

Āṅuttaranikāyaṭṭhakathāya

Ekakanipātassa Atthavaṇṇanābhūtā

Bhadantasāriputtattherena katā

Sāratthamañjūsā nāma

Āṅuttaraṭṭikā

(Paṭhamo bhāgo)



Romanized from Myanmar version published in 1961

© Buddhasāsana Society

Ṭikā Series 18

First published in 2008 by Ministry of Religious Affairs

Yangon, Myanmar

THE PĀLI ALPHABET IN BURMESE AND ROMAN CHARACTERS

VOWELS

အ a အာ ā ဣ i ဤ ī ဥ u ဦ ū ဧ e ဩ o

CONSONANTS WITH VOWEL "A"

က ka ခ kha ဂ ga ဃ gha င ṇa
 ဇ ca ဆ cha ဇ ja ဈ jha ဠ ña
 ဋ ta ဌ tha ဒ da ဝ dha ဏ ṇa
 တ ta ထ tha ဒ da ဓ dha န na
 ပ pa ဖ pha ဗ ba ဘ bha မ ma
 ယ ya ရ ra လ la ဝ va သ sa ဟ ha ဠ la ၊ ṁ

VOWELS IN COMBINATION

ာ = ā ဲ = i ဳ = ī ဴ = u ဵ = ū ံ = e ့ = o
 က ka ကာ kā ကိ ki ကိ kī ကု ku ကု kū ကေ ke ကေ ko
 ခ kha ခါ khā ခိ khi ခိ khī ခု khu ခု khū ခေ khe ခေါ kho ...

CONJUNCT-CONSONANTS

ကက kka	ယ ယ် ṅgha	က န ṇtha	ဈ dhya	လ pla	လ lla
ကက kka	ဇ cca	က န ṇda	ဇ dhva	ဗ pba	လှ lya
ကျ kya	ဆ ccha	က န ṇa	န nta	ဘ bbha	လှ lha
ကြ kri	ဇ jja	က န ṇha	န ntva	ဈ bya	ဝှ vha
ကက kla	ဇ jja	က တ tta	န ntha	ဇ bra	ဆ sta
ကက kva	ည ṇña	က တ ttha	န nda	ဗ mpa	ဆ strā
ဈ khya	ပ ṇha	က တ tva	န ndra	ဗ mpha	သ္မ sna
ဇ khva	ပ ṇca	ကျ တ tya	န ndha	ဗ mba	သှ sya
ဇ gga	ဆ ṇcha	ကြ တ tra	န nna	ဗ mbha	သ ssa
လှ ggha	ည ṇja	ဒ dda	ဈ nya	ဗ mma	သ္မ sma
ဈ gya	ည ṇjha	ဒ ddha	န nha	ဈ mya	သ္မ sva
ဂ gra	ဇ ṭta	ဈ dya	ဗ ppa	ဗ mha	ကှ hma
က ṅka	ဇ ṭtha	ဒ dra	ဗ ppha	လှ yya	ကှ hva
န ṅkha	ည ḍda	ဒ dva	ဈ pya	လှ yha	ဇ ḷha
န ṅga					

၁ ၂ ၃ ၄ ၅ ၆ ၇ ၈ ၉ ၁၀
 1 2 3 4 5 6 7 8 9 0

Nidānakathā

Sirimatā amhākaṃ Buddhena Bhagavatā Arahatā Sammāsambuddhena sakalalokapattthaṭamahākaruṇāsinehasiniddhahadayena sabbattha appaṭihatasabbaññutānāvaraṇādiñṇāṇobhāsasamujjalitena sanarāmaralokagurunā sadevakassa lokassa atthāya hitāya sukhāya dhammo ca vinayo ca desito paññatto, so pariyattipaṭipattipaṭivedhavasena vibhattesu tīsu saddhammesu pariyattisaddhammo nāma, tadeva ca sāsanaṭṭhitiyā pamāṇaṃ, satiyeva hi tasmim itare uppajjanti, nāsati, vuttañhetam **Āṅguttaraṭṭhakathāyaṃ**— (Am-Ṭṭha 1. 72 piṭṭhe)

“Suttantesu asantesu, pamuṭṭhe vinayamhi ca.
Tamo bhavissati loko, sūriye atthaṅgate yathā.

Suttante rakkhite sante, paṭipatti hoti rakkhitā.
Paṭipattiyam ṭhito dhīro, yogakkhemā na dhamasati”ti.

Teneva ca saddhammaciraṭṭhitikāmino theravarā Mahākassapādayo pariyattisaddhammasaṅkhātā Tepiṭakaṃ Buddhavacanaṃ saṅgītimāropetvā Buddhasāsanam samrakkhimsu, taṃkālikā ca rājāno saddhammābhivuddhikāmā tesam saṅgītikārānamanubalappadānena sahāyattamupāgamuṃ.

Tathā hi catūhādhikatimāsaparinibbute Bhagavati Mahākassapattherappamukhehi pañcahi arahantasatehi Rājagahe **paṭhamā dhammasaṅgīti** katā rañño Māgadhasa Ajātasattuno visesānuggahamādāya.

Vassasataparinibbute ca Bhagavati Mahāyasattherappamukhehi sattahi arahantasatehi Vesāliyam **duṭṭiyā dhammasaṅgīti** katā, tadā ca Kālāsoko mahīpati tesam sahāyattamupāgato.

Tathāgataparinibbānato pana dvinnam vassasatānamupari pañcattimsatime vasse Mahāmoggaliputtatissattherappamukhehi arahantasahashehi Pāṭaliputte **tatiyā dhammasaṅgīti** katā sakalalokapattthaṭayasassa Dhammāsokassa bhūpatino niratisayānuggaham laddhāna.

Sammāsambuddhapariniibbutito pana catunnaṃ vassasatānamupari paṇṇāse vasse Laṅkādiṇe Vaṭṭagāmaṇirājino kāle Mātulajanapade Ālokalēṇe **catutthī dhammasaṅgīti** katā pañcahi arahantasatehi Mahādhammarakkhitattherappamukhehi, yā loke “pothakāropanasaṅgīti”ti pākaṭā.

Buddhavasṣe pana catussatādhikadvisahassānamupari pannarasamasāṅkhyāṃ sampatte imasmimpi Marammaraṭṭhe **Mindonnā**massa mahādhammarājino kāle Mandalay itipākaṭe Ratanāpuñjanagare **pañcamī dhammasaṅgīti** katā catussatādhikadvisahassattherehi Dakkhiṇārāmaṇvāsītipīṭakadharabhadantaajāgarattherappamukhehi tasṣeva rañño anavaṣeṇaṇuggaḥamaḍāya, yā loke “selakkharāropanasaṅgīti”ti vuccati.

Itthaṃ sudāṃ Buddhassa Bhagavato sāsanaṃ iddhañceva hoti phītaṇca vitthārikaṃ bāhujaññaṃ puthubhūtaṃ yāvajjatanā.

Cirakālato panetaṃ Buddhavacanāṃ lekhaṇaparamparāya ceva muddaṇaparamparāya ca anekakkhattuṃ parivattiyābhataṃ na sakkā dāni vattuṃ “paṭhamadutiyatatiyādisaṅgītimāropitākāreṇeva sabbaso parisuddhaṃ”ti, aññadatthu paṇādhunikapotthakesu saṃvijjamāṇehi kehici paṇādalekhādisaṅgītakhalitādhikaparibhaṭṭhapāṭhehi malīnamevetāṃ, tathā hi nāṇadesiyapotthakesu aññamaññaṃ saṃsandiyaṃāṇesu anekā visadisapāṭhā dissanti.

Tatoyeva ca Buddhavacanassa suparisuddhabhāvakāmīno mahātherā sasatthantarapīṭakattayakovidā dhammavinayaṃ vācentāyeva te khalitādhikaparibhaṭṭhapāṭhe disvā evaṃ samacintesuṃ kathesuṃ ca—

“Advayaṇvādīno suparisuddhavacanassa tassa Bhagavato pāvacanāṃ advayaṃ suparisuddhaṃ nimmalamevassa, imesu pana pāvacanapotthakesu aññamaññaṃ visadisā ceva aparisuddhā ca pāṭhā dissanti, nissāṃsayāṃ kho ayameva mūlapāṭho, yo nesāṃ yuttisampanno, tadañño pana paṇādalekhaṇapāṭhoyeva, tādisā ca dissanti ādhunikapāvacanapotthakesu kismiñci kismiñci ṭhāne.

Kāmañcetedāni na tāva bahutarā, yāva yathābhūtaṃ Pāḷiyā atthaṃ paṭisedheyyuṃ, etarahi pana asodhiyaṃāṇā te gacchante gacchante

kāle bahutarā bahutarā jāyeyyūṃ, taṃkālikā ca pacchimā janā te sodhetuṃ asamatthā yathādhippetāṃ Pāḷiyā atthaṃ na sammā jāneyyūṃ, evamete saddhammassa sammosāya antaradhānāya saṃvatteyyūṃ.

Vuttaṃ hetuṃ **Āṅguttaranikāye**— (Am 1. 60 piṭṭhe)

‘Dveme bhikkhave dhammā saddhammassa sammosāya antaradhānāya saṃvattanti, katame dve, dunnikkhittaṃ ca padabyañjanaṃ attho ca dunnīto, dunnikkhittassa bhikkhave padabyañjanassa atthopi dunnayo hoti, ime kho bhikkhave dve dhammā saddhammassa sammosāya antaradhānāya saṃvattanti’ti.

Yaṃnūna mayāṃ te sodhetvā nimmalaṃ parisuddhaṃ Buddhavacanaṃ sampatiṭṭhāpeyyāma, tadassa saddhammaciraṭṭhitiyā bahujanahitāya bahujanasukhāya ca, taṃ pana na sukaraṃ sampādetuṃ aññatra dhammikaṛājūnāmanuggahenā”ti.

Sā paṇāyaṃ kathā patthaṭṭā sādhujanaparamparāya, sutā ca **U Nu** nāmadheyyaggamahāmacappamukhehi Marammaratṭhissarehi, sutvāna te evaṃ samacintesuṃ sammantayimsu ca “na kho panetaṃ amhākaṃ patirūpaṃ, ye mayāṃ pubbakehi dhammikehi dhammarājūhi samanuggahitassa Buddhasāsanassa parihānikāraṇaṃ passamānāyeva ajjhupekkhitvā appossukkā vihareyyāma, yaṃnūna mayāṃ sāsānopakārupāye sampādetvā visesato ca ādhunikapāvācanapotthakesu dissamāne saṃsayaṭṭhāniye pamādalekhapāṭhe saṃsodhetukāmānaṃ mahātherānaṃ ajjhāsayaṃ paripūretvā Buddhasāsanaṃ anuggaṇheyyāma”ti, atha te sabbe pi sāsānānuggahāya katasanniṭṭhānā ahesuṃ.

Anuggahitukāmehipi ca tehi na sakkā āṇāya kātuṃ vinā mahājanacchandasañjātōpadesena, mahājanappatinidhibhūtā hi etarahi Marammikā rājāno, upadeso ca santhāgārasamitiyaṃ mahājanappatinidhibhūtānaṃ matisajīvānaṃ chandeneva samuppajjati, tasmā Buddhasāsanānuggahāya santhāgārasamitiyaṃ ekaṃ dhammupadesaṃ paññāpetvā **Buddhasāsanasamiti** nāma mahāsamiti samuṭṭhāpitā. Tassā kho pana samitiyā sabhāpati hoti *Thadosirīsudhammopādhidhārī* **Sīr U Thwin**haya mahāseṭṭhi, upasabhāpati pana *Thadosirīsudhammopādhidhārī*eva **U Thein Maung**haya padhānaḍḍavinicchayamandiramhi mahākkhadassādhipati, sabbakammavidhāyako pana

hitadharo *Thadomahāsa*resīthūpādhiko **U Chan Htun**vhayo
upadesikādhīpatipadhānanītivēdimahāmantī. Bhaṇḍuppadako pana
raṭṭhissarānaṃ patinidhibhūto **U Win** nāmadheyyo
sāsanaṭṭhānikamahāmatto.

Atha te Buddhasāsanasamitikā “yāyeva kho panatthāya
samuṭṭhāpitāyaṃ samiti, tadatthamidāni visesato kāhāmā”ti
Marammaraṭṭhebhīpākaṭaḡaḡasamudayasamudite tattha tattha
padhānanāyakabhūte paropaṇṇāsamahāthere dīghadassino nimantiya
evamārocesuṃ “ayaṃ bhante amhākaṃ Buddhasāsanamahāsamiti
Buddhasāsanānuggahatthāyeva raṭṭhissarānaṃ dhammupadesena
samuṭṭhāpitā, sacedāni bhante pubbe viya dhammasaṅgītiṃ katvā sāsanaṃ
paggaṇhituṃ yujjeyya, mahātherā ca tathā kātumiccheyyuṃ, vissatthāva
bhante karontu, mayaṃ tattha kāyañāṇapaccayabalehi niravasesaṃ byāvaṭā
bhavissāmā”ti.

Atha kho te mahātherā “dhammasaṅgītiṃ karissāmā”ti katasanniṭṭhānā
evaṃ pativedesuṃ “kattabbāyevesā dhammasaṅgīti, nesā na kattabbā, tasmā
mayaṃ dāni piṭakapotthakāni pañcamasaṅgītisilālekhāya samānetvā
tāniyeva sarīraṃ katvā Pāḷisaṃsodhanapubbaṅgamaṃ dhammasaṅgītiṃ
kassāma, yāya ādhunikapotthakesu paramparāparivattanavasena saṅjātā
pamādalekhaṇā ca nirākariyissanti, visodhitaṇca suparisuddhaṃ
pāvacaṇamūlaṃ labhivā taṃ muddāpetvā sakalaloke nānāraṭṭhesu
nānādesesu byāpanavasena Buddhasāsanassa ciraṭṭhiti ca sādhiyissati, sabbe
ca Theravādikā raṭṭhā Marammaraṭṭhasahitā ekato hutvā Buddhasāsanāṃ
abhūtapubbapaggahena paggaṇhituṃ labhissanti, sā ca purimikā pañca
saṅgītiyo upanidhāya **chaṭṭhasaṅgīti** nāma bhavissati, taṇca sabbaṃ
bhavissati bahujaṇahitāya bahujaṇasukhāya atthāya hitāya sukhāya
devamanussānaṃ, bahūni panettha āvassakakiccāni paṭikacceva
samādapetabbāni tumhākamāyattāni, tasmā saṅgītikālavavattānādikiccam
tumhākaṃyeva bhāro hotū”ti.

Atha te Buddhasāsanasamitikā sāsanaṇālakānaṃ mahātherānaṃ
chandaṇca ruciṇca samādāya ovādaṇca sirasā sampaṭicchitvā therānaṃ ceva
attano ca kattabbakiccānaṃ pariniṭṭhānasamayaṃ sallakkhetvā “ayaṃ
chaṭṭhasaṅgīti Sammāsambuddhapaṇinibbānato catussatādhikānaṃ dvinnaṃ
vassasahassānamupari

aṭṭhanavutime vasse vesākhapunṇamito paṭṭhāya ārabhitabbā, dve ca vassāni kattabbā, pañcannaṃ ca sāsanaṃ vassasahassānam upaḍḍhavasve vesākhapunṇamiyaṃ yeva pariniṭṭhāpetabbā”ti saṅgītikālaṃ vavatthapesuṃ.

Tato paṭṭhāya ca te punappunaṃ sannipatitvā sammantayitvā saṅgītiyā pubbakiccesu nirantaraṃ byāvaṭṭaṃ honti, “mahantaṃ kho Jinasāsanaṃ mahatiyāyevetaṃ pūjāya pūjanīyaṃ”ti mantvā tehi kārapitāni mahantamahantāni sāsanaṃ mandirāni, tattha saṅgītiṃ kurumānassa bhikkhusaṅghassa sukhassannisaṃjattamaṃ sannipātapaṭṭhānabhūtaṃ mahantaṃ saṅgītiṃ mandiraṃ Yangon nāma rājadhāniyaṃ **Sirīmaṅgalatthale Kaba Aye** (Lokasāma) nāmakassa cetiyassa āsanne selapabbataguhāvesena kārapitaṃ tibhūmakam pāyaso silā-iṭṭhakāyomayaṃ, evaṃ mahantampetaṃ ekasamvachhareneva pariniṭṭhāpitaṃ iddhiyā maññe nimmitaṃ, taṃca bahi ṭhatvā apekkhattaṃ sayamaṃ jātase lapabbato viya dissati, anto pavisitvā olokayataṃ pana olokitolokitaṭṭhānato dassanīyaṃ pāsādikaṃ ramaṇīyaṃ atittikameva hutvā devavimānamiva khāyati. Tassa panāvidūre aḍḍhateyyānaṃ saṅgītikārabhikkhusahassānaṃ nivāsappahonakā cattāro iṭṭhakamayā mahāpāsādā ceva iṭṭhakamayāyeva bhojanamahāsālā ca mahāsīmāpāsādādayo ca muddaṇayantasālā ca tattheva kārapitā.

Mahātherāpi ca “saṅgītikiccaṃ nāma therādheyyaṃ, therānaṃ ovādeneva kattabbaṃ, na vinā tena, tasmā bhikkhusaṅghassa ceva upāsakānaṃca sabbampi saṅgītipaṭibaddhamovādaṃ dātum bhavitabbamettha ovādadāyakaṃ saṅghasabhāyapī”ti Marammaraṭṭhadhajūpame aggamahāpaṇḍitopādhidhārino ca raṭṭhovādācariyasammate ca raṭṭhavinayadharasammate ca aññe cābhipākaṭaḡarubhāvaṇīyādiguṇaḡaḡasamaḡinoti parosataṃ nāyakamahāthere uccinitvā “chaṭṭhasaṅgīti-ovādācariyasamghanāyakaṃ sabhaṃ” nāmekam padhānamahāsaṅghasabhaṃ patiṭṭhāpesuṃ, te ca nāyakamahātherā Sambuddhavadanaratanākarapāraḡe vividhasatthantaragahanāsaṅgacārīne therānuthere pañcavīsatiṃ matte samuccinitvā “chaṭṭhasaṅgītidhurandharasabhā”ti ca sammannitvā tassā sabhāya bhāraṃ niyyātesuṃ sabbāni saṅgītipaṭibaddhakiccāni samvidahitum. Te ca saṅgītidhurandharasabhikā therā sakalamarammaraṭṭhe **Nyaung Yan Sayadaw**ti abhipākaṭaṃ “Aggamahāpaṇḍito” pādhiṇā ceva “Abhidhajamahāraṭṭhagurū” pādhiṇā cāti

dvīhi Marammaraṭṭhissarasamappitopādhīhi virājitam jātiyā āsītivassikam upasampadāya saṭṭhivassam “Bhadantarevataṃ” nāma mahātheravaram sabhāpatiṃ katvā Tepiṭake Buddhavacane ceva nānāsatthesu ca kovide dhammācariyakavipadappatte bhikkhū uccinitvā aṭṭhadasādivaggavasena parosataṃ Pāḷivisodhakavagge ceva sambahule ca paṭivisodhakavagge bandhāpetvā visodhanappaṭivisodhanehi Buddhavacanam suparisuddhattam paṭipāpetvā dhammasaṅgītimakamsu yathā taṃ porāṇakasaṅgītikārā.

Evam saṅgītimāropitassa Tepiṭakassa Buddhavacanassa atthasaṃvaṇṇanābhūtā Aṭṭhakathāyo ca saṃvijjanti manoramāya tantinayānucchavikāya bhāsāya Ācariyabuddhaghosādīhi theravarehi katā.

Tāsampi Aṭṭhakathānam sadesīyamūlehi ceva videsīyamūlehi ca saṃsanditvā Tepiṭakassa viya Buddhavacanassa visodhanapaṭivisodhanavasena mahātherā pāvacanadassino saṃvaṇṇanākovidā pāṭhasodhanamakamsu.

Icevamatṭhakathāyo ca pamādakhalitādhika paribhaṭṭhapāṭhānam nirākaraṇavasena visodhitā ceva paṭivisodhitā ca hutvā Buddhasāsanamuddaṇayantālaye samappitā suṭṭhu muddāpaṇāya.

Muddāpaṇakāle ca Piṭakattayamuddāpaṇe viya mahātheravarā mūlasodheyyapattapāṭhakehi gahaṭṭhapaṇḍitehi ceva dhammācariyabhikkhupaṇḍitehi ca anekavāram parisodhitam osānasodheyyapattam paṭivisodhitamūlapotthakena ceva aññehi sadesa desantarika Aṭṭhakathāpotthakehi ca vividhabyākaraṇādisatthehi ca punappunam saṃsandetvā suvisada paribyattakaṇḍavāra vākyaccheda saṅketatañca sampāpetvā mahatā parissamena osānasodhanamakamsu.

Evametāsampi ca suvisodhitānam Aṭṭhakathānam saṅgītibhāranitthārakā mahātherā nikhilamarammaraṭṭhe **Maso Yein Sayadawti** abhipākaṭam “Aggamahāpaṇḍito” pādhinā ceva “Abhidhajamahāraṭṭhagurū” pādhinā cāti dvīhi Marammaraṭṭhissarasamappitopādhīhi virājitam jātiyā chasattativassikam upasampadāya chappaññāsavassam “Bhadantasūriyābhivaṃsam” nāma mahātheravaram sabhāpatiṃ katvā chaṭṭhasaṅgītikārapariyāpannehi therānutherehi

saṅgama paṭhanatthāya samārabhiṃsu yathā taṃ
chaṭṭhasaṅgītidhammasaṅgāyanākāle.

Evametāsaṃ Aṭṭhakathānaṃ saṃsodhana-muddāpaṇa-sampaṭhanesu
karīyamānesu raṭṭhissaragaṇe aggamahāmacco **U Nu** nāmadheyyo
mahāsayo ceva Buddhasāsanasamitiyaṃ sampati bhaṇḍuppadako
raṭṭhissarānaṃ patinidhibhūto **U Basaw** nāmadheyyo
sāsanatṭhānikamahāmatto cāti-imepi taṃkiccasampādanāya Pāḷisaṅgītikāle
viya mahussāhena byāvaṭā honti.

Icevametāpi Aṭṭhakathāyo theravādīnekāyikavibudhappamukhānaṃ
satthāgamaratanālayasāragāhīnaṃ veyyākaraṇakesarīnaṃ
accantanimmalañāṇavārīnā paridhovitā saṅgama ca paṭhitā, tā
vibudhappavarekagocarā vimuttirasassādādāyiniyo Piṭakattayassatthaṃ
paribhayaṃ pakāsentīyo ciraṃ vilasantiyo lokatthasiddhiṃ sādhayantūti.

Tenetaṃ vuccati—

1. Mūlakam pariyattīva, sāsanaṃ Mahesino.
Pariyattippamāṇā hi, ciraṃ saddhammasaṇṭhiti.
2. Tasmā taṃ rakkhituṃ therā, dhammasaṅgāhakā purā.
Rājāno upanissāya, akaṃsu dhammasaṅgahe.
3. **Paṭhamam** dhammasaṅgītiṃ, **Ajātasatturājino**.
Anuggahena katvāna, pālayuṃ Jinasāsanam.
4. **Dutiyam** tu tathā katvā, **Kālāsokassa** rājino.
Kāle tamupanissāya, pālayuṃ Jinasāsanam.
5. **Tatiyam** pica katvāna, **Dhammāsokassa** rājino.
Anuggahena Buddhassa, sāsanaṃ abhipālayuṃ.
6. **Catutthim** pana Laṅkāyaṃ, **Vatṭagāmaṇirājino**.
Kālamhi potthakārulhaṃ, katvāna pālayuṃ tathā.
7. Imasmiṃ Marammaratṭhepi, **Mindonnāma** narādhipam.
Rajjam samanussantaṃ, ratanattayamāmakaṃ.

8. Sannissāya mahātherā, thirasilā guṇākārā.
Pañcamim dhammasaṅgītiṃ, karontā sāsanaṭṭhitim.
9. Patthayantā likhāpetvā, silāpaṭṭesu peṭakam.
Vāyāmena mahantena, pālayum Jinasāsanam.
10. Ittham purā mahātherā, rājāno cāpi dhammikā.
Sāsanam paripālesum, jīvitam viya attano.
11. Tathāpi khalitādāni, dissanti Piṭakattaye.
Paramparāya lekhāya, sañjātā muddaṇena ca.
12. Disvāna te mahātherā, vācentāva Tipetakam.
Vuccamānanayenevam, cintesum mantayimsu ca.
13. “Katvāna sādhuḥkam gantha-suddhikam sāsanaṇyukam.
Yamṇūna dhammasaṅgītiṃ, kareyyāma mayam” iti.
14. Etamattham suṇitvāna, **U Nu** nāma mahāsayo.
Marammavisaye **agga-mahāmacca**dhurandharo.
15. “Sāsanaṇyattakiccāni, sampādentā visesato.
Saṅgītiyaṇca therānam, sampūrentā manoratham.
16. Yathā rakkhimsu porāṇā, surājāno tathā mayam.
Samrakkheyyāma sambuddha-sāsanam” iti cintiya.
17. Mahāmaccehi aññehi, saṅgamehi ca mantiya.
Suppatiṭṭhāpayitvāna, **Buddhasāsanasaṅgama**m.
18. Mahātherānamādāya, chandam idha nivāsinam.
Aññesu Sīhaḷādīsu, videsesu ca vāsinam.
19. Kāretvā dhammasaṅgītiṃ, sodhetvā Satthusāsanam.
Saddhammānuggahattāya, karam daḷhaparakkamam.
20. **Sirīmaṅgala**vikhyāte, thalasmim pavare subhe.
Cetiyaṣṣavidūramhi, **Kaba Aye** itisaññino.
21. Guhāvesena kāretvā, mahāsaṅgītimandiram.
Āvāsādiṇca bhikkhūnam, kāresi muddaṇālayam.

22. Ganthasaṃsodhanam dhamma-saṅgītiyā tu paṇḍitā.
Mahātheravarākamsu, satimantā punappunam.
23. Muddāpente ca passitvā, mahātherehi pañcahi.
Sodheyyapattamosānam, nimmalattam supāpitam.
24. Katvā suvisadam Buddha-bhāsitam Piṭakattayam.
Yathā muddāpitam āsi, sāsanaṭṭham Mahesino.
25. Tathā Aṭṭhakathāyo ca, saṃsodhetvā punappunam.
Suṭṭhu muddāpitā honti, sabbalokatthasiddhiyāti.

Aṅguttaraṭṭikā

Paṭhamabhāga

Mātikā		Piṭṭhaṅka
Ganthārambhakathā	...	1
Ganthārambhakathāvaṇṇanā	...	3
1. Rūpādivaggavaṇṇanā	...	22
Nettinayavaṇṇanā	...	52
2. Nīvaraṇappahānavaggavaṇṇanā	...	72
3. Akammaniyavaggavaṇṇanā	...	88
4. Adantavaggavaṇṇanā	...	90
5. Paṇihita-acchavaggavaṇṇanā	...	90
6. Accharāsaṅghātavaggavaṇṇanā	...	100
7. Vīriyārambhādivaggavaṇṇanā	...	112
8. Kalyāṇamittādivaggavaṇṇanā	...	116
10. Dutiyapamādādivaggavaṇṇanā	...	117
13. Ekapuggalavaggavaṇṇanā	...	120

14. Etadaggavagga

1. Paṭhamavagga

Etadaggapadavaṇṇanā	...	142
Aññāsikoṇḍaññattheravatthu	...	148
Sāriputta-moggallānattheravatthu	...	149
Mahākassapattheravatthu	...	150
Anuruddhattheravatthu	...	155
Bhaddiyattheravatthu	...	156

Mātikā		Piṭṭhaṅka	
Lakuṇḍakabhaddiyattheravatthu	...	...	156
Piṇḍolabhāradvājattheravatthu	...	...	156
Mantāṇīputta-puṇṇattheravatthu	...	...	157
Mahākaccānattheravatthu	...	...	158

2. Dutiyavagga

Cūḷapanthakattheravatthu	...	...	159
Subhūtittheravatthu	...	...	162
Khadiravaniyarevatattheravatthu	...	...	162
Kaṅkhārevatattheravatthu	...	...	163
Soṇakoḷivisattheravatthu	...	...	163
Soṇakuṭikaṇṇattheravatthu	...	...	164
Sīvalittheravatthu	...	...	167
Vakkalittheravatthu	...	...	168

3. Tatiyavagga

Rāhula-raṭṭhapālāttheravatthu	...	...	169
Kuṇḍadhānattheravatthu	...	...	175
Vaṅḡsattheravatthu	...	...	176
Upasenavaṅgantaputtattheravatthu	...	...	177
Dabbattheravatthu	...	...	177
Pilindavacchattheravatthu	...	...	179
Bāhiyadārucīriyattheravatthu	...	...	180
Kumārakassapattheravatthu	...	...	182
Mahākoṭṭhikattheravatthu	...	...	182

4. Catutthavagga

Ānandattheravatthu	...	...	183
Uruvelakassapattheravatthu	...	...	183

Mātikā		Piṭṭhaṅka	
Kāḷudāyittheravattu	...	...	184
Bākulattheravattu	...	...	184
Sobhitattheravattu	...	...	185
Upālitttheravattu	...	...	185
Nandakattheravattu	...	...	186
Nandattheravattu	...	...	186
Mahākappinattheravattu	...	...	188
Sāgatattheravattu	...	...	189
Rādhattheravattu	...	...	189
Mogharājattheravattu	...	...	190

5. Pañcamavagga

Mahāpajāpatigotamītherīvatthu	...	...	192
Khemātherīvatthu	...	...	193
Uppalavaṇṇātherīvatthu	...	...	194
Paṭācārātherīvatthu	...	...	194
Dhammadinnātherīvatthu	...	...	194
Nandātherīvatthu	...	...	197
Soṇātherīvatthu	...	...	197
Bakulātherīvatthu	...	...	198
Kuṇḍalakesātherīvatthu	...	...	198
Bhaddākāpilānītherī-bhaddākaccānātherīvatthu	...	...	199
Kisāgotamītherīvatthu	...	...	199
Siṅgālamātātherīvatthu	...	...	199

6. Chatṭhavagga

Tapussa-bhallikavatthu	...	...	200
Anāthapiṇḍikaseṭṭhiwatthu	...	...	200
Cittagahapativatthu	...	...	200

Mātikā		Piṭṭhaṅka	
Hatthaka-āḷavakavatthu	...	...	203
Mahānāmasakkavatthu	...	...	206
Uggagahapatyādivatthu	...	...	207
Nakulapitugahapativatthu	...	...	207

7. Sattamavagga

Sujātāvatthu	...	...	207
Visākhāvatthu	...	...	207
Khujjuttarā-sāmāvatīvattu	...	...	208
Uttarānandamātāvatthu	...	...	208
Suppavāsāvatthu	...	...	209
Suppiyāvatthu	...	...	209
Kāṭiyānīvattu	...	...	210
Nakulamātāvatthu	...	...	210
Kālīkuraragharikāvatthu	...	...	210

15. Aṭṭhānapāli

1. Paṭhamavaggavaṇṇanā	...	...	211
2. Dutiyavaggavaṇṇanā	...	...	219

16. Ekadhammapāli

1. Paṭhamavaggavaṇṇanā	...	...	222
2. Dutiyavaggavaṇṇanā	...	...	224
3. Tatiyavaggavaṇṇanā	...	...	227
4. Catutthavaggavaṇṇanā	...	...	231

17. Pasādakaradhammavaggavaṇṇanā	...	232
----------------------------------	-----	-----

18. Aparā-accharāsaṅghātavaggavaṇṇanā	...	233
---------------------------------------	-----	-----

19. Kāyagatāsativaggavaṇṇanā	...	275
------------------------------	-----	-----

20. Amatavaggavaṇṇanā	...	287
-----------------------	-----	-----

Aṅguttaraṭṭikāya paṭhamabhāge mātikā niṭṭhitā.

Suttantapiṭaka

Ekakanipāta

Anguttaraṭīkā

Namo tassa Bhagavato Arahato Sammāsambuddhassa.

Ganthārambhakathā

Anantañāṇaṃ karuṇāniketaṃ,
Namāmi **nāthaṃ** jitapañcamāraṃ.
Dhammaṃ visuddhaṃ bhavanāsahetuṃ,
Samghaṇca seṭṭhaṃ hatasabbapāpaṃ.
Kassapaṃ taṃ mahātheraṃ, samghassa pariṇāyakaṃ.
Dīpasmim̐ tambapaṇṇimhi, sāsana-dayakāraṃ¹.
Paṭipattiparādhīnaṃ, sadāraṇīyanivāsinaṃ.
Pākaṭaṃ gagane canda-maṇḍalaṃ viya sāsane.
Samghassa pitaraṃ vande, vinaye suvisāraṃ.
Yaṃ nissāya vasantohaṃ, vuḍḍhippattosmi sāsane.
Anutheraṃ mahāpaṇṇaṃ², **sumedhaṃ** sutivissutaṃ.
Avikhaṇḍitasīlādi-parisuddhaguṇodayaṃ.
Bahussutaṃ satimantaṃ, dantaṃ santaṃ samāhitaṃ.
Namāmi sirasā dhīraṃ, garuṃ me gaṇavācakaṃ.

1. Sāsana-dayakāraṇaṃ (Sī)

2. Mahāpuṇṇaṃ (Ka)

Āgatāgamatakkesu, saddasatthanayaññusu.

Yassantevāsibhikkhūsu, sāsanaṃ suppatiṭṭhitaṃ.

Yo sīhaḷindo dhitimā yasassī,

Uḷārapañño nipuṇo kalāsu¹.

Jāto visuddhe ravisomavaṃse².

Mahabbalo abbhutavuttitejo.

Jitvārivaggaṃ atiduppasayhaṃ,

Anaññasādhāraṇavikkamena.

Pattābhiseko jinadhammasevī,

Abhippasanno ratanattayamhi.

Ciraṃ vibhinne jinasāsanasmim,

Paccatthike suṭṭhu viniggahetvā.

Sudhaṃva sāmaggirasaṃ pasatthaṃ,

Pāyesi bhikkhū parisuddhasīle.

Katvā vihāre vipule ca ramme,

Tatrappitenekasahassasaṅkhe.

Bhikkhū asese catupaccayehi,

Santappayanto suciraṃ akhaṇḍaṃ.

Saddhammavuddhiṃ abhikaṅkhamāno,

Sayampi bhikkhū anusāsayitvā.

Niyojayaṃ ganthavipassanāsu,

Akāsi vuddhiṃ jinasāsanassa.

Tenāhamaccantamanuggahīto,

Anaññasādhāraṇasaṅghena.

Yasmā parakkantabhujavhayena³,

Ajjhesito bhikkhugaṇassa majjhe.

1. Kulesu (Ka)

2. Ravisūnuvaṃse (Sī)

3. Parakkantibhujavhayena (Sī)

Tasmā anuttānapadānamatthaṃ,
 Setṭhāya aṅguttaravaṇṇanāya.
 Sandassayissaṃ sakalaṃ suboddhum,
 Nissāya pubbācariyappabhāvaṃ.

Ganthārambhakathāvaṇṇanā

1. Saṃvaṇṇanārambhe ratanattayaṃ namassitukāmo tassa
 viṣiṭṭhaguṇayogasandassanattam **“karuṇāsītalahaḍayan”**ti-ādimāha.
 Viṣiṭṭhaguṇayogena hi vandanārahabhāvo, vandanārahe ca katā vandanā
 yathādhīppetamatthaṃ sādheti. Ettha ca saṃvaṇṇanārambhe
 ratanattayappaṇāmakaraṇappayojanaṃ tattha tattha bahudhā papañcenti
 ācariyā, mayāṃ pana idhādhīppetameva payojanaṃ dassayissāma, tasmā
 saṃvaṇṇanārambhe ratanattayappaṇāmakaraṇaṃ
 yathāpaṭiññātasamvaṇṇanāya anantarāyena parisamāpanatthanti veditabbaṃ.
 Idameva hi payojanaṃ ācariyena idhādhīppetam. Tathā hi vakkhati—

“Iti me pasannamatino, ratanattayavandanāmayāṃ puññaṃ.
 Yaṃ suvihatanarāyo, hutvā tassānubhāvenā”ti.

Ratanattayappaṇāmakaraṇena cettha yathāpaṭiññātasamvaṇṇanāya
 anantarāyena parisamāpanaṃ ratanattayapūjāya paññāpāṭavato, tāya
 paññāpāṭavañca rāgādimalavidhamanato. Vuttaṃ hetam—

“Yasmiṃ mahānāma samaye ariyasāvako tathāgataṃ anussarati,
 nevassa tasmiṃ samaye rāgapariyuṭṭhitaṃ cittaṃ hoti, na
 dosapariyuṭṭhitaṃ cittaṃ hoti, na mohapariyuṭṭhitaṃ cittaṃ hoti,
 ujugatamevassa tasmiṃ samaye cittaṃ hoti”ti-ādi¹.

Tasmā ratanattayapūjanena vikkhālitamalāya paññāya pāṭavasiddhi.

Atha vā ratanattayapūjanassa paññāpadaṭṭhānasamādhīhetuttā
 paññāpāṭavaṃ. Vuttaṃ hi tassa samādhīhetuttaṃ—

1. Am 2. 252; Am 3. 531 piṭṭhesu.

“Ujugatacitto kho pana mahānāma ariyasāvako labhati atthavedaṃ, labhati dhammavedaṃ, labhati dhammūpasamhitaṃ pāmojjaṃ, pamuditassa pīti jāyati, pītimanassa kāyo passambhati, passaddhakāyo sukhaṃ vediyati, sukhino cittaṃ samādhiyati”¹.

Samādhissa ca paññāya padaṭṭhānabhāvo vuttoyeva “samāhito yathābhūtaṃ pajānāti”². Tato evaṃ paṭubhūtāya paññāya paṭiññāmahattakataṃ khedamabhibhuyya anantarāyena samvaṇṇanaṃ samāpayissati.

Atha vā ratanattayapūjāya āyuvaṇṇasukhabalavaḍḍhanato anantarāyena parisamāpanaṃ veditabbaṃ. Ratanattayappaṇāmena hi āyuvaṇṇasukhabalāni vaḍḍhanti. Vuttaṃ hetam—

“Abhivādanasīlissa, niccaṃ vuḍḍhāpacāyino.

Cattāro dhammā vaḍḍhanti, āyu vaṇṇo sukhaṃ balan”³.

Tato āyuvaṇṇasukhabalavuddhiyā hoteva kāriyaniṭṭhānaṃ.

Atha vā ratanattayagāravassa paṭibhānāparihānāvahattā⁴.

Aparihānāvahaṃ hi tīsupi ratanesu gāravaṃ. Vuttaṃ hetam—

“Sattime bhikkhave aparihānīyā dhammā. Katame satta?

Satthugāravatā dhammagāravatā saṃghagāravatā sikkhāgāravatā samādhigāravatā sovacassatā kalyāṇamittatā”⁵.

Hoteva ca tato paṭibhānāparihānena yathāpaṭiññātaparisamāpanaṃ.

Atha vā pasādavatthūsu pūjāya puññātisayabhāvato. Vuttaṃ hi tassā puññātisayattaṃ—

“Pūjārahe pūjayato, buddhe yadi va sāvake.

Papañcasamatikkante, tiṇṇasokapariddave.

1. Am 3. 531 piṭṭhe. 2. Sam 2. 12, 302; Sam 3. 363 piṭṭhesu. 3. Khu 1. 29 piṭṭhe.

4. Paṭibhānāparihānāvahattaṃ (Sī)

5. Am 2. 420 piṭṭhe.

Te tādise pūjayato, nibbute akutobhaye.
Na sakkā puññaṃ saṅkhātum, imettamapi kenacī”ti¹.

Puññātisayo ca yathādhippeta-parisamāpanūpāyo. Yathāha—

“Esa devamanussānaṃ, sabbakāmadado nidhi.
Yaṃ yadevābhipatthenti, sabbametena labbhati”ti².

Upāyesu ca paṭipannassa hoteva kāriyaniṭṭhānaṃ. Ratanattayapūjā hi nīratisayapuññakkhetasambuddhiyā aparimeyyappabhāvo puññātisayoti bahuvīdhanatāyepi lokasannivāse antarāyanibandhanasakalasamkilesaviddhamsanāya pahoti, bhayādi-upaddavañca nivāreti. Tasmā vuttaṃ “saṃvaṇṇanārambhe ratanattayappaṇāmakaraṇaṃ yathāpaṭiññātasamvaṇṇanāya anantarāyena parisamāpanatthan”ti.

Evañca sappayojanaṃ ratanattayavandanaṃ kattukāmo paṭhamam tāva bhagavato vandanaṃ kātum tammūlakattā sesaratanānaṃ
“**karuṇāsītalahadayaṃ -pa- gativimuttan**”ti āha. Tattha yassā desanāya saṃvaṇṇanaṃ kattukāmo, sā na vinayadesanā viya karuṇāpadhānā, nāpi abhidhammadesanā viya paññāpadhānā, atha kho karuṇāpaññāpadhānāti tadubhayappadhānameva tāva sammāsambuddhassa thomaṇaṃ kātum
“**karuṇāsītalahadayaṃ, paññāpajjotavihatamohataman**”ti vuttaṃ. Tattha kiratīti karuṇā, paradukkhaṃ vikkhipati apanetīti attho. Atha vā kiṇṭatīti karuṇā, paradukkhe sati kāruṇikaṃ himsati vibādhatīti attho. Paradukkhe sati sādhuṇaṃ kampanaṃ hadayakhedaṃ karotīti vā karuṇā. Atha vā kamitīti sukhaṃ, taṃ rundhatīti karuṇā. Esā hi paradukkhāpanayanakāmatālakkaṇā attasukhanirapekkhatāya kāruṇikānaṃ sukhaṃ rundhati vibandhatīti attho. Karuṇāya sītalaṃ karuṇāsītalaṃ, karuṇāsītalaṃ hadayaṃ assāti karuṇāsītalahadayaṃ, taṃ **karuṇāsītalahadayaṃ**.

Tattha kiñcāpi paresaṃ hitopasaṃhārasukhādi-aparihānicchanasabhāvatāya, byāpādāratīnaṃ ujuvipaccanīkatāya ca sattasantānagatasantāpavicchedanākārappavattiyā mettāmuditānampi cittasītalahāvākāraṇatā upalabbhati, tathāpi dukkhāpanayanākārappavattiyā parūpatāpāsahanarasā

1. Khu 1. 42; Khu 3. 147 piṭṭhesu.

2. Khu 1. 10 piṭṭhe.

avihiṃsabhūtā karuṇā visesena bhagavato cittassa cittappassaddhi viya sītibhāvanimittanti vuttam **“karuṇāsītalahadayan”**ti. Karuṇāmukhena vā mettāmuditānampi hadayasītalabhāvakāraṇatā vuttāti daṭṭhabbam. Atha vā asādhāraṇaññānavisesanibandhanabhūtā¹ sātisayam niravasesaṇca Sabbaññutaññānam viya savisayabyāpitāya mahākaruṇābhāvam upagatā karuṇāva bhagavato atisayena hadayasītalabhāvahetūti āha **“karuṇāsītalahadayan”**ti. Atha vā satipi mettāmuditānam sātisaye hadayasītibhāvanibandhanatte sakalabuddhaguṇavisesakāraṇatāya tāsampi kāraṇanti karuṇāva bhagavato “hadayasītalabhāvakāraṇan”ti vuttā. Karuṇānidānā hi sabbepi buddhaguṇā. Karuṇānubhāvanibbāpiyamānasamśārdukkhasantāpassa hi bhagavato paraduḥkhāpanayanakāmatāya anekānipi asaṅkhyeyyāni kappānam akilantarūpasseva niravasesabuddhakaradhammasambharaṇaniratassa samadhigatadhammādhipeyyassa ca sannihitesupi sattasaṅkhārasamupanītahadayūpatāpanimittesu na īsakampi cittasītibhāvassa aññathattamahosīti. Etasmiṃ ca atthavikappe tīsupi avatthāsu bhagavato karuṇā saṅgahitāti daṭṭhabbam.

Pajānātīti paññā, yathāsabhāvam pakārehi paṭivijjhatīti attho. Paññāva ñeyyāvaraṇappahānato pakārehi dhammasabhāvāvajotanaṭṭhena pajjototi paññāpajjoto. Savāsanappahānato visesena hatam samugghātitaṃ vihatam. Paññāpajjotena vihatam paññāpajjotavihatam, muyhanti tena, sayam vā muyhati, mohanamattameva vā tanti moho, avijjā. Sveva visayasabhāvappaṭicchādanato andhakārasarikkhatāya tamo viyāti mohatamo, paññāpajjotavihato mohatamo etassāti paññāpajjotavihatamohatamo, tam **paññāpajjotavihatamohataman**. Sabbesampi hi khīṇāsavānam satipi paññāpajjotena avijjandhakārassa vihatabhāve saddhādhimuttehi viya diṭṭhippattānam sāvakehi paccekasambuddhehi ca savāsanappahānena sammāsambuddhānam kilesappahānassa viseso vijjatīti sātisayena avijjāpahānena bhagavantam thomento āha **“paññāpajjotavihatamohataman”**ti.

1. ...nibandhanabhūtā (Sī)

Atha vā antarena paropadesaṃ attano santāne accantaṃ
 avijjandhakāravigamassa nibbattitattā, tattha ca sabbaññutāya balesu ca
 vasībhāvassa samadhigatattā, parasantatiyañca
 dhammadesanātisayānubhāvena sammadeva tassa pavattitattā bhagavāva
 visesato mohatamavigamena thometabboti āha
“paññāpajjotavihatamohataman”ti. Imasmim ca atthavikappe
 “paññāpajjoto”ti padena bhagavato paṭivedhapaññā viya desanāpaññāpi
 sāmāññaniddesena, ekasesanayena vā saṅgahitāti daṭṭhabbāṃ.

Atha vā bhagavato ñāṇassa ñeyyapariyantikattā
 sakalañeyyadhammasabhāvāvabodhanasamattthena anāvaraṇaṇāṇasaṅkhātena
 paññāpajjotena sabbañeyyadhammasabhāvacchādakassa mohandhakārassa
 vidhamitattā anaññasādhāraṇo bhagavato mohatamavināsoti katvā vuttaṃ
“paññāpajjotavihatamohataman”ti. Ettha ca mohatamavidhamanante
 adhigatattā anāvaraṇaṇāṇaṃ kāraṇopacārena
 sasantānamohatamavidhamanaṃ daṭṭhabbāṃ. Abhinīhārasampattiyā
 savāsanappahānameva hi kilesānaṃ ñeyyāvaraṇappahānanti, parasantāne
 pana mohatamavidhamanassa kāraṇabhāvato anāvaraṇaṇāṇaṃ
 “mohatamavidhamanan”ti vuccatīti.

Kim pana kāraṇaṃ avijjāsamugghātōyeveko pahānasampattivāsena
 bhagavato thomanānimittaṃ gayhati, na pana
 sātisayaniravasesakilesappahānanti? Tappahānavacaneneva tadekaṭṭhatāya
 sakalasaṃkilesagaṇasamugghātassa vuttattā. Na hi so tādiso kilesa atthi, yo
 niravasesa-avijjāpahānena na pahīyatīti.

Atha vā vijjā viya sakalakusaladhammasamuppattiyā,
 niravasesākusaladhammanibbattiyā saṃsārappavattiyā ca avijjā
 padhānakāraṇanti tabbighātavacanena sakalasaṃkilesagaṇasamugghāto vutto
 eva hotīti vuttaṃ **“paññāpajjotavihatamohataman”**ti.

Narā ca amarā ca narāmarā, saha narāmarehīti sanarāmaro, sanarāmaro
 ca so loko cāti sanarāmaraloko, tassa garūti sanarāmaralokagaru, taṃ
sanarāmaralokagaruṃ. Etena devamanussānaṃ viya tadavasiṭṭhasattānampi
 yathārahaṃ guṇavisesāvahatāya bhagavato

upakāratam dasseti. Na cettha padhānappadhānabhāvo codetabbo. Añño hi saddakkamo, añño atthakkamo. Īdisesu hi samāsapadesu padhānampi appadhānam viya niddisīyati yathā “sarājikāya parisāyā”¹. Kāmañcettha sattasaṅkhārabhājanavasena tividho loko, garubhāvassa pana adhippetattā garukaraṇasamatthasseva yujjanato sattalokassa vasena attho gahetabbo. So hi lokīyanti ettha puññapāpāni tabbipāko cāti “loko”²ti vuccati. Amaraggahaṇena cettha upapattidevā adhippetā.

Atha vā samūhattho lokasaddo samudāyavasena lokīyati paññāpiyatīti². Saha narehīti sanarā, sanarā ca te amarā cāti sanarāmarā, tesam lokoti sanarāmaralokoti purimanayeneva yojetabban. Amarasaddena cettha visuddhidevāpi saṅgayhanti. Tepi hi maraṇābhāvato paramatthato amarā. Narāmarānamyeva ca gahaṇam ukkaṭṭhaniddesavasena yathā “satthā devamanussānan”³. Tathā hi sabbānatthapariharaṇapubbaṅgamāya niravasesahitasukhavidhānatapparāya niratisayāya payogasampattiya sadevamanussāya pajāya accantūpakāritāya aparimitanirupamappabhāvaguṇavisesasamaṅgitāya ca sabbasattuttamo bhagavā aparimāṇasu lokadhātūsu aparimāṇānam sattānam uttamagāraṇaṭṭhānam. Tena vuttam **“sanarāmaralokagarun”**ti.

Sobhanam gataṁ gamanam etassāti sugato. Bhagavato hi vencyyajanūpasaṅkamanam ekantena tesam hitasukhanipphādanato sobhanam, tathā lakkhaṇānubyañjanappaṭimaṇḍitarūpakāyatāya duta⁴vilambitakhalitānukaḍḍhananippīlanukkuṭikakuṭīlakuṭīlatādidosa rahitamavahasitarājahamsavabhavāraṇamigarājagamanam kāyagamanam ñāṇagamanañca vipulanimmalakaruṇāsativīriyādiguṇavisesasahitamabhinīhārato yāva mahābodhi anavajjatāya sobhanamevāti. Atha vā sayambhuññaṇena sakalampi lokam pariññābhisamayavasena pariṇānanto ñāṇena sammā gato avagatoti sugato, tathā lokasamudayam pahānābhisamayavasena pajahanto anuppattidhammatam āpādentoti sammā gato atītoti sugato, lokanīrodham nibbānam sacchikiriyābhisamayavasena sammā gato

1. Vi 4. 347 piṭṭhe. 2. Paññāpiyatīti vuttattā (Sī) 3. Dī 1. 46 piṭṭhe. 4. Dhuta (Sī)

adhigatoti sugato, lokanirodhagāminipaṭipadaṃ bhāvanābhisamayavasena sammā gato paṭipannoti sugato. “Sotāpattimaggena ye kilesā pahīnā, te kilese na puneti na pacceti na paccāgacchatīti sugato”¹ti-ādinā¹ nayena ayamattho vibhāvetabbo. Atha vā sundaraṃ ṭhānaṃ sammāsambodhiṃ, nibbānameva vā gato adhigatoti sugato, yasmā vā bhūtaṃ tacchaṃ atthasaṃhitaṃ veneyyānaṃ yathārahaṃ kālayuttameva ca dhammaṃ bhāsatī, tasmā sammā gadatīti sugato da-kārassa ta-kāraṃ katvā. Iti sobhanagamanatādīhi sugato, taṃ **sugataṃ**.

Puññapāpakammehi upapajjanavasena gantabbato gatiyo, upapattibhavavisesā. Tā pana nirayādivasena pañcavidhā. Tāhi sakalassapi bhavagāmikammassa ariyamaggādhigamena avipākārahabhāvakaraṇena nivattitattā bhagavā pañcahi paṭiṇi sūṭṭhu mutto viṣaṇyuttoti āha “**gativimuttaṃ**”²ti. Etena bhagavato katthacipi gatiyā aparīyāpannataṃ dasseti, yato bhagavā “devātidevo”²ti vuccati. Tenevāha—

“Yena devūpapatyassa, gandhabbo vā vihaṅgamo.

Yakkhattaṃ yena gaccheyyaṃ, manussattaṃca abbaje.

Te mayhaṃ āsavā khīṇā, viddhastā vinaṭṭikā”²ti².

Taṃtaṃgatisaṃvattanikānaṃ hi kammakilesānaṃ aggamaggena bodhimūleyeva suppahīnattā natthi bhagavato gatipariyāpannatāti accantameva bhagavā sabbabhavayonigativinīṇāṇaṭṭhitisattāvāsasattanikāyehi superimutto, taṃ **gativimuttaṃ**. **Vandeti** namāmi, thomeṃti vā attho.

Atha vā **gativimuttanti** anupādisesanibbānadhātuppattiyā bhagavantam thometi. Ettha hi dvīhi ākārehi bhagavato thomaṇā veditabbā attahitasampattito parahitappaṭipattito ca. Tesu attahitasampatti anāvaraṇaṇādhigamato savāsanānaṃ sabbesaṃ kilesānaṃ accantappahānato anupādisesanibbānappattito ca veditabbā, parahitappaṭipatti lābhasakkārādinirapekkhacittassa sabbadukkhaniyyānika dhammadesanato viruddhesupi niccaṃ hitajjhāsayato nāṇaparipākakālāgamanato ca. Sā panettha āsayato payogato ca duvidhā parahitappaṭipatti tividdhā ca

1. Khu 8. 83 piṭṭhe.

2. Am 1. 348 piṭṭhe.

attahitasampatti pakāsītā hoti. Kathaṃ? “Karūṇāsītalahadayan”ti etena āsayato parahitappaṭipatti, sammāgadanatthena sugatasaddena payogato parahitappaṭipatti, “paññāpajjotavihatamohatamaṃ gativimuttan”ti etehi catusaccasampaṭivedhanatthena ca sugatasaddena tividhāpi attahitasampatti, avasiṭṭhena “paññāpajjotavihatamohataman”ti etena cāpi attahitasampatti parahitappaṭipatti pakāsītā hotīti.

Atha vā tihi ākārehi bhagavato thomanā veditabbā hetuto phalato upakārato ca. Tattha **hetu** mahākaruṇā, sā paṭhamapadena dassitā. **Phalaṃ** catubbidham ṇāṇasampadā pahānasampadā ānubhāvasampadā rūpakāyasampadā cāti. Tāsu ṇāṇappahānasampadā dutiyapadena saccappaṭivedhanatthena ca sugatasaddena pakāsītā honti, ānubhāvasampadā tatiyapadena, rūpakāyasampadā yathāvuttakāyagamanasobhanatthena sugatasaddena lakkhaṇānubyañjanapāripūriyā vinā tadabhāvato. **Upakāro** anantaram abāhiraṃ karitvā tividhayānamukhena vimuttidhammadesanā. So sammāgadanatthena sugatasaddena pakāsito hotīti veditabbaṃ.

Tattha “karuṇāsītalahadayan”ti etena sammāsambodhiyā mūlaṃ dasseti. Mahākaruṇāsaṅcoditamānaso hi bhagavā saṃsārapaṅkato sattānaṃ samuddharaṇatthaṃ katābhinihāro anupubbena pāramiyo pūretvā anuttaraṃ sammāsambodhiṃ adhigatoti karuṇā sammāsambodhiyā mūlaṃ. “Paññāpajjotavihatamohataman”ti etena sammāsambodhiṃ dasseti. Anāvaraṇañāṇapadaṭṭhānaṃ hi maggañāṇaṃ, maggañāṇapadaṭṭhānaṃ anāvaraṇañāṇaṃ “sammāsambodhi”ti vuccatīti. Sammāgamanatthena sugatasaddena sammāsambodhiyā paṭipattiṃ dasseti līnuddhaccapaṭiṭṭhānāyūhanakāmasukhallikattakilamathānuyoga sassatucchedābhinivesādi-antadvayarahitāya karuṇāpaññāpariggahitāya majjhimāya paṭipattiyā pakāsanato sugatasaddassa. Itarehi sammāsambodhiyā padhānappadhānabhedam payojanam dasseti. Saṃsāramahoghato sattasantāraṇam hettha padhānam payojanam, tadanñamappadhānam. Tesu padhānena parahitappaṭipattiṃ dasseti, itarena attahitasampattiṃ. Tadubhayena

attahitāya paṭipannādīsu catūsu puggalesu bhagavato
catutthapuggalabhāvaṃ dasseti. Tena ca anuttaradakkhiṇeyyabhāvaṃ
uttamavandaneyyabhāvaṃ attano ca vandanakiriyāya khettaṅgatabhāvaṃ
dasseti.

Ettha ca karuṇāgahaṇena lokiyesu
mahaggatabhāvappattāsādhāraṇaguṇadīpanato bhagavato
sabbalokiyaguṇasampatti dassitā hoti, paññāgahaṇena
Sabbaññutaññānapadaṭṭhānamaggaññānadīpanato sabbalokuttaraguṇasampatti.
Tadubhayaggahaṇasiddho hi attho “sanarāmaralokagarun”ti-ādina
papañcīyatīti. Karuṇāgahaṇena ca upagamanam nirupakkilesam dasseti,
paññāgahaṇena apagamanam. Tathā karuṇāgahaṇena lokasamaññānurūpam
bhagavato pavattim dasseti lokavohāraṇasayattā karuṇāya, paññāgahaṇena
samaññāya anatidhāvanam. Sabhāvānavabodhena hi dhammānam samaññam
atidhāvitvā sattādīparāmasanam hotīti. Tathā karuṇāgahaṇena
mahākaruṇāsamāpattivihāram dasseti, paññāgahaṇena tisu kālesu
appaṭihataññam catusaccaññam catupaṭṭisambhidāññam
catuvesārājjaññam. Karuṇāgahaṇena mahākaruṇāsamāpattiñāssa gahitattā
sesāsādhāraṇāññāni, cha abhiññā, aṭṭhasu parisāsu akampanāññāni, dasa
balāni, cuddasa buddhaññāni, soḷasa ñāṇacariyā, aṭṭhārasa buddhadhammā,
catucattālīsa ñāṇavattūni, sattasattati ñāṇavattūnīti evamādīnam anekesam
paññāpabhedānam vasena ñāṇacāram dasseti. Tathā karuṇāgahaṇena
caraṇasampattim, paññāgahaṇena vijjāsampattim. Karuṇāgahaṇena
attādhipatitā, paññāgahaṇena dhammādhipatitā. Karuṇāgahaṇena
lokanāthabhāvo, paññāgahaṇena attanāthabhāvo. Tathā karuṇāgahaṇena
pubbakāribhāvo, paññāgahaṇena kataññutā. Tathā karuṇāgahaṇena
aparantapatā, paññāgahaṇena anattantapatā. Karuṇāgahaṇena vā
buddhakaradhammasiddhi, paññāgahaṇena buddhabhāvasiddhi. Tathā
karuṇāgahaṇena paresam tāraṇam, paññāgahaṇena sayamāraṇam. Tathā
karuṇāgahaṇena sabbasattesu anuggahacittatā, paññāgahaṇena
sabbadhammesu virattacittatā dassitā hoti.

Sabbesaṇca buddhaguṇānam karuṇā ādi tannidānabhāvato, paññā
pariyosānam tato uttarikaraṇīyābhāvato. Iti

ādipariyosānadassanena sabbe buddhaguṇā dassitā honti. Tathā karuṇāgahaṇena sīlakkhandhapubbaṅgamo samādhikkhandho dassito hoti. Karuṇānidānaṃ hi sīlaṃ tato pāṇātipātādiviratippavattito, sā ca jhānattayasampayoginīti. Paññāvacanena paññākkhandho. Sīlaṅca sabbesaṃ buddhaguṇānaṃ ādi, samādhi majjhe, paññā pariyosānanti evampi ādimajjhapariyosānakalyāṇā sabbe buddhaguṇā dassitā honti nayato dassitattā. Eso eva hi niravasesato buddhaguṇānaṃ dassanūpāyo, yadidaṃ nayaggahaṇaṃ, aññathā ko nāma samattho bhagavato guṇe anupadaṃ niravasesato dassetuṃ. Tenevāha—

“Buddhopi buddhassa bhaṇeyya vaṇṇaṃ,
Kappampi ce aññaṃabhāsamaṇo.
Khīyetha kappo ciradīghamantare,
Vaṇṇo na khīyetha tathāgatassā”ti¹.

Teneva ca āyasmatā sārīputtattherenapi buddhaguṇaparicchedanaṃ pati anuyuttēna “no hetuṃ bhante”ti paṭikkhipitvā “apica me bhante dhammanvayo vidito”ti vuttaṃ.

2. Evaṃ saṅkhepena sakalasabbaññuguṇehi bhagavantaṃ abhiththavitvā idāni saddhammaṃ thometuṃ “**buddhopi**”ti-ādimāha. Tattha **buddhoti** kattuniddeso. **Buddhabhāvanti** kammaniddeso. **Bhāvetvā sacchikatvāti** ca pubbakālakiriyāniddeso. **Yanti** aniyamato kammaniddeso. **Upagatoti** aparakālakiriyāniddeso. **Vandeti** kiriyāniddeso. **Tanti** niyamaṇaṃ. **Dhammanti** vandanakiriyāya kammaniddeso. **Gatamalaṃ anuttaranti** ca tabbisesanaṃ.

Tattha buddhasaddassa tāva “bujjhita saccānīti buddho, bodhetā pajāyāti buddho”ti-ādinā² niddesanayena attho veditabbo. Atha vā savāsanāya aññāṇaniddāya accantaviḡamato, buddhiyā vā vikaṣitabhāvato buddhavāti **buddho** jāgaraṇavikaṣanattavasena. Atha vā kassacipi ñeyyadhammassa anavabuddhassa abhāvena ñeyyavisesassa kammabhāvena aggahaṇato kammavacanicchāya abhāvena

1. Dī-Ṭṭha 1. 257; Dī-Ṭṭha 3. 61; Ma-Ṭṭha 3. 289; Udāna-Ṭṭha 305;

Buddhavaṃsa-Ṭṭha 163; Apadāna-Ṭṭha 2. 91 piṭṭhesu.

2. Khu 7. 363; Khu 8. 197 piṭṭhesu.

avagamanatthavaseneva kattuniddeso labbhatīti buddhavāti buddho yathā “dikkhito na dadātī”ti. Atthato pana pāramitāparibhāvito¹ sayambhuññaṇena saha vāsanāya vihataviddhamṣitaniravasesakilesa mahākaruṇāsabbaññūtaññādi-aparimeyyaguṇagaṇadhāro khandhasantāno buddho. Yathāha—

“Buddhoti yo so bhagavā sayambhū anācariyako pubbe ananussutesu dhammesu sāmāṃ saccāni abhisambujjhi, tattha ca sabbaññūtaṃ patto balesu ca vasībhāvan”ti².

Api-saddo sambhāvane. Tena “evaṃ guṇavisesayutto sopi nāma bhagavā”ti vakkhamānaguṇadhamme sambhāvanaṃ dīpeti. **Buddhabhāvanti** sammāsambodhiṃ. **Bhāvetvā**ti uppādetvā vaḍḍhetvā ca. **Sacchikatvā**ti paccakkhaṃ katvā. **Upagatoti** patto, adhigatoti attho. Etassa buddhabhāvanti etena sambandho. **Gatamalanti** vigatamalaṃ, niddosanti attho. **Vandeti** paṇamāmi, thomemi vā. **Anuttaranti** uttararahitaṃ, lokuttaranti attho. **Dhammanti** yathānusiṭṭhaṃ paṭipajjamāne apāyato ca saṃsārato ca apatamāne katvā dhāretīti dhammo. Ayaṃ hettha saṅkhepattho—evaṃ vividhaguṇagaṇasamannāgato buddhopi bhagavā yaṃ ariyamaggasaṅkhātāṃ dhammaṃ bhāvetvā, phalanibbānaṃ pana sacchikatvā anuttaraṃ sammāsambodhiṃ adhigato, tamevaṃ buddhānampi buddhabhāvahetubhūtaṃ sabbadosamalarahitaṃ attano uttaritarābhāvena anuttaraṃ paṭivedhasaddhammaṃ namāmīti. Pariyattisaddhammassapi tappakāsanattā idha saṅgaho daṭṭhabbo.

Atha vā “abhidhammanayasamuddaṃ adhigañchi, tīṇi piṭakāni sammasī”ti ca aṭṭhakathāyaṃ³ vuttattā pariyattidhammassapi sacchikiriyaśammasanapariyāyo labbhatīti sopi idha vutto evāti daṭṭhabbaṃ. Tathā “yaṃ dhammaṃ bhāvetvā sacchikatvā”ti ca vuttattā buddhakaradhammabhūtāhi pāramitāhi saha pubbabhāge adhisīlasikkhādayopi idha dhammasaddena saṅgahitāti veditabbā. Tāpi hi vigatappaṭipakkhatāya gatamalā, anaññasādhāraṇatāya anuttarā cāti. Tathā hi sattānaṃ sakalavaṭṭadukkhānissaraṇāya katamahābhinihāro

1. Pāramitāparibhāvitena (Sī)

2. Khu 7. 363; Khu 8. 197; Khu 9. 172 piṭṭhesu.

3. Apadāna-Ṭṭha 1. 231 piṭṭhe.

mahākaruṇādhivāsanapesalajjhāsayo paññāvisesapariyodātanimmālānaṃ
 dānadamasaññaṃādīnaṃ uttamadhammānaṃ satasahassādhikāni kappānaṃ
 cattāri asaṅkhyeyyāni sakkaccaṃ nirantaraṃ niravasesānaṃ
 bhāvanāpaccakkhakarāṇehi kammādīsu adhigatavasībhāvo
 acchariyācinteyyamahānubhāvo adhisīla-adhicittānaṃ
 paramukkaṃsapāramippatto bhagavā paccayākāre
 catuvīsatikotīsasahasamukhena mahāvajiraññaṃ pesetvā anuttaraṃ
 sammāsambodhiṃ abhisambuddhoti.

Ettha ca “bhāvetvā”ti etena vijjāsampadāya dhammaṃ thometi,
 “sacchikatvā”ti etena vimuttisampadāya. Tathā paṭhamena jhānasampadāya,
 dutiyena vimokkhasampadāya. Paṭhamena vā samādhisampadāya, dutiyena
 samāpattisampadāya. Atha vā paṭhamena khayañāṇabhāvena, dutiyena
 anuppādañāṇabhāvena. Paṭhamena vā vijjūpamatāya, dutiyena
 vajirūpamatāya. Purimena vā virāgasampattiya, dutiyena nirodhasampattiya.
 Tathā paṭhamena niyyāṇabhāvena, dutiyena nissaraṇabhāvena. Paṭhamena
 vā hetubhāvena, dutiyena asaṅkhatabhāvena. Paṭhamena vā dassanabhāvena,
 dutiyena vivekabhāvena. Paṭhamena vā adhipatibhāvena, dutiyena
 amatabhāvena dhammaṃ thometi. Atha vā “yaṃ dhammaṃ bhāvetvā
 buddhabhāvaṃ upagato”ti etena svākkhātātāya dhammaṃ thometi,
 “sacchikatvā”ti etena sandiṭṭhikatāya. Tathā purimena akālikatāya,
 pacchimena ehipassikatāya. Purimena vā opaneyyikatāya, pacchimena
 paccattaṃveditabbatāya dhammaṃ thometi. “Gatamalan”ti iminā
 saṅkilesābhāvadīpanena dhammassa parisuddhataṃ dasseti, “anuttaran”ti
 etena aññaṃsaṃ viṣiṭṭhassa abhāvadīpanena vipulaparipuṇṇataṃ. Paṭhamena
 vā pahānasampadaṃ dhammassa dasseti, dutiyena pabhavasampadaṃ.
 Bhāvetabbatāya vā dhammassa gatamalabhāvo yojetabbo. Bhāvanāguṇena hi
 so dosānaṃ samugghātako hotīti. Sacchikātabbabhāvena anuttarabhāvo
 yojetabbo. Sacchikiriyānibbattito hi taduttarikaṇṭhābhāvato
 anaññasādharaṇatāya anuttaroti. Tathā “bhāvetvā”ti etena saha
 pubbabhāgasīlādīhi sekkhā sīlasamādhipaññākkhandhā dassitā honti.
 “Sacchikatvā”ti etena saha asaṅkhatāya dhātuyā asekkhā
 sīlasamādhipaññākkhandhā dassitā hontīti.

3. Evaṃ saṅkhepeneva sabbadhammaguṇehi saddhammaṃ abhitthavitvā idāni ariyaśaṅghaṃ thometum **“Sugatassā”**ti-ādimāha. Tattha **sugatassā**ti sambandhaniddeso. “Tassa puttānaṃ”ti etena sambandho. **Orasānanti** puttavisesanaṃ. **Mārasenamathanānanti** orasaputtabhāve kāraṇaniddeso tena kilesappahānameva bhāgavato orasaputtabhāve kāraṇaṃ anujānātīti dasseti. **Aṭṭhannanti** gaṇanaparicchedaniddeso. Tena ca satipi tesam sattivisesabhāvena anekasatasahassabhāve imaṃ gaṇanaparicchedaṃ nātivattantīti dasseti maggaṭṭhaphalaṭṭhabhāvānativattanato. **Samūhanti** samudāyaniddeso. **Ariyaśaṅghanti** guṇavisiṭṭhasaṃhatabhāvaniddeso¹. Tena asatipi ariyapuggalānaṃ kāyasāmaggiyaṃ ariyaśaṅghabhāvaṃ dasseti diṭṭhisīlasāmaññena saṃhatabhāvato.

Tattha urasi bhavā jātā saṃvaddhā ca orasā. Yathā hi sattānaṃ orasaputtā attajātāya pitu santakassa dāyajjassa visesena bhāgino honti, evametepi ariyapuggalā sammāsambuddhassa savanante ariyāya jātiyā jātātāya bhagavato santakassa vimuttisukhassa ariyadhammaratanassa ekantena bhāginoti orasā viya orasā. Atha vā bhagavato dhammadesanānubhāvena ariyabhūmiṃ okkamamānā okkantā ca ariyasāvakā bhagavato ure vāyāmajanitābhijātītāya nippariyāyena orasaputtāti vattabbaṃ arahanti. Sāvakehi pavattiyamānāpi hi dhammadesanā “bhagavato dhammadesanā” icceva vuccati taṃmūlakattā lakkhaṇādivisesābhāvato ca.

Yadipi ariyasāvakānaṃ ariyamaggādhigamasamaye bhagavato viya tadantarāyakaṇaṭṭhaṃ devaputtamāro, māravāhinī vā na ekantena apasādeti, tehi pana apasādetabbaṭāya kāraṇe vimathite tepi vimathitā eva nāma hontīti āha “mārasenamathanānaṃ”ti. Imasmiṃ panatthe “māramārasenamathanānaṃ”ti vattabbe “mārasenamathanānaṃ”ti ekadesasarūpekaseso katoti daṭṭhabbaṃ. Atha vā khandhābhisaṅkhāramāraṇaṃ viya devaputtamārassapi guṇamāraṇe sahāyabhāvūpagamanato kilesabalakāyo “senā”ti vuccati. Yathāha “kāmaṃ te paṭhamā

1. Guṇavisiṭṭhasaṃghātabhāvaniddeso (Ka)

senā”ti-ādi¹. Sā ca tehi diyaḍḍhasahassabhedā, anantabhedā vā kilesavāhinī satidhammavicayavīriyasamathādiguṇappaharaṇehi odhiso vimathitā vihatā viddhastā cāti **mārasenamathanā**, ariyasāvakā. Etena tesam bhagavato anujātaputtatam dasseti.

Ārakattā kilesehi, anaye na iriyanato, aye ca iriyanato ariyā niruttinayena. Atha vā sadevakena lokena saraṇanti araṇiyato upagantabbato, upagatānañca tadatthasiddhito ariyā, ariyānam saṃghoti ariyasamgho, ariyo ca so samgho cāti vā ariyasamgho, tam **ariyasamghan**. Bhagavato aparabhāge buddhadhammaratanānampi samadhighamo saṃgharatanādhīnoti assa ariyasamghassa bahūpakārataṃ dassetuṃ idheva “**sirasā vande**”ti vuttanti daṭṭhabbam.

Ettha ca “Sugatassa orasānam puttānan”ti etena ariyasamghassa pabhavasampadam dasseti, “mārasenamathanānan”ti etena pahānasampadam sakalasamkilesappahānadīpanato. “Aṭṭhannampi samūhan”ti etena nānasampadam maggaṭṭhaphalaṭṭhabhāvadīpanato. “Ariyasamghan”ti etena pabhavasampadam dasseti sabbasamghānam aggabhāvadīpanato. Atha vā “Sugatassa orasānam puttānan”ti ariyasamghassa visuddhanissayabhāvadīpanam, “mārasenamathanānan”ti sammā-
ujuṇāyasāmīcipaṭipannabhāvadīpanam, “aṭṭhannampi samūhan”ti āhuneyyādibhāvadīpanam, “ariyasamghan”ti anuttarapuññakkhettabhāvadīpanam. Tathā “Sugatassa orasānam puttānan”ti etena ariyasamghassa lokuttarasaraṇagamanasabbhāvaṃ dīpeti. Lokuttarasaraṇagamanena hi te bhagavato orasaputtā jātā. “Mārasenamathanānan”ti etena abhinīhārasampadāsiddham pubbabhāge sammāpaṭipattiṃ dasseti. Katābhinīhārā hi sammāpaṭipannā mārāṃ māraparisāṃ vā abhivijjanti. “Aṭṭhannampi samūhan”ti etena viddhastavipakkhe sekkhāsekkhadhamme dasseti puggalādhiṭṭhānena maggaphaladhammānam pakāsītattā. “Ariyasamghan”ti aggadakkhiṇeyyabhāvaṃ dasseti. Saraṇagamanañca sāvakanāṃ sabbaguṇānam ādi, sapubbabhāgaṭṭhapaṭipadā sekkhā sīlakkhandhādayo majjhe, asekkhā sīlakkhandhādayo pariyosānanti ādimajjhapariyosānakalyāṇā saṅkhepato sabbe ariyasamghaguṇā pakāsītā honti.

1. Khu 1. 342; Khu 7. 73, 135, 259 piṭṭhesu.

4. Evaṃ gāthāttayena saṅkhepato sakalaguṇasaṃkittanamukhena ratanattayassa paṇāmaṃ katvā idāni taṃnipaccakāraṃ yathādhippete payojane pariṇāmento **“iti me”**ti-ādimāha. Tattha ratijanaṇaṭṭhena **ratanam**, buddhadhammasaṃghā. Tesam hi **“itipi so bhagavā”**ti-ādinā yathābhūtaguṇe āvajjentassa amatādhigamahetubhūtaṃ anappakaṃ pītipāmojjaṃ uppajjati. Yathāha—

“Yasmiṃ mahānāma samaye ariyasāvako tathāgataṃ anussarati, nevassa tasmiṃ samaye rāgapariyuṭṭhitaṃ cittaṃ hoti, na dosa -pa- na mohapariyuṭṭhitaṃ cittaṃ hoti, ujugatamevassa tasmiṃ samaye cittaṃ hoti tathāgataṃ ārabha. Ujugatacitto kho pana mahānāma ariyasāvako labhati atthavedaṃ, labhati dhammavedaṃ, labhati dhammūpasamhitaṃ pāmojjaṃ, pamuditassa pīti jāyati”ti-ādi¹.

Cittikatādibhāvo vā ratanaṭṭho. Vuttaṃ hetam—

“Cittikataṃ mahagghaṇca, atulaṃ dullabhadassanaṃ.
Anomasattaparibhogaṃ, ratanaṃ tena vuccatī”ti².

Cittikatabhāvādayo ca anaññasādhāraṇā buddhādīsu eva labbhantīti.

Vandanāva **vandanāmayaṃ** yathā **“dānamayaṃ sīlamayaṃ”**ti³. Vandanā cettha kāyavācācittēhi tiṇṇaṃ ratanānaṃ guṇaninnatā, thomaṇā vā. Pujjabhavaphalanibbattanato⁴ **puññaṃ**, attano santānaṃ punātīti vā. **Suvihatantarāyoti** suṭṭhu vihatantarāyo. Etena attano pasādasampattiyā, ratanattayassa ca khettabhāvasampattiyā taṃ puññaṃ atthappakāsanassa upaghātaka-upaddavānaṃ vihanane samatthanti dasseti. **Hutvāti** pubbakālakiriyā. Tassa **“atthaṃ pakāsayissāmī”**ti etena sambandho. **Tassāti** yaṃ ratanattayavandanāmayaṃ puññaṃ, tassa. **Ānubhāvenāti** balena.

1. Am 2. 252; Am 3. 531 piṭṭhesu.

2. Dī-Ṭṭha 2. 35; Saṃ-Ṭṭha 3. 190; Khuddakapāṭha-Ṭṭha 143; Suttanipāta-Ṭṭha 1. 172 piṭṭhesu.

3. Dī 3. 182; Khu 1. 230 piṭṭhesu.

4. Pāmujjapujjabhāvaphalanibbattanato (Sī)

5. Evaṃ ratanattayassa nipaccakārakaraṇe payojanaṃ dassetvā idāni yassā dhammadesanāya atthaṃ saṃvaṇṇetukāmo, tassā tāva guṇātitthavanavasena upaṇṇāpanatthaṃ “**ekakadukādipaṭimaṇḍitassā**”ti-ādimāha, ekakādīni aṅgāni uparūpari vaḍḍhetvā desitehi suttantehi paṭimaṇḍitassa viṣiṭṭhassāti attho. Etena “aṅguttaro”ti ayaṃ imassa āgamaṃ atthānugatā samaññāti dasseti. Nanu ca ekakādivasena desitāni suttāniyeva āgamo, kassa pana ekakadukādīhi paṭimaṇḍitabhāvoti? Saccametaṃ paramatthato, suttāni pana upādāya paññatto āgamo. Yatheva hi atthabyañjanasamudāye suttanti vohāro, evaṃ suttasamudāye āgamoti vohāro. Ekakādīhi aṅgehi uparū pari uttaro adhikoti aṅguttaro, āgamissanti ettha, etena, etasmā vā attatthaparattādayoti āgamo, ādikalyāṇādiguṇasampattiyaṃ uttamaṭṭhena taṃtaṃ abhipatthitasamiddhihetutāya paṇḍitehi varitabbato varo, āgamo ca so varo ca seṭṭhaṭṭhenāti āgamavaro, āgamasammatehi vā varoti āgamavaro. Aṅguttaro ca so āgamavaro cāti **aṅguttarāgamavaro**, tassa.

Puṅgavā vuccanti usabhā, asantasanaparissayasahanassa paripālanādiguṇehi taṃsadiṣatāya dhammakathikā eva puṅgavāti **dhammakathikapuṅgavā**, tesam.
Hetūpamādippaṭimaṇḍitanānāvidhadesanānāyavicittatāya **vicittapaṭibhānajananaṃ**. **Sumaṅgalavilāsini**-ādīsu¹ pana “buddhānubuddhasaṃvaṇṇitassā”ti vuttaṃ. Buddhānaṃ hi saccappaṭivedhaṃ anugamma paṭividdhasaccā aggasāvakādayo ariyā buddhānubuddhā. Ayampi āgamo tehi atthasaṃvaṇṇanāvasena guṇasaṃvaṇṇanāvasena ca saṃvaṇṇito eva. Atha vā buddhāca anubuddhā ca buddhānubuddhāti yojetabbaṃ. Sammāsambuddheneva hi tiṇṇaṃ piṭakānaṃ atthavaṇṇanākkamo bhāsito, yā “pakiṇṇakadesanā”ti vuccati. Tato saṅgāyanādivaseneva sāvakehīti ācariyā vadanti. Idha pana “dhammakathikapuṅgavānaṃ vicittapaṭibhānajananaṃ” icceva thomaṇā katā. Saṃvaṇṇanāsu cāyaṃ ācariyassa pakati, yā taṃtaṃsaṃvaṇṇanāsu ādito tassa tassa saṃvaṇṇetabbassa dhammassa viśesaguṇakittanena thomaṇā. Tathā hi sumaṅgalavilāsini papañcasūdanīsaratthappakāsanāsu

1. Dī-Ṭṭha 1. 1; Ma-Ṭṭha 1. 1; Saṃ-Ṭṭha 1. 1 piṭṭhesu.

aṭṭhasālinī-ādīsu ca yathākkamaṃ “saddhāvahaguṇassa, paravādamathanassa, ñāṇappabhedajananassa, tassa gambhīrañāṇehi ogāḷhassa abhinhaso nānāyavicittassā”ti-ādinā thomanā katā.

6. Attho kathīyati etāyāti atthakathā, sā eva **aṭṭhakathā** ttha-kārassa tṭha-kāraṃ katvā yathā “dukkhassa pīḷanaṭṭho”ti¹. **Āditoti**-ādimhi paṭhamasaṅgītiyaṃ. Chaḷabhiññatāya paramena cittavasībhāvena samannāgatattā jhānādīsu pañcavidhavasitāsabbhāvato ca **vasino**, therā mahākassapādayo, tesam **satehi pañcahi**. **Yāti** yā aṭṭhakathā. **Saṅgītāti** attham pakāsetum yuttatṭhāne “ayaṃ etassa attho, ayaṃ etassa attho”ti saṅgahetvā vuttā. **Anusaṅgītā** ca yasattherādīhi **pacchāpi** dutiyatatiyasaṅgītīsu. Iminā attano samvaṇṇanāya āgamanavisuddhim dasseti.

7. Sīhassa lānato gahaṇato sīhaḷo, sīhakumāro. Tamvaṃsajātātāya Tambapaṇṇidīpe khattiyānaṃ, tesam nivāsātāya tambapaṇṇidīpassa ca sīhaḷabhāvo veditabbo. **Ābhatāti** jambudīpato ānītā. **Athāti** pacchā. Aparabhāge hi asaṅkarattham Sīhaḷabhāsāya aṭṭhakathā ṭhapitāti. Tena sā² mūlaṭṭhakathā sabbasādhāraṇā na hotīti idaṃ atthappakāsaṇaṃ ekantena karaṇīyanti dasseti. Tenevāha “**dīpavāsīnamatthāyā**”ti. Tattha **dīpavāsīnanti** jambudīpavāsīnaṃ, **dīpavāsīnanti** vā sīhaḷadīpavāsīnaṃ atthāya sīhaḷabhāsāya ṭhapitāti yojanā.

8. **Apanetvānāti** kaṇcukasadisam sīhaḷabhāsamaṇapanetvāna. **Tatoti** aṭṭhakathāto. **Ahanti** attānaṃ niddisati. **Manoramaṃ bhāsanti** māgadhabhāsaṃ. Sā hi sabhāvaniruttibhūtā paṇḍitānaṃ manam ramayatīti. Tenevāha “**tantinayānucchavikan**”ti, pāḷigatiyā anulomikaṃ pāḷicchāyānuvidhāyininti attho. **Vigatadosanti** asabhāvaniruttibhāsantararahitaṃ.

9. **Samayaṃ avilomentoti** siddhantaṃ avirodhento. Etena atthadosābhāvamāha. Aviruddhattā eva hi theravādāpi idha pakāsīyissanti. **Theravaṃsadīpānanti**³ thirehi sīlakkhandhādīhi samannāgatattā

1. Khu 9. 20, 293 piṭṭhesu.

2. Tenassa (Sī)

3. Theravaṃsapidīpānanti (Sī)

therā, mahākassapādayo, tehi apagatā ācariyaparamparā theravaṃso, tappariyāpannā hutvā āgamādhigamasampannattā paññāpajjotena tassa samujjаланato theravaṃsadīpā¹, mahāvihārapāsino therā, tesam. Vividhehi ākārehi nicchīyatīti vinicchayo, gaṇṭhiṭṭhānesu khīlamaddanākārena pavattā vimaticchedakathā. Suṭṭhu nipuṇo saṇho vinicchayo etesanti **sunipuṇavinicchayā**. Atha vā vinicchīnotīti vinicchayo, yathāvuttatthavisayaṃ ṇāṇaṃ. Suṭṭhu nipuṇo cheko vinicchayo etesanti **sunipuṇavinicchayā**. Etena mahākassapādīttheraparamparābhato, tato yeva ca aviparīto saṇhasukhumo mahāvihāravāsīnaṃ vinicchayoti tassa pamāṇabhūtataṃ dasseti.

10. **Sujanassa cāti ca-saddo sampiṇḍanattho**. Tena “na kevalaṃ Jambudīpavāsīnaṃ yeva atthāya, atha kho sādhujaṇānaṃ tosanatthañcā”ti dasseti. Tena ca “tambapaṇṇidīpavāsīnampi atthāyā”ti ayamattho siddho hoti uggahaṇādisukaratāya tesampi bahūpakārattā. **Ciraṭṭhitatthanti** ciraṭṭhiti-atthaṃ, ciraḷālvatṭhānāyāti attho. Idaṃ hi atthappakāsaṇaṃ aviparītabyaṇjanasunikkhepassa atthasunītassa ca upāyabhāvato saddhammassa ciraṭṭhitiyā saṃvattati. Vuttaṃ hetuṃ bhagavatā—

“Dveme bhikkhave dhammā saddhammassa ṭhitiyā asammossāya anantaradhānāya saṃvattanti. Katame dve? Sunikkhittañca padabyaṇjanaṃ, attho ca sunīto”ti².

11-12. Yaṃ atthavaṇṇanaṃ kattukāmo, tassā mahantattaṃ pariharitum “**sāvattipabhutīnaṃ**”ti-ādimāha. Tenaha “na idha vitthārakathaṃ karissāmi, na taṃ idha vicārayissāmī”ti ca. Tattha **dīghassāti** dīghanikāyassa. **Majjhimassāti** majjhimanikāyassa. “Saṅgītīnaṃ dvinnam yā me atthaṃ vadantena”ti pipāṭho. Tatthapi **saṅgītīnaṃ dvinnanti** dīghamajjhimanikāyānanti attho gahetabbo. **Meti** karaṇatthe sāmivacanam, mayāti attho. **Sudanti** nipātamattaṃ. Heṭṭhā dīghassa majjhimassa ca atthaṃ vadantena sāvattipabhutīnaṃ nagarānaṃ yā vaṇṇanā katā, tassā vitthārakathaṃ na idha bhiyyo

1. Theravaṃsapadīpā (Sī)

2. Am 1. 60 piṭṭhe.

karissāmīti yojetabbaṃ. Yāni ca tattha vatthūni vitthāravasena vuttāni, tesampi vitthārakathaṃ na idha bhiyyo karissāmīti sambandho.

13. Idāni “na idha vitthārakathaṃ karissāmī”ti sāmāññato vuttassa atthassa pavaram dassetuṃ **“suttānaṃ panā”**ti-ādi vuttaṃ. Suttānaṃ ye atthā vatthūhi vinā na pakāsantīti yojetabbaṃ.

14. Yaṃ aṭṭhakathaṃ kattukāmo, tadekadesabhāvena visuddhimaggoca gahetabboti kathikānaṃ upadesaṃ karonto tattha vicāritadhamme uddesavasena dasseti **“sīlakathā”**ti-ādinā. Tattha **sīlakathā**ti cārittavārittādivasena sīlassa vitthārakathā. **Dhutadhammā**ti piṇḍapātikaṅgādayo terasa kilesadhunanakadhammā. **Kammaṭṭhānāni sabbānī**ti pāliyaṃ āgatāni aṭṭhatimsa, aṭṭhakathāyaṃ dveti niravasesāni yogakammasa bhāvanāya pavattiṭṭhānāni. **Cariyāvidhānasahitoti** rāgacaritādīnaṃ sabhāvādividhānena sahito. **Jhānāni** cattāri rūpāvacarajjhānāni, **samāpattiyo** catasso āruppasamāpattiyo. Aṭṭhapi vā paṭiladdhamattāni **jhānāni** samāpajjanavasībhāvappattiyā **samāpattiyo**. **Jhānāni** vā rūpārūpāvacarajjhānāni, **samāpattiyo** phalasangāhikānirodhasamāpattiyo.

15. Lokiyalokuttarabhedā cha abhiññāyo **sabbā abhiññāyo**. Nāṇavibhaṅgādīsu āgatanayena ekavidhādīnā paññāya saṅkaletvā sampiṇḍetvā nicchayo **paññāsaṅkalananicchayo**.

16. Paccayadhammānaṃ hetu-ādīnaṃ paccayuppannadhammānaṃ hetupaccayādivhāvo paccayākāro, tassa desanā **paccayākāradesanā**, paṭiccasamuppādakathāti attho. Sā pana ghanavinibbhogassa sudukkaratāya saṅhasukhumā, nikāyantaraḷaddhisāṅkararahitā, ekattanayādisahitā ca tattha vicāritāti āha **“suparisuddhanipuṇanayā”**ti. Paṭisambhidādīsu āgatanayaṃ avissajjetvā vicāritattā **avimuttatantimaggā**.

17. **Iti pana sabbanti iti**-saddo parisamāpane, **pana**-saddo vacanālaṅkāre, etaṃ sabbanti attho. **Idhā**ti imissā aṭṭhakathāya **na vicārayissāmi** punaruttibhāvatoti adhippāyo.

18. Idāni tasseva avicāraṇassa ekantakāraṇaṃ niddhārento “**majjhe visuddhimaggo**”ti-ādimāha. Tattha “majjheṭṭhatvā”ti etena majjhabhāvadīpanena visesato catunnaṃ āgamānaṃ sādharmaṇaṭṭhakathā visuddhimaggo, na sumaṅgalavilāsinī-ādayo viya asādharaṇaṭṭhakathāti dasseti. “Visesato”ti ca idaṃ vinayābhidhammānampi visuddhimaggo yathārahaṃ atthavaṇṇanā hoti evāti katvā vuttaṃ.

19. **Icevāti** iti eva. **Tampī**ti visuddhimaggampi. **Etāyāti** manorathapūraṇiyā. Ettha ca “sīhaḷadīpaṃ ābhatā”ti-ādinā atthappakāsanassa nimittaṃ dasseti, “dīpavāsīnamatthāya sujanassa ca tuṭṭhatthaṃ ciraṭṭhitatthaṃca dhammassā”ti etena payojanaṃ, apanetvāna tatohaṃ, sīhaḷabhāsan”ti-ādinā, “sāvatthipabhuṭīnaṃ”ti-ādinā ca karaṇappakāraṃ. Heṭṭhimanikāyesu visuddhimagge ca vicāritānaṃ atthānaṃ avicāraṇampi hi idha karaṇappakāro evāti.

Ganthārambhakathāvaṇṇanā niṭṭhitā.

1. Rūpādivaggavaṇṇanā

Vibhāgavantānaṃ sabhāvavibhāvanaṃ vibhāgadassanavaseneva hotīti paṭhamam tava nipātasuttavasena vibhāgaṃ dassetuṃ “**tattha aṅguttarāgamo nāmā**”ti-ādimāha. Tattha **tatthāti** “aṅguttarāgamassa atthaṃ pakāsayissāmī”ti yadidaṃ vuttaṃ, tasmim vacane, “yassa atthaṃ pakāsayissāmī”ti paṭiññātaṃ, so aṅguttarāgamo nāma nipātasuttavasena evaṃ vibhāgoti attho. Atha vā **tatthāti** “aṅguttaranissitaṃ atthan”ti etasmim vacane yo aṅguttarāgamo vutto, so nipātasuttādivasena edisoti attho.

Idāni taṃ ādito paṭṭhāya saṃvaṇṇitukāmo attano saṃvaṇṇanāya paṭhamamahāsaṅgītiyaṃ nikkhittānukkamena pavattabhāvadassanattaraṃ “**tassa nipātesu -pa- vuttaṃ nidānamādi**”ti-ādimāha. Tattha yathāpaccayaṃ tattha tattha desitattā paññattattā ca vippakiṇṇānaṃ dhammavinayānaṃ saṅgahetvā gāyanaṃ kathaṃ saṅgīti. Etena taṃtaṃsikkhāpadānaṃ suttānañca

ādi-pariyosānesu antarantarā ca sambandhavasena ṭhapitaṃ saṅgītikāravacanam saṅgahitaṃ hoti. Saṅgīyamānassa atthassa mahantatāya pūjanīyatāya ca mahatī saṅgīti mahāsaṅgīti, paṭhamā mahāsaṅgīti paṭhamamahāsaṅgīti, tassā pavattikālo paṭhamamahāsaṅgītikālo, tasmiṃ **paṭhamamahāsaṅgītikāle**. Nidadāti desanam desakālādivasena aviditaṃ viditaṃ katvā nidassetīti **nidānam**. Yo lokiyehi upogghātoti¹ vuccati, svāyamettha “evam me sutan”ti-ādiko gantho veditabbo. Na “sanidānāham bhikkhave dhammam desemi”ti-ādīsu² viya ajjhāsayaḍidesanuppattihetu. Tenevāha “**evam me sutanti-ādikaṃ āyasmata ānandena paṭhamamahāsaṅgītikāle vuttam nidānamādi**”ti.

1. “Sā panesā”ti-ādinā bāhiraṇidāne vattabbaṃ atidisitvā idāni abhantaranidānam ādito paṭṭhāya saṃvaṇṇitum “**yaṃ panetan**”ti vuttam. Tattha yasmā saṃvaṇṇanam karontena saṃvaṇṇetabbe dhamme padāni padavibhāgam tadatthañca dassetvā tato param piṇḍatthādinidassanavasena ca saṃvaṇṇanā tātabbā, tasmā padāni tāva dassento “**evanti nipātapadan**”ti-ādimāha. Tattha **padavibhāgoti** padānam viseso, na padaviggaho. Atha vā padāni ca padavibhāgo ca **padavibhāgo**, padaviggaho ca padavibhāgo ca **padavibhāgoti** vā ekasesavasena padapadaviggahā padavibhāgasaddena vuttāti veditabbaṃ. Tattha padaviggaho “jetassa vanam jetavanam”ti-ādinā samāsapadesu daṭṭhabbo.

Atthatoti padatthato. Tam pana padattham atthuddhārakkamena paṭhamam evam-saddassa dassento “**evam-saddo tāva**”ti-ādimāha. **Avadhāraṇādi**ti ettha **ādi**-saddena idamatthapucchāparimāṇādi-atthānam saṅgaho daṭṭhabbo. Tathā hi “evamgatāni puthusippāyanāni, evamādīni”ti-ādīsu³ idam-saddassa atthe evam-saddo. Gata-saddo hi pakārapariyāyo, tathā vidhākāra-saddā ca. Tathā hi vidhayuttagatasadde lokiyā pakāratthe vadanti. “Evam su te sunhātā suvilittā kappitakesamassū āmukkamaṇikuṇḍalābharaṇā odātavattavasana pañcahi kāmagaṇehi samappitā samaṅgībhūtā paricārenti seyyathāpi tvaṃ

1. Ummugghātoti (Si)

2. Am 1. 280 piṭṭhe.

3. Dī 2. 48 piṭṭhe.

etarahi sācariyakoti. No hidam bho gotamā”ti-ādīsu¹ pucchāyaṃ. “Evaṃ lahuparivattam², evamāyupariyanto”ti³ ca ādīsu parimāṇe.

Nanu ca “evaṃ su te sunhātā suvilittā evamāyupariyanto”ti ettha evaṃ-saddena pucchanākāraparimāṇākārānaṃ vuttattā ākārattho eva evaṃ-saddoti? Na, visesasabbhāvato. Ākāramattavācako hi evaṃ-saddo ākāratthoti adhippeto yathā “evaṃ byākho”ti-ādīsu⁴, na pana ākāravisesavācako. Evañca katvā “evaṃ jātena maccenā”ti-ādīni⁵ upamādi-udāharaṇāni upapannāni honti. Tathā hi “yathā hi -pa- bahun”ti⁵ ettha puppharāsiṭṭhāniyato manussūpapattisappurisūpanissayasaddhammassavana yonisomanasikārabhogasampatti-ādidānādipuññakiriyāhetusamudāyato sobhāsugandhatādiguṇayogato mālāguṇasadisīyo pahūtā puññakiriyā maritabbasabhāvatāya maccena sattena kattabbāti jotitattā puppharāsimālāguṇāva upamā, tesam upamākāro yathā-saddena aniyamato vuttoti “evaṃ-saddo upamākāranigamanattho”ti vattum yuttam, so pana upamākāro niyamiyamāno atthato upamāva hotīti āha “**upamāyaṃ āgato**”ti. Tathā “evaṃ iminā ākārena atikkamitabban”ti-ādīnā upadisiyamānāya samaṇasārūppāya ākappasampattiya yo kattha upadisanākāro, so atthato upadeso evāti vuttam “**evaṃ te -pa- upadese**”ti. Tathā **evametaṃ bhagavā, evametaṃ sugatā**ti ettha bhagavatā yathāvuttamattham aviparītato jānantehi kataṃ tattha saṃvijjamānaguṇānaṃ pakārehi haṃsanam udaggaṭākaraṇam sampahaṃsanam, yo tattha sampahaṃsanākāroti yojetabbam.

Evaṃ evaṃ panāyanti ettha garaṇāṇākāroti yojetabbam, so ca garaṇāṇākāro “vasalī”ti ādikhuṃsanasaddasannidhānato idha evaṃ-saddena pakāsitoti viññāyati. Yathā cettha, evaṃ upamākārādayopi upamādivasena vuttānam puppharāsi-ādisaddānaṃ sannidhānatoti daṭṭhabbam. **Evaṃ bhanteti khoti**-ādīsu⁶ pana dhammassa sādhuṇaṃ savanamanasikārena niyojitehi bhikkhūhi attano tattha ṭhitabhāvassa paṭijānanavasena

1. Dī 1. 98 piṭṭhe.

2. Aṃ 1. 9 piṭṭhe.

3. Dī 1. 77; Vi 1. 5 piṭṭhesu.

4. Ma 1. 182; Vi 2. 175; Vi 4. 68 piṭṭhesu.

5. Khu 1. 21 piṭṭhe Dhammapade.

6. Evaṃ bhanteti kho (Ka)

vuttattā ettha evaṃ-saddo vacanasampañcchanattho vutto, tena “evaṃ bhante sādhu bhante suṭṭhu bhante”ti vuttam hoti. **Evañca vadehī**ti “yathāhaṃ vadāmi, evaṃ samaṇaṃ ānandaṃ vadehī”ti vadanākāro idāni vattabbo evaṃ-saddena nidassīyatīti nidassanattho vutto. **Evaṃ noti** etthāpi tesam yathāvuttadhammaṇaṃ ahitadukkhāvahabhāve sannitṭhānajananaṭṭhaṃ anumattiggahaṇavasena “no vā, kathaṃ vo ettha hotī”ti pucchāya katāya “evaṃ no ettha hotī”ti vuttattā¹ tadākārasannitṭhānaṃ evaṃ-saddena vibhāvitanti viññāyati. So pana tesam dhammaṇaṃ ahitāya dukkhāya saṃvattanākāro niyamiyamāno avadhāraṇattho hotīti āha “**evaṃ no ettha hotīti-ādīsu avadhāraṇe**”ti.

Nānānayanipuṇanti ekattanānatta-abyāpāra-evaṃdhammatāsaṅkhātā, nandiyāvaṭṭatipukkhalasīhavikkīṭa-aṅkusadisālocanaṃsaṅkhātā vā ādhārādibhedavasena nānāvidhā nayā nānāyā, nayā vā pāḷigatiyo, tā ca paññatti-ādivasena saṃkilesabhāgiyādilokiyāditadubhayavomissakatādivasena kusalādivasena khandhādivasena saṅghādivasena samayavimuttādivasena padhānādivasena kusalamūlādivasena tikapaṭṭhānādivasena ca nānappakārāti nānāyā, tehi nipuṇaṃ saṇhaṃ sukhumanti nānānayanipuṇaṃ. Āsayova ajjhāsayo, te ca sassatādibhedena tattha ca apparajakkhatādibhedena ca aneke, attajjhāsayaḍayo eva vā samuṭṭhānaṃ uppattihetu etassāti **anekajjhāsayasamuṭṭhānaṃ. Atthabyañjanasampannanti** atthabyañjanaparipuṇṇaṃ upanetabbābhāvato. Saṅkāsanapakāsanavivaraṇavibhajana-uttānīkaraṇapaññattivasena chahi atthapadehi akkharapadabyañjanākāraniruttiniddeśavasena chahi byañjanapadehi ca samannāgatanti vā attho daṭṭhabbo.

Vividhapāṭihāriyanti ettha pāṭihāriyapadassa vacanaṭṭhaṃ “paṭipakkhaharaṇato rāgādikilesāpanayanato ca pāṭihāriyan”ti vadanti. Bhagavato pana paṭipakkhā rāgāḍayo na santi, ye haritabbā. Puthujjanānampi vigatūpakkilese aṭṭhaguṇasamannāgate citte hatapaṭipakkhe iddhividhaṃ pavattati, tasmā tattha pavattavohārena ca na sakkā idha “pāṭihāriyan”ti vattuṃ. Sace pana mahākāruṇikassa bhagavato veneyyagatā ca

1. Vuttamattha ta (Ka)

kilesā paṭipakkhā, tesam haraṇato “pāṭihāriyan”ti vuttam, evaṃ sati yuttametam. Atha vā bhagavato ca sāsanaassa ca paṭipakkhā titthiyā, tesam haraṇato pāṭihāriyam. Te hi diṭṭhiharaṇavasena ca diṭṭhippakāsane asamatthabhāvena ca iddhi-ādesanānusāsanihi haritā apanītā hontīti. “Paṭī”ti vā ayaṃ saddo “pacchā”ti etassa attham bodheti “tasmiṃ paṭipaviṭṭhamhi, añño āgañchi brāhmaṇo”ti-ādīsu¹ viya, tasmā samāhite citte vigatūpakkilese katakiccena pacchā haritabbam pavattetabbanti paṭihāriyam, attano vā upakkilesesu catutthajjhānamaggehi haritesu pacchā haraṇam paṭihāriyam, iddhi-ādesanānusāsaniyo ca vigatūpakkilesena katakiccena ca sattahitattam puna pavattetabbā, haritesu ca attano upakkilesesu parasattānam upakkilesaharaṇāni hontīti paṭihāriyāni bhavanti, paṭihāriyameva pāṭihāriyam, paṭihāriye vā iddhi-ādesanānusāsanisamudāye bhavam ekamekam pāṭihāriyanti vuccati. Paṭihāriyam vā catutthajjhānam maggo ca paṭipakkhaharaṇato, tattha jātam, tasmiṃ vā nimittabhūte, tato vā āgantanti pāṭihāriyam. Tassa pana iddhi-ādibhedena visayabhedena ca² bahuvidhassa bhagavato desanāyam labbhamānattā āha “vividhapāṭihāriyan”ti.

Na aññathāti bhagavato sammukhā sutākārato na aññathāti attho, na pana bhagavato desitākārato. Acinteyyānubhāvā hi bhagavato desanā. Evañca katvā “sabbappakārena ko samattho viññātun”ti idam vacanam samatthitam bhavati, dhāraṇabaladassanañca na virujjhati sutākārāvirujjhanassa adhippetattā. Na hettha atthantaratāparihāro dvinnam atthānam ekavisayattā, itarathā thero bhagavato desanāya sabbathā paṭiggahaṇe samattho asamattho cāti āpajjeyyāti.

“Yo paro na hoti, so attā”ti evaṃ vuttāya niyakajjhattasaṅkhātāya sasantatīyam vattanato tividhopi me-saddo kiñcāpi ekasmiṃyeva atthe dissati, karaṇasampadānasāminiddesavasena pana vijjamānabhedam sandhāyāha “**me-saddo tīsu atthesu dissati**”ti.

1. Khu 1. 429; Khu 8. 1 piṭṭhesu.

2. Vividhavisayabhedena ca (Sī)

Kiñcāpi upasaggo kiriyaṃ viseseti, jotakabhāvato pana satipi tasmim suta-saddo eva taṃ tamatthaṃ vadatīti anupasaggassa suta-saddassa atthuddhāre sa-upasaggassa gahaṇaṃ na virujjhatīti dassento **“sa-upasaggo ca anupasaggo cā”**ti āha. **Assā**ti suta-saddassa. Kammabhāvasādhanaṇi idha sutasadde sambhavantīti vuttaṃ **“upadhāritanti vā upadhāraṇanti vā attho”**ti. **Mayāti atthe satī**ti yadā me-saddassa kattivasena karaṇaniddeso, tadāti attho. **Mamāti atthe satī**ti yadā sambandhavasena sāminiddeso, tadā.

Sutasaddasanniṭṭhāne payuttana **evam**-saddena savanakiriyājotakena bhavitabbanti vuttaṃ **“evanti sotaviññāṇādiviññāṇakiccanidassanan”**ti. **Ādi**-saddena sampaṭicchanaḍḍinaṃ sotadvārikaviññāṇaṃ tadabhinīhaṭṭānaṇca manodvārikaviññāṇaṃ gahaṇaṃ veditabbaṃ. Sabbesampi vākyānaṃ evakāratthasahitattā **“sutan”**ti etassa sutamevāti ayamattho labbhatīti āha **“assavanabhāvappaṭikkhepato”**ti. Etena avadhāraṇena niyāmataṃ dasseti. Yathā ca sutam sutamevāti niyāmetabbaṃ, taṃ sammā sutam hotīti āha **“anūnādhikāviparītaggahaṇanidassanan”**ti. Atha vā saddantarathāpohana vasena saddo atthaṃ vadatīti sutanti assutam na hotīti ayametassa atthoti vuttaṃ **“assavanabhāvappaṭikkhepato”**ti. Iminā diṭṭhādivinivattanaṃ karoti. Idam vuttaṃ hoti—na idam mayā diṭṭham, na sayambhuññaṇena sacchikataṃ, atha kho sutam, taṇca sammadevāti. Tenevāha **“anūnādhikāviparītaggahaṇanidassanan”**ti. Avadhāraṇatthe vā **evam**-sadde ayamatthayojanā—**“tarīyatīti tadepekkhassa suta-saddassa ayamattho vutto “assavanabhāvappaṭikkhepato”**ti. Tenevāha **“anūnādhikāviparītaggahaṇanidassanan”**ti. Savana-saddo cettha kammaṭtho veditabbo **“suyyati”**ti.

Evam savana hetu savana visesavasena padattayassa ekena pakārena atthayojanaṃ dassetvā idāni pakārantarehi taṃ dassetuṃ **“tathā evan”**ti-ādi vuttaṃ. Tattha **tassāti** yā sā bhagavato sammukhā dhammassavanākārena pavattā manodvāraviññāṇavīthi, tassā. Sā hi nānappakārena ārammaṇe pavattitum samatthā. Tathā ca vuttaṃ **“sotadvārānusārenā”**ti. **Nānappakārenāti** vakkhamānānaṃ

anekavihitānaṃ byañjanatthaggaṇānaṃ nānākārena. Etena imissā yojanāya ākārattho evaṃ-saddo gahitoti dīpeti. **Pavattibhāvappakāyananti** pavattiyā atthibhāvappakāsanāṃ. **Sutanti dhammappakāsananti** yasmim ārammaṇe vuttappakārā viññāṇavīthi nānappakārena pavattā, tassa dhammattā vuttaṃ, na sutasaddassa dhammatthattā. Vuttassevatthassa pākaṭīkaraṇaṃ “**ayañhetthā**”ti-ādi. Tattha **viññāṇavīthiyā**ti karaṇatthe karaṇavacanaṃ, **mayā**ti kattu-atthe.

Evanti niddisitabbappakāsananti nidassanatthaṃ evaṃ-saddaṃ gahetvā vuttaṃ nidassetabbassa nidassitabbattābhāvābhāvato. Tena evaṃ-saddena sakalampi suttaṃ paccāmaṭṭhanti dasseti. Sutasaddassa kiriyāsaddattā savanakiriyāya ca sādharmaṇaviññāṇappabandhappaṭibaddhattā tattha ca puggalavohāroti vuttaṃ “**sutanti puggalakiccappakāsanā**”ti. Na hi puggalavohārahite dhammappabandhe savanakiriyā labbhatīti.

Yassa cittasantānassāti-ādipi ākāratthameva evaṃ-saddaṃ gahetvā purimayojanāya aññathā atthayojanaṃ dassetuṃ vuttaṃ. Tattha **ākārapaññattī**ti upādāpaññatti eva dhammānaṃ pavatti-ākārupādānavasena tathā vuttā. **Sutanti visayaniddesoti** sotabbabhūto dhammo savanakiriyākattupuggalassa savanakiriyāvasena pavattiṭṭhānanti katvā vuttaṃ. Cittasantānavinimuttassa paramatthato kassaci kattu-abhāvepi saddavohārena buddhiparikappitabhedavacanicchāya cittasantānato aññaṃ viya taṃsamaṅgiṃ katvā vuttaṃ “**cittasantānena taṃsamaṅgino**”ti. Savanakiriyāvisayopi sotabbadhammo savanakiriyāvasena pavattacittasantānassa idha paramatthato kattubhāvato, savanavasena cippavattiyā eva vā savanakiriyābhāvato taṃkiriyākattu ca visayo hotīti katvā vuttaṃ “**taṃsamaṅgino kattuvise**”ti. Sutākārassa ca therassa sammānicchitabhāvato āha “**gahaṇasannitṭhāna**”ti. Etena vā avadhāraṇatthaṃ evaṃ-saddaṃ gahetvā ayamatthayojanā katāti daṭṭhabbaṃ.

Pubbe sutānaṃ nānāvihitānaṃ suttasaṅkhātānaṃ atthabyañjanānaṃ upadhāritarūpassa ākārassa nidassanassa, avadhāraṇassa vā

pakāsanāsabhāvo evaṃ-saddoti tadākārādi-upadhāraṇassa puggalapaññattiyā upādānabhūta-dhammappabandhabhyāpārātāya vuttaṃ **“evanti puggalakiccaniddeso”**ti. Savanakiriyā pana puggalavādinopi viññāṇanirapekkhā natthīti visesato viññāṇabyāpāroti āha **“sutanti viññāṇakiccaniddeso”**ti. Meti saddappavattiyā ekanteneva sattavisayattā viññāṇakiccassa ca tattheva samodahitabbato **“meti ubhayakiccayuttapuggalaniddeso”**ti vuttaṃ. Avijjamānapaññattivijjamānapaññattisabhāvā yathākkamaṃ evaṃsaddasutasaddānaṃ atthāti te tathārūpapaññatti-upādānabyāpārābhāvena dassento āha **“evanti puggalakiccaniddeso, sutanti viññāṇakiccaniddeso”**ti. Ettha ca karaṇakiriyākattukammavisesappakāsanavasena puggalabyāpāravisayapuggalabyāpāranidassanavasena gahaṇākārāggāhakatabbisayavisesaniddesavasena kattukaraṇabyāpārakattuniddesavasena ca dutiyādayo catasso atthayojanā dassitāti daṭṭhabbāṃ.

Sabbassapi saddādhigamanīyassa atthassa paññattimukheneva paṭipajjitabbattā sabbapaññattīnaṃ vijjamānādivasena chasu paññattibhedeṣu antogadhattā tesu **“evan”**ti-ādīnaṃ paññattīnaṃ sarūpaṃ niddhārento āha **“evanti ca meti cā”**ti-ādi. Tattha evanti ca meti ca vuccamānassatthassa ākārādino dhammānaṃ asallakkhaṇabhāvato avijjamānapaññattibhāvoti āha **“saccikaṭṭhaparamatthavasena avijjamānapaññatti”**ti. Tattha **saccikaṭṭhaparamatthavasena**ti bhūtattha-uttamatthavasena. Idaṃ vuttaṃ hoti—yo māyāmarīci-ādayo viya abhūtattho, anussavādīhi gahetabbo viya anuttamattho ca na hoti, so rūpasaddādisabhāvo, ruppanānubhavanādisabhāvo vā¹ attho saccikaṭṭho paramattho cāti vuccati, na tathā **“evaṃ me”**ti padānaṃ atthoti. Etamevatthaṃ pākaṭataraṃ kātuṃ **“kiñhettha taṃ”**ti-ādi vuttaṃ. Sutanti pana saddāyatanāṃ sandhāyāha **“vijjamānapaññatti”**ti. Teneva hi **“yañhi taṃ ettha sotena upaladdhan”**ti vuttaṃ, **“sotadvārānusārena upaladdhan”**ti pana vutte atthabyañjanādi sabbaṃ labbhati. **Taṃ taṃ upādāya vattabbatoti** sotapathamāgate dhamme upādāya tesaṃ upadhāritākārādino paccāmasanavasena evanti, sasantatipariyāpanne khandhe upādāya meti vattabbattāti attho. Diṭṭhādisabhāvarahite saddāyatane

1. Ruppanādisasāvo vā (Ka)

pavattamānopi sutavohāro “dutiyaṃ tatiyaṃ”ti-ādiko viya paṭhamādīni diṭṭhamutaviññāte apekkhitvā pavattoti āha “**diṭṭhādīni upanidhāya vattabbato**”ti. Assutaṃ na hotīti hi sutanti pakāsito ayamatthoti.

Attanā paṭividdhā suttassa pakāravisesā evanti therena paccāmaṭṭhāti āha “**asammohaṃ dīpeti**”ti. **Nānappakārappaṭivedhasamattho** hotīti etena vakkhamānassa suttassa nānappakārataṃ duppaṭivijjhataṃca dasseti. **Sutassa asammosaṃ dīpeti**ti sutākārassa yāthāvato dassiyamānattā vuttaṃ.

Asammohenāti sammohābhāvena, paññāya eva vā savanakālasambhūtāya taduttarikālapaññāsiddhi. Evaṃ **asammosenā**ti etthāpi vattabbaṃ.

Byañjanānaṃ paṭivijjhitaḥ ākāro nātigambhīro, yathāsutadhāraṇameva tattha karaṇīyanti satiya byāpāro adhiko, paññā tattha guṇibhūtāti vuttaṃ “**paññāpubbaṅgamāyā**”ti-ādi “paññāya pubbaṅgamā”ti katvā. Pubbaṅgamatā cettha padhānabhāvo “manopubbaṅgamā”ti-ādīsu¹ viya, pubbaṅgamatāya vā cakkhuviññādisu āvajjanādīnaṃ viya appadhānatte paññā pubbaṅgamā etissāti ayampi attho yujjati, evaṃ **satipubbaṅgamāyā**ti etthāpi vuttanayānusārena² yathāsambhavamatto veditabbo.

Atthabyañjanasampannassāti atthabyañjanaparipuṇṇassa, saṅkāsanappakāsanavivaraṇavibhajana-uttānīkaraṇapaññāttivasena chahi atthapadehi akkharapadabyañjanākāraniruttiniddesavasena chahi byañjanapadehi ca samannāgatassāti vā attho daṭṭhabbo.

Yoniso manasikāraṃ dīpeti evaṃ-saddena vuccamānānaṃ ākāranidassanāvadhāraṇatthānaṃ aviparītasaddhammavisayattāti adhippāyo.

Avikkhepaṃ dīpetiti “cittapariyādānaṃ kattha bhāsitaṃ”ti-ādipucchāvase pakaraṇappattassa vakkhamānassa suttassa savanaṃ samādhānamantarena na sambhavaṭīti katvā vuttaṃ. **Vikkhittacittassāti**-ādi tassevatthassa samatthanavasena vuttaṃ. **Sabbasampattiyāti**

atthabyañjanadesakappayojanādisampattiyā. Aviparītasaddhammavisayehi viya ākāranidassanāvadhāraṇatthehi yonisomanasikārassa, saddhammassavanena viya ca avikkhepassa yathā yonisomanasikārena phalabhūtena attasammāpaṇidhipubbekatapūññatānaṃ siddhi vuttā

1. Khu 1. 13 piṭṭhe Dhammapade.

2. Vuttavipariyāyena (Ka)

tadavinābhāvato, evaṃ avikkhepena phalabhūtena kāraṇabhūtānaṃ saddhammassavanasappurisūpanissayānaṃ siddhi dassetabbā siyā assutavato sappurisūpanissayarahitassa ca tadabhāvato. **Na hi vikkhittacittoti-**ādinā samatthanavacanena pana avikkhepena kāraṇabhūtena sappurisūpanissayena ca phalabhūtassa saddhammassavanassa siddhi dassitā. Ayaṃ panettha adhippāyo yutto siyā, saddhammassavanasappurisūpanissayā na ekantena avikkhepassa kāraṇaṃ bāhiraṅgattā, avikkhepo pana sappurisūpanissayo viya saddhammassavanassa ekantakāraṇanti. Evampi avikkhepena sappurisūpanissayasiddhijotanaṃ na samatthitāva. No na samatthitā vikkhittacittānaṃ sappurisapayirupāsanābhāvassa atthasiddhattā. Ettha ca purimaṃ phalena kāraṇassa siddhidassanaṃ nadīpūrena viya upari vuṭṭhisabbhāvassa, dutiyaṃ kāraṇena phalassa siddhidassanaṃ daṭṭhabbaṃ ekantavassinā viya meghavuṭṭhānena vuṭṭhippavattiyā.

Bhagavato vacanassa atthabyañjanappabhedaparichedavasena sakalasāsanasampatti-ogāhanākāro niravasesaparahitapāripūritākāraṇanti vuttaṃ “**evaṃ bhaddako ākāro**”ti. Yasmā na hotīti sambandho.

Pacchimacakkadvayasampattinti

attasammāpaṇidhipubbekatapūññatāsaṅkhātāguṇadvayaṃ. Aparāparaṃ vuttiyā cettha cakkabhāvo, caranti etehi sattā sampattibhavesūti vā. Ye sandhāya vuttaṃ “cattārimāni bhikkhave cakkāni, yehi samannāgatānaṃ devamanussānaṃ catucakkaṃ vattatī”ti-ādi¹. Purimapacchimabhāvo cettha desanākkamavasena daṭṭhabbo. **Pacchimacakkadvayasiddhiyāti** pacchimacakkadvayassa atthitāya. Sammāpaṇihitatto pubbe ca katapuñño suddhāsayo hoti tadasiddhihetūnaṃ kilesānaṃ dūrībhāvatoti āha

“**āsayasuddhi siddhā hotī**”ti. Tathā hi vuttaṃ “sammāpaṇihitaṃ cittaṃ, seyyaso naṃ tato kare”ti² “katapuññosi tvaṃ ānanda, padhānamanuyuñja, khippaṃ hohisi anāsavo”ti³ ca. Tenevāha “**āsayasuddhiyā**

adhigamabyattisiddhī”ti. **Payogasuddhiyāti**

yonisomanasikārapubbaṅgamassa dhammassavanappayogassa visadabhāvena. Tathā cāha “**āgamabyattisiddhī**”ti, sabbassa vā kāyavacīpayogassa niddosabhāvena. Parisuddhakāyavacīpayogo hi vipaṭṭisārābhāvato avikkhittacitto pariyattiyaṃ visārado hotīti.

1. Am 1. 341 piṭṭhe.

2. Khu 1. 19 piṭṭhe Dhammapade.

3. Dī 2. 119 piṭṭhe.

Nānappakārapaṭivedhadīpakenāti-ādinā atthabyañjanesu therassa evaṃ-saddasutasaddānaṃ asammohadīpanato catuppaṭisambhidāvasena atthayojanaṃ dasseti. Tattha **sotappabhedapaṭivedhadīpakenāti** etena ayaṃ suta-saddo evaṃ-saddasannidhānato, vakkhamānāpekkhāya vā sāmāññeneva sotabbadhammavisesaṃ āmasatīti dasseti. Manodiṭṭhikaraṇānaṃ pariyaṭṭidhammānaṃ anupekkhanasuppaṭivedhā visesato manasikārapaṭibaddhāti te vuttanayena yonisomanasikāradīpakena evaṃ-saddena yojetvā, savanadhāraṇavacīparicayā pariyaṭṭidhammā visesena sotāvadhānappaṭibaddhāti te avikkhepadīpakena suta-saddena yojetvā dassento sāsanasampattiyaṃ dhammassavane ussāhaṃ janeti. Tattha **dhammāti** pariyaṭṭidhammā. **Manasā anupekkhitāti** “idha sīlaṃ kathitaṃ, idha samādhi, idha paññā, ettakā ettha anusandhaya”ti-ādinā nayena manasā anu anu pekkhitā. **Diṭṭhiyā suppaṭividdhāti** nijjhānakkhantibhūtāya, nātapariññāsankhātāya vā diṭṭhiyā tattha tattha vuttarūpārūpadhamme “iti rūpaṃ, ettakam rūpaṃ”ti-ādinā suṭṭhu vavatthepetvā paṭividdhā.

Sakalena vacanenāti pubbe tīhi padehi visuṃ visuṃ yojitattā vuttaṃ. **Asappurisabhūminti** akataññutaṃ, “idhekacco pāpabhikkhu tathāgatappaveditaṃ dhammavinayaṃ pariyaṭṭitvā attano dahatī”ti¹ evaṃ vuttaṃ anariyavohārāvattaṃ. Sā eva anariyavohārāvattā asaddhammo. Nanu ca ānandattherassa “mamedāṃ vacanaṃ”ti adhimānassa, mahākassapattherādīnañca tadāsankāya abhāvato asappurisabhūmisamatikkamādivacanaṃ niratthakanti? Nayidamevaṃ “evaṃ me sutan”ti vadantena ayampi attho vibhāvitoti dassanato. Keci pana “devatānaṃ parivitakkāpekkhaṃ tathāvacananti edisī codanā anavakāsā”ti vadanti. Tasmim kira khaṇe ekaccānaṃ devatānaṃ evaṃ cetaso parivitakko udapādi “bhagavā parinibbuto, ayañca āyasmā desanākusalo idāni dhammaṃ deseti, sakyakulappasuto tathāgatassa bhātā cūḷapituputto, kim nu kho sayaṃ sacchikataṃ dhammaṃ deseti, udāhu bhagavato eva vacanaṃ yathāsutan”ti, evaṃ tadāsankitappakārato asappurisabhūmisamokkamādi atikkamādi vibhāvantanti. **Attano adahantoti** “mamedan”ti attani aṭṭhapento.

1. Vi 1. 115 piṭṭhe.

Appetīti nidasseti. Diṭṭhadhammikasamparāyikaparamatthesu yathārahaṃ satte netīti netti, dhammoyeva netti **dhammanetti**.

Dalḥataraniviṭṭhā vicikicchā **kaṅkhā**. Nātisamsappanaṃ matibhedamattaṃ **vimati**. **Assaddhiyaṃ vināseti** bhagavatā bhāsītattā sammukhā cassa paṭiggahitattā khalitaduruttādiggahaṇadosābhāvato ca. Ettha ca pañcamādayo¹ tisso atthayojanā ākārādi-atthesu aggaḥitavisesameva evaṃ-saddaṃ gahetvā dassitā, tato parā catasso² ākārattameva evaṃ-saddaṃ gahetvā vibhāvitā, pacchimā pana tisso yathākkamaṃ ākārattamaṃ nidassanattamaṃ avadhāraṇattamaṃ evaṃ-saddaṃ gahetvā yojitāti daṭṭhabbaṃ.

Eka-saddo aññaseṭṭha-asahāyasaṅkhādīsu dissati. Tathā hesa “sassato attā ca loko ca, idameva saccaṃ moghamaññanti ittheke abhivadanti”ti-ādīsu³ aññatthe dissati, “cetaso ekodibhāvan”ti-ādīsu⁴ seṭṭhe, “eko vūpakaṭṭho”ti-ādīsu⁵ asahāye “ekova kho bhikkhave khaṇo ca samayo ca brahmacariyavāsāyā”ti-ādīsu⁶ saṅkhāyaṃ. Idhāpi saṅkhāyanti dassento āha “**ekanti gaṇanaparichedaniddeso**”ti. **Kālaṇca samayañcāti** yuttakālaṇca paccayasāmaggiṇca. **Khaṇoti** okāso. Tathāgatuppādādiko hi maggabrahmacariyassa okāso tappaccayappaṭilābhahetuttā. Khaṇo eva ca samayo. Yo khaṇoti ca samayoti ca vuccati, so eko evāti hi attho. **Mahāsamayoti** mahāsamūho. **Samayopi khoti** sikkhāpadapūraṇassa hetupi. **Samayappavāda**keti diṭṭhippavāda. Tattha hi nisinnā titthiyā attano attano samayaṃ pavadanti. **Atthābhisamayāti** hitappaṭilābhā. Abhisametabboti abhisamayo, abhisamayo attho **abhisamayattḥoti** pīlanādīni abhisametabbabhāvena ekībhāvaṃ upanetvā vuttāni. Abhisamayassa vā paṭivedhassa visayabhūto⁷ attho **abhisamayattḥoti** tāneva tathā ekattena vuttāni.

1. Paṭhamādayo (Dī-Ṭī 1. 44; Saṃ-Ṭī 1. 30 piṭṭhesu.)

3. Ma 3. 22 piṭṭhe.

5. Dī 1. 166; Dī 2. 126; Ma 1. 48; Saṃ 2. 61; Vi 4. 489 piṭṭhesu.

6. Am 3. 61 piṭṭhe.

2. Tisso (Sī)

4. Dī 1. 70; Vi 1. 5 piṭṭhesu.

7. Visayabhūtabhāvo (Sī)

Tattha **pīḷanaṃ** dukkhasaccassa taṃsamaṅgino hiṃsanaṃ avipphārikatākaraṇaṃ. **Santāpo** dukkhadukkhatādivasena santapanam paridahanam.

Tattha sahakārikāraṇe saniḷḷhaṃ sameti samaveṭṭi **samayo**, samavāyo. Sameti samāgacchati ettha maggabrahmacariyaṃ tadādhārapuggalehīti **samayo**, khaṇo. Sameti ettha, etena vā saṃgacchati satto, sabhāvadhammo vā sahaḷātādīhi, uppādādīhi vāti **samayo**, kālo. Dhammappavattimattatāya atthato abhūtopi hi kālo dhammappavattiyā adhikaraṇaṃ karaṇaṃ viya ca kappanāmattasiddhena rūpena vohariyati. Samam, saha vā avayavānaṃ ayanam pavatti avatṭhānanti **samayo**, samūho yathā “samudāyo”ti. Avayavasahāvavattṭhānameva hi samūhoti. Avasesapaccayānaṃ samāgame eti phalaṃ etasmā uppajjati pavattati cāti **samayo**, hetu yathā “samudayo”ti. Sameti saṃyojanabhāvato sambaddho eti attano visaye pavattati, daḷhaggahaṇabhāvato vā saṃyuttā ayanti pavattanti sattā yathābhinivesam etenāti **samayo**, diṭṭhi. Diṭṭhisamyojanena hi sattā ativiya bajjhantīti. Samiti saṅgati samodhānanti **samayo**, paṭilābho. Samassa yānam, sammā vā yānam apagamoti **samayo**, pahānam. Abhimukhaṃ ñāṇena sammā etabbo abhisametabboti **abhisamayo**, dhammānaṃ aviparīto sabhāvo. Abhimukhabhāvena sammā eti gacchati bujjhatīti **abhisamayo**, dhammānaṃ aviparītasabhāvāvabodho. Evaṃ tasmim tasmim atthe samayasaddassa pavatti veditabbā. Samayasaddassa atthuddhāre abhisamayasaddassa udāharaṇaṃ vuttanayena veditabbaṃ. Assāti samayasaddassa. **Kālo attho** samavāyādīnaṃ atthānaṃ idha asambhavato, desadesakaparisānaṃ viya suttassa nidānabhāvena kālassa apadisitabbato ca.

Kasmā panettha aniyamitavaseneva kālo niddiṭṭho, na utusaṃvaccharādivasena niyamevāti āha “**tattha kiñcāpī**”ti-ādi. Utusaṃvaccharādivasena niyamaṃ akatvā samayasaddassa vacane ayampi guṇo laddho hotīti dassento “**ye vā ime**”ti-ādimāha. Sāmaññajotanaṃ hi visese ātiṭṭhatīti. Tattha **diṭṭhadhammasukhavihārasamayo** devasikaṃ jhānasamāpattīhi vītināmanakālo, visesato sattasattāhāni. **Suppakāsāti** dasasahasilokadhātuyā

pakampana-obhāsapātubhāvādīhi pākaṭā. Yathāvuttabhedesu eva samayesu ekadesaṃ pakārantarehi saṅgahetvā dassetuṃ “yo cāyan”ti-ādimāha. Tathā hi nāṇakiccasamayo attahitappaṭipattisamayo ca abhisambodhisamayo, ariyatupphibhāvasamayo diṭṭhadhammasukhavihārasamayo, karuṇākiccaparahitappaṭipattidhammikathāsamayo desanāsamayoyeva.

Karaṇavacanena niddeso katoti sambandho. **Tatthāti** abhidhammavinayesu. **Tathāti** bhummakaraṇehi. **Adhikaraṇattho** ādhārattho. Bhāvo nāma kiriyā, kiriyāya kiriyantaralakkhaṇaṃ **bhāvenabhāvalakkhaṇaṃ**. Tattha yathā kālo sabhāvadhammaparicchinno sayam paramatthato avijjamānopi ādhārabhāvena paññāto¹ taṅkhaṇappavattānaṃ tato pubbe parato ca abhāvato “pubbaṇhe jāto, sāyanhe gacchatī”ti ca ādisu, samūho ca avayavavinimutto avijjamānopi kappanāmattasiddho avayavānaṃ ādhārabhāvena paññāpīyati “rukkhe sākha, yavarāsiyaṃ sambhūto”ti-ādisu, evaṃ idhāpīti dassento āha “**adhikaraṇaṃ -pa- dhammānaṃ**”ti. Yasmiṃ kāle, dhammapuñje vā kāmāvacaraṃ kusalaṃ cittaṃ uppannaṃ hoti, tasmīṃ eva kāle, dhammapuñje ca phassādayopi hontīti ayaṃ hi tattha attho. Yathā “gāvīsu duyhamānāsu gato, duddhāsu āgato”ti dohanakiriyāya gamanakiriyā lakkhīyati, evaṃ idhāpi “yasmiṃ samaye, tasmīṃ samaye”ti ca vutte “satī”ti ayamattho viññāyamāno eva hoti padatthassa sattāvirahābhāvatoti samayassa sattākiriyāya cittassa uppādakiriyā, phassādīnaṃ bhavanakiriyā ca lakkhīyatīti. **Yasmiṃ samayeti** yasmiṃ navame khaṇe, yasmiṃ yonisomanasikārādi hetumhi, paccayasamavāye vā sati kāmāvacaraṃ kusalaṃ cittaṃ uppannaṃ hoti, tasmīṃyeva khaṇe hetumhi paccayasamavāye ca phassādayopi hontīti ubhayattha samayasadde bhummaniddeso kato lakkhaṇabhūtabhāvayuttoti dassento āha “**khaṇa -pa- lakkhīyatī**”ti.

Hetu-attho karaṇattho ca sambhavati “annena vasati, ajjhenena vasati, pharasunā chindati, kudālena khaṇatī”ti-ādisu viya. Vītikkamaṃ hi sutvā bhikkhusaṃghaṃ sannipātāpetvā otiṇṇe vatthusmiṃ taṃ puggalaṃ

1. Paññatto (Sī)

paṭipucchitvā vigarahitvā ca taṃ taṃ vatthum otiṇṇakālaṃ anatikkamitvā teneva kālena sikkhāpadāni paññāpento bhagavā viharati sikkhāpadapaññattihetuṇca apekkhamāno tatiyapārājikādisu viya.

Accantameva ārambhato paṭṭhāya yāva desanāniṭṭhānaṃ parahitappaṭipattisaṅkhātena **karuṇāvihārena**. **Tadatthajotanatthanti** accantasāmyogatthajotanatthaṃ. **Upayogavacananiddeso kato** yathā “māsaṃ ajjhetī”ti. **Porāṇāti** aṭṭhakathācariyā. **Abhilāpamattabhedoti** vacanamattena viseso. Tena suttavinayesu vibhattibyattayo katoti dasseti.

Idāni “bhagavā”ti imassa atthaṃ dassento āha “**bhagavāti garū**”ti-ādi. **Bhagavāti vacanaṃ seṭṭhanti** seṭṭhavācakaṃ vacanaṃ, seṭṭhaguṇasahacaraṇaṃ seṭṭhanti vuttaṃ. Atha vā vuccatīti vacanaṃ, attho. Yasmā yo “bhagavā”ti vacanena vacanīyo attho, so seṭṭhoti attho. **Bhagavāti vacanamuttamanti** etthāpi eseva nayo. **Gāravayuttoti** garubhāvayutto garugūṇayogato. Garukaraṇaṃ vā sātisaṃyamaṃ arahatīti gāravayutto, gāravārahoti attho. Sippādisikkhāpakā garū honti, na ca gāravayuttā, ayaṃ pana tādiso na hoti, tasmā garūti vatvā gāravayuttoti vuttanti keci. **Vuttoyeva**, na idha vattabbo visuddhimaggassa imissā aṭṭhakathāya ekadesabhāvatoti adhippāyo.

Dhammasarīyaṃ paccakkhaṃ karotīti “yo vo ānanda mayā dhammo ca vinayo ca desito paññatto, so vā mamaccayena satthā”ti¹ vacanato dhammassa satthubhāvapariyāyo vijjatīti katvā vuttaṃ.

Vajirasaṅghātasamānakāyo parehi abhejjasarīrattā. Na hi bhagavato rūpakāye kenaci sakkā antarāyo² kātunti. **Desanāsampattiṃ niddisati** vakkhamānassa sakalasuttassa evanti niddisanato. **Sāvakasampattiṃ niddisati** paṭisambhidāpattena pañcasu ṭhānesu bhagavatā etadagge ṭhapitena mayā mahāsāvakena sutāṃ, taṅca kho mayā sutāṃ, na anussutikaṃ, na paramparābhatanti imassa atthassa dīpanato. **Kālasampattiṃ niddisati** “bhagavā”ti padassa sannidhāne payuttassa samayasaddassa kālassa

1. Dī 2. 126 piṭṭhe.

2. Antarāyaṃ (Sī, Ka)

buddhuppādappaṭimaṇḍitabhāvadīpanato. Buddhuppādaparamā hi
kālasampadā. Tenetaṃ vuccati—

“Kappakasāye kaliyuge, buddhuppādo aho mahacchariyaṃ.
Hutāvahamajjhe jātaṃ, samuditamakarandamaravindan”¹.

Bhagavāti desakasampattiṃ niddisati

guṇavisiṭṭhasattuttamagarugāravādhivacanabhāvato.

Evamṇāmake nagareti kathaṃ panetaṃ nagaraṃ evamṇāmakeṃ jātanti?
Vuccate, yathā kākandassa isino nivāsaṭṭhāne māpitā nagarī kākandī,
mākandassa nivāsaṭṭhāne māpitā mākandī, kusambassa nivāsaṭṭhāne māpitā
kosambīti vuccati, evaṃ savatthassa isino nivāsaṭṭhāne māpitā nagarī
sāvattīti vuccati. Evaṃ tāva akkharacintakā vadanti. Aṭṭhakathācariyā pana
bhaṇanti “yaṃ kiñci manussānaṃ upabhogaparibhogaṃ, sabbamettha atthīti
sāvattīti. Satthasamāyoge ca ‘kiṃ bhaṇḍamatthī’²ti pucchite ‘sabbamatthī’³ti
vacanamupādāya sāvattīti.

Sabbadā sabbūpakaraṇaṃ, sāvattīyaṃ samohitaṃ.
Tasmā sabbamupādāya, sāvattīti pavuccati².

Kosalānaṃ puraṃ rammaṃ, dassaneyyumaṃ manoramaṃ.
Dasahi saddehi avivittaṃ, annapānasamāyutaṃ.

Vuddhiṃ vepullataṃ pattāṃ, iddhaṃ phītaṃ manoramaṃ.
Ālakamandāva devānaṃ, sāvattīpuramuttamaṃ”³.

Avisesenāti na visesena, vihārabhāvasāmaññenāti attho. **Iriyāpatha -pa-
vihāresūti** iriyāpathavihāro dibbavihāro brahmavihāro ariyavihāroti etesu
catūsu vihāresu. **Samaṅgiparidīpananti** samaṅgibhāvaparidīpanaṃ. **Etanti**
viharatīti etaṃ padaṃ. Tathā hi taṃ “idhekacco gihisaṃsaṭṭho viharati
sahanandī sahasokī”⁴ti-ādīsu⁴ iriyāpathavihāre āgataṃ, “yasmaṃ samaye
bhikkhave bhikkhu vivicceva

1. Dī-Ṭī 1. 48; Saṃ-Ṭī 1. 39 piṭṭhesu.

2. Ma-Ṭī 1. 62; Khuddakapāṭha-Ṭī 94; Udāna-Ṭī 50; Paṭisaṃ-Ṭī 2. 127 piṭṭhesu.

3. Ma-Ṭī 1. 62; Khuddakapāṭha-Ṭī 94 piṭṭhesu.

4. Saṃ 2. 387 piṭṭhe.

kāmehi paṭhamam jhānam upasampajja viharatī”ti-ādīsu¹ dibbavihāre, “so mettāsahagatena cetasā ekaṁ disaṁ pharitvā viharatī”ti-ādīsu² brahmavihāre, “so khohaṁ aggivessana tassāyeva kathāya pariyoṣāne tasmiṇyeva purimasmiṁ samādhinimitte ajjhattameva cittaṁ saṇṭhapemi sannisāдеми ekodiṁ karomi, samādahāmi, yena sudam niccakappaṁ viharāmi”ti-ādīsu³ ariyavihāre.

Tattha iriyaṇaṁ pavattanaṁ iriyā, kāyappayogo. Tassā pavattanūpāyabhāvato ṭhānādi **iriyāpatho**. Ṭhānasamaṅgī vā hi kāyena kiñci kareyya gamanādisu aññatarasamaṅgī vā. Atha vā iriyati pavattati etena attabhāvo, kāyakiccaṁ vāti iriyā, tassā pavattiyā upāyabhāvato pathoti iriyāpatho, ṭhānādi eva. So ca atthato gatinivatti-ādi-ākārena pavatto catusantatirūpappabandho eva. Viharaṇaṁ, viharati etenāti vā **vāhāro**. Divi bhavo dibbo, tattha bahulappavattiyā brahmapārisajjādevaloke bhavoti attho. Tattha yo dibbānubhāvo, tadatthāya saṁvattatīti vā dibbo, abhiññābhinihāravasena mahāgatikattā vā dibbo, dibbo ca so vihāro cāti **dibbavihāro**, catasso rūpāvacarasamāpattiyo. Arūpasamāpattiyopi ettheva saṅgahaṁ gacchanti. Brahmānaṁ, brahmāno⁴ vā vihārā **brahmavihārā**, catasso appamaññāyo. Ariyo, ariyaṇaṁ vā vihāro **ariyavihāro**, cattāri sāmaññaphalāni. **So hi ekaṁ iriyāpathabāddhananti**-ādi yadipi bhagavā ekenapi iriyāpathena cirataraṁ kālāṁ attabhāvaṁ pavattetuṁ sakkoti, tathāpi upādinnakasarīrassa ayaṁ sabhāvoti dassetuṁ vuttaṁ. Yasmā vā bhagavā yattha katthaci vasanto veneyyānaṁ dhammaṁ desento nānāsamāpattihi ca kālāṁ vītināmento vasatīti sattānaṁ attano ca vividhahitasukhaṁ harati upaneti uppādeti, tasmā vividhaṁ haratīti viharatīti evamettha attho veditabbo.

1. Abhi 1. 116; Abhi 2. 274 piṭṭhesu.

2. Dī 1. 234; Dī 3. 187; Ma 1. 46, 371, 411; Ma 2. 263, 269, 405, 422; Ma 3. 185; Abhi 2. 284 piṭṭhesu.

3. Ma 1. 316 piṭṭhe.

4. Brahmuno (Sī)

Jetassa rājakumārassāti ettha attano paccatthikajanaṃ jinātīti jeto. Sotasaddo viya hi kattusādhano jetasaddo. Atha vā raññā pasenadikosalena attano paccatthikajane jite jātoti jeto. Rañño hi jayaṃ āropetvā kumāro jītavāti jetoti vutto. Maṅgalakāmatāya vā tassa evaṃnāmaeva katanti jeto. Maṅgalakāmatāya hi jeyyoti etasmim atthe jetoti vuttaṃ. **Vitthāro panāti-**ādinā “anāthapiṇḍikassa ārāme”ti ettha sudatto nāma so gahapati mātāpitūhi katanāmasasena, sabbakāmasamiddhatāya pana vigatamaccheratāya karuṇādiguṇasamaṅgitāya ca niccakālaṃ anāthānaṃ piṇḍamadāsi. Tena anāthapiṇḍikoti saṅkhaṃ gato. Āramanti ettha pāṇino, visesena vā pabbajitāti **ārāmo**, tassa pupphaphalādisobhāya nātīdūranaccāsannatādīpañcavidhasenāsanaṅgasampattiyā ca tato tato āgamma ramanti abhiramanti, anukkaṇṭhitā hutvā nivasantīti attho. Vuttappakārāya vā sampattiyā tattha tattha gatepi attano abbhantaramyeva ānetvā rametīti **ārāmo**. So hi anāthapiṇḍikena gahapatinā jetassa rājakumārassa hatthato aṭṭhārasahiraññakoṭīhi santhārena kiṇitvā aṭṭhārasahiraññakoṭīhi senāsanaṇi kārāpetvā aṭṭhārasahiraññakoṭīhi vihāramahaṃ niṭṭhāpetvā evaṃ catupaññāsahiraññakoṭipariccāgena buddhappamukhassa bhikkhusaṅghassa niyyātito, tasmā “anāthapiṇḍikassa ārāmo”ti vuccatīti imamatthaṃ nidasseti.

Tatthāti “ekaṃ samayaṃ bhagavā sāvatthiyaṃ viharati jetavane anāthapiṇḍikassa ārāme”ti yaṃ vuttaṃ vākyam, tattha. **Siyāti** kassaci evaṃ parivitaṅko siyā, vakkhamānākārena kadāci codeyya vāti attho. **Atha tattha viharatīti** yadi jetavane anāthapiṇḍikassa ārāme viharati. **Na vattabbanti** nānāṭhānabhūtattā sāvatthijetavanānaṃ, “ekaṃ samayaṃ”ti ca vuttattāti adhippāyo. Idāni codako tameva attano adhippāyaṃ “**na hi sakkā**”ti-ādinā vivarati. Itaro sabbametaṃ aviparītaṃ atthaṃ ajānantena tayā vuttanti dassento “**na kho panetaṃ evaṃ datṭhabban**”ti-ādimāha. Tattha **etanti** “sāvatthiyaṃ viharati jetavane anāthapiṇḍikassa ārāme”ti etaṃ vacanaṃ. **Evanti** “yadi tāva

bhagavā”ti-ādinā yaṃ taṃ bhavatā coditaṃ, taṃ atthato evaṃ na kho pana daṭṭhabbaṃ, na ubhayattha apubbaṃ acarimaṃ vihāradassanattanti attho. Idāni attanā yathādhippetam aviparītamattam, tassa ca paṭikacceva vuttabhāvaṃ, tena ca appaṭividdhataṃ pakāsento **“nanu avocumha -pa-jetavane”**ti āha. Evampi “jetavane anāthapiṇḍikassa ārāme viharati”cceva vattabbaṃ, na “sāvatthiyan”ti codanaṃ manasi katvā vuttaṃ **“gocaragāmanidassanattan”**ti-ādi.

Avassaṃ cettha gocaragāmakittanaṃ kattabbaṃ. Tathā hi taṃ yathā jetavanādikittanaṃ pabbajitānuggahakaraṇādi-ane-kappayojanaṃ, evaṃ gocaragāmakittanampi gahaṭṭhānuggahakaraṇādīvidhapayojananti dassento **“sāvattvivacanenā”**ti-ādimāha. Tattha paccayaggahaṇena upasaṅkamapayirupāsanaṇaṃ okāsadānena dhammadesanāya saraṇesu silesu ca paṭiṭṭhāpanena yathūpanissayaṃ uparivisesādhigamāvahanena ca **gahaṭṭhānuggahakaraṇaṃ**, uggahaparipucchānaṃ kammaṭṭhānānuyogassa ca anurūpavasanaṭṭhānapariggahenettha **pabbajitānuggahakaraṇaṃ** veditabbaṃ. **Karuṇāya upagamaṇaṃ**, na lābhādinimittaṃ¹. **Paññāya apagamaṇaṃ**, na virodhādinimittanti upagamaṇāpagamaṇaṇaṃ nirupakkilesataṃ vibhāveti. **Dhammikasukhaṃ** nāma anavajjasukhaṃ. **Devatānaṃ upakārabahulatā** janavivittatāya. Pacurajanavivittaṃ hi ṭhānaṃ devā upasaṅkamitabbaṃ maññanti. **Tadatthapariniṭṭhādananti** lokatthanipphādanaṃ, buddhakiccasampādananti attho. **Evamādināti ādi**-saddena sāvattvikittanena rūpakāyassa anuggaṇhanaṃ dasseti jetavanādikittanena dhammakāyassa. Tathā purimena parādhīnakiriyākaraṇaṃ, dutiyena attādhīnakiriyākaraṇaṃ. Purimena vā karuṇākiccaṃ, itarena paññākiccaṃ. Purimena cassa paramāya anukampāya samannāgamaṃ, pacchimena paramāya upekkhāya samannāgamaṃ dīpeti. Bhagavā hi sabbasatte paramāya anukampāya anukampati, na ca tattha sinehadosānupatito paramupekkhakabhāvato. Upekkhako ca na parahitasukhakarāṇe appossukko mahākāruṇikabhāvato. Tassa mahākāruṇikatāya lokanāthatā, upekkhakatāya attanāthatā.

Tathā hesa bodhisattabhūto mahākāruṇāya saṅcoditamānaso sakalalokahitāya ussukkamāpanno mahābhinihārato

1. Na bhojanalābhādinimittaṃ (Si)

paṭṭhāya tadatthanipphādanatthaṃ puññañāṇasambhāre sampādentō aparimitaṃ kālaṃ anappakaṃ dukkhamanubhosi, upekkhakatāya sammā patitehi dukkhehi na vikampitatā. Mahākāruṇikatāya saṃsārābhimukhatā, upekkhakatāya tato nibbindanā. Tathā upekkhakatāya nibbānābhimukhatā, mahākāruṇikatāya tadadhiḡamo. Tathā mahākāruṇikatāya paresaṃ ahimsāpanaṃ, upekkhakatāya sayāṃ parehi abhāyaṇaṃ. Mahākāruṇikatāya paraṃ rakkhato attano rakkhaṇaṃ, upekkhakatāya attānaṃ rakkhato paresaṃ rakkhaṇaṃ. Tenassa attahitāya paṭipannādīsū catutthapuggalabhāvo siddho hoti. Tathā mahākāruṇikatāya saccādhītṭhānassa ca cāḡadhītṭhānassa ca pāripūrī, upekkhakatāya upasamādhītṭhānassa ca paññādhītṭhānassa ca pāripūrī. Evaṃ parisuddhāsāyappayogassa mahākāruṇikatāya lokahitatthameva rajjasampadādibhavasampattiyā upagamaṇaṃ, upekkhakatāya tiṇāyapi amaññaṃānassa tato apagamaṇaṃ. Iti suvisuddha-upagamāpagamassa mahākāruṇikatāya lokahitatthameva dānavasena sampattīnaṃ pariccajanā, upekkhakatāya cassa phalassa attano apaccāsīsaṇā. Evaṃ samudāgamanato paṭṭhāya acchariyabbhutaḡaṇasamannāḡatassa mahākāruṇikatāya paresaṃ hitasukhatthaṃ atidukkarakāritā, upekkhakatāya kāyampi anāmaṃkāritā¹.

Tathā mahākāruṇikatāya carimattabhāve jīṇṇaturamatadassanena sañjātasāṃvego, upekkhakatāya uḷāresu devabhogasadisesu bhogesu nirapekkho mahābhinnikkhamaṇaṃ nikkhami². Tathā mahākāruṇikatāya “kicchaṃ vatāyaṃ loko āpanno”ti-ādinā³ karuṇāmukheneva vipassanārambho, upekkhakatāya buddhabhūtassa satta sattāhāni vivekasukheneva vītināmaṇaṃ. Mahākāruṇikatāya dhammagambhīrataṃ paccavekkhitvā dhammadesanāya appossukkaṇaṃ āpajjitvāpi mahābrahmuno ajjesanāpadesena okāsakaraṇaṃ, upekkhakatāya pañcavaggiyādiveneyyānaṃ ananurūpasamudācārepi anaññathābhāvo. Mahākāruṇikatāya katthaci paṭiḡhātābhāvenassa sabbattha amittasaññābhāvo, upekkhakatāya katthacipi anurodhābhāvena sabbattha sinehasanthavābhāvo. Mahākāruṇikatāya paresaṃ pasādanā,

1. Anamaṃkāritā (Ka) 2. Nikkhamittha (Ka) 3. Dī 2. 26; Saṃ 1. 246, 251 piṭṭhesu.

upekkhakatāya pasannākārehi na vikampanā. Mahākāruṇikatāya dhammānurāgābhāvena tattha ācariyaṃuṭṭhi-abhāvo, upekkhakatāya sāvakanurāgābhāvena parivāraparikammatābhāvo. Mahākāruṇikatāya dhammāṃ desetum parehi saṃsaggamupagacchatopi upekkhakatāya na tattha abhirati. Mahākāruṇikatāya gāmadīnaṃ āsannaṭṭhāne vasatopi upekkhakatāya araṇṇaṭṭhāne eva viharaṇaṃ. Tena vuttaṃ **“purimenassa paramāya anukampāya samannāgamaṃ dīpeti”**ti.

Tanti tatrāti padaṃ. “Desakālaparidīpanan”ti ye desakālā idha viharaṇakiriyāvisesanabhāvena vuttā, tesāṃ paridīpananti dassento **“yaṃ samayaṃ -pa- dīpeti”**ti āha. Taṃ-saddo hi vuttassa atthassa paṭiniddeso, tasmā idha kālassa desassa vā paṭiniddeso bhavitumarahati, na aññassa. Ayaṃ tāva tatra-saddassa paṭiniddesabhāve atthavibhāvanā. Yasmā pana īdisesu ṭhānesu tatra-saddo dhammadesanāvisiṭṭhaṃ desakālaṃca vibhāveti, tasmā vuttaṃ **“bhāsitaḥ bayutte vā desakāle dīpeti”**ti. Tena tatrāti yatra bhagavā dhammadesanattamaṃ bhikkhū ālapati bhāsati, tādise dese, kāle vāti attho. **Na hīti**-ādinā tamevattham samattheti. Nanu ca yattha ṭhito bhagavā **“akālo kho tāvā”**ti-ādinā bāhiyassa dhammadesanaṃ paṭikkhipi, tattheva antaravīthiyaṃ ṭhito tassa dhammaṃ desesīti? Saccametaṃ, adesetabbakāle adesaṇāya idaṃ udāharaṇaṃ. Tenevāha **“akālo kho tāvā”**ti.

Yaṃ pana tattha vuttaṃ “antaraghamaṃ pavīṭṭhamhā”ti, tampi tassa akālabhāvasseva pariyāyena dassanattamaṃ vuttaṃ. Tassa hi tadā addhānaparissamena rūpakāye, akammaññatā ahosi, balavapīṭivegena nāmakāye. Tadubhayassa vūpasamaṃ āgamento papañcaparihārattham bhagavā **“akālo kho”**ti pariyāyena paṭikkhipi. Adesetabbadesse adesaṇāya pana udāharaṇaṃ **“atha kho bhagavā maggā okkamma aññatarasmim rukkhamaṇe nisīdi¹, vihārapacchāyāyaṃ paññatte āsane nisīdi²”**ti² ca evamādikaṃ idha ādisaddena saṅgahitaṃ. **“Atha kho so bhikkhave bālo idha pubbe nesādo idha pāpāni kammāni karitvā”**ti-ādīsu³ padapūraṇamatte kho-saddo, **“dukkhaṃ kho agāravo**

1. Saṃ 1. 420 piṭṭhe.

2. Dī 1. 145 piṭṭhe.

3. Ma 3. 206 piṭṭhe.

viharati appatissu”ti-ādīsu¹ avadhāraṇe, “kittāvatā nu kho āvuso satthu pavivittassa viharato sāvakā vivekaṃ nānusikkhantī”ti-ādīsu² ādikālatthe, vākyārambheti attho. Tattha padapūraṇena vacanālaṅkāramattaṃ kataṃ hoti, ādikālatthena vākyassa upaṇṇāsamattaṃ. Avadhāraṇatthena pana niyamadassanaṃ, tasmā āmantesi evāti āmantane niyamo dassito hoti.

Bhagavāti lokagarudīpananti kasmā vuttaṃ, nanu pubbepi bhagavāsaddassa attho vuttoti? Yadipi vutto, taṃ panassa yathāvutte ṭhāne viharaṇakiriyāya kattu visesadassanattham kataṃ, na āmantanakiriyāya, idha paja āmantanakiriyāya, tasmā tadattham puna “bhagavā”ti pāḷiyaṃ vuttanti tassattham dassetuṃ “bhagavāti lokagarudīpanan”ti āha. Tena lokagarubhāvato tadanurūpaṃ paṭipattiṃ patthento attano santikaṃ upagatānaṃ bhikkhūnaṃ ajjhāsayanurūpaṃ dhammaṃ desetuṃ te āmantesīti dasseti. **Kathāsavanayuttapuggalavacananti** vakkhamānāya cittapariyādānadesanāya savanayoggapuggalavacananaṃ. Catūsupi parisāsu bhikkhū eva edisānaṃ desanānaṃ visesena bhājanabhūtāti sātisaṃ sāsanasamapaṭiggāhakabhāvadassanattham idha bhikkhuggahaṇanti dassetvā idāni saddattham dassetuṃ “**apicā**”ti-ādimāha. Tattha **bhikkhakoti bhikkhūti** bhikkhanadhammatāya bhikkhūti attho. **Bhikkhācariyaṃ ajjhupagatoti** buddhādīhi ajjhupagataṃ bhikkhācariyaṃ uñchācariyaṃ ajjhupagatatā anuṭṭhitattā bhikkhu. Yo hi appaṃ vā mahantaṃ vā bhogakkhandhaṃ pahāya agārasmā anagāriyaṃ pabbajito, so kasigorakkhādijīvikākappanaṃ hitvā līngasamapaṭicchaneneva bhikkhācariyaṃ ajjhupagatatā bhikkhu, parappaṭibaddhajīvikattā vā vihāramajjhe kājabhattaṃ bhuñjamānopi bhikkhācariyaṃ ajjhupagatoti bhikkhu, piṇḍiyālopabhojanaṃ nissāya pabbajjāya ussāhajātattā vā bhikkhācariyaṃ ajjhupagatoti bhikkhūti evamettha attho daṭṭhobbo. **Ādinā nayanāti** “chinnabhinnapaṭadharoti bhikkhu, bhindati pāpake akusale dhammeti bhikkhu, bhinnattā pāpakānaṃ akusalānaṃ dhammānaṃ bhikkhū”ti-ādinā **vibhaṅge**³ āgatanayena. **Ñāpaneti** avabodhane, paṭivedaneti attho.

1. Am 1. 328 piṭṭhe.

2. Ma 1. 17 piṭṭhe.

3. Abhi 2. 254 piṭṭhe.

Bhikkhanasīlatāti bhikkhanena jīvanasīlatā, na kasivāṇijjādīnā jīvanasīlatā. **Bhikkhanadhammatā**ti “uddissa ariyā tiṭṭhanti”¹ti evaṃ vuttā bhikkhanasabhāvatā, na yācanakohaṇṇasabhāvatā. **Bhikkhane sādhu-kāritā**ti “uttiṭṭhe nappamajjeyyā”²ti vacanaṃ anussaritvā tattha appamajjanā. Atha vā **sīlaṃ** nāma pakatisabhāvo, idha pana tadadhiṭṭhānaṃ. **Dhammoti** vataṃ. **Sādhu-kāritā**ti sakkaccakāritā ādarakiriya. **Hīnādhikajanasevanti** ye bhikkhubhāve ṭhitāpi jātimadādivasena uddhatā unnaḷā, ye ca gihibhāve paresaṃ adhi-kabhāvampi anupagatatā bhikkhācariyaṃ paramakāruṇṇatamaṇṇanti, tesāṃ ubhayesampi yathākkamaṃ “bhikkhavo”ti vacanena hīnajanehi daliddehi paramakāruṇṇatamaṃ pattehi parakulesu bhikkhācariyāya jīvikaṃ kappentehi sevitaṃ vuttiṃ pakāsento **uddhatabhāvaniggahaṃ karoti**. Adhikajanehi uḷārabhogakhattiyakulādito pabbajitehi buddhādīhi ājīva-visodhanattham sevitaṃ vuttiṃ pakāsento dīnabhāvaniggahaṃ karotīti yojetabbaṃ. Yasmā “bhikkhavo”ti vacanaṃ āmantanabhāvato abhimukhikaraṇaṃ, pakaraṇato sāmattiya-to ca sussusājananaṃ sakkaccasavanamanasikāraṇiyojanaṇca hoti, tasmā tamattham dassento “**bhikkhavoti iminā**”ti-ādimāha. Tattha **sādhukaṃ savanamanasikāreti** sādhukasavane sādhukamanasikāre ca. Kathaṃ pana pavattitā savanādayo sādhukaṃ pavattitā hontīti? “Addhā imāya sammāpaṭipattiyaṃ sakalasāsanasampatti hatthagatā bhavissatī”ti ādaragāravayogena kathādīsu aparibhavādīnā ca. Vuttaṃ hi “pañcahi bhikkhave dhammehi samannāgato suṇanto saddhammaṃ bhabbo niyāmaṃ okkamituṃ kusalesu dhammesu sammattaṃ. Katameti pañcahi? Kathaṃ na paribhoti, kathitaṃ na paribhoti, na attānaṃ paribhoti, avikkhattacitto dhammaṃ suṇāti ekaggacitto, yoniso ca manasikaroti. Imehi kho bhikkhave pañcahi dhammehi samannāgato suṇanto saddhammaṃ bhabbo niyāmaṃ okkamituṃ kusalesu dhammesu sammattaṃ”³. Tenevāha “**sādhukaṃ savanamanasikārāyattā hi sāsanasampattī**”ti.

Pubbe sabbaparisa-sādhāraṇattepi bhagavato dhammadesanāya “jeṭṭhaseṭṭhā”ti-ādīnā bhikkhūnaṃ eva āmantane kāraṇaṃ dassetvā idāni

1. Khu 5. 162 piṭṭhe.

2. Khu 1. 18 piṭṭhe Dhammapade.

3. Am 2. 154 piṭṭhe.

bhikkhū āmantetvāva dhammadesanāya payojanaṃ dassetuṃ “**kimatthaṃ pana bhagavā**”ti codanaṃ samuṭṭhāpeti. Tattha **aññaṃ cintenti** aññavihitā. **Vikkhittacittā**ti asamāhitacittā. **Dhammaṃ paccavekkhantā**ti hiyyo tato paraṃ divasesu vā sutadhammaṃ pati pati manasā avekkhantā. Bhikkhū āmantetvā dhamme desiyamāne ādito paṭṭhāya desanaṃ sallakkhetuṃ sakkontīti imamatthaṃ byatirekamukhena dassetuṃ “**te anāmantetvā**”ti-ādi vuttaṃ.

Bhikkhavoti cettha sandhivasena i-kāralopo daṭṭhabbo. **Bhikkhavo itīti** ayaṃ **iti**-saddo hetuparisamāpanādi-atthapadatthavipariyāya pakārāvadadhāraṇanidassanādi-aneakatthappabhedo. Tathā hesa “ruppatīti kho bhikkhave, tasmā rūpanti vuccatī”ti-ādīsu¹ hetvatthe dissati. “Tasmātiha me bhikkhave dhammadāyādā bhavatha, mā āmisadāyādā. Atthi me tumhesu anukampā. Kinti me sāvaka dhammadāyādā bhaveyyuṃ, no āmisadāyādā”ti-ādīsu² parisamāpane. “Iti vā iti evarūpā naccagītavāditavisūkadassanā paṭivirato”ti-ādīsu³ ādi-atthe. “Māgaṇḍiyoti tassa brahmaṇassa saṅkhā samañña paññatti vohāro nāmaṃ nāmakammaṃ nāmadheyyaṃ nirutti byañjanamabhilāpo”ti-ādīsu⁴ padatthavipariyāye. “Iti kho bhikkhave sappatibhayo bālo, appatibhayo paṇḍito, sa-upaddavo bālo, anupaddavo paṇḍito, sa-upasaggo bālo, anupasaggo paṇḍito”ti-ādīsu⁵ pakāre. “Atthi idappaccayā jarāmaraṇanti puṭṭhena satā ‘ānanda atthi’ tissa vacanīyaṃ. ‘Kim paccayā jarāmarāṇaṃ’ti iti ce vadeyya. Jātipaccayā jarāmarāṇaṃ iccassa vacanīyaṃ”ti-ādīsu⁶ avadhāraṇe. “Atthīti kho kaccāna ayameko anto, natthīti kho kaccāna ayaṃ dutiyo anto”ti-ādīsu⁷ nidassane. Idhāpi nidassane eva daṭṭhabbo. Bhikkhavoti hi āmantanākāro. Tamesa iti-saddo nidasseti “bhikkhavoti āmantesi”ti. Iminā nayena “bhaddante”ti-ādīsupi yathārahaṃ iti-saddassa attho veditabbo. Pubbe “bhagavā āmantesi”ti vuttattā “bhagavato

1. Saṃ 2. 71 piṭṭhe.

2. Ma 1. 16 piṭṭhe.

3. Dī 1. 6 piṭṭhe.

4. Khu 7. 144, 148 piṭṭhesu.

5. Ma 3. 107 piṭṭhe.

6. Dī 2. 47 piṭṭhe.

7. Saṃ 1. 258; Saṃ 2. 110 piṭṭhesu.

paccassosun”ti idha “bhagavato”ti sāmivacanāṃ āmantanameva sambandhi-
 antaraṃ apekkhatīti iminā adhippāyena **“bhagavato āmantanaṃ paṭi-
 assosun”**ti vuttaṃ, “bhagavato”ti pana idaṃ paṭissavasambandhena
 sampadānavacanāṃ yathā “devadattāya paṭissuṇotī”ti. Yaṃ nidānaṃ
 bhāsitaṃ sambandho. **Imassa suttassa sukhāvagāhaṇatthanti**
 tamalakavalayujjalavimalasādurasasilāya pokkharāṇiyā
 sukhāvatarāṇatthaṃ nimmalasilātalaracanāvīlāsasobhitaratanasopānaṃ
 vippakiṇṇamuttātālasadisavālukaṇṇapaṇḍarabhūmibhāgaṃ titthaṃ viya
 suvibhattabhittivicitravedikāparikkhattassa nakkhattapathaṃ
 phusitukāmatāya viya paṭivijambhitasamussayassa pāsādarassa
 sukhārohanatthaṃ
 dantamayasaṇhamuduphalakaṇṇanālatāvinaddhamāṇigaṇappabhāsamudayujj
 alasobhaṃ sopānaṃ viya
 suvaṇṇavalayanūpurādisaṃghaṭṭanasaddasammissitassa
 kathitahasitamadhurassaragehajanaviṇṇambhi tavacaritassa ulāra-
 issariyavibhavasobhitassa mahāgharassa sukhappavesanatthaṃ
 suvaṇṇarajatamaṇimuttāpavālādiṇṇavissaravijjotitasuppatiṭṭhitavisāladvārābā
 haṃ mahādvāraṃ viya ca atthabyañjanasampannassa buddhānaṃ
 desanāñāṇagambhīrabhāvasaṃsūcakassa imassa suttassa sukhāvagāhatthaṃ.

Etthāha “kimatthaṃ pana dhammavinayasaṅgahe kayiramāne
 nidānavacanāṃ, nanu bhagavatā bhāsita vacanasseva saṅgaho kātabbo”ti?
 Vuccate, desanāya ṭhiti-asammosasaddheyyabhāvasampādanatthaṃ.
 Kāladesadesakanimittaparisāpadesehi upanibandhitvā ṭhapitā hi desanā
 ciraṭṭhitikā hoti asammosadhammā saddheyyā ca.
 Desakālakattuhetunimittehi upanibaddho viya vohāravinicchayo. Teneva ca
 āyasmataṃ mahākassapena “cittapariyādānasuttaṃ āvuso ānanda kattha
 bhāsitaṃ”ti-ādinā desādiṇṇapucchāsu katāsu tāsāṃ vissajjanaṃ karontena
 dhammabhaṇḍāgārikena “evaṃ me sutā”ti-ādinā imassa suttassa nidānaṃ
 bhāsitaṃ. Apica satthusampattippakāsanatthaṃ nidānavacanāṃ.
 Tathāgatassa hi bhagavato pubbacaraṇānumānāgamatakkābhāvato
 sammāsambuddhabhāvasiddhi. Na hi sammāsambussa pubbacaraṇādīhi
 attho atthi sabbattha appaṭihatañāṇacāratāya ekappamāṇattā ca
 ñeyyadhammesu. Tathā
 ācariyamuttidhammamacchariyasāsanasāvakānānurāgābhāvato
 khīṇāsavabhāvasiddhi. Na hi sabbaso khīṇāsavassa te sambhavantīti
 suvisuddhassa parānuggahappavatti.

Evam desakasaṁkilesabhūtānaṁ diṭṭhisīlasampadādūsakānaṁ
 avijjātāṇhānaṁ accantābhāvasaṁsūcakehi
 ñāṇappahānasampadābhiyañjanakehi ca sambuddhavisuddhabhāvehi
 purimavesārajjadvayasiddhi, tato ca antarāyikaniiyānikadhammesu
 sammohābhāvasiddhito pacchimavesārajjadvayasiddhīti bhagavato
 catuvesārajjasamannāgamo attahitaparahitappaṭipatti ca nidānavacanena
 pakāsītā hoti. Tattha tattha sampattaparīsāya ajjhāsayanurūpaṁ
 ṭhānuppattikappaṭibhānena dhammadesanādīpanato, idha pana
 rūpagarukānaṁ puggalānaṁ ajjhāsayanurūpaṁ ṭhānuppattikappaṭibhānena
 dhammadesanādīpanatoti yojetabbaṁ. Tena vuttaṁ
 “satthusampattippakāsanatthaṁ nidānavacanan”ti.

Tathā sāsanasampattippakāsanatthaṁ nidānavacanānaṁ.
 Ñāṇakaruṇāpariggahitasabbakiriyassa hi bhagavato natthi niratthakā
 paṭipatti, attahitatthā vā. Tasmā paresaṁ eva atthāya pavattasabbakiriyassa
 sammāsambuddhassa sakalampi kāyavacīmanokammaṁ yathāpavattaṁ
 vuccamānaṁ diṭṭhadhammikasamparāyikaparamatthehi yathārahaṁ
 sattānaṁ anusāsanatṭhena sāsanaṁ, na kapparacanā. Tayidaṁ satthucaritaṁ
 kāladesadesakaparīsāpadeschi saddhiṁ tattha tattha nidānavacanehi
 yathārahaṁ pakāsīyati. “Idha pana rūpagarukānaṁ puggalānaṁ”ti-ādi
 sabbaṁ purimasadisameva. Tena vuttaṁ “sāsanasampattippakāsanatthaṁ
 nidānavacanan”ti. Apica satthuno pamāṇabhāvappakāsanena vacanena
 sāsanaṁ pamāṇabhāvadassanatthaṁ nidānavacanānaṁ, taṁca
 desakappamāṇabhāvadassanaṁ heṭṭhā vuttanayānusārena “bhagavā”ti ca
 iminā padena vibhāvitanti veditabbaṁ. Bhagavāti hi tathāgatassa
 rāgadosamohādisabbakilesamaladuccaritadosappahānadīpanena vacanena
 anaññasādhāraṇasuparisuddhañāṇakaruṇādiguṇavisesayogaparidīpanena tato
 eva sabbasattuttamabhāvadīpanena ayamatto sabbathā pakāsito hotīti.
 Idamettha nidānavacanappayojanassa mukhamattanidassanaṁ.

Nikkhittassāti desitassa. Desanā hi desetabbassa sīlādi-atthassa
 veneyyasantānesu nikkhipanato “nikkhepo”ti vuccati. **Suttanikkhepaṁ**
vicāretvā vuccamānā pākāṭā hotīti sāmāññato bhagavato desanāya
 samuṭṭhānassa vibhāgaṁ dassetvā “etthāyaṁ desanā evaṁsamuṭṭhānā”ti
 desanāya samuṭṭhāne dassite suttassa sammadeva nidānaparijānanena
 vaṇṇanāya suviññeyyattā vuttaṁ. Tattha

yathā anekasata-anekasahassabhedānipi suttantāni
 samkilesabhāgiyādipaṭṭhānanayavasena soḷasavidhataṃ nātivattanti, evaṃ
 attajjhāsayādisuttanikkhepavasena catubbidhabhāvanti āha “**cattāro hi
 suttanikkhepā**”ti. Ettha ca yathā attajjhāsayassa aṭṭhuppattiyā ca
 parajjhāsayapucchāhi saddhiṃ saṃsaggabhedo sambhavati “attajjhāsayo ca
 parajjhāsayo ca, attajjhāsayo ca pucchāvasiko ca, aṭṭhuppattiko ca
 parajjhāsayo ca, aṭṭhuppattiko ca pucchāvasiko cā”ti
 ajjhāsayapucchānusandhisabbhāvato, evaṃ yadipi aṭṭhuppattiyā
 attajjhāsayenapi saṃsaggabhedo sambhavati, attajjhāsayādīhi pana purato
 ṭhitehi aṭṭhuppattiyā saṃsaggo natthīti na idha niravaseso vitthāranayo
 sambhavatīti cattāro suttanikkhepā”ti vuttaṃ. Tadantogadhattā vā
 sesanikkhepānaṃ mūlanikkhepavasena cattārova dassitā. Yathādassanaṃ
 hettha ayaṃ saṃsaggabhedo gahetabboti.

Tatrāyaṃ vacanattho—nikkhipīyatīti nikkhepo, suttam eva nikkhepo
suttanikkhepo. Atha vā nikkhipanaṃ nikkhepo, suttassa nikkhepo
suttanikkhepo, suttadesanāti attho. Attano ajjhāsayo attajjhāsayo, so assa
 atthi kāraṇabhūtoti **attajjhāsayo**. Attano ajjhāsayo etassāti vā **attajjhāsayo**.
Parajjhāsayepi eseva nayo. Pucchāya vaso pucchāvaso, so etassa atthīti
pucchāvasiko. Suttadesanāvattubhūtaṃ atthassa uppatti atthuppatti,
 atthuppattiyeva aṭṭhuppatti ttha-kārassa ṭṭha-kāraṃ katvā. Sā etassa atthīti
aṭṭhuppattiko. Atha vā nikkhipīyati suttam etenāti **suttanikkhepo**,
 attajjhāsayādi eva. Tesmiṃ atthavikappe attano ajjhāsayo **attajjhāsayo**.
 Paresaṃ ajjhāsayo **parajjhāsayo**. Pucchīyatīti pucchā, pucchitabbo attho.
 Pucchāvasena pavattaṃ dhammappaṭiggāhakānaṃ vacanaṃ pucchāvasikaṃ,
 tadeva nikkhepasaddāpekkhāya pulliṅgavasena vuttaṃ “**pucchāvasiko**”ti.
 Tathā aṭṭhuppatti eva **aṭṭhuppattikoti** evamettha attho veditabbo.

Apicettha paresaṃ indriyaparipākādikāraṇanirapekkhattā
 attajjhāsayassa visuṃ suttanikkhepabhāvo yutto kevalaṃ attano
 ajjhāsayeneva dhammatantiṭṭhapanatthaṃ pavattitadesanattā.
 Parajjhāsayapucchāvasikānaṃ pana paresaṃ ajjhāsayapucchānaṃ
 desanāpavattihetubhūtaṃ uppattiyam

pavattitānaṃ¹ kathamaṭṭhuppattiyā anavarodho, pucchāvasika-aṭṭhuppattikānaṃ vā parajjhāsayaṇurodhena pavattitānaṃ katham parajjhāsaye anavarodhoti? Na codetabbametaṃ. Paresaṃ hi abhinīhāraparipucchādivinimuttasseva suddadesanākāraṇuppadassa aṭṭhuppattibhāvena gahitattā parajjhāsayaṇupucchāvasikānaṃ visum gahaṇaṃ. Tathā hi brahmajāladdhammadāyādasuttādīnaṃ vaṇṇāvaṇṇa-āmisuppādādidesanānimittaṃ “aṭṭhuppattī”ti vuccati. Paresaṃ puccham vinā ajjhāsayaṃ eva nimittaṃ katvā desito parajjhāsayo, pucchāvasena desito pucchāvasikoti pākaṭoyamatthoti. **Attano ajjhāsayeneva kathesi**ti dhammatantiṭṭhapanattham kathesi. **Vimutti-paripācanīyā dhammā** saddhindriyādayo. **Ajjhāsayanti** adhimuttiṃ. **Khintinti** diṭṭhijjhānakkhantiṃ. **Mananti** paññatticittaṃ. **Abhinīhāraṇti** paṇidhānaṃ. **Bujjhanabhāvanti** bujjanasabhāvaṃ, paṭivijjhanākāraṃ vā. **Rūpagarukāṇanti** pañcasu ārammaṇesu rūpārammaṇagarukā rūpagarukā. Cittaṇa rūpaninnā rūpapoṇā rūpapabbhārā rūpadassanappasutā rūpena ākaḍḍhitahadayā, tesam rūpagarukānaṃ.

Paṭisedhatthoti paṭikkhepattho. Kassa pana paṭikkhepatthoti? Kiriyāpadhānaṃ hi vākyam, tasmā “na samanupassāmi”ti samanupassanākiriyāpaṭisedhattho. Tenāha “**imassa pana padassā**”ti-ādi. Yo paro na hoti, so attāti lokasamaññamattasiddham sattasantānaṃ sandhāya “ahan”ti satthā vadati, na bāhirakaparikappitaṃ ahaṃkāravisaṃsaṃ ahaṃkāraṇaṃ bodhimūleyeva samucchinnattā. Lokasamaññānatikkamantā eva hi buddhānaṃ lokiye visaye desanāpavatti. **Bhikkhavi**ti ālapane kāraṇaṃ heṭṭhā vuttameva. Aññanti apekkhāsiddhattā aññatthassa “**idāni vattabba-itthirūpato aññan**”ti āha. **Kempi rūpanti** ekaṃ vaṇṇāyatanam. Samaṃ visamaṃ sammā yāthāvato anu anu passatīti **samanupassanā**, ñāṇaṃ. Saṃkilissanavasena anu anu passatīti **samanupassanā**, diṭṭhi. **No niccatoti** ettha **iti**-saddo ādi-attho, evamādikoti attho. Tena “dukkhato samanupassati”ti evamādinī saṅgaṇhāti. **Olokontopīti** devamanussavimāṇakapparukkhamaṇikanakādigatāni rūpāni anavasesam sabbaññutaññāṇena olokontopi. Sāmaññavacanopi yaṃ-saddo “ekarūpampī”ti

rūpassa adhigatattā rūpavisayo icchitoti **“yaṃ rūpaṃ”**ti vuttaṃ. Tathā purisasaddo pariyādiyātabbacittapuggalavisayoti **rūpagarukassā**ti visesitaṃ. **Gahaṇaṃ** “khepanaṃ”ti ca adhippetam, **pariyādānaṇṇa** uppattinivāraṇanti āha **“catubhūmakakusalacittaṃ”**ti. Taṃ hi rūpaṃ tādisassa parittakusalassapi uppattiṃ nivāreti, kimaṅgaṃ pana mahaggaṭānuttaracittassāti lokuttarakusalacittassapi uppattiyā nivāraṇaṃ hotuṃ samattham, lokiyakusaluppattiyā nivāraṇakatte vattabbameva natthīti **“catubhūmakakusalacittaṃ pariyādiyitvā”**ti vuttaṃ. Na hi kāmagaṇassādappasutassa purisassa dānādivasena savipphārikā kusalluppatti sambhavati. **Gaṇhitvā khepetvā**ti attānaṃ assādetvā pavattamānassa akusalacittassa paccayo hontaṃ pavattinivāraṇena muṭṭhigataṃ viya gahetvā anuppādanādivirodhena khepetvā viya tiṭṭhati. Tāva mahati lokasannivāse tassa pariyādiyaṭṭhānaṃ avicchedato labbhatīti āha **“tiṭṭhati”**ti yathā “pabbatā tiṭṭhanti, najjo sandanti”ti. Tenāha **“idha ubhayampi vattatī”**ti-ādi.

Yathayidanti sandhivasena ākāraṇassa rassattaṃ yakārāgamo cāti āha **“yathā idan”**ti. **Itthiyā rūpanti** itthisarīragataṃ tappaṭibaddhaṇṇa rūpāyatanam. Paramatthassa niruḷho, paṭhamam sādhaṇaṇato saddasatthalakkhaṇāni vibhāvetabbāni, pacchā asādhaṇaṇatoti tāni pālivasena vibhāvetuṃ **“ruppatīti kho -pa- veditabban”**ti āha. Tattha **ruppatīti** sītādivirodhipaccayehi vikāraṃ āpādiyati, āpajjati vā attho. Vikāruppatti ca virodhipaccayasannipāte visadisuppatti vibhūtatarā, kuto panāyaṃ visesoti ce? “Sītenā”ti-ādivacanato. Evaṇṇa katvā vedanādīsū anavasesarūpasamaññā sāmāññalakkhaṇanti sabbarūpadhammasādhaṇaṇam ruppanam. Idāni atthuddhāraṇayena rūpa-saddam samvaṇṇento **“ayaṃ panā”**ti-ādimāha. **Rūpakkhanda vattatīti** “oḷārikaṃ vā sukkhamaṃ vā”ti-ādivacanato¹. **Rūpūpapattiyāti** ettha rūpabhavo rūpaṃ uttarapadalopena. Rūpabhavūpapattiyāti ayaṃ hettha attho. **Kasiṇanimitteti** pathavīkasiṇādisaṇṇite paṭibhāganimitte. Ruppatti attano phalassa sabhāvaṃ karotīti rūpaṃ,

1. Ma 1. 297; Ma 2. 84; Ma 3. 67, 69; Abhi 2. 1 piṭṭhesu.

sabhāvaheṭṭi āha “**sarūpā -pa- ettha paccaye**”ti. Karacaraṇādi-
avayavasāṅghātabhāvena rūpīyati nirūpīyatīti rūpaṃ, rūpakāyoti āha “**ākāso
-pa- ettha sarīre**”ti.

Rūpayati vaṇṇavikāraṃ āpajjamānaṃ hadayaṅgatabhāvaṃ pakāsetīti
rūpaṃ, vaṇṇāyatanam. Ārohapariṇāhādibhedarūpagataṃ saṅghānasampattim
nissāya pasādaṃ āpajjamāno rūpappamāṇoti vuttoti āha “**ettha saṅghāne**”ti.
Piyarūpanti-ādisu sabhāvattho rūpasaddo. Ādisaddena rūpajjhānādīnaṃ
saṅgaho. “Rūpī rūpāni passatī”ti ettha ajjhataṃ kesādisu
parikkamasāññāvasena paṭiladdharūpajjhānaṃ rūpaṃ, taṃ assa atthīti rūpīti
vutto. **Itthiyā catusamutṭhāne vaṇṇeti** itthisarīrapariyāpannameva rūpaṃ
gahitaṃ, tappaṭibaddhavadatthālaṅkāradirūpampi pana purisacittassa
pariyādāyakaṃ hotīti dassetuṃ “**apicā**”ti-ādi vuttaṃ.
Gandhavaṇṇaggahaṇena vilepanaṃ vuttaṃ. Kāmaṃ “asukāya itthiyā
pasādhanan”ti sallakkhitassa akāyappaṭibaddhassapi vaṇṇo
paṭibaddhacittassa purisassa cittaṃ pariyādāya tiṭṭheyya, taṃ pana na
ekantikanti ekantikaṃ dassento “**kāyappaṭibaddho**”ti-āha. **Upakappatīti**
cittassa pariyādānāya upakappati. **Purimassevāti** pubbe vutta-atthasseva
dalhīkaraṇatthaṃ vuttaṃ yathā “dvikkhattuṃ bandhaṃ subandhan”ti.
Nigamanavasena vā etaṃ vuttanti daṭṭhabbaṃ. **Opammavasena vuttanti**
“yaṃ evaṃ purisassa cittaṃ pariyādāya tiṭṭhatī”ti sakalamevidaṃ
purimavacanaṃ upamāvasena vuttaṃ, tattha pana upamābhūtaṃ atthaṃ
dassetuṃ “**yathayidaṃ -pa- itthirūpan**”ti vuttaṃ. Pariyādāne ānubhāvo
sambhavo **pariyādānānubhāvo**, tassa dassanavasena vuttaṃ.

Idaṃ pana “itthirūpan”ti-ādivacanaṃ **pariyādānānubhāve** sādhetabbe
dīpetabbe **vatthu** kāraṇaṃ. **Nāgo** nāma so rājā, dīghadāṭhikattā pana
“mahādāṭhikanāgarājā”ti vutto. **Asaṃvaraniyāmenāti** cakkhudvārikena
asaṃvaranīhārena. **Nimittaṃ gahetvāti** rāgupattihetubhūtaṃ rūpaṃ
subhanimittaṃ gahetvā. **Visikādassanaṃ gantvāti** sivathikadassanaṃ gantvā.
Tattha hi ādīnavānupassanā ijjhati. Vatthulobhena kuto tādisāya maraṇanti
asaddahanto “**mukhaṃ tumhākaṃ dhūmavaṇṇan**”ti te daharasāmaṇere
uppaṇḍento vadati.

Ratanattaye suppasannattā kākavaṇṇatissādīhi visesanatthañca so
tissamahārājā saddhāsaddena visesetvā vuccati. **Daharassa cittaṃ**

pariyādāya tiṭṭhatīti adhikāravasena vuttam. **Niṭṭhituddesakiccoti** gāme asappāyarūpadassanam imassa anattāya siyāti ācariyena nivāritagāmapaveso pacchā niṭṭhituddesakicco hutvā ṭhito. Tena vuttam “**atthakāmānam vacanam aggahetvā**”ti. **Nivatthavattham sañjānitvā**ti attanā diṭṭhadivase nivatthavattham tassā matadivase sivathikadassanattham gatena laddham sañjānitvā. **Evampī**ti evam maraṇasampāpanavasenapi. Ayam tāvettha aṭṭhakathāya anuttānatthadīpanā.

Nettinayavaṇṇanā

Idāni pakaraṇanayena pāliya atthavaṇṇanam karissāma. Sā pana atthasamvaṇṇanā yasmā desanāya samuṭṭhānappayojanabhājanesu piṇḍatthesu ca niddhāritesu sukarā hoti suviññeyyā ca, tasmā suddesanaṇāya samuṭṭhānādīni paṭhamam niddhārayissāma. Tattha **samuṭṭhānam** nāma desanānidānam, tam sādharmaṇamasādharaṇanti duvidham. Tattha sādharmaṇampi ajjhattikabāhirabhedato duvidham. Tattha **sādharaṇam ajjhattikasamuṭṭhānam** nāma lokanāthassa mahākaruṇā. Tāya hi samussāhitassa bhagavato veneyyanam dhammadesanāya cittam udapādi, yam sandhāya vuttam “sattesu ca kāruṇṇīyam paṭicca buddhacakkhunā lokam volokesī”ti-ādi¹. Ettha ca hetāvattāyapi mahākaruṇāya saṅgaho datṭhabbo yāvadeva samasāramahoghato saddhammadesanāhatthadānehi sattasantāraṇattham taduppattito. Yathā ca mahākaruṇā, evam Sabbaññutaññānam dasabalaññādayo ca desanāya abbhantarasamuṭṭhānabhāvena vattabbā. Sabbam hi ñeyyadhammam tesam desetabbākāram sattānaṃca āsayānusayādim yāthāvato jānanto bhagavā ṭhānāṭṭhānādīsu kosallena veneyyajjhāsayānurūpam vicittanayadesanam pavattesīti. **Bāhiram** pana **sādharaṇam samuṭṭhānam** dasasahassamahābrahmaparivārassa sahampatibrahmuno ajjhesanam. Tadajjhesanuttarakālam hi dhammagambhīratāpaccavekkhaṇājanitam appossukkatam paṭippassambhetvā dhammassāmī dhammadesanāya ussāhajāto ahosi. Asādharaṇampi abbhantarabāhirabhedato duvidhameva. Tattha **abbhantaram** yāya mahākaruṇāya yena ca

1. Ma 1. 225; Vi 3. 9; Saṃ 1. 139 piṭṭhesu.

desanāññāṇena idaṃ suttam pavattitam, tadubhayaṃ veditabbaṃ. **Bāhiram** pana rūpagarukānaṃ puggalānaṃ ajjhāsayo. Svāyamattho aṭṭhakathāyaṃ vutto eva.

Payojanampi sādharmaṇasādharaṇato duvidham. Tattha **sādharaṇam** yāva anupādāparinibbānaṃ vimuttirasattā bhagavato desanāya. Tenevāha “etadatthā kathā, etadatthā mantanā”ti-ādi. **Asādharaṇam** pana tesam rūpagarukānaṃ puggalānaṃ rūpe chandarāgassa jahāpanaṃ, ubhayampetaṃ bāhirameva. Sace pana veneyyasantānagatampi desanābalasiddhisāṅkhātāṃ payojanaṃ adhippāyasamijjhanabhāvato yathādhippetatthasiddhiyā mahākāruṇikassa bhagavatopi payojanamevāti gaṇheyya, iminā pariyāyenassa abbha-antaratāpi siyā.

Apica tesam rūpagarukānaṃ puggalānaṃ rūpasmiṃ vijjamānassa ādīnavassa yāthāvato anavabodho imissā desanāya samuṭṭhānaṃ, tadavabodho payojanaṃ. So hi imāya desanāya bhagavantaṃ payojeti tannipphādanaparāyaṃ desanāti katvā. Yaṃ hi desanāya sādhetabbaṃ phalaṃ, taṃ ākaṅkhitabbattā desakaṃ desanāya payojetīti payojananti vuccati. Tathā tesam puggalānaṃ tadaññesañca veneyyānaṃ rūpamukhena pañcasu upādānakkhandhesu ādīnavadassanañcettha payojanaṃ. Tathā saṃsāracakkanivattisaddhammacakkappavattisassatādimicchāvādanirākaraṇaṃ sammāvādapurekkhāro akusalamūlasamūhananaṃ kusalamūlasamāropanaṃ apāyadvārapidhanaṃ saggamaggadvāravivaraṇaṃ pariyuṭṭhānavūpasamanaṃ anusayasamugghātanaṃ “mutto mocessāmī”ti purimapaṭiññāvisaṃvādanaṃ tappaṭipakkhamāraṇamanorathavisaṃpādanaṃ titthiyadhammanimmathanaṃ buddhadhammapaṭiṭṭhāpananti evamādinipi payojanāni idha veditabbāni.

Yathā te puggalā rūpagarukā, evaṃ tadaññe ca sakkāyagarukā sakkāyasmim allīnā saṅkhatadhammānaṃ sammāsambuddhassa ca paṭipattim ajānantā asaddhammassavanasādharaṇaparicariyamanasikāraparā saddhammassavanadhāraṇa paricayappaṭivedhavimukhā ca bhavavippamokkhesino veneyyā imissā desanāya **bhājanaṃ**.

Piṇḍattā cettha rūpaggaḥena

rūpadhāturūpāyatanarūpakkhandhapariggaṇhanam rūpamukhena
catudhammānam vaṭṭattayavicchedanūpāyo āsavoghādivivecanam
abhinandanānivāraṇasaṅgatikkamo vivādamūlapariccāgo sakkhattayānuyogo
pahānattayadīpanā samathavipassanānuṭṭhānam bhāvanāsacchikiriyaśiddhīti
evamādayo veditabbā.

Iti param paṇa soḷasa hārā dassetabbā. Tattha “rūpan”ti sahaḷatā tassa
nissayaabhūtā tappaṭṭibaddhā ca sabbe rūpārūpadhammā taṇhāvajjā
dukkhasaccam. Taṃsamūṭṭhāpikā tadārammaṇā ca taṇhā samudayasaccam.
Tadubhayesam appavatti nirodhasaccam. Nirodhappajānanā paṭipadā
maggasaccam. Tattha samudayena assādo, dukkhena ādīnavo,
magganīrodhehi nissaraṇam, rūpārammaṇassa akusalacittassa kusala-
cittassa ca pariyādānam phalam. Yam hi desanāya sādhetabbam payo-
janam, tam phalanti vuttovāyamattho. Tadattham hidaṃ suttaṃ bhagavatā desitanti.
Yathā tam kusala-
cittam na pariyādiyati, evam
paṭisaṅkhānabhāvanābalapariggahitā indriyesu guttadvāratā upāyo. Purisassa
kusala-
cittapariyādānenassa rūpassa aññarūpāsādhāraṇatādassanāpadesena
atthakāmehi tato cittam sādhu-
kam rakkhita-
bbam. Ayamettha bhagavato
āṇattīti ayam **desanāhāro**. Assādādisandassanavibhāvanalakkhaṇo hi
desanāhāro. Vuttaṃ hetam **nettippakaraṇe**—

“Assādādīnavatā, nissaraṇampi ca phalam upāyo ca.

Āṇattī ca bhagavato, yogīnam desanāhāro”ti¹.

Desīyati saṃvaṇṇīyati etāya suttatthoti desanā, desanāya saha-
caraṇato vā desanā. Nanu ca aññepi hārā desanāsaṅkhātassa suttassa
atthasaṃvaṇṇanāto desanāya saha-
cārinovāti? Saccametam, ayam paṇa hāro
yebhuyyena yathārutavaseneva viññāyamāno desanāya saha-
caraṭīti vattabbatam arahati, na tathāpare. Na hi
assādādīnavanissaraṇādisandassanarahitā suttadesanā atthi. Kim paṇa tesam
assādādīnam anavasesānam pacanam desanāhāro,

1. Khu 10. 3 piṭṭhe.

udāhu ekaccānanti? Niravasesānaṃyeva. Yasmim hi sutte assādādīnavanissaraṇāni sarūpato āgatāni, tattha vattabbameva natthi. Yattha pana ekadesena āgatāni, na ca sarūpena, tattha anāgataṃ atthavasena niddhāretvā hāro yojetabbo.

Sayaṃ samantacakkhubhāvato taṃdassanena sabhāvato ca **“ahan”**ti vuttaṃ. Bhikkhanasīlatādiguṇayogato abhimukhikaraṇatthaṃ **“bhikkhave”**ti vuttaṃ. Attābhāvato aparatādassanatthaṃ¹ **“aṇṇan”**ti vuttaṃ. Ekassa anupalabbhadassanatthaṃ anekabhāvappaṭisedhanatthaṃ **“ekarūpampī”**ti vuttaṃ. Tādisassa rūpassa abhāvato adassanato ca **“na samanupassāmī”**ti vuttaṃ. Tassa paccāmasanatho aniyamato ca **“yan”**ti vuttaṃ. Idāni vuccamānākāraparāmasanato tadanānākāranisedhanato ca **“evan”**ti vuttaṃ. Visabhāgindriyavatthuto sabhāgavattusmim tadabhāvato ca **“purisassā”**ti vuttaṃ. Nimittaggāhassa vatthubhāvato tathā parikappitattā ca **“cittam pariyādāya tiṭṭhatī”**ti vuttaṃ. Evanti vuttākāraparāmasanatthaṃeva nidassanatthaṃ **“yathā”**ti vuttaṃ. Attano paccakkhabhāvato bhikkhūnaṃ paccakkhakaraṇatthaṃ **“idan”**ti vuttaṃ. Itthisantānapariyāpannato tappaṭibaddhabhāvato ca **“itthirūpan”**ti vuttanti evaṃ anupadavicayato **vicayo hāro**. Vicīyanti etena, ettha vā padapañhādayoti vicayo, vicitī eva vā tesanti vicayo. Padapucchāvissajjanapubbāparānuggaḥanaṃ assādādīnaṃ visesaniddhāraṇavasena pavicalakkhaṇo hi vicayo hāro. Vuttampi cetam—

“Yaṃ pucchitaṃca vissajjitaṃca, suttassa yā ca anugīti.

Suttassa yo pavicayo, hāro vicayoti niddiṭṭho”ti².

Anādimati saṃsāre itthipurisānaṃ aṇṇamaṇṇarūpābhirāmatāya **“itthirūpan purisassa cittam pariyādāya tiṭṭhatī”**ti yujjati ayaṃ **yuttihāro**. Byañjanatthānaṃ yuttāyuttavibhāgavibhāvanalakkhaṇo hi yuttihāro. Vuttampi cetam—

“Sabbesaṃ hārānaṃ, yā bhūmī yo ca gocaro tesam.

Yuttāyuttiparikkhā, hāro yuttitī niddiṭṭho”ti².

1. Apanatādassanatthaṃ (Ka)

2. Khu 10. 3 piṭṭhe.

Yuttīti ca upapatti sādhanayutti, idha pana yuttivicāraṇā yutti uttarapadalopena “rūpabhavo rūpan”ti yathā. Yuttisahacaraṇato vā yutti.

Itthirūpaṃ ayoniso olokiyamānaṃ indriyesu aguttadvāratāya padaṭṭhānaṃ, sā kusalānaṃ dhammānaṃ abhāvanāya padaṭṭhānaṃ, sā sabbassapi saṃkilesapakkhassa parivuddhiyā padaṭṭhānaṃ. Byatirekato pana itthirūpaṃ yoniso olokiyamānaṃ satipaṭṭhānabhāvanāya padaṭṭhānaṃ, sā bojjhaṅgānaṃ bhāvanāpāripūriyā padaṭṭhānaṃ, sā vijjāvimuttīnaṃ pāripūriyā padaṭṭhānaṃ, kusalassa cittassa pariyādānaṃ sammohābhinivesassa padaṭṭhānaṃ, so saṅkhārānaṃ padaṭṭhānaṃ, saṅkhārā viññāṇassāti sabbam āvattati bhavacakkam. Byatirekato pana kusalassa cittassa aparīyādānaṃ tesaṃ tesaṃ kusalānaṃ dhammānaṃ uppādāya pāripūriyā padaṭṭhānanti ayaṃ tāva avisesato nayo. Visesto pana silassa aparīyādānaṃ avippaṭṭisārassa padaṭṭhānaṃ, avippaṭṭisāro pāmojjassāti-ādina yāva anupādāparinibbānaṃ netabbam. Ayaṃ **padaṭṭhāno hāro**. Sutte āgatadhammānaṃ padaṭṭhānabhūte dhamme tesaṃca padaṭṭhānabhūteti sambhavato padaṭṭhānabhūtadhammaniddhāraṇalakkhaṇo hi padaṭṭhāno hāro. Vuttañcetaṃ—

“Dhammaṃ deseti jino, tassa ca dhammassa yaṃ padaṭṭhānaṃ.

Iti yāva sabbadhammā, eso hāro padaṭṭhāno”ti¹.

Padaṭṭhānanti āsanna-kāraṇaṃ. Idha pana padaṭṭhānavicāraṇā padaṭṭhānoti-ādi yuttihāre vuttanayeneva veditabbam.

Ekarūpanti ca rūpāyatanaggahaṇena channampi bāhirānaṃ āyatanānaṃ gahaṇaṃ bāhirāyatanabhāvena ekalakkhaṇattā. **Cittanti** manāyatanaggahaṇena channampi ajjhattikānaṃ āyatanānaṃ gahaṇaṃ ajjhattikāyatanabhāvena ekalakkhaṇattā. Evaṃ khandhadhātādivasenapi ekalakkhaṇatā vattabbā. Ayaṃ **lakkhaṇo hāro**. Lakkhīyanti etena, ettha vā ekalakkhaṇadhammā avuttāpi ekaccavacanenaṇāti lakkhaṇo. Sutte anāgatepi dhamme vuttappakāre āgate viya niddhāretvā yā samvaṇṇanā, so lakkhaṇo hāro. Vuttampi cetam—

1. Khu 10. 3 piṭṭhe.

“Vuttamhi ekadhamme, ye dhammā ekalakkhaṇā keci.
Vuttā bhavanti sabbe, so hāro lakkhaṇo nāmā”¹.

Nidāne imissā desanāya rūpagarukānaṃ puggalānaṃ rūpasmiṃ anādīnavadassitā vuttā, “kathaṃ nu kho ime imaṃ desanaṃ sutvā rūpe ādīnavadassanamukhena sabbasmimpi khandhapañcake sabbaso chandarāgaṃ pahāya sakalavaṭṭadukkhato mucceyyuṃ, pare ca tattha paṭiṭṭhāpeyyuṃ”²ti ayamettha bhagavato **adhippāyo**. Padanibbacanaṃ **niruttaṃ**, taṃ “evan”³ti-ādīnidānapadānaṃ “nāhan”³ti-ādipāḷipadānaṃ ca aṭṭhakathāyaṃ tassā līnatthavaṇṇanāya ca vuttanayānusārena sukarattā na vitthārayimha.

Padapadatthadesanādesanānikkhepasuttasandhivasena pañcavidhā **sandhi**. Tattha padassa padantarena sambandho **padasandhi**. Padatthassa padatthantarena sambandho **padatthasandhi**, yo “kiriyaṅkārakasambandho”³ti vuccati. Nānānusandhikassa suttassa taṃtamanusandhihi sambandho, ekānusandhikassa ca pubbāparasambandho **desanāsandhi**, yā aṭṭhakathāyaṃ “pucchānusandhi ajjhāsayaṇusandhi yathānusandhi”³ti tidhā vibhattā. Ajjhāsayo cettha attajjhāsayo parajjhāsayoti dvidhā veditabbo. **Desanānikkhepasandhi** catunnaṃ suttanikkhepānaṃ vasena veditabbā. **Suttasandhi** idha paṭhamanikkhepavaseneva veditabbā. “Kasmā panettha idameva cittapariyādānasuttaṃ paṭhamāṃ nikkhittan”³ti nāyamanuyogo katthaci na pavattati. Apica ime sattā anādimati saṃsāre paribbhamantā itthipurisā aññaṃaññesaṃ pañcakāmaguṇasaṅkhātārūpābhiraṃ, tattha itthi purisassa rūpe sattā giddhā gadhitā laggā laggitā āsattā, sā cassā tattha āsatti dubbivecanīyā. Tathā puriso itthiyā rūpe, tattha ca dassanasāmsaggo garutaro itaresaṃ mūlabhūto. Teneva hi bhagavā “kathaṃ nu kho mātugāme paṭipajjitabban”²ti puṭṭho “adassanamevā”²ti avoca. Tasmā bhagavā pañcasu kāmaguṇesu rūpe chandarāgahāpanatthaṃ idameva suttāṃ paṭhamāṃ dasesi. Nibbānādhigamāya paṭipattiyaṃ ādi resā³ paṭipattīti. Yaṃ pana ekissā desanāya desanantarena saṃsandanaṃ, ayampi desanāsandhi. Sā idha evaṃ veditabbā. “**Nāhaṃ bhikkhave -pa- tiṭṭhati**”³ti ayaṃ desanā “ye kho bhikkhave cakkhuviññeyyā rūpā itthā kantā manāpā viyarūpā kāmūpasamhitā

1. Khu 10. 3 piṭṭhe.

2. Dī 2. 116 piṭṭhe.

3. Ādare sā (Ka)

rajanīyā, tañce bhikkhu abhinandati abhivadati ajjhosāya tiṭṭhati, tassa taṃ abhinandato abhivadato ajjhosāya tiṭṭhato uppajjanti aneke pāpakā akusalā dhammā”¹ti imāya desanāya saṃsandati. Tathā “rūpe maññati, rūpesu maññati, rūpato maññati, rūpaṃ ‘me’ti maññati. Rūpaṃ bhikkhave anabhijānaṃ aparijānaṃ avirājayaṃ appajahaṃ abhabbo dukkhakkhayāyā”²ti evamādihi desanāhi saṃsandatīti ayaṃ **catubyūho hāro**. Viyūhiyanti vibhāgena piṇḍīyanti etena, ettha vāti byūho, nibbacanādīnaṃ catunnaṃ byūhoti catubyūho, catunnaṃ vā byūho etthāti catubyūho. Nibbacanādhippāyādīnaṃ catunnaṃ vibhāgalakkhaṇo hi catubyūho hāro. Vuttaṃ hetam—

“Neruttamadhippāyo, byañjanamatha desanānidānañca.
Pubbāparānusandhī, eso hāro catubyūho”³ti.

“**Nāhaṃ bhikkhave aññaṃ -pa- itthirūpan**”⁴ti etena ayoniso manasikāro dīpito. Yaṃ tattha cittaṃ pariyādiyati, tena yoniso manasikāro. Tattha ayonisomanasikaroto taṇhāvijjā parivaḍḍhanti, tāsu taṇhāgahaṇena nava taṇhāmūlakā dhammā āvaṭṭanti, avijjāgahaṇena avijjāmūlakaṃ sabbaṃ bhavacakkaṃ āvaṭṭati, yonisomanasikāraggahaṇena ca yonisomanasikāramūlakā dhammā āvaṭṭanti, catubbidhañca sampatticakkanti. Ayaṃ **āvaṭṭo hāro**. Āvaṭṭayanti etena, ettha vā sabhāgavisabhāgā ca dhammā, tesam vā āvaṭṭananti āvaṭṭo. Desanāya gahitadhammānaṃ sabhāgā sabhāgadhammavasena āvaṭṭanalakkhaṇo hi āvaṭṭo hāro. Vuttampi cetam—

“Ekamhi padaṭṭhāne, pariyesati sesakaṃ padaṭṭhānaṃ.
Āvaṭṭati paṭipakkhe, āvaṭṭo nāma so hāro”⁵ti.

Rūpaṃ catubbidhaṃ kammamuṭṭhānaṃ cittasamuṭṭhānaṃ utusamuṭṭhānaṃ āhārasamuṭṭhānaṃ, tathā iṭṭhaṃ iṭṭhamajjhataṃ aniṭṭhaṃ aniṭṭhamajjhataṃ. Idha pana iṭṭhaṃ adhippetam. Cittaṃ kusalcittamettha veditabbaṃ. Taṃ kāmāvacaraṃ rūpāvacaraṃ arūpāvacaraṃ lokuttaranti catubbidhaṃ. Vedanādisampayuttadhammabhedato

1. Saṃ 2. 321 piṭṭhe. (Atthato samānaṃ) 2. Saṃ 2. 310 piṭṭhe. 3. Khu 10. 3 piṭṭhe.

anekavidhanti ayaṃ **vibhattihāro**. Vibhajjanti etena, ettha vā sādharmaṇāsādharaṇānaṃ saṃkilesavodānadhammānaṃ bhūmiyoti vibhatti. Vibhajanaṃ vā etesaṃ bhūmiyoti vibhatti. Saṃkilesadhamme vodānadhamme ca sādharmaṇāsādharaṇato padaṭṭhānato bhūmito vibhajanalakkhaṇo hi vibhattihāro. Vuttampi cetam—

“Dhammañca padaṭṭhānaṃ, bhūmiñca vibhajjate ayaṃ hāro.
Sādharaṇe assādhāraṇe ca neyyo vibhatti”ti¹.

Itthirūpaṃ purisassa cittaṃ pariyādāya tiṭṭhati ayoniso manasikaroto, yoniso manasikaroto na pariyādiyati susaṃvutindriyattā silesu samāhitassāti ayaṃ **parivatto hāro**. Paṭipakkhavasena parivattiyanti iminā, ettha vā sutte vuttadhammā, parivattanaṃ vā tesanti parivatto. Niddiṭṭhānaṃ dhammānaṃ paṭipakkhato parivattanalakkhaṇo hi parivatto hāro. Vuttaṃ hetam—

“Kusalākusale dhamme, niddiṭṭhe bhāvite pahīne ca.
Parivattati paṭipakkhe, hāro parivattano nāmā”ti¹.

Bhikkhave samaṇā pabbajitāti pariyāyavacanaṃ. Aññaṃ paraṃ kiñcīti pariyāyavacanaṃ. Rūpaṃ vaṇṇaṃ cakkhuviññeyyanti pariyāyavacanaṃ. Samanupassāmi olokessāmi jānāmīti pariyāyavacanaṃ. Evaṃ itthaṃ imaṃ pakāraṇti pariyāyavacanaṃ. Purisassa puggalassāti pariyāyavacanaṃ. Cittaṃ viññāṇaṃ manoti pariyāyavacanaṃ. Pariyādāya gahetvā khepetvāti pariyāyavacanaṃ. Tiṭṭhati dharati ṭhātīti pariyāyavacanaṃ. Yathā yena pakārena yenākārenāti pariyāyavacanaṃ. Itthi nārī mātugāmoti pariyāyavacanaṃ ayaṃ **vevacano hāro**. Vividhaṃ vacanaṃ vuccati etena atthoti vā vivacanaṃ, vivacanameva vevacanaṃ. Ekasmiṃ atthe anekapariyāyasaddappayojanalakkhaṇo hi vevacano hāro. Vuttaṃ hetam—

“Vevacanāni bahūni tu, sutte vuttāni ekadhammassa.
Yo jānāti suttavidū, vevacano nāma so hāro”ti¹.

1. Khu 10. 4 piṭṭhe.

Rūpaṃ kāḷasāmādivasena anekadhā paññattaṃ. Puriso khattiyādivasena anekadhā paññatto. Cittaṃ parittamahaggatādivasena anekadhā paññattaṃ. “Pariyādāyā”ti ettha pariyādānaṃ pariyādāyakānaṃ pāpadhammānaṃ vasena vītikkamapariyuṭṭhānādinā ca anekadhā paññattaṃ. Ayaṃ **paññattihāro**. Pakārehi, pabhedato vā ñāpīyanti iminā, ettha vā atthāti paññatti. Ekekassa dhammassa anekāhi paññattīti paññāpetabbākāravibhāvanalakkhaṇo hi paññattihāro. Vuttaṃ hetam—

“Ekaṃ bhagavā dhammaṃ, paññattīhi vividhāhi deseti.

So ākāro ñeyyo, paññattī nāma so hāro”ti¹.

Virodhipaccayasamavāye visadisuppattiruppanavaṇṇavikārāpattiyā taṃsamaṅgino hadayaṅgatabhāvappakāsaṇaṃ rūpaṭṭhoti aniccatāmukhena otaraṇaṃ, aniccassa pana dukkhattā dukkhatāmukhena, dukkhassa ca anattakattā suññatāmukhena otaraṇaṃ. Cittaṃ manoviññāṇadhātu, tassā pariyādāyikā taṇhā tadekaṭṭhā ca pāpadhammā dhammadhātūti dhātumukhena otaraṇaṃ. Evaṃ khandhāyatanādīmukhehi otaraṇaṃ vattabbanti ayaṃ **otaraṇo hāro**. Otārīyanti anuppavesīyanti etena, ettha vā suttāgatā dhammā paṭiccasamuppādādisūti otaraṇo. Paṭiccasamuppādādimukhena suttatthassa otaraṇalakkhaṇo hi otaraṇo hāro. Vuttaṃ hetam—

“Yo ca paṭiccuppādo, indriyakhandhā ca dhātu-āyatanā.

Etehi otarati yo, otaraṇo nāma so hāro”ti¹.

Nāhaṃ bhikkhave -pa- samanupassāmīti ārambho. **Evaṃ purisassa cittaṃ pariyādāya tiṭṭhatīti** padasuddhi, na pana ārambhasuddhi. **Yathayidanti**-ādi padasuddhi ceva ārambhasuddhi cāti ayaṃ **sodhano hāro**. Sodhīyanti samādhīyanti etena, ettha vā sutte padapadatthapañhārambhāti sodhano. Sutte padapadatthapañhārambhānaṃ sodhanalakkhaṇo hi sodhano hāro. Vuttaṃ hetam—

“Vissajjitamhi pañhe, gāthāyaṃ pucchitāyamārabbhā.

Suddhāsuddhaparikkhā, hāro so sodhano nāmā”ti¹.

1. Khu 10. 4 piṭṭhe.

Aññanti sāmāññato adhiṭṭhānaṃ kassaci visesassa anāmaṭṭhattā.
Ekarūpampīti taṃ avikappetvā visesavacanāṃ. **Yathayidanti** sāmāññato
 adhiṭṭhānaṃ aniyamavacanabhāvato. **Itthirūpanti** taṃ avikappetvā
 visesavacananti ayaṃ **adhiṭṭhāno hāro**. Adhiṭṭhīyanti anuppavattīyanti etena,
 ettha vā sāmāññavisesabhūtā dhammā vinā vikappenāti adhiṭṭhāno.
 Suttāgatānaṃ dhammānaṃ avikappanavaseneva
 sāmāññavisesaniddhāraṇalakkhaṇo hi adhiṭṭhāno hāro. Vuttampi cetāṃ—

“Ekattatāya dhammā, yepi ca vemattatāya niddiṭṭhā.

Tena vikappayitabbā, eso hāro adhiṭṭhāno”ti¹.

Rūpassa kammāvijjādayo kammacittādayo ca hetu. Samanupassanāya
 āvajjanādayo. Kusalassa cittassa yoniso manasikārādayo. **Pariyādāyāti** ettha
 pariyādānaṃ ayonisomanasikārādayoti ayaṃ **parikkhāro hāro**. Parikaroti
 abhisankharoti phalanti parikkhāro, hetu paccayo ca. Parikkhāraṃ
 ācikkhatīti parikkhāro, hāro. Parikkhāraṃ visayattā, parikkhārasahacaraṇato vā
 parikkhāro. Sutte āgatadhammānaṃ parikkhārasaṅkhātahetupaccaye
 niddhāretvā samvaṇṇanālakkhaṇo hi parikkhāro hāro. Vuttaṃ hetāṃ—

“Ye dhammā yaṃ dhammaṃ, janayantippaccayā paramparato.

Hetumavakaḍḍhayitvā, eso hāro parikkhāro”ti¹.

Purisassa cittaṃ pariyādāya tiṭṭhatīti ettha pariyādāyikā visesato
 taṇhāvijjā veditabbā tāsāṃ vasena pariyādānasambhāvato. Tāsu taṇhāya
 rūpamadhiṭṭhānaṃ, avijjāya arūpaṃ. Visesato taṇhāya samatho paṭipakkho,
 avijjāya vipassanā. Samathassa cetovimutti, phalavipassanāya paññāvimutti.
 Tathā hi tā rāgavirāgā avijjāvirāgāti visesetvā vuccantīti ayaṃ **samāropano
 hāro**. Samāropīyanti etena, ettha vā padaṭṭhānādīmukhena dhammāti
 samāropano. Sutte āgatadhammānaṃ
 padaṭṭhānavevacanabhāvanāpahānasamāropanavicāraṇalakkhaṇo hi
 samāropano hāro. Vuttaṃ hetāṃ—

1. Khu 10. 4 piṭṭhe.

“Ye dhammā yaṃ mūlā, ye cekatthā pakāsītā muninā.
Te samāropayitabbā, esa samāropano hāro”¹.

Ettāvatā ca—

“Desanā vicayo yutti, padaṭṭhāno ca lakkhaṇo.
Catubyūho ca āvaṭṭo, vibhatti parivattano.

Vevacano ca paññatti, otaraṇo ca sodhano.
Adhiṭṭhāno parikkhāro, samāropanā soḷaso”²—

evaṃ vuttā soḷasa hārā dassitāti veditabbā. Harīyanti etehi, ettha vā
suttageyyādivisayā aññāṇasaṃsayavipallāsāti hārā. Haranti vā sayam tāni,
haraṇamattameva vāti hārā phalūpacārena. Atha vā harīyanti voharīyanti
dhammasaṃvaṇṇakadhammappaṭiggāhakehi dhammassa
dānaggahaṇavasenāti hārā. Atha vā hārā viyāti hārā. Yathā hi
anekaratanāvalisamūho hārasaṅkhāto attano avayavabhūtaratanasamphassehi
samupajaniyamānahilādasukho hutvā tadupabhogijanasarīrasantāpaṃ
nidāghapariḷāhūpajanitaṃ vūpasameti, evameva tepi
nānāvidhparamattharatanappabandhā saṃvaṇṇanāvisesā attano
avayavabhūtaparamattharatanādhiḡamena samuppādiyamānanibbutisukhā
dhammappaṭiggāhakajanahadayaparitāpaṃ kāmarāgādikilesahetukaṃ
vūpasamentīti. Atha vā hārayanti aññāṇādinīhāraṃ apagamaṃ karonti
ācikkhantīti vā hārā. Atha vā sotujanacittassa haraṇato ramaṇato ca hārā
niruttinayena yathā “bhavesu vantaḡamano bhagavā”³.

Ito paraṃ pana nandiyāvaṭṭādipaṇcavidhanayā veditabbā—tattha
taṇhāvijjā samudayasaccaṃ, tāsāṃ adhiṭṭhānādibhūtā rūpadhammā
dukkhasaccaṃ, tesāṃ appavatti nirodhasaccaṃ, nirodhappajānanā paṭipadā
maggasaccaṃ. Taṇhāḡaṇena cettha
māyāsāṭheyyamānātimānamadappamādapāpicchatāpāpamittatā-ahirika-
anottappādivasena akusalapakkho netabbo. Avijjāḡaṇena
viparītamanasikāra kodhūpanāhamakkhapalāsa-
issāmacchariyasārambhadvacassatābhavadiṭṭhivibhavadiṭṭhi-ādivasena
akusalapakkho netabbo.

1. Khu 10. 4 piṭṭhe. 2. Khu 10. 2 piṭṭhe. 3. Visuddhi 1. 204; Vi-Ṭṭha 1. 95 piṭṭhesu.

Vuttavipariyāyato kusalapakkho netabbo. Kathaṃ? Amāyā-asāṭheyyādivasena aviparītamanasikārādivasena ca. Tathā samathapakkhiyānaṃ saddhindriyādīnaṃ, vipassanāpakkhiyānaṃ aniccasaññādīnaṃ vasena vodānapakkho netabboti ayaṃ **nandiyāvaṭṭassa nayassa bhūmi**. Yo hi taṇhā-avijjāhi saṃkilesapakkhassa suttatthassa samathavipassanāhi vodānapakkhassa ca catusaccayojanamukhena nayanalakkaṇo saṃvaṇṇanāviseso, ayaṃ nandiyāvaṭṭanayo nāma. Vuttaṃ hetam—

“Taṇhaṇca avijjampi ca, samathena vipassanāya yo neti.
Saccehi yojayitvā, ayaṃ nayo nandiyāvaṭṭo”¹.

Nandiyāvaṭṭassa viya āvaṭṭo tessāti nandiyāvaṭṭo. Yathā hi nandiyāvaṭṭo anto ṭhiteṇa padhānāvayavena bahiddhā āvaṭṭati, evamayampi nayoti attho. Atha vā nandiyā taṇhāya pamodassa vā āvaṭṭo etthāti nandiyāvaṭṭo.

Heṭṭhā vuttanayena gahitesu taṇhāvijjātappakkhiyadhammesu taṇhā lobho, avijjā moho, avijjāya sampayutto lohite sati pubbo viya taṇhāya sati sijjhamāno āghāto doso iti tīhi akusalamūlehi gahitehi, tappaṭipakkhato kusalacittaggahaṇena ca tīhi kusalamūlāni gahitāni eva honti. Idhāpi lobho sabbāni vā sāsavakusalamūlāni samudayasaccaṃ, tannibbattā tesam adhiṭṭhānagocarabhūtā upādānakkhandhā dukkhasaccanti-ādīnā saccayojanā veditabbā. Phalaṃ panettha vimokkhattayavasena niddhāretabbaṃ, tīhi akusalamūlehi tividhaduccaritasamkilesamalavisama-akusalasaññāvitakkādivasena akusalapakkho netabbo, tathā tīhi kusalamūlehi tividhasucaritasamakusalasaññāvitakkasaddhammasamādhivimokkhamukhā divasena vodānapakkho netabboti ayaṃ **tipukkhalassa nayassa bhūmi**. Yo hi akusalamūlehi saṃkilesapakkhassa kusalamūlehi vodānapakkhassa suttatthassa ca catusaccayojanāmukhena nayanalakkaṇo saṃvaṇṇanāviseso, ayaṃ **tipukkhalanayo** nāma. Tīhi

1. Khu 10. 4 piṭṭhe.

avayavehi lobhādīhi saṁkilesapakkhe, alobhādīhi ca vodānapakkhe
pukkhalo sobhanoti tipukkhalo. Vuttaṁ hetam—

“Yo akusale samūlehi,
Neti kusale ca kusalamūlehi.
Bhūtaṁ tathaṁ avitathaṁ,
Tipukkhalam taṁ nayaṁ āhū”ti¹.

Vuttanayena gahitesu taṇhāvijjātapakkhiyadhammesu visesato
taṇhādiṭṭhīnaṁ vasena asubhe “subhan”ti, dukkhe “sukhan”ti ca vipallāsā,
avijjādiṭṭhīnaṁ vasena anicce “niccan”ti, anattani “attā”ti vipallāsā
veditabbā. Tesam paṭipakkhato kusalacittaggahaṇena siddhehi
sativīriyasamādhipaññindriyehi cattāri satipaṭṭhānāni siddhāniyeva honti.

Tattha catūhi indriyehi cattāro puggalā niddisitabbā. Kathaṁ? Duvidho
hi taṇhācarito mudindriyo tikkhindriyoti, tathā diṭṭhicarito. Tesu paṭhamo
asubhe “subhan”ti vipariyesaggāhī satibalena yathābhūtaṁ kāyasabhāvaṁ
sallakkhento bhāvanābalena taṁ vipallāsaṁ samugghātetvā
sammattaniyāmaṁ okkamati. Duttiyo asukhe “sukhan”ti vipariyesaggāhī
“uppannaṁ kāmavitakkaṁ nādhivāseti”ti-ādinā² vuttena
vīriyaṁvarabhūtena vīriyabalena paṭipakkham vinodento bhāvanābalena
taṁ vipallāsaṁ vidhametvā sammattaniyā maṁ okkamati. Tatiyo anicce
“niccan”ti vipallāsaggāhī samathabalena samāhitacitto saṅkhārānaṁ
khaṇikabhāvaṁ sallakkhento bhāvanābalena taṁ vipallāsaṁ samugghātetvā
sammattaniyāmaṁ okkamati. Catuttho
santatisamūhakkiccārammaṇaghaṇavañcitātāya phassādidhammapuñjamatte
anattani “attā”ti micchābhinivesī catukoṭīkasuññatāmanasikārena taṁ
micchābhinivesaṁ viddhamsetto sāmāññaphalaṁ sacchikaroti.
Subhasaññādīhi catuhipi vā vipallāsehi samudayasaccaṁ,
tesamadhiṭṭhānārammaṇabhūtā pañcupādānakkhandhā dukkhasaccanti-ādinā
saccayojanā veditabbā. Phalaṁ panettha cattāri sāmāññaphalāni, catūhi
cettha vipallāsehi caturāsavoghayogagantha-
agatitaṇhupādānasallaviññāṇaṭṭhiti-apariññādivasena akusalapakkho
netabbo, tathā catūhi

1. Khu 10. 4 piṭṭhe.

2. Ma 1. 14; Am 1. 323; Am 2. 342 piṭṭhesu.

satipaṭṭhānehi catubbidhajjhānavihārādhiṭṭhānasukhabhāgiyadhamma-
appamaññā sammappadhāna-iddhipādādivasena vodānapakkho netabboti
ayaṃ **sīhavikkīḷitassa nayassa bhūmi**. Yo hi subhasaññādīhi vipallāsehi
sakalassa saṃkilesapakkhassa saddhindriyādīhi ca vodānapakkhassa
catusaccayojanāvasena nayanalakkhaṇo saṃvaṇṇanāviseso, ayaṃ
sīhavikkīḷito nāma. Vuttaṃ hetam—

“Yo neti vipallāsehi,
Kilese indriyehi saddhamme.
Etaṃ nayaṃ nayavidū,
Sīhavikkīḷitaṃ āhū”ti¹.

Asantāsanajavaparakkamādivisesayogena sīho bhagavā, tassa vikkīḷitaṃ
desanā vacīkammabhūto viharoti katvā vipallāsatappaṭipakkhaparidīpanato
sīhassa vikkīḷitaṃ etthāti sīhavikkīḷito, nayo. Balavisesayogadīpanato vā
sīhavikkīḷitasadisattā nayo sīhavikkīḷito. Balaviseso cetttha saddhādibalaṃ,
dasabalāni eva vā.

Imesaṃ pana tiṇṇaṃ atthanayānaṃ siddhiyā vohāranayadvayaṃ
siddhameva hoti. Tathā hi atthanayattayadisābhāvena kusalādidhammānaṃ
ālocanaṃ **disālocanaṃ**. Vuttaṃ hetam—

“Veyyākaraṇesu hi ye,
Kusalākusalā tahiṃ tahiṃ vuttā.
Manasā olokayate,
Taṃ khu disālocanaṃ āhū”ti².

Tathā ālocitānaṃ tesaṃ dhammānaṃ atthanayattayayojane
samānayanato aṅkuso viya **aṅkuso**. Vuttaṃ hetam—

“Oloketvā disalocanena, ukkhipiya yaṃ samāneti.
Sabbe kusalākusale, ayaṃ nayo aṅkuso nāmā”ti².

Tasmā manasāva atthanayānaṃ disābhūtadhammānaṃ locanaṃ
disālocanaṃ, tesaṃ samānayanam aṅkusoti pañcapi nayāni yuttāni honti.

1. Khu 10. 4 piṭṭhe.

2. Khu 10. 5 piṭṭhe.

Ettāvata ca—

“Paṭhamo nandiyāvaṭṭo, dutiyo ca tipukkhalo.

Sihavikkīlito nāma, tatiyo nayalañjako.

Disālocanamāhaṃsu, catutthamṃ nayamuttamam.

Pañcama aṅkuso nāma, sabbe pañca nayā gatā”ti¹—

evam vuttapañcanayāpi ettha dassitāti veditabbā. Nayati saṃkilesam vodānañca vibhāgato ñāpetīti nayo, lañjeti pakāseti suttatthanti lañjako, nayo ca so lañjako cāti **nayalañjako**. Idañca suttam soḷasavidhe suttantapaṭṭhāne saṃkilesabhāgiyam byatirekamukhena nibbedhāsekkhabhāgiyanti daṭṭhabbam. Aṭṭhavīsatividhe pana suttantapaṭṭhāne lokiya lokuttaram sattadhammādhittānam ñāṇaṇṇeyyam dassanabhāvanam sakavacanam vissajjanīyam kusalākusalam anuññātam paṭikkhittaṇcāti veditabbam.

Tattha soḷasavidhasuttantam paṭṭhānam nāma “saṃkilesabhāgiyam suttam, vāsanābhāgiyam suttam, nibbedhabhāgiyam suttam, asekkhabhāgiyam suttam, saṃkilesabhāgiyañca vāsanābhāgiyañca suttam, saṃkilesabhāgiyañca nibbedhabhāgiyañca suttam, saṃkilesabhāgiyañca asekkhabhāgiyañca suttam, vāsanābhāgiyañca nibbedhabhāgiyañca suttam, vāsanābhāgiyañca asekkhabhāgiyañca suttam, nibbedhabhāgiyañca asekkhabhāgiyañca suttam, saṃkilesabhāgiyañca vāsanābhāgiyañca nibbedhabhāgiyañca suttam, saṃkilesabhāgiyañca vāsanābhāgiyañca asekkhabhāgiyañca suttam, saṃkilesabhāgiyañca nibbedhabhāgiyañca asekkhabhāgiyañca suttam, vāsanābhāgiyañca nibbedhabhāgiyañca asekkhabhāgiyañca suttam, saṃkilesabhāgiyañca vāsanābhāgiyañca nibbedhabhāgiyañca asekkhabhāgiyañca suttam, neva saṃkilesabhāgiyam na vāsanābhāgiyam na nibbedhabhāgiyam na asekkhabhāgiyam suttan”ti² evam vuttasoḷasasāsanapaṭṭhānāni.

Tattha saṃkilissanti etenāti saṃkilesa, saṃkilesabhāge saṃkilesakoṭṭhāse pavattam **saṃkilesabhāgiyam**. Vāsanā puññabhāvanā, vāsanābhāge pavattam **vāsanābhāgiyam**, vāsanam bhajāpetīti vā **vāsanābhāgiyam**. Nibbijjhanam lobhakkhandhādīnam padālanam nibbedho,

1. Khu 10. 2 piṭṭhe.

2. Khu 10. 106 piṭṭhe.

nibbedhabhāge pavattaṃ, nibbedhaṃ bhajāpetīti vā **nibbedhabhāgiyaṃ**. Pariniṭṭhitasikkhā dhammā asekkhā, asekkhabhāge pavattaṃ, asekkhe bhajāpetīti vā **asekkhabhāgiyaṃ**. Tesu yattha taṇhādisaṃkilesa vibhatto, idaṃ saṃkilesabhāgiyaṃ. Yattha dānādipuñṇakiriyavatthu vibhattaṃ, idaṃ vāsanābhāgiyaṃ. Yattha sekkhā sīlakkhandhādayo vibhattā, idaṃ nibbedhabhāgiyaṃ. Yattha pana asekkhā sīlakkhandhādayo vibhattā, idaṃ asekkhabhāgiyaṃ. Itarāni tesaṃ vomissakanayavasena vuttāni. Sabbāsavaṣaṃvarapariyāyādīnaṃ vasena sabbabhāgiyaṃ veditabbaṃ. Tattha hi saṃkilesadhammā lokiyasucaritadhammā sekkhā dhammā asekkhā dhammā ca vibhattā. Sabbabhāgiyaṃ pana “passaṃ na passaṃ”ti-ādikaṃ udakādi-anuvādavacanaṃ veditabbaṃ.

Aṭṭhavīsatividhaṃ suttantaṭṭhānaṃ pana “lokiyaṃ, lokuttaraṃ, lokiyaṇca lokuttaraṇca, sattādhiṭṭhānaṃ, dhammādhiṭṭhānaṃ, sattādhiṭṭhānaṇca dhammādhiṭṭhānaṇca, ñāṇaṃ, ñeyyaṃ, ñāṇaṇca ñeyyaṇca, dassanaṃ, bhāvanā, dassanaṇca bhāvanā ca, sakavacanaṃ, paravacanaṃ, sakavacanaṇca paravacanaṇca, vissajjanīyaṃ, avissajjanīyaṃ, vissajjanīyaṇca avissajjanīyaṇca, kammaṃ, vipāko, kammaṇca vipāko ca kusalaṃ, akusalaṃ, kusalaṇca akusalaṇca, anuññātaṃ, paṭikkhittaṃ, anuññātaṇca paṭikkhittaṇca, thavo”ti¹ evamāgatāni aṭṭhavīsati sāsanaṭṭhānāni. Tattha **lokiyanti** loka niyutto, loka vā vidito lokiyo. Idha pana lokiyo attho yasmiṃ sutte vutto, taṃ suttaṃ lokiyaṃ. Tathā **lokuttaraṃ**. Yasmiṃ pana sutte padesena lokiyaṃ, padesena lokuttaraṃ vuttaṃ, taṃ **lokiyaṇca lokuttaraṇca**. Satta-adhippāyasattapaññattimukhena desitaṃ **sattādhiṭṭhānaṃ**. Dhammavasena desitaṃ **dhammādhiṭṭhānaṃ**. Ubhayavasena desitaṃ **sattādhiṭṭhānaṇca dhammādhiṭṭhānaṇca**. Iminā nayena sabbapadesu attho veditabbo. Buddhādīnaṃ pana guṇābhithavanavasena pavattaṃ suttaṃ **thavo** nāma—

“Maggānaṭṭhaṅgiko seṭṭho, saccānaṃ caturo padā.

Virāgo seṭṭho dhammānaṃ, dvipadānaṇca cakkhumā”ti-ādikaṃ² viya.

Nettinayavaṇṇanā niṭṭhitā.

1. Khu 10. 139 piṭṭhe.

2. Khu 1. 52; Khu 10. 162, 206 piṭṭhesu.

2. **Saddagarukādīnanti** ādisaddena gandharasaphoṭṭhabbagaruke saṅgaṇhāti. **Āsayavasenāti** ajjhāsavayavaseṇa. Utusamuṭṭhānopi itthisantānagato saddo labbhati, so idha nādhīppetoti “**cittasamuṭṭhāno**”ti vuttaṃ. **Kathitasaddo** ālāpādisaddo. **Gītasaddo** sareṇa gāyanasaddo. Itthiyā hasanasaddopettha saṅgaṇhetabbo tassapi purisena assādetabbato. Tenāha “apica kho mātuḡāmaṣṣa saddaṃ suṇāti tirokuṭṭā vā tiropākārā vā hasantiyā vā bhaṇantiyā vā gāyantiyā vā, so tadassādeti”ti-ādi. **Nivatthanivāsanassāti** khalitthaddhassa nivāsanassa. **Alaṅkāraṣṣāti** nūpurādikassa alaṅkāraṣṣa. **Itthisaddotveva veditabboti** itthipaṭibaddhabhāvato vuttaṃ. Tenāha “**sabbopī**”ti-ādi. **Avidūratṭhāneti** tassa hatthikulassa vasaṇatṭhānato avidūratṭhāne. **Kāyūpapannoti** sampannakāyo thirakathinamahākāyo. **Mahāhatthīti** mahānubhāvo hatthī. **Jeṭṭhakaṃ katvāti** yūthapatim katvā.

Kathinatikkhabhāvena siṅgasadisattā aḷasaṅkhātāni siṅgāni etassa atthīti **siṅgī**, suvaṇṇavaṇṇatāya mahābalatāya ca sīhahatthi-ādimigasadisattā migo viyāti **migo**. Tattha tattha kiccaṃ netubhāvena cakkhuyeva nettam, taṃ uggatattṭhena āyataṃ etassāti **āyatacakkhunetto**. Atṭhi eva taco etassāti **atṭhittaco**. **Tenābhibhūtoti** tena migena abhibhūto ajjhotthaṭo niccalaggahito hutvā. **Karuṇaṃ rudāmīti** kāruṇṇāpatto hutvā rodāmi viravāmi. Paccatthikabhayato mutti nāma yathā tathā sahāyavato hoti, na ekākinoti āha “**mā heva maṃ pāṇasamaṃ jaheyyā**”ti. Tattha **mā heva manti** maṃ evarūpaṃ byasaṇaṃ pattaṃ attano pāṇasamaṃ piyasāmikaṃ tvaṃ māheva jahi.

Kuṇḇe girikūṭe ramati abhīramati, tattha vā vicarati, koṇḇanādaṃ nadanto vā vicarati, ku vā pathavī, tadabhighātena jīratīti **kuṇḇaro**. **Saṭṭhihāyananti** jātiyā saṭṭhivassakālasmiṃ kuṇḇarā thāmena parihāyanti, taṃ sandhāya evamāha. **Pathabyā caturantāyāti** catūsu disāsu samuddaṃ patvā tṭhitāya caturantāya pathaviyā. **Suppiyoti** suṭṭhu piyo. **Tesaṃ tvaṃ vārijo setṭhoti** ye samudde vā gaṅgāya vā yamunāya vā nammadānadiyā¹ vā kuḷīrā, tesaṃ sabbesaṃ vaṇṇasampattiyā mahantattena ca

1. Rammadānadiyā (Sī)

vārimhi jātattā vārijo tvameva seṭṭho pasatthataro. **Muñca rodantiyā patinti** sabbesaṃ seṭṭhattā tameva yācāmi, rodamānāya mayhaṃ sāmikaṃ muñca. **Athāti** gahaṇassa sithilakaraṇasamanantarameva. **Etassāti** paṭisattumaddanassa.

Pabbatagahanam nissāyāti tisso pabbatarājiyo atikkamitvā catutthāya pabbatarājiyaṃ pabbatagahanam upanissāya. **Evam vadatīti** “udetayaṃ cakkhumā”ti-ādinā¹ imaṃ buddhamantaṃ mantento vadati.

Tattha **udetīti** pācīnalokadhātuto uggacchati. **Cakkhumāti** sakalacakkavālavāsīnaṃ andhakāraṃ vidhamitvā cakkhuppaṭilābhakaraṇena yantena tesaṃ dinnam cakkhu, tena cakkhunā cakkhumā. **Ekarājāti** sakalacakkavāle ālokarānaṃ antare seṭṭhaṭṭhena raṇjanatṭhena ca ekarājā. **Harissavaṇṇoti** harisamānavāṇṇo, suvaṇṇavaṇṇoti attho. Pathaviṃ pabhāsetīti **pathavippabhāso**. **Taṃ taṃ namassāmīti** tasmā taṃ evarūpaṃ bhavantaṃ namassāmi vandāmi. **Tayājja guttā viharemu divasanti** tayā ajja rakkhitā² hutvā imaṃ divasaṃ catu-iriyāpathavihārena sukhaṃ vihareyyāma³.

Evam bodhisatto imāya gāthāya sūriyaṃ namassitvā dutiyagāthāya atīte parinibbute buddhe ceva buddhaguṇe ca namassati “**ye brāhmaṇā**”ti-ādinā. Tattha **ye brāhmaṇāti** ye bāhitapāpā parisuddhā brāhmaṇā. **Vedagūti** vedānaṃ pāraṃ gatā, vedehi pāraṃ gatāti vā vedagū. Idha pana sabbe saṅkhatadhamme vidite pākaṭe katvā katāti vedagū. Tenevāha “**sabbadhamme**”ti. Sabbe khandhāyatanadhātudhamme salakkhaṇasāmaññalakkhaṇavasena attano ñāṇassa vidite pākaṭe katvā tiṇṇaṃ mārānaṃ matthakaṃ madditvā sammāsambodhiṃ pattā, saṃsāraṃ vā atikkantāti attho. **Te me namoti** te mama imaṃ namakkāraṃ paṭicchantu. **Te ca maṃ pālayantūti** evaṃ mayā namassitā ca te bhagavanto maṃ pālayantu rakkhantu. **Namattu buddhānaṃ -pa- vimuttiyāti** ayaṃ mama namakkāro atītānaṃ parinibbutānaṃ buddhānaṃ atthu, tesaṃyeva catūsu phalesu⁴ ñāṇasaṅkhātāya bodhiyā atthu, tathā tesaññeva

1. Khu 5. 38 piṭṭhe Jātake.

2. Rakkhitagopitā (Sī)

3. Vihareyyāmu (Ka)

4. Catūsu maggesu catūsu phalesu (Sī)

arahattaphalavimuttiyā vimuttānaṃ atthu, yā ca nesaṃ
tadaṅgavikkhambhanasamucchedappaṭippassaddhinissaraṇasaṅkhātā
pañcavidhā vimutti, tāya vimuttiyāpi ayaṃ mayhaṃ namakkāro atthūti
attho. **Imaṃ so parittaṃ katvā, moro carati esanāti** idaṃ pana padadvayaṃ
sathā abhisambuddho hutvā āha. Tassattho—bhikkhave so moro imaṃ
parittaṃ imaṃ rakkhaṃ katvā attano gocarabhūmiyaṃ pupphaphalādīnaṃ
atthāya nānappakārāya esanāya caratīti.

Evam divasaṃ caritvā sāyaṃ pabbatamatthake nisīditvā atthaṃ
gacchantaṃ sūriyaṃ olokeno buddhaguṇe āvajjetvā nivāsattāhāne
rakkhāvaraṇatthāya puna brahmamantaṃ vadanto **“apetayan”**ti-ādimāha.
Tenevāha **“divasaṃ gocaraṃ gahetvā”**ti-ādi. Tattha **apetīti** apayāti atthaṃ
gacchati. **Imaṃ so parittaṃ katvā moro vāsamakappayīti** idampi
abhisambuddho hutvā āha. Tassattho—bhikkhave so moro imaṃ parittaṃ
imaṃ rakkhaṃ katvā attano nivāsattāhāne vāsaṃ saṃkappayitthāti.
Parittakammato puretamevāti parittakammakaraṇato puretameva.
Morakukkuṭikāyāti kukkuṭikāsadisāya moracchāpikāya.

3. Tatiye rūpāyatanassa viya gandhāyatanassapi
samuṭṭhāpakapaccayavasena viseso natthīti āha **“catusamuṭṭhānikan”**ti.
Itthiyā sarīragandhassa kāyāruḷha-anulepanādīgandhassa ca
tappaṭibaddhabhāvato avisesena gahaṇappasaṅge idhādhippetagandhaṃ
niddhārento **“svāyan”**ti-ādimāha. Tattha **itthiyāti** pākatikāya itthiyā.
Duggandhoti pākatikāya itthiyā sarīragandhabhāvato duggandho hoti.
Idhādhippetoti iṭṭhabhāvato assādetabbattā vuttaṃ. Kathaṃ pana itthiyā
sarīragandhassa duggandhabhāvoti āha **“ekaccā hī”**ti-ādi. Tattha assassa
viya gandho assā atthīti **assagandhinī**. Meṇḍakassa viya gandho assā atthīti
meṇḍakagandhinī. Sedassa viya gandho assā atthīti **sedagandhinī**. Soṇitassa
viya gandho assā atthīti **soṇitagandhinī**. **Rajjatevāti** anādimati saṃsāre
avijjādikilesavāsānāya parikaḍḍhitahadayattā
phoṭṭhabbassādagadhitacittatāya ca andhabālo evarūpāyapi
duggandhasarīrāya itthiyā rajjatiyeva. Pākatikāya itthiyā sarīragandhassa
duggandhabhāvaṃ dassetvā idāni viṣiṭṭhāya ekaccāya itthiyā tadabhāva
dassetum

“**cakkavattino pana**”ti-ādimāha. Yadi evaṃ īdisāya itthiyā sarīragandhopi idha kasmā nādippetoti āha “**ayaṃ na sabbāsaṃ hotī**”ti-ādi.

Tiracchānagatāya itthiyā ekaccāya ca manussitthiyā sarīragandhassa ativiya assādetabbabhāvadassanato puna tampi avisesena anujānanto “**itthikāye gandho vā hotū**”ti-ādimāha. **Itthigandhotveva veditabboti** tappaṭibaddhabhāvato vuttaṃ.

4. Catutthādīsu **kiṃ tenā**ti jivhāviññeyyarase idhādhippete kiṃ tena avayavarasādīnā vuttana payojanaṃ. Oṭṭhamāsaṃ sammakkhetīti **oṭṭhamāsasammakkhano**, khelādīni. Ādisaddena oṭṭhamāsamakkhano tambulamukhavāsādiraso gayhati. **Sabbo so itthirasoti** itthiyāvassa gahetabbattā.

5. **Itthiphotṭhabboti** etthāpi eseṇa nayo. Yadi panettha itthigatāni rūpārammaṇādīni avisesato purisassa cittaṃ pariyādāya tiṭṭhanti, atha kasmā bhagavatā tāni visuṃ visuṃ gahetvā desitānīti āha “**iti satthā**”ti-ādi. **Yathā hī**ti-ādinā tamevatthaṃ samattheti. **Gametī**ti vikkhepaṃ gameti, ayameva vā pāṭho. **Gametī**ti ca saṅgameti. **Na tathā sesā saddādayo, na tathā rūpādīni ārammaṇānī**ti etena sattesu rūpādigarukatā asaṃkiṇṇā viya dassitā, na kho panetaṃ evaṃ daṭṭhabbaṃ anekavidhattā sattānaṃ ajjhāsayassāti dassetuṃ “**ekaccassa cā**”ti-ādi vuttaṃ. **Pañcagarukavasenā**ti pañcārammaṇagarukavasena. Ekaccassa hi purisassa yathāvuttesu pañcasupi ārammaṇesu garukatā hoti, ekaccassa tattha katipayesu, ekasmiṃ eva vā, te sabbe pi pañcagarukātveva veditabbā yathā “**sattisayo aṭṭhavimokkhā**”ti. **Na pañcagarukajātakavasena**¹ ekekārammaṇe garukasseva nādhippetattā. Ekekārammaṇagarukānaṃ hi pañcannaṃ puggalānaṃ tattha āgatattā taṃ jātaṃ “**pañcagarukajātakaṇ**”ti vuttaṃ. Yadi evaṃ tena idha payojanaṃ natthīti āha “**sakkhibhāvatthāyā**”ti. **Āharitvā kathetabbanti** rūpādigarukatāya ete anayabyasanaṃ pattāti dassetuṃ kathekabbaṃ.

1. Khu 5. 31 piṭṭhe.

6-8. **Tesanti** suttānaṃ. **Uppaṇḍetvā gaṇhituṃ na icchīti** tassa thokaṃ virūpadhātukattā na icchi. **Anatikkamantoti** saṃsando. **Dve hatthaṃ pattānīti** dve uppalāni hatthaṃ gatāni. **Pahaṭṭhākāraṃ dassetvāti** aparāhi itthīhi ekekaṃ laddhaṃ, mayā dve laddhānīti santuṭṭhākāraṃ dassetvā. **Parodīti** tassā pubbasāmikassa mukhagandhaṃ saritvā. Tassa hi mukhato uppalagandho vāyati. **Hāretvāti** tasmā ṭhānā apanetvā, “harāpetvā”ti vā pāṭho, ayamevattho.

Sādhu sādhuṭi bhāsatoti dhammakathāya anumodanavasena “sādhu sādhu”ti bhāsato. **Uppalaṃva yathodaketi** yathā uppalāṃ uppalagandho mukhato nibbattoti. **Vaṭṭameva kathitanti** yathārutavasena vuttaṃ. Yadi pi evaṃ vuttaṃ, tathāpi yathārutamatthe¹ avatvā vivaṭṭaṃ nīharitvā kathetabbaṃ vimuttirasattā bhagavato desanāya.

Iti manorathapūraṇiyā aṅguttaranikāyaṭṭhakathāya
Paṭhamavaggavaṇṇanāya anuttānatthadīpanā niṭṭhitā.

2. Nīvaraṇappahānavaggavaṇṇanā

10. **Dutiyassāti** dutiyavaggassa. **Ekadhammampīti** ettha “ekasabhāvampī”ti iminā sabhāvatthoyaṃ dhammasaddo “kusalā dhammā”ti-ādīsu² viyāti dassitaṃ hoti. Yadaggena ca sabhāvattho, tadaggena nissattattho siddho evāti “**nissattaṭṭhena dhammo veditabbo**”ti vuttaṃ. **Subhanimittanti** dhammapariyāyena vuttaṃ. Taṃ hi atthato kāmaccando vā siyā. So hi attano gahaṇākārena subhanti, tenākārena pavattanakassa aññassa kāmaccandassa nimittattā “subhanimittan”ti ca vuccati. Tassa ārammaṇaṃ vā subhanimittan. Itṭhaṃ hi itṭhākārena vā gayhamānaṃ rūpādi-ārammaṇaṃ “subhanimittan”ti vuccati. **Ārammaṇameva** cettha nimittan³. Tathā hi vakkhati “subhanimittanti rāgaṭṭhāniyaṃ ārammaṇan”ti. Samuccayattho vā-saddo anekatthattā nipātānaṃ. **Bhiyyobhāvāyāti** punappunaṃ bhāvāya. **Vepullāyāti** vipulabhāvāya, vaḍḍhiyāti attho. **Ajāto** nijjāto. Sesapadāni

1. Yathārutamatte (Sī)

2. Abhi 1. 1 piṭṭhe.

3. Niyamitaṃ (Ka)

tasseva vevacanāni. **Kāmesūti** pañcasu kāmagaṇesu. **Kāmacchandoti** kāmasaṅkhāto chando, na kattukamyatāchando na dhammacchando. Kāmanavasena rajjanavasena ca kāmo eva rāgo **kāmarāgo**. Kāmanavasena nandanavasena ca kāmo eva nandīti **kāmanandī**. Kāmanavasena taṇhāyanavasena ca **kāmataṇhā**. Ādisaddena “kāmasneho kāmapariḷāho kāmamucchā kāmajjhosaṇaṃ”ti etesaṃ padānaṃ saṅgaho daṭṭhabbo. Tattha vuttanayeneva kāmattaṃ viditvā sinehanaṭṭhena **kāmasneho**, pariḷāhanaṭṭhena **kāmapariḷāho**, mucchanaṭṭhena **kāmamucchā**, gilitvā pariniṭṭhāpanaṭṭhena **kāmajjhosaṇaṃ** veditaḥḥaṃ. Kāmacchando eva kusallappavattito cittassa nīvaraṇaṭṭhena **kāmacchandanivaraṇaṃ**, soti kāmaccchando. **Asamudācāravasena**ti asamudācārabhāvena. **Ananubhūṭārammaṇavasena**ti “idaṃ nāmetan”ti vatthavasena ñatvā tasmaṃ attabhāve ananubhūṭassa ārammaṇassa vasena. Rūpasaddādibhedanā pana ārammaṇaṃ ekasmiṃpi attabhāve ananubhūṭaṃ nāma nattheva, kimaṅgaṃ pana anādimati saṃsāre.

Yaṃ vuttaṃ “asamudācāravasena cā”ti-ādi, taṃ atisaṃkhittanti vitthārato dassetuṃ “**tatthā**”ti-ādimāha. Tattha bhavaggahaṇena mahaggatabhavo gahito. So hi oḷārikakilesasamudācārarahito. Tajjanīyakammakatādikāle pārivāsikakāle ca caritabbāni **dve asīti khuddakavattāni** nāma. Na hi tāni sabbāsu avatthāsu caritabbāni, tasmā tāni na mahāvattesu antogadhānīti “**cuddasa mahāvattāni**”ti vuttaṃ. Tathā āgantukavatta āvāsikagamika anumodanabhattacha piṇḍacārika āraññakasenāsanajantāgharavaccakuṭi-upajjhāyasaddhivihārika-ācariya-antevāsikavattānīti etāni cuddasa mahāvattāni nāmāti vuttaṃ. Itarāni pana “pārivāsikānaṃ bhikkhūnaṃ vattaṃ paññāpessāmī”ti¹ ārabhitvā “na upasampādetabbāmi¹, na chamāyaṃ caṅkamante caṅkame caṅkamitabbāmi”ti² vuttāni pakatatte caritabbavattāni chasaṭṭhi, tato param “na bhikkhave pārivāsikena bhikkhunā pārivāsikavuḍḍhatarena bhikkhunā saddhiṃ, mūlāyapaṭikassanārahena, mānattārahena, mānattacārikena, abbhānārahena bhikkhunā saddhiṃ ekacchanne āvāse vatthabban”ti-ādīni² pakatatte caritabbhehi anaññattā visum visum agaṇetvā pārivāsikavuḍḍhatarādīsū puggalantaresu

1. Vi 4. 83 piṭṭhe.

2. Vi 4. 86 piṭṭhe.

caritabbattā tesaṃ vasena sampiṇḍetvā ekekaṃ katvā gaṇitāni pañcāti ekasattativattāni. Ukkhepanīyakammakatavattesu vattapaññāpanavasena vuttaṃ “na pakatattassa bhikkhuno abhivādanam paccuṭṭhānam -pa-piṭṭhiparikammaṃ sādītābbaṃ”¹ti idam abhivādanādīnam assādiyanam ekaṃ, “na pakatatto bhikkhu sīlavipattiyā anuddhamsetabbo”¹ti-ādīni¹ ca dasāti evaṃ dvāsīti honti. Etesveva pana kānici tajjanīyakammakatādivattāni kānici pārivāsikādivattānīti aggahitaggahaṇena dvāvīsativattanti veditabbaṃ. “Cuddasa mahāvattāni”¹ti vatvāpi “āgantukagamikavattāni cā”¹ti imesaṃ visum gahaṇam imāni abhiṇham sambhavantīti katvā. **Kilesa okāsaṃ na labhati** sabbadā vattappaṭipattiyāmyeva byāvaṭacittatāya.

Ayonisomanasikāraṇti aniccādīsū “niccaṃ”¹ti-ādīnā pavattaṃ anupāyamanasikāraṃ. **Sativossagganti** satiyā vissajjanaṃ, sativirahanti attho. **Evampīti** vakkhamānāpekkhāya avuttasampiṇḍanatto **pi-saddo**.

Anusandhivasenāti pucchānusandhi-ādi-anusandhivasena. **Pubbāparavasenāti** pubbāparaganthasallakkhaṇavasena. **Gaṇhantassāti** ācariyamukhato gaṇhantassa. **Sajjhāyantassāti** ācariyamukhato uggahitagantham sajjhāyantassa. **Vācentassāti** pālīm tadatthañca uggāṇhāpanavasena paresaṃ vācentassa. **Desentassati** desanāvasena paresaṃ dhammaṃ desentassa. **Pakāsentassāti** attano attano saṃsayatṭhāne pucchantānam yāthāvato attham pakāsentassa. **Kilesa okāsaṃ na labhati** rattindivaṃ ganthakammesuyeva byāvaṭacittatāya. **Evampīti** vuttasampiṇḍanatto **pi-saddo**. Evaṃ sesesupī.

Dhutaṅgadhara hotīti vuttamevattham pakāseti “**terasa dhutaṅgagūṇe samādāya vattatī**”¹ti. **Bāhullāyāti** cīvarādi-paccaya-bāhullāya. Yathā cīvarādayo paccayā bahulaṃ uppajjanti, tathā **āvattassa** pavattassāti attho. **Parihīnajjhānassāti** jhānantarāyakarena visabhāgarūpadassanādinā kenaci nimittena parihīnajjhānassa. **Vissatṭhajjhānassāti** asamāpajjanavasena pariccattajjhānassa. **Bhassādīsūti ādi-saddena** gaṇasaṅgaṇikaniddānavakammādiṃ saṅgaṇhāti. **Sattasu vā anupassanāsūti** ettha satta anupassanā nāma aniccānupassanā dukkhānupassanā anattānupassanā nibbidānupassanā

virāgānupassanā nirodhānupassanā paṭinissaggānupassanā khayānupassanā
vayānupassanā vipariṇāmanupassanā animittānupassanā
appaṇihitānupassanā suññātānupassanā adhipaññādharmavipassanā
yathābhūtañāṇadassanaṃ ādinavānupassanā paṭisaṅkhānupassanā
vivatṭānupassanāti imāsu aṭṭhārasasu mahāvipassanāsu ādito vuttā
aniccānupassanādipaṭinissaggānupassanāpariyantā satta. Ettha yaṃ
vattabbaṃ, taṃ **visuddhimaggasaṃvaṇṇanāto**¹ gahetabbaṃ.

Anāsevanatāyāti purimattabhāve jhānena vikkhambhi takilesassa
kāmacchandādi-āsevanāya abhāvato. **Ananubhūtapubbanti** tasmim attabhāve
ananubhūtapubbaṃ. **Jātoti** etasseva vevacanaṃ **sañjātoti**-ādi. Nanu ca
khaṇikattā sabbadhammānaṃ uppannassa kāmacchandassa taṅkhaṇaṃyeva
avassaṃ nirodhasambhavato niruddhe ca tasmim puna aññasseva
uppañjanato ca kathaṃ tassa punappunabhāvo rāsibhāvo cāti āha “**tattha
sakiṃ uppanno kāmacchando**”ti-ādi. **Aṭṭhānametanti** akāraṇametam, yena
kāraṇena uppanno kāmacchando na nirujjhati, niruddho ca sveva puna
uppañjissati, tādisaṃ kāraṇaṃ natthīti attho.

Rāgaṭṭhāniyanti rāgajanakaṃ. Aniccādīsu niccādivasena
viparītamanasikāro idha ayonisomanasikāroti āha “**anicce niccan**”ti-ādi.
Ayonisomanasikāroti anupāyamanasikāro, kusalahammappavattiyā
akāraṇabhūto manasikāroti attho. **Uppathamanasikāroti**
kusalahammappavattiyā amaggabhūto manasikāro. **Saccavippaṭikūlenāti**
saccābhisamayassa ananulomavasena. **Āvajjanāti**-ādinā āvajjanāya
paccayabhūtā tato purimuppannā manodvārikā akusalajavanappavatti
phalavohārena tathā vuttā. Tassa hi vasena sā akusalappavattiyā upanissayo
hoti. **Āvajjanāti** bhavaṅgacittaṃ āvajjayatīti āvajjanā. Anu anu āvajjetīti
anvāvajjanā. Bhavaṅgārammaṇato aññaṃ ābhujatīti **ābhogo**.
Samannāharatīti **samannāhāro**. Tadevārammaṇaṃ attānaṃ anubandhitvā
uppañjamāno manasi karoti ṭhapetīti **manasikāro**. **Ayaṃ vuccati**
ayonisomanasikāroti ayaṃ anupāya-uppathamanasikāralakkhaṇo
ayonisomanasikāro nāma vuccati.

1. Visuddhi-Ṭī 2. 439 piṭṭhe.

12. Dutiye **bhattabyāpatti viyāti** bhattassa pūtibhāvena vippakārappatti viya, **cittassa byāpajjananti** cittassa vikārabhāvāpādanam. Tenevāha “**pakativijahanabhāvo**”ti. Byāpajjati tena cittaṃ pūtikummāsādayo viya purimapakatim jahatīti **byāpādo**. Paṭighoyeva uparūpari uppajjamānassa paṭighassa nimittabhāvato **paṭighanimittam**, paṭighassa ca kāraṇabhūtaṃ ārammaṇaṃ paṭighanimittanti āha “**paṭighassapi paṭighārammaṇassapi etaṃ adhivacanan**”ti. **Aṭṭhakathāyanti** mahā-aṭṭhakathāyaṃ.

13. Tatiye thinatā **thinam**, sappiṇḍo viya avipphārikatāya cittassa ghanabhāvo baddhatāti attho. Medhatīti **middham**, akammaññabhāvena himsatīti attho. “Ya tasmim samaye cittassa akalyatā”ti-ādinā¹ thinassa, “yā tasmim samaye kāyassa akalyatā”ti-ādinā¹ ca middhassa abhidhamme niddiṭṭhattā vuttaṃ “**cittassa akammaññatā thinam, tiṇṇam khandhānam akammaññatā middhan**”ti. Satipi aññamaññāvippayoge cittakāyalahutādīnaṃ viya cittacetasikānaṃ yathākkamaṃ taṃtaṃviseso siyā, yā tesam akalyakādīnaṃ visesapaccayatā, ayametesam sabhāvoti daṭṭhabbari. **Kapimiddhassāti** vuttamevattham vibhāveti “**pacalāyikabhāvassā**”ti. Akkhidalānaṃ pacalabhāvaṃ karotīti pacalāyiko, pacalāyikassa bhāvo **pacalāyikabhāvo**, pacalāyikattanti vuttaṃ hoti. **Ubhinnanti** thinamiddhānaṃ. “Vitthāro veditabbo”ti iminā sambandho veditabbo. **Cittassa akalyatāti** cittassa gilānabhāvo. Gilāno hi akalyakoti vuccati. Vinayepi vuttaṃ “nāhaṃ bhante akalyako”ti². Kālaṃ khamatīti hi kalyaṃ, arogatā, tassaṃ niyutto kalyako, na kalyako **akalyako**. **Akammaññatāti** cittagelaññasaṅkhātova akammaññatākāro. **Olīyanāti** olīyanākāro. Iriyāpathūpatthambhitaṃ hi cittaṃ iriyāpathaṃ sandhāretuṃ asakkontaṃ rukkhe vagguli viya khīle laggitaphāṇitavārako viya ca olīyati lambati, tassa taṃ ākāraṃ sandhāya “olīyanā”ti vuttaṃ. Dutiyapadaṃ upasaggena vaḍḍhitaṃ. **Kāyassāti** vedanādikkhandhattayasāṅkhātassa nāmakāyassa. **Akalyatā akammaññatāti** heṭṭhā vuttanayameva. Megho viya ākāsaṃ onayhatīti **onāho**. **Onayhatīti** ca chādeti avattharati vāti

1. Abhi 1. 233 piṭṭhe.

2. Vi 1. 78 piṭṭhe.

attho. Sabbatobhāgena onāhoti **pariyonāho**. **Arati**-ādīnaṃ attho **vibhaṅge**¹ vuttanayeneva veditabboti tattha vuttapāliyaṃ dassetuṃ “**vuttaṃ hetan**”ti-ādimāha.

Tattha **pantesūti** dūresu, vivittesu vā. **Adhikusalesūti** samathavipassanādhammesu. **Aratīti** ratippaṭikkhepo. **Aratitāti** aramanākāro. **Anabhiratīti** anabhiratabhāvo. **Anabhiramanāti** anabhiramanākāro. **Ukkaṇṭhitāti** ukkaṇṭhanākāro. **Paritassitāti** ukkaṇṭhanavaseneva paritassanā, ukkaṇṭhitasseva tattha tattha taṇhāyanāti vuttaṃ hoti. **Paritassitāti** vā kampanā. **Tandīti** jāti-ālasīyaṃ, pakati-ālasīyanti attho. Tathā hi kusalataraṇe kāyassa avipphārikatā līnatā jāti-ālasīyaṃ tandī nāma, na roga-utujādīhi kāyagelaññaṃ. **Tandiyanāti** tandiyanākāro. **Tandimanatāti** kandiya abhibhūtacittatā. Alasassa bhāvo **ālasīyaṃ**, ālasīyānanākāro **ālasīyānanā**. Ālasīyāyitassa bhāvo **ālasīyāyitattaṃ**. Iti sabbehipi imehi padehi kilesavasena kāyālasīyaṃ kathitaṃ. Thinamiddhakāraṇānaṃ hi rāgādikilesānaṃ vasena nāmakāyassa ālasīyaṃ, tadeva rūpakāyassāpīti daṭṭhabbaṃ. **Jambhanāti** phandanā. Punappunaṃ jambhanā **vijambhanā**. **Ānamanāti** purato namanā. **Vinamanāti** pacchato namanā. **Sannamanāti** samantato namanā. **Paṇamanāti** yathā tantato uṭṭhitapesakāro kismiñcīdeva gahetvā ujum kāyaṃ ussāpeti, evaṃ kāyassa uddhaṃ ṭhapanā. **Byādhiyakanti** uppanabyādhitā. Iti sabbehipi imehi padehi thinamiddhakāraṇānaṃ rāgādikilesānaṃ vasena kāyabandhanameva kathitaṃ. **Bhuttāvissāti** bhuttavato. **Bhattamucchāti** bhattagelaññaṃ. Balavabhattena hi mucchāpato viya hoti. **Bhatakilamathoti** bhattena kilantabhāvo. **Bhattapariḷāhoti** bhattadaratho. Tasmim hi samaye pariḷāhuppattiyā upahatindriyo hoti, kāyo jīratīti. **Kāyaduṭṭhullanti** bhattaṃ nissāya kāyassa akammaññaṃ. **Akalyatāti**-ādi heṭṭhā vuttanayameva. **Līnanti** avipphārikatāya paṭikuṭitaṃ. Itare dve ākārabhāvaniddesā. **Thinanti** sappiṇḍo viya avipphārikatāya ghanabhāvena ṭhitaṃ. **Thiyanāti** ākāraniddeso. Thiyibhāvo

1. Abhi 2. 365 piṭṭhe.

thiyitattam, avipphāravaseneva baddhatāti attho. Imehi pana sabbehipi padehi thinamiddhakāraṇānaṃ rāgādikilesānaṃ vasena cittassa gilānākāro kathitoti veditabbo. **Purimā cattāro dhammā**ti arati tandī vijambhitā bhattasammadoti ete cattāro dhammā. Yadā thinamiddhaṃ uppannaṃ hoti, tadā arati-ādīnampi sambhavato “**upanissayakoṭiyā pana hotī**”ti vuttaṃ, upanissayakoṭiyā paccayo hotīti attho.

14. Catutthe uddhatassa bhāvo **uddhaccaṃ**. Yassa dhammassa vasena uddhataṃ hoti cittaṃ, taṃsampayuttā vā dhammā, so dhammo **uddhaccaṃ**. Kucchitaṃ kataṃ kukataṃ, duccharitaṃ sucaritañca. Akatampi hi kukatameva. Evaṃ hi vattāro honti “yaṃ mayā na kataṃ, taṃ kukatan”ti. Evaṃ katākataṃ duccharitaṃ sucaritañca kukataṃ, taṃ ārabha vippaṭisāravasena pavattaṃ pana cittaṃ idha kukatanti veditabbaṃ. Tassa bhāvo **kukkuccaṃ**. **Cittassa uddhatākāro**ti cittassa avūpasamākārova vutto. Avūpasamalakkhaṇaṃ hi uddhaccaṃ. Yathāpavattassa katākātākāraviṣiṭṭhassa duccharitasucaritassa anusocanavasena virūpaṃ paṭisaraṇaṃ **vippaṭisāro**. Kukkuccassapi katākātānusocanavasena cittavikkhepabhāvato avūpasamākāro sambhavatīti āha “**cetaso avūpasamoti uddhaccakukkuccassevetarī nāmaṃ**”ti. Sveva ca cetaso avūpasamoti uddhaccakukkuccameva niddiṭṭhaṃ. Tañca attanova attanā sahaajātaṃ na hotīti āha “**ayaṃ pana upanissayakoṭiyā paccayo hotī**”ti. Upanissayapaccayatā ca purimuppannavasena veditabbā.

15. Pañcame vigatā cikicchā assāti **vicikicchā**. Sabhāvaṃ vicinanto tāya kicchatīti vā **vicikicchā**.

16. Chaṭṭhe **hetuṃ vā paccayaṃ vā na labhatī**ti ettha hetuggahaṇena janakaṃ kāraṇamāha, paccayaggahaṇena anupālanakaṃ kāraṇaṃ. **Hetunti** vā upādānakāraṇaṃ. **Paccayanti** sahakāraṇaṃ vuttaṃ. **Tanti** kilesaṃ. **Vivaṭṭetvā arahattaṃ gaṇhātī**ti vivaṭṭābhimukhaṃ cittaṃ pesetvā vipassanaṃ vaḍḍhento arahattaphalaṃ gaṇhātī. Bhikkhāya caranti etthāti **bhikkhācāro**, gocaragāmassetaṃ adhivacanaṃ, tasmim bhikkhācāre. **Vayaṃ āgammā**ti dārabharaṇānurūpaṃ vayaṃ āgamma. **Āyūhantoti** upacinanto. **Aṅgārapakkanti** vītaccikaṅgāresu pakkaṃ. **Kim nāmetanti** bhikkhū garahanto āha.

Jīvamānapetakasattoti jīvamāno hutvā “teneva attabhāvena petabhāvaṃ pattasatto bhavissatī”ti parikkappavasena vuttaṃ. **Kuṭanti** pāṇiyaghaṭaṃ. **Yāva dāruṇanti** ativiya dāruṇaṃ. **Vipāko kīdiso bhavissatīti** tayā katakammaṣṣa āyatīṃ anubhavitabbavipāko kīdiso bhavissati.

Visaṅkharitvāti chedanabhedanādihi vināsetvā. **Dīpakamigapakkhinoti** attano nisinnabhāvassa dīpanato evaṃladdhanāmā migapakkhino, yena araṇṇaṃ netvā nesādo tesaṃ saddena āgatāgate migapakkhino vadhitvā gaṇhāti. **Theranti** Cūḷapiṇḍapātikatissattheraṃ. **Iddhiyā abhisāṅkharitvāti** adhiṭṭhānādivasena iddhiṃ abhisāṅkharitvā. Upayogathe cetāṃ karaṇavacanaṃ. **Aggipapaṭikanti** accikaraṇaṃ¹, vipphuliṅganti attho. **Passantassevāti** anādare sāmivacanaṃ. **Tassa therassāti** tassa Milakkhatissattherassa. **Tassāti** tassā aggipapaṭikāya. **Paṭibalassāti** uggahaṇasajjhāyādīsu paṭibalassa. Dukkhaṃ upanīsa kāraṇametissāti **dukkhūpanisā**, dukkhanibandhanā dukkhahetukā saddhāti vuttaṃ hoti. Vattamukhena kammaṭṭhānassa kathitattā “**vattasīse ṭhatvā**”ti vuttaṃ. **Palālavaraṇakanti** palālapuṇjaṃ.

Ārambhathāti samathavipassanādīsu vīriyaṃ karoṭha. **Nikkamathāti** kosajjato nikkhamatha, kāmānaṃ vā panūdanāya nikkhamatha, ubhayenapi vīriyameva vuttaṃ. Vīriyaṃ hi ārambhanakavasena ārambho, kosajjato nikkhamanavasena “nikkamo”ti vuccati. **Yuñjatha buddhasāsane** buddhassa bhagavato pariyattipaṭipattipaṭivedhasaṅkhāte tividdhasāsane yuñjatha yogaṃ karoṭha, evamanuyuñjantā **maccuno senaṃ dhunātha** viddhamsetha. Tattha **maccuno senanti**—

“Kāmā te paṭhamā senā, dutiyā aratī vuccati.

Tatiyā khuppiṇāsā te, catutthī taṇhā pavuccati.

Pañcamaṃ thinamiddhaṃ te, chaṭṭhā bhīrū pavuccati.

Sattamī vicikicchā te, makkho thambho te aṭṭhamo.

1. Aggikaraṇaṃ (Ka)

Lābho siloko sakkāro,
Micchāladdho ca yo yaso.
Yo cattānaṃ samukkaṃse,
Pare ca avajānāti.

Esā namuci te senā, kaṇhassābhippahārīnī.
Na naṃ asūro jināti, jetvā ca labhate sukhaṃ”ti¹—

evamāgataṃ kamādibhedaṃ maccuno senaṃ. Ettha ca yasmā āditova agāriyabhūte satte vatthukāmesu kilesakāmā mosayanti, te abhibhuyya anagāriyabhāvaṃ upagatānaṃ pantesu senāsanesu aññataraññataresu vā adhikusalesu dhammesu arati uppajjati. Vuttaṃ hetuṃ “pabbajitena kho āvuso abhirati dukkarā”ti². Tato te parappaṭibaddhajīvikattā khuppipāsā bādhati, tāya bādhitānaṃ pariyesanatanāḥ cittaṃ kilamayati, atha nesaṃ kilantacittānaṃ thinamiddhaṃ okkamati, tato³ visesamanadhigacchantānaṃ durabhisambhavesu araṇṇavanapatthesu pantesu senāsanesu viharataṃ utrāsasaññitā bhīru jāyati. Tesāṃ ussaṅkitaparisaṅkitānaṃ dīgharattaṃ vivekarasamanassādayamānānaṃ viharataṃ “na siyā nu kho esa maggo”ti paṭipattiyaṃ vicikicchā uppajjati, taṃ vinodetvā viharataṃ appamattakena visesādhigamena mānamakkhathambhā jāyanti. Tepi vinodetvā viharataṃ tato adhikataṃ visesādhigamaṃ nissāya lābhasakkārasilokā uppajjanti, lābhādīhi mucchitvā dhammappatirūpakāni pakāsento micchāyasaṃ adhigantvā tattha ṭhitā jāti-ādīhi attānaṃ ukkaṃsenti, paraṃ vambhenti, tasmā kāmādīnaṃ paṭhamasenādhībhāvo vedītabbo. **Naḷāgāranti** naḷehi vinaddhatiṇacchannagehaṃ.

Vihassatīti uggahaṇasajjhāyanamanasikārādīhi viharissati⁴.

Jātisamsāranti punappunaṃ jātisāṅkhātasamsāravatṭaṃ. **Dukkhassantaṃ karissatīti** dukkhassa antasaṅkhātaṃ nibbānaṃ sacchikarissati.

Palālapuñjāhanti palālapuñjaṃ ahanti padacchedo. **Tatiyaṃ ṭhānanti** anāgāmiphalaṃ sandhāya vadati.

Tivassabhikkhukāleti upasampadato tīṇi vassāni assāti tivasso, tivasso ca so bhikkhu cāti tivassabhikkhu, tassa, tena

1. Khu 1. 342 piṭṭhe Suttanipāte.

3. Tattheva (Sī)

2. Sam 2. 456 piṭṭhe.

4. Vijahessa (Tisī, Ka)

vā upalakkhito kālo tivassabhikkhukālo, tasmim. Yadā so tivasso bhikkhu nāma hoti, tadāti vuttaṃ hoti. **Kammaṃ karotīti** bhāvanākammaṃ karoti. **Ganthakammanti** ganthavisayaṃ uggahaṇādikammaṃ. **Piṇḍāpacitīm katvāti** antovasse temāsaṃ dinnapiṇḍassa kilesakkhayakaraṇena apacitīm pūjaṃ katvā. Piṇḍāpacitīm karonto hi bhikkhu yehi attano yo piṇḍapāto dinno, tesam tassa mahapphalabhāvaṃ icchanto attano santānameva kilesakkhayakaraṇena visodhetvā arahatthaṃ gaṇhāti.

Mahābhūtīti ettha pūjāvacano mahantasaddo, bhūtīti ca nāmekadesena tissabhūtitheram ālapati. Bhavati hi nāmekadesenapi vohāro yathā “devadatto datto”ti. **Mahābhūtīti** vā piyasamudāhāro, so mahatī bhūtī vibhūtī puññañāṇādisampadā assāti mahābhūtī. **Channaṃ sepaṇṇigacchamūlanti** sākāpalāsādīhi channaṃ ghanacchāyaṃ sepaṇṇigacchamūlaṃ. **Asubhakammaṭṭhānaṃ pādakaṃ katvāti** kesādi-asubhakoṭṭhāsabhāvanāya paṭiladdhaṃ upacārasamādhim appanāsamādhim vā pādakaṃ katvā. Asubhavisayaṃ upacārajjhānādikammamevettha upari pavattetabbabhāvanākammassa kāraṇabhāvato ṭhānanti kammaṭṭhānaṃ.

Sahassadvisahassasaṅkhāmattattā “mahāgaṇe”ti vuttaṃ. **Attano vasanaṭṭhānato therassa santikaṃ gantvāti** attano vasanaṭṭhānato ākāseṇa gantvā vihārasamīpe otaritvā divāṭṭhāne nisinnattherassa santikaṃ gantvā. **Kim āgatosīti** kimkāraṇā āgatosi. **Sabbesu rattidivasabhāgesu okāsaṃ alabhantoti** so kira thero “tuyhaṃ okāso na bhavissati āvuso”ti vuttepi “vitakkamālake ṭhitakāle pucchissāmi bhante”ti vatvā “tasmim ṭhāne aññe pucchissanti”ti vutte “bhikkhācāramagge bhante”ti vatvā “tatrāpi aññe pucchanti”ti vutte dupaṭṭanivāsanaṭṭhāne, saṃghāṭipārupanaṭṭhāne, pattanīharaṇaṭṭhāne, gāme caritvā āsanāsālāya yāgupitakāle bhanteti. Tatthāpi therā attano kaṅkhaṃ vinodenti āvusoti. Antogāmato nikkhamanakāle pucchissāmi bhanteti. Tatrāpi aññe pucchanti āvusoti. Antarāmagge bhanteti. Bhojanasālāya bhattakiccapariyosāne bhante. Divāṭṭhāne pādadhovanakāle bhanteti. Tato

paṭṭhāya yāva aruṇā apare pucchanti āvusoti. Dantakaṭṭham gahetvā mukhadhovanattham gamanakāle bhanteti. Tadāpi aññe pucchantīti. Mukham dhovivā āgamanakāle bhanteti. Tatrāpi aññe pucchissantīti. Senāsanam pavisivā nisinnakāle bhanteti. Tatrāpi aññe pucchanti āvusoti. Evaṃ sabbesu rattidivasabhāgesu yācamāno okāsam na labhi, taṃ sandhāyetam vuttam “evaṃ okāse asati maraṇassa katham okāsam labhissathā”ti. Bhante nanu mukham dhovivā senāsanam pavisivā tayo cattāro pallaṅke uṇhāpetvā yonisomanasikārakammaṃ karontānam okāsalābhena bhavitabbaṃ siyāti adhippāyena vadati. **Maṇivaṇṇeti** indanīlamanīvaṇṇe.

Ghaṭentassevāti vāyāmantasseva. **Visuddhipavāraṇanti** “parisuddho ahan”ti evaṃ pavattam visuddhipavāraṇam. Arahantānameva hesā pavāraṇā. **Kāḷakam vāti** mahantaṃ kāḷakam sandhāya vadati, **tilako vāti** khuddakam sandhāya. Ubhayenapi sīlassa parisuddhabhāvameva vibhāveti.

Padhānakammikāti padhānakamme niyuttā. **Laddhamagganti** laddhūpāyam, paṭhamameva laddhūpadesanti vuttam hoti. **Apattānīti** chaḍḍitāni. **Alābūneva sārasedi** saradakāle vātātapahatāni tattha tattha vipṇakkaṇṇa-alābūni viya. **Kāpotakānīti** kapotakavaṇṇāni. **Tāni disvāna kā ratīti** tāni evarūpāni aṭṭhīni disvā tumhākam kā nāma rati, nanu appamattakāpi rati kātum na vaṭṭatiyevāti attho. **Dutiyakatham akathitapubboti** attano vuḍḍhatarena saddhim vuttavacanassa paccanīkam dutiyakatham akathitapubbo.

Tadaṅgena, tadaṅgassa pahānam **tadaṅgappahānam**. Yam hi rattibhāge samujjalitena dīpena andhakārassa viya tena tena vipassanāya avayavabhūtena ñāṇaṅgena paṭipakkhavaseneva tassa tassa pahātabbaddhammassa pahānamidaṃ tadaṅgappahānam nāma. Yathā kāmaccchandādayo na cittaṃ pariyuṭṭhāya tiṭṭhanti, evaṃ pariyuṭṭhānassa nisedhanam appavattikaraṇam vikkhambhanam **vikkhambhanappahānam**. Yam hi sasevāle udake pakkhittena ghaṭena sevālassa viya tena tena lokiyasamādhinā nīvaraṇādīnaṃ paccanīkadhammānaṃ vikkhambhanamidaṃ vikkhambhappahānam nāma. Sammā upacchiṇṇanti etena kilesāti samucchedo, pahīyanti etena kilesāti pahānam,

samucchedasaṅkhātāṃ pahānaṃ niravasesappahānanti
samucchedappahānaṃ. Yaṃ hi asanivicakkābhihatassa rukkhassa viya
ariyamaggañāṇena saṃyojanādīnaṃ dhammānaṃ yathā na puna vattanti,
evaṃ pahānamidaṃ samucchedappahānaṃ nāma. Paṭippassambhati
vūpasammati kilesadaratho etāyāti paṭippassaddhi, phalaṃ, sāyeva pahānanti
paṭippassaddhippahānaṃ. Sabbe kilesā sabbasaṅkhātā vā nissaranti
apagacchanti etenāti nissaraṇaṃ, nibbānaṃ, tadeva pahānanti
nissaraṇappahānaṃ. Paṭippassambhayamānanti paṭippassambhaṃ
kilesavūpasamaṃ kurumānaṃ. **Lokiyalokuttarehīti**
tadaṅgavikkhambhanappahānaṃ lokiyattā, itaresaṃ lokuttaratthā vuttaṃ.

Nimīyati phalaṃ etena uppajjanaṭṭhāne pakkhipamānaṃ viya hotīti
nimittaṃ, kāraṇassettaṃ adhivacanaṃ, asubhassa nimittaṃ, asubhameva vā
nimittanti **asubhanimittaṃ**. Asubhanissitampi hi jhānaṃ nissite
nissayavohārena asubhanti voharīyati yathā “mañcā ukkuṭṭhiṃ karontī”ti.
Tenevāha “**dasasu asubhesu uppannaṃ sārammaṇaṃ paṭhamajjhānaṃ**”ti.
Anicce aniccanti-ādinā nayena vuttassāti iminā catubbidhaṃ
yonisomanasikāraṃ dasseti. Heṭṭhā cettha idha ca catubbidhassa
ayonisomanasikārassa yonisomanasikārassa ca gahaṇaṃ
niravasesadassanatthaṃ katanti daṭṭhabbaṃ. Tesu pana asubhe “asubhan”ti
manasikāro idhādhippeto, tadanukūlattā vā itaresampi gahaṇaṃ daṭṭhabbaṃ.

Ekādasasu asubhesu paṭikūlakārassa uggaṇhanaṃ, yathā vā tattha
uggahanimittaṃ uppajjati, tathā paṭipatti **asubhanimittassa uggaho**.
Upacārappanāvahāya asubhabhāvanāya anuyuñjanaṃ
asubhabhāvanānuyogo. Bhojane mattaññuno thinamiddhābhibhavābhāvā
otāraṃ alabhamāno kāmacchando pahīyatīti vadanti. Bhojananissitaṃ pana
āhāre paṭikūlasaññaṃ, tabbipariṇāmassa tadādhārassa tassaca
udariyabhūtaṃ asubhatādassanaṃ, kāyassa ca āhāraṭṭhitikatādassanaṃ yo
uppādeti, so visesato bhojane pamāṇaññū nāma, tassa ca kāmacchando
pahīyateva. **Dasavidhaṃ hi asubhanimittanti** pakaṭavasena vuttaṃ.
Kāyagatāsatiṃ pana gahetvā ekādasavidhampi asubhanimittaṃ veditabbaṃ.

Abhutvā udakaṃ piveti pāṇiyassa okāsadānatthaṃ cattāro pañca ālope
abhutvā pāṇiyaṃ piveyyāti attho. Tena vuttaṃ

“**catunnaṃ pañcannaṃ ālopānaṃ okāse satī**”ti. Abhidhammaṭṭikākārena panettha “cattāro pañca ālope, bhutvāna udakaṃ pive”ti pāṭham parikkappetvā aññathā attho vaṇṇito¹, so aṭṭhakathāya na sameti. **Asubhakammikatisatthero** dantaṭṭhidassāvī.

17. Sattame mijjati hitapharaṇavasena siniyhatīti mitto, hitesī puggalo, tasmim mitte bhavā, mittassa vā esāti **mettā**, hitesitā. Tattha “mettā”ti vutte appanāpi upacāropi vaṭṭati sādharmaṇavacanabhāvatoti āha “**mettāti ettāvatā pubbabhāgopi vaṭṭati**”ti. **Api**-saddo appanaṃ samīḍeti. Appanaṃ appattāya mettāya suṭṭhu mucanassa abhāvato cetovimuttīti “**appanāva adhippetā**”ti vuttaṃ.

Sattesu mettāyanassa hitūpasamhārassa uppādanaṃ pavattanaṃ **mettānimittassa uggaho**. Paṭhamuppanno mettāmanasikāro parato uppajjanakassa kāraṇabhāvato mettāmanasikārova mettānimittam. Kammanīyeva sakaṃ etesanti kammassakā, sattā, tabbhāvo **kammassakatā**, kammaḍāyādatā. Dosamettāsu yāthāvato ādīnavānisamsānaṃ paṭisaṅkhānavīmaṃsā idha **paṭisaṅkhānam**. Mettāvihārīkalyāṇamittavantatā idha **kalyāṇamittatā**. **Odissaka-anodissakadisāpharaṇā**nanti attati piyamaññhattaverivasena odissakatā, sīmāsambhede kate anodissakatā, ekādidisāpharaṇavasena disāpharaṇatā mettāya uggahaṇe veditabbā. Vihārarakchagāmādivasena vā odissakadisāpharaṇam. Vihārādi-uddesarahitaṃ puratthimādidisāvasena anodissakadisāpharaṇam. Evaṃ vā dvividhā uggahaṇam sandhāya “odissakanodissakadisāpharaṇam”ti vuttaṃ. Uggaho ca yāva upacārā daṭṭhabbo. Uggahitāya āsevanā bhāvanā. Tattha sabbe sattā, pāṇā, bhūtā, puggalā, attabhāvapariyāpannāti etesaṃ vasena pañcavidhā, ekekaṃmiṃ averā hontu, abyāpajjhā, anīghā, sukhī attānaṃ pariharantūti catudhā pavattito vīsatividhā **anodhisoppharaṇā** mettā. Sabbā itthiyo, purisā, ariyā, anariyā, devā, manussā, vinipātikāti sattādhikaraṇavasena pavattā sattavidhā aṭṭhavīsatividhā vā, dasahi disāhi disādhikaraṇavasena pavattā dasavidhā ca,

ekekāya vā disāya sattādi-itthādi-averādibhedena
asītādhikacatusatappabhedā ca **odhisopharanā** veditabbā. **Mettam**
bhāventassāti mettājhānaṃ bhāventassa. **Tvaṃ etassa kuddhoti**-ādi
paccavekkhaṇāvidhidassanaṃ. **Appaṭicchitapahēnakaṃ viyāti**
asampaṭicchitapaṇṇākāraṃ viya. **Paṭisaṅkhāneti** vīmaṃsāyaṃ. Vattani-
aṭaviyaṃ **Attaguttattherasadi**.

18. Aṭṭhame kusaladhammasampaṭipattiyā paṭṭhapanasabhāvatāya
tappaṭipakkkhānaṃ visosanasabhāvatāya ca ārambhadhātu-ādito
pavattavīriyanti āha **“paṭhamārambhavīriyaṃ”**ti. Yasmā
paṭhamārambhamattassa kosajjavidhamanaṃ thāmagamanañca natthi, tasmā
vuttaṃ **“kosajjato nikkhantattā tato balavataran”**ti. Yasmā pana
aparāparuppattiyā laddhāsevanaṃ uparūpari visesaṃ āvahantaṃ ativiya
thāmagatameva hoti, tasmā vuttaṃ **“param param thānaṃ akkamanato**
tatopi balavataran”ti. **Panūdanāyāti** nīharaṇāya. Yathā mahato palīghassa
ugghāṭakajanassa mahanto ussāho icchibhabbo, evamidhāpīti **“nikkamo**
cetaso palighugghāṇāyā”ti vuttaṃ. Mahāparakkamo eva parena kataṃ
bandhanaṃ chindeyya, evamidhāpīti vuttaṃ **“parakkamo cetaso**
bandhanacchedanāyā”ti.

Āraddhaṃ saṃsādhitaṃ paripūritaṃ vīriyaṃ etassāti **āraddhavīriyo**,
nippannahavīriyo, āraddhaṃ paṭhapitaṃ vīriyaṃ etassāti **āraddhavīriyo**,
vīriyārambhappasutoti āha **“āraddhavīriyassāti paripuṇṇavīriyassaceva**
paggaḥitavīriyassa cā”ti. **Catudosāpagatanti** atilīnatādīhi catūhi dosehi
apagataṃ. Catudosāpagatattameva vibhāveti **“na ca atilīnan”**ti-ādinā.
Atilīnaṃ hi bhāvanācittaṃ kosajjapakkhikaṃ siyā, atipaggaḥitañca
uddhaccapakkhikaṃ. Bhāvanāvīthim anajjhogāhetvā saṅkocāpatti **atilīnatā**.
Ajjhogāhetvā antosaṅkoco **ajjhattaṃ saṅkhittatā**. **Atipaggaḥitatā**
accāraddhavīriyatā. **Bahiddhā vikkhittatā** bahivisaṭavittakkānudhāvanā.
Tadetaṃ vīriyaṃ caṅkamādikāyikappayogāvahaṃ **kāyikaṃ**, tadanāṃ
cetasikaṃ. **Rattidivassa pañca koṭṭhāseti**
pubbaṇhasāyanhapaṭhamamajjhimapacchimayāmasaṅkhāte pañca koṭṭhāse.
Tadubhayampīti kāyikaṃ cetasikañca vīriyaṃ. **Milakkhatissattherassa**
mahāsīvatterassa ca vatthu heṭṭhā dassitameva.

Pītimallakattherassa vatthu pana evaṃ veditabbaṃ. So kiragihikāle mallayuddhāya āhiṇḍanto tīsu rajjesu paṭākāṃ gahetvā tambapaṇṇidīpaṃ āgama rājānaṃ disvā raññā katānuggaho ekadivasāṃ kilāñjakāsanāsālādvārena¹ gacchanto “rūpaṃ bhikkhave na tumhākaṃ, taṃ pajahatha, taṃ vo pahīnaṃ dīgharattaṃ hitāya sukhāya bhavissatī”ti² natumhākavaggaṃ sutvā cintesi “neva kira rūpaṃ attano, na vedanā”ti. So taṃyeva aṅkusaṃ katvā nikkhamitvā mahāvihāraṃ³ gantvā pabbajjaṃ yācitvā pabbajito upasampanno dvemātikā paṇaṃ katvā tiṃsa bhikkhū gahetvā avaravāliya-aṅgaṇaṃ gantvā samaṇadhammaṃ akāsi. Pādesu avahantesu jaṇṇukehi caṅkamati. Tameṇaṃ rattim eko migaluddako “migo”ti maññaṃ māno pahari, satti vinivijjhivā gatā. So taṃ sattim harāpetvā pahāramukhāni tiṇavaṭṭiyā pūrāpetvā pāsānapitṭhiyaṃ attānaṃ nisīdāpetvā okāsaṃ karetvā vipassanaṃ vaḍḍhetvā saha paṭisambhidāhi arahattaṃ patvā ukkāsitāsaddena āgatānaṃ bhikkhūnaṃ byākaritvā imaṃ udānaṃ udānesi—

“Bhāsitaṃ buddhaseṭṭhassa, sabbalokaggavādino.

Na tumhākaṃ idaṃ rūpaṃ, taṃ jaheyyātha bhikkhavo⁴.

Aniccā vata saṅkhārā, uppādavayadhammino.

Uppajjitvā nirujjhanti, tesaṃ vūpasamo sukho”ti⁵.

Kuṭumbiyaputtatissattherassapi vatthu evaṃ veditabbaṃ. Sāvatthiyaṃ kira tisso nāma kuṭumbiyaputto cattālīsa hiraññaakoṭiyo pahāya pabbajitvā agāmake araṇṇe viharati, tassa kaniṭṭhabhātubhariyā “gacchatha, naṃ jīvita voropethā”ti pañcasate core pesesi, te gantvā therāṃ parivāretvā nisīdimsu. Thero āha “kasmā āgatattha upāsakā”ti. Taṃ jīvita voropessāmāti. Pāṭibhogaṃ me upāsakā gahetvā ajjekarattim jīvitaṃ dethāti. Ko te samaṇa imasmim ṭhāne pāṭibhogo bhavissatīti. Thero mahantaṃ pāsānaṃ gahetvā ūruṭṭhīni bhinditvā “vaṭṭati upāsakā pāṭibhogo”ti āha. Te apakkamitvā caṅkamasāse aggim katvā nipajjimsu. Therassa vedanaṃ

1. Lañcakāsanāsālādvārena (Ka)

3. Vihāraṃ (Ka)

5. Dī 2. 129; Khu 2. 363 piṭṭhesu.

2. Saṃ 2. 28, 304; Ma 1. 194 piṭṭhesu.

4. Dī-Ṭṭha 2. 341; Ma-Ṭṭha 1. 239 piṭṭhesu.

vikkhambhetvā sīlaṃ paccavekkhato parisuddhasīlaṃ nissāya pītipāmojjaṃ
uppañji, tato anukkamena vipassanaṃ vaḍḍhento tiyāmarattiṃ
samaṇadhammaṃ katvā aruṇuggamane arahattaṃ patto imaṃ udānaṃ
udānesi—

“Ubho pādāni bhinditvā, saññapessāmi vo ahaṃ.

Aṭṭiyāmi harāyāmi, sarāgamaraṇaṃ ahaṃ.

Evāhaṃ cintayitvāna, yathābhūtaṃ vipassisāmi.

Sampatte aruṇuggamhi, arahattaṃ apāpuṇiṃ”¹.

Atibhojane nimittaggāhoti atibhojane thinamiddhassa nimittaggāho,
“ettake bhutte taṃ bhojanaṃ thinamiddhassa kāraṇaṃ hoti, ettake na hoti”²ti
thinamiddhassa kāraṇākāraṇaggāho hotīti attho. Byatirekavasena cetāṃ
vuttaṃ, tasmā ettake bhutte taṃ bhojanaṃ thinamiddhassa kāraṇaṃ na hotīti
bhojane mattaññutāva atthato dassitāti daṭṭhabbaṃ. Tenāha **“catupañca -pa-
taṃ na hoti”**ti. **Divā sūriyālokaṃ**ti divā gahitanimittaṃ sūriyālokaṃ rattiyaṃ
manasikarontassapīti evamettha attho veditabbo. Dhutaṅgānaṃ
vīriyanissitattā vuttaṃ **“dhutaṅganissitasappāyakathāyapī”**ti.

19. Navame **jhānena vā vipassanāya vā vūpasamitacittassā**ti jhānena vā
vipassanāya vā avūpasamakarakilesavigamanena vūpasamitacittassa.
Kukkuccampi katākatānusocanavasena pavattamānaṃ cetaso
avūpasamāvahatāya uddhaccena samānalakkhaṇanti ubhayassa
pahānakāraṇaṃ abhinnaṃ katvā vuttaṃ. Bahussutassa ganthato atthato ca
suttādīni vicārentassa tabbahulavihārino atthavedādippaṭilābhasambhavato
vikkhepo na hoti. Yathā vidhippaṭipattiyā yathānurūpapattikārappavattiyā ca
vikkhepo ca katākatānusocanañca na hotīti **“bāhusaccenapi
uddhaccakukkuccaṃ pahīyati”**ti āha. Yadaggena bāhusaccena
uddhaccakukkuccaṃ pahīyati, tadaggena
paripucchakatāvinayappakataññutāhipi taṃ pahīyatīti daṭṭhabbaṃ.
Vuddhasevitā ca vuddhasīlitaṃ āvahatīti cetaso vūpasamakaraṭṭhā
“uddhaccakukkuccappahānakārī”³ti vuttaṃ, vuddhataṃ pana anapekkhitvā
kukkuccavinodakā vinayadharā kalyāṇamittatī vuttatī daṭṭhabbaṃ. Vikkhepo
ca pabbajitānaṃ

1. Visuddhi 1. 46; Dī-Ṭṭha 2. 339; Ma-Ṭṭha 1. 238 piṭṭhesu.

yebhuyyena kukkuccahetuko hotīti “**kappiyākappiyaparipucchābahulassā**”ti-
ādinā vinayanayeneva paripucchakatādayo niddiṭṭhā.

20. Dasame bahussutānaṃ dhammasabhāvāvabodhasambhavato vicikicchā anavakāsā evāti āha “**bāhusaccenapi -pa- vicikicchā pahīyati**”ti. Kāmaṃ bāhusaccaparipucchakatāhi sabbāpi aṭṭhavatthukā vicikicchā pahīyati, tathāpi ratanattayavicikicchāmūlikā sesavicikicchāti āha “**tīṇi ratanāni ārabha paripucchābahulassapi**”ti. Ratanattayaguṇāvabodhehi “satthari kaṅkhatī”ti-ādivicikicchāya asambhavoti. Vinaye pakataññutā “sikkhāya kaṅkhatī”ti¹ vuttāya vicikicchāya pahānaṃ karotīti āha “**vinaye ciṇṇavasābhāvassapi**”ti. **Okappaniyasaddhāsāṅkhāta-adhimokkhabahulassāti** saddheyyavatthuno anuppavisanasaddhā saṅkhāta adhimokkkena adhimuccanabahulassa. Adhimuccanañca adhimokkhuppādanamevāti daṭṭhabbaṃ. Saddhāya vā taṃninnapoṇatā adhimutti adhimokkho. Nīvaraṇānaṃ paccayassa ceva paccayaghātassa ca vibhāvitattā vuttam “**vaṭṭavivaṭṭam kathitam**”ti.

Nīvaraṇappahānavaggavaṇṇanā niṭṭhitā.

3. Akammaniyavaggavaṇṇanā

21. Tatiyassa paṭhame **abhāvanti** samathavipassanābhāvanāvasena na bhāvitam tathā abhāvitattā. Tam hi “avaḍḍhitan”ti vuccati paṭipakkhābhābhavena paribrūhanābhāvato. Tenāha bhagavā “**akammaniyam hoti**”ti.

22. Dutiye vuttavipariyāyena attho veditabbo. **Paṭhameti** tatiyavaggassa paṭhamasutte. **Vaṭṭavasenā**ti vipākavaṭṭavasena. **Tebhūmakavaṭṭanti** tebhūmakavipākavaṭṭam. **Vaṭṭapaṭilābhāya kamanti** vipākavaṭṭassa paṭilābhāya upanissayabhūtam kammaṃ, tassa sahāyabhūtam kilesavaṭṭampi kammaggahaṇeneva saṅgahitanti daṭṭhabbaṃ. **Vivaṭṭapaṭilābhāya kamanti** vivaṭṭādhigamassa upanissayabhūtam kammaṃ. Yaṃ pana carimabhavanibbattakaṃ kammaṃ, tam vivaṭṭappaṭilābhāya kammaṃ hoti, na hotīti? Na hoti vaṭṭapādakabhāvato.

1. Abhi 1. 208; Abhi 2. 379 piṭṭhesu.

Carimabhavapaṭisandhi viya pana vivaṭṭūpanissayoti sakkā viññātum. Na hi kadāci tihetukapaṭisandhiyā vinā visesādhigamo sambhavati. **Imesu suttesūti** imesu pana paṭhamadutiyasuttesu yathākkamaṃ vaṭṭavivaṭṭameva kathitaṃ.

23. Tatiye **abhāvitanti** ettha bhāvanā nāma samādhibhāvanā. Sā yattha āsaṅkitabbā, taṃ kāmāvacarapaṭhamamahākusalacittādi-abhāvitanti adhippetanti āha “**devamanussasampattiyo**”ti-ādi.

24. Catutthe yasmā **cittanti** vivaṭṭavaseneva uppannacittaṃ adhippetam, tasmā jātijarābyādhimaraṇasokādidukkhassa anibbattanato mahato atthāya saṃvattatīti yojanā veditabbā.

25-26. Pañcamachaṭṭhesu **uppannanti** avigatuppādādikhaṇattayampi abhāvitaṃ bhāvanārahitaṃ apātubhūtaṃ eva paṇḍitasammatassa uppannakicassa asāadhanato yathā “aputto”ti. So hi samattho hutvā pitu puttakiccaṃ asādhento aputtoti loke vuccati, evaṃ sampadamidaṃ. Tenāha “**kasmā**”ti-ādi. **Tesu dhammesūti** lokuttarapādakajjhānādīsu. Thero pana matthakappattameva bhāvitaṃ cittaṃ dassento “**maggacittamevā**”ti āha.

27-28. Sattamaṭṭhamesu **punappunaṃ akatanti** bhāvanābahulikāravasena punappunaṃ na kataṃ. **Imānipi dveti** imesu dvīsu suttesu āgatāni imānipi dve cittāni.

29-30. Navame **adhivahatīti** āneti. **Dukkhenāti** kicchena. **Duppesanatoti** dukkhena pesetabbato. Matthakappattaṃ vipassanāsukhaṃ pākaticajjhānasukhato santatarapaṇītataramevāti āha “**jhānasukhato vipassanāsukhan**”ti. Tenāha bhagavā—

Suññāgāraṃ pavittassa, santacittassa bhikkhuno.

Amānusī rati hoti, sammā dhammaṃ vipassato.

Yato yato sammāsati, khandhānaṃ udayabbayaṃ.

Labhatī pītipāmojjaṃ, amataṃ taṃ vijānatan”ti¹.

Taṃ hi cittaṃ vissaṭṭha-indavajirasadisam amoghabhāvato.

Akammaniyavaggavaṇṇanā niṭṭhitā.

4. Adantavaggavaṇṇanā

31-36. Catutthassa paṭhame **adantanti** cittabhāvanāya vinā na dantaṃ. Tenāha “**satisamvararahitan**”ti. Catutthe tatiye vuttavipariyāyena attho veditabbo. Pañcamachaṭṭhesu **purimasadisoyevā**ti tatiyacatutthasadio eva.

37-38. Sattamaṭṭhamesu **upamā panetthā**ti yathā paṭhamādīsu adantahatthi-assādayo upamābhāvena gahitā, evamettha sattamaṭṭhamesu “**asamvutagharadvārādivasena veditabbā**”ti vuttaṃ.

39-40. Navamadasamesu **patūhipi padehī**ti adantādīhi catūhi padehi yojetvā navamadasamāni suttāni vuttānīti yojanā.

Adantavaggavaṇṇanā niṭṭhitā.

5. Paṇihita-acchavaggavaṇṇanā

41. Pañcamassa paṭhame upamāva opammaṃ, so eva attho, tasmim **opammatthe** bodhetabbe **nipāto**. **Seyyathāpī**ti yathāti attho. Ettha ca tatra bhagavā katthaci atthena upamaṃ parivāretvā dasseti vatthasutte viya, **pāricchattakopama**² **aggikkhandhopamā**³ suttasu viya ca. Katthaci upamāya atthaṃ parivāretvā dasseti **loṇambilasutte**⁴ viya,

1. Khu 1. 67 piṭṭhe Dhammapade.

3. Am 2. 495 piṭṭhe.

2. Am 2. 486 piṭṭhe.

4. Am 1. 250 piṭṭhe.

suvaṇṇakārasattasūriyopamādisuttesu¹ viya ca. Imasmim̐ pana sālīsūkopame upamāya atthaṃ parivāretvā dassento “**seyyathāpi bhikkhave**”ti-ādimāhāti potthakesu likhanti, taṃ majjhimaṭṭhakathāya vatthasuttavaṇṇanāya² na sameti. Tattha hi idaṃ vuttam—

Seyyathāpi bhikkhave vatthanti upamāvacanamevetam̐. Upamaṃ karonto ca bhagavā katthaci paṭhamam̐yeva upamaṃ dassetvā pacchā atthaṃ dasseti, katthaci paṭhamam̐ atthaṃ dassetvā pacchā upamaṃ, katthaci upamāya atthaṃ parivāretvā dasseti, katthaci atthena upamaṃ. Tathā hesa “seyyathāpissu bhikkhave dve agārā sadvārā, tattha cakkhumā puriso majjhe ṭhito passeyyā”ti sakalampi devadūtasuttam̐³ upamaṃ paṭhamam̐ dassetvā pacchā atthaṃ dassento āha. “Tirokuṭṭam̐ tiropākāram̐ tiropabbatam̐ asajjamāno gacchati seyyathāpi ākāse”ti-ādinā pana nayena sakalampi iddhividham̐ atthaṃ paṭhamam̐ dassetvā pacchā upamaṃ dassento āha. “Seyyathāpi brāhmaṇapuriso sārattthiko sārāgavesī”ti-ādinā⁴ nayena sakalampi cūlasāropamasuttam̐ upamāya atthaṃ parivāretvā dassento āha. “Idha pana bhikkhave ekacce kulaputtā dhammam̐ pariyāpuṇanti suttaṃ -pa-. Seyyathāpi bhikkhave puriso alagaddatthiko”ti-ādinā nayena sakalampi alagaddasuttam̐⁵ mahāsāropamasuttanti evamādāni suttāni atthena upamaṃ parivāretvā dassento āha. Svāyaṃ idha paṭhamam̐ upamaṃ dassetvā pacchā atthaṃ dassetīti.

Ettha hi **cūlasāropamādisu**⁶ paṭhamam̐ upamaṃ vatvā tadanantaram̐ upameyyattham̐ vatvā puna upamaṃ vadanto upamāya atthaṃ parivāretvā dassetīti vutto. Alagaddūpamasuttādīsū pana atthaṃ paṭhamam̐ vatvā tadanantaram̐ upamaṃ vatvā puna atthaṃ vadanto atthena upamaṃ parivāretvā dassetīti vutto. Tenevettha līnatthappakāsiniyaṃ vuttam̐ “upameyyattham̐ paṭhamam̐ vatvā tadanantaram̐ atthaṃ vatvā puna upamaṃ vadanto upamāya atthaṃ

1. Am̐ 2. 473 piṭṭhe.

2. Ma-Ṭṭha 1. 170 piṭṭhe.

3. Ma 3. 216 piṭṭhe.

4. Ma 1. 258 piṭṭhe.

5. Ma 1. 187 piṭṭhe.

6. Ma 1. 258 piṭṭhe.

parivāretvā dasseti”ti vutto. **Atthena upamaṃ parivāretvā**ti etthāpi eseṇa
 nayoti. Idha pana katthaci atthena upamaṃ parivāretvā dasseti. “Vatthasutte
 viya pāricchattakopama-aggikkhandhopamādisuttesu viya cā”ti vuttaṃ.
 Tattha vatthasutte tāva “seyyathāpi bhikkhave vatthaṃ saṃkiliṭṭhaṃ
 malaggahitaṃ, tamenāṃ rajako yasmiṃ yasmiṃ raṅgajāte upasamhareyya.
 Yadi nīlakāya, yadi pītakāya, yadi lohitakāya, yadi mañjiṭṭhakāya,
 durattavaṇṇamevassa aparisuddhavaṇṇamevassa. Taṃ kissa hetu.
 Aparisuddhattā bhikkhave vatthassa. Evameva kho bhikkhave citte
 saṃkiliṭṭhe duggati pāṭikaṅkhā”ti-ādinā¹ paṭhamāṃ upamaṃ dassetvā
 pacchā upameyyattho vutto, na pana paṭhamāṃ atthaṃ vatvā tadanantaram
 upamaṃ dassetvā puna attho vutto. Yena katthaci atthena upamaṃ
 parivāretvā dasseti. Vatthasutte viyāti vadeyya.

Tathā pāricchattakopamepi “yasmiṃ bhikkhave samaye devānaṃ
 tāvatimsānaṃ pāricchattako koviḷāro paṇḍupalāso hoti, attamanā bhikkhave
 devā tāvatimsā, tasmiṃ samaye honti paṇḍupalāso dāni pāricchattako
 koviḷāro, na cirasseva dāni pannapalāso bhavissati -pa-. Evameva kho
 bhikkhave yasmiṃ samaye ariyasāvako agārasmā anagāriyaṃ pabbajjāya
 ceteti. Paṇḍupalāso bhikkhave ariyasāvako tasmiṃ samaye hoti”ti-ādinā²
 paṭhamāṃ upamaṃ dassetvā pacchā attho vutto. Aggikkhandhopame
 “passatha no tumhe bhikkhave amuṃ mahantaṃ aggikkhandhaṃ ādittaṃ
 sampajjalitaṃ sajotibhūtaṃ. Evaṃ bhanteti. Taṃ kiṃ maññatha bhikkhave,
 katamaṃ nu kho varaṃ yaṃ amuṃ mahantaṃ aggikkhandhaṃ ādittaṃ
 sampajjalitaṃ sajotibhūtaṃ āliṅgetvā upanisīdeyya vā upanipajjeyya vā,
 yaṃ khattiyakaṇṇaṃ vā brāhmaṇakaṇṇaṃ vā gahapatikaṇṇaṃ vā
 mudutalunahatthapādaṃ āliṅgetvā upanisīdeyya vā upanipajjeyya vā”ti-
 ādinā³ paṭhamāṃ upamaṃyeva dassetvā pacchā attho vutto, na pana
 paṭhamāṃ atthaṃ vatvā tadanantaram upamaṃ dassetvā puna attho vutto,
 tasmā “katthaci atthena upamaṃ parivāretvā dasseti vatthasutte viya
 pāricchattakopama-aggikkhandhopamādisuttesu viya cā”ti na vattabbaṃ.

 1. Ma 1. 43 piṭṭhe.

2. Am 2. 486 piṭṭhe.

3. Am 2. 495 piṭṭhe.

Keci panettha evaṃ vaṇṇayanti “atthaṃ paṭhamam vatvā pacchā ca upamam dassento atthena upamam parivāretvā dasseti nāma, upamam pana paṭhamam vatvā pacchā atthaṃ dassento upamāya atthaṃ parivāretvā dasseti nāma, tadubhayassapi āgataṭṭhānam nidassento ‘vatthasutte viyā’-ti-ādimāhā”ti. Tampi “katthaci atthena upamam parivāretvā dasseti vatthasutte viya pāricchattakopama-aggikkhandhopamādisuttesu viya cā”ti vattabham, evaṃ vuccamāne “katthaci upamāya atthaṃ parivāretvā dasseti loṇambilasutte viyā”ti visum na vattabham “aggikkhandhopamādisutte viyā”ti ettha ādisaddeneva saṅgahitattā. Loṇambilasuttepi hi—

“Seyyathāpi bhikkhave paṇḍito byatto kusalo sūdo rājānam vā rājamahāmattaṃ vā nānaccayehi sūpehi paccupaṭṭhito assa ambilaggehipi tittakaggehipi kaṭukaggehipi madhuraggehipi khārikehipi akhārikehipi loṇikehipi aloṇikehipi.

Sa kho so bhikkhave paṇḍito byatto kusalo sūdo sakassa bhattassa nimittam uggaṇhāti ‘idaṃ vā me ajja bhattasūpeyyam ruccati, imassa vā abhiharati, imassa vā bahum gaṇhāti, imassa vā vaṇṇam bhāsati. Ambilaggaṃ vā me ajja bhattasūpeyyam ruccati, ambilaggassa vā abhiharati, ambilaggassa vā bahum gaṇhāti, ambilaggassa vā vaṇṇam bhāsati -pa- aloṇikassa vā vaṇṇam bhāsati’ti. Sa kho so bhikkhave paṇḍito byatto kusalo sūdo lābhī ceva hoti acchādanassa, lābhī vetanassa, lābhī abhihārānam. Taṃ kissa hetu. Tathā hi so bhikkhave paṇḍito byatto kusalo sūdo sakassa bhattanimittam uggaṇhāti. Evameva kho bhikkhave idhekacco paṇḍito byatto kusalo bhikkhu kāye kāyānupassī viharati -pa- vedanāsu -pa- citte -pa- dhammesu dhammānupassī viharati ātāpī sampajāno satimā vineyya loke abhiijhādomanassam. Tassa dhammesu dhammānupassino viharato cittam samādhīyati, upakkilesā pahīyanti, so taṃ nimittam uggaṇhāti.

Sa kho bhikkhave paṇḍito byatto kusalo bhikkhu lābhī ceva hoti diṭṭheva dhamme sukhavīhārānaṃ, lābhī hoti satisampajañña. Taṃ kissa hetu. Tathā hi so bhikkhave paṇḍito byatto kusalo bhikkhu sakassa cittassa nimittaṃ uggaṇhātī”ti¹—

evaṃ paṭhamāṃ upamāṃ dassetvā pacchā attho vutto.

“Suvāṇṇakārasūriyopamādisuttesu viya cā”ti idaṇca udāharaṇamattena saṅgahaṃ gacchati suvāṇṇakārasuttādisu paṭhamāṃ upamāya adassitattā. Etesu hi suvāṇṇakāropamasutte² tāva—

“Adhicittamanuyutta bhikkhave bhikkhunā tīṇi nimittāni kālena kālaṃ manasi kātabbāni, kālena kālaṃ samādhinimittaṃ manasi kātabbāṃ, kālena kālaṃ paggahanimittaṃ manasi kātabbāṃ, kālena kālaṃ upekkhānimittaṃ manasi kātabbāṃ. Sace bhikkhave adhicittamanuyutto bhikkhu ekantaṃ samādhinimittānyeva manasi kareyya, tñānaṃ taṃ cittaṃ kosajjāya saṃvatteyya. Sace bhikkhave adhicittamanuyutto bhikkhu ekantaṃ paggahanimittānyeva manasi kareyya, tñānaṃ taṃ cittaṃ uddhaccāya saṃvatteyya. Sace bhikkhave adhicittamanuyutto bhikkhu ekantaṃ upekkhānimittānyeva manasi kareyya, tñānaṃ taṃ cittaṃ na sammāsamādhiyeyya āsavānaṃ khayāya. Yato ca kho bhikkhave adhicittamanuyutto bhikkhu kālena kālaṃ samādhinimittaṃ -pa- paggahanimittaṃ -pa- upekkhānimittaṃ manasi karoti, taṃ hoti cittaṃ muduṇca kammaniyaṇca pabhassaraṇca, na ca pabhaṅgu, sammā samādhiyati āsavānaṃ khayāya.

Seyyathāpi bhikkhave suvāṇṇakāro vā suvāṇṇakārantevāsī vā ukkaṃ bandheyya, ukkaṃ bandhitvā ukkāmuḥkaṃ ālimpeyya, ukkāmuḥkaṃ ālīpītvā saṇḍāsena jātarūpaṃ gahetvā ukkāmuḥke pakkhippeyya, ukkāmuḥke pakkhipītvā kālena kālaṃ abhidhamati, kālena kālaṃ udakena pariṭṭhoseti, kālena kālaṃ ajjhupekkhati. Sace bhikkhave suvāṇṇakāro vā suvāṇṇakārantevāsī vā taṃ jātarūpaṃ ekantaṃ abhidhameyya, tñānaṃ taṃ

1. Saṃ 3. 131 piṭṭhe.

2. Aṃ 1. 258 piṭṭhe.

jātarūpaṃ daheyya. Sace bhikkhave suvaṇṇakāro vā suvaṇṇakārantevāsī vā taṃ jātarūpaṃ ekantaṃ udakena paripphoseyya, ṭhānaṃ taṃ jātarūpaṃ nibbāpeyya. Sace bhikkhave suvaṇṇakāro vā suvaṇṇakārantevāsī vā taṃ jātarūpaṃ ekantaṃ ajjhupekkheyya, ṭhānaṃ taṃ jātarūpaṃ na sammā paripākaṃ gaccheyya. Yato ca kho bhikkhave suvaṇṇakāro vā suvaṇṇakārantevāsī vā taṃ jātarūpaṃ kālena kālaṃ abhidhamati, kālena kālaṃ udakena paripphoseti, kālena kālaṃ ajjhupekkhati, taṃ hoti jātarūpaṃ muduñca kammaniyañca pabhassarañca, na ca pabhaṅgu, sammā upeti kammāya. Yassā yassā ca piḷandhanavikatiyā ākaṅkhati, yadi paṭṭikāya yadi kuṇḍalāya yadi gīveyyakena yadi suvaṇṇamālāya, tañcassa atthaṃ anubhoti.

Evameva kho bhikkhave adhicittamanuyuttena bhikkhu -pa-sammāsamādhīyati āsavānaṃ khayāya. Yassa yassa ca abhiññāsacchikaraṇīyassa dhammassa cittaṃ abhininnāmeti abhiññāsacchikiriyāya, tatra tatveva sakkebhābhatāṃ pāpuṇāti sati sati-āyatane”ti¹—

evaṃ paṭhamāṃ atthaṃ dassetvā tadanantaram upamaṃ vatvā punapi attho vutto.

Sattasūriyopame ca—

“Aniccā bhikkhave saṅkhārā, adhuvā bhikkhave saṅkhārā, anassāsikā bhikkhave saṅkhārā, yāvañcidaṃ bhikkhave alameva sabbasaṅkhāresu nibbindituṃ alaṃ virajjitūṃ alaṃ vimuccituṃ. Sineru bhikkhave pabbatarājā caturāsītiyojanasahassāni āyāmena, caturāsītiyojanasahassāni vitthārena, caturāsītiyojanasahassāni mahāsamudde ajjhogāḷho, caturāsītiyojanasahassāni mahāsamuddā accuggato. Hoti so kho bhikkhave samayo, yaṃ kadāci karahaci dīghassa addhuno accayena bahūni vassāni bahūni vassasatāni bahūni vassasahassāni bahūni vassasatasahassāni devo na vassati,

1. Am 1. 259 piṭṭhe.

deve kho pana bhikkhave avassante ye kecime bijagāmaabhūtagāmā
osadhitiṇavanappatayo, te ussussanti visussanti na bhavanti. Evaṃ
aniccā bhikkhave saṅkhārā, evaṃ adhuvā bhikkhave saṅkhārā”ti-
ādinā¹—

Paṭhamam attham dassetvā tadanantaram upamam vatvā punapi attho
vutto. Atha vā “sūriyassa bhikkhave udayato etaṃ pubbaṅgamaṃ etaṃ
pubbanimittam, yadidaṃ aruṇuggaṃ. Evameva kho bhikkhave bhikkhuno
ariyassa aṭṭhaṅgikassa maggassa uppādāya etaṃ pubbaṅgamaṃ etaṃ
pubbanimittam, yadidaṃ kalyāṇamittatā”ti yadetaṃ **saṃyuttanikāye**²
āgataṃ, taṃ idha sūriyopamasuttanti adhippetam siyā. Tampi “katthaci
upamāya attham parivāretvā dasseti”ti iminā na sameti paṭhamam upamam
vatvā tadanantaram attham dassetvā puna upamāya avuttattā. Paṭhamameva
hi tattha upamā dassitā, “imasmiṃ pana sālīsūkopame upamāya attham
parivāretvā dassento seyyathāpi bhikkhaveti-ādimāhā”ti idampi
vacanamasaṅgahitam vatthasuttassa imassa ca visesābhāvato. Ubhayatthāpi
hi paṭhamam upamam dassetvā pacchā attho vutto, tasmā evamettha pāṭhena
bhavitabbari “tatra bhagavā katthaci paṭhamamyeva upamam dassetvā
pacchā attham dasseti vatthasutte viya
pāricchattakopama³**aggikkhandhopamādisuttesu**⁴ viya ca, katthaci atthena
upamam parivāretvā dasseti **suvaṇṇakārasattasūriyopamādisuttesu**⁵ viya,
imasmiṃ pana sālīsūkopame paṭhamam upamam dassetvā pacchā attham
dassento seyyathāpi bhikkhaveti ādimāhā”ti. Aññathā **majjhimaṭṭhakathāya**⁶
virujjhati. Idhāpi ca pubbenāparam na sameti. Majjhimaṭṭhakathāya
vuttanayeneva vā idhāpi pāṭho gahetabbo.

Kaṇasadiso sāliphālassa tuṇḍe⁷ uppajjanakavālo **sālīsūkam**, tathā
yavasūkam. Sūkassa tanukabhāvato bhedavato bhedo nātimahā hotīti āha
“**bhindissati, chaviṃ chindissatīti attho**”ti. Yathā micchāṭhapitasālīsūkādi
akkantampi hatthādiṃ na bhindati bhinditum ayoggabhāvena ṭhitattā, evaṃ
ācayagāmicittam avijjam na bhindati

1. Am 2. 474 piṭṭhe.

2. Sam 3. 23 piṭṭhe.

3. Am 2. 486 piṭṭhe.

4. Am 2. 495 piṭṭhe.

5. Am 2. 473 piṭṭhe.

6. Ma-Ṭṭha 1. 171 piṭṭhe.

7. Phuṇḍe (Ka)

bhindituṃ ayoggabhāvena uppannattāti imamatthaṃ dasseti
“micchāṭhapitenā”ti-ādinā. **Aṭṭhasu ṭhānesūti** “dukkhe aññāṇaṃ”ti-ādinā
 vuttesu dukkhādīsu catūsu saccesu pubbantādīsu catūsu cāti aṭṭhasu ṭhānesu.
Ghanabahalanti cirakālaparibhāvanāya ativiya bahalaṃ. Mahāvisayatāya
 mahāpaṭipakkhatāya bahuparivāratāya bahudukkhatāya ca mahatī avijjāti
 mahā-avijjā. Taṃ **mahā-avijjaṃ**. Mahāsaddo hi bahubhāvattthopi hoti
 “mahājano”ti-ādīsu viya. **Taṇhāvānato nikkhantabhāvenāti** tattha taṇhāya
 abhāvameva vadati.

42. Dutiye pādeneva avamaddite akkantanti vuccamāne hatthena
 avamadditaṃ akkantaṃ viya akkantanti ruḥhī hesāti āha **“akkantanteva
 vuttan”**ti. **Ariyavohāro**ti ariyadesavāsīnaṃ vohāro. Mahantaṃ aggahetvā
 appamattakasseva gahaṇe payojanaṃ dassetuṃ **“kasmā panā”**ti-ādi
 āradham. Tena “vivaṭṭupanissayakusalaṃ nāma yoniso uppāditaṃ
 appakan”ti na cintetabbaṃ, anukkamena laddhapaccayaṃ hutvā
 vaḍḍhamānaṃ khuddakanadī viya pakkhandamahoghā samuddaṃ,
 anukkamena nibbānamahāsamuddameva purisaṃ pāpetīti dīpeti.
Paccekabodhiṃ buddhabhūminti ca paccatte upayogavacanaṃ.
Vaṭṭavivaṭṭaṃ kathitanti yathākkamena vuttaṃ.

43. Tatiye **dosena paduṭṭhacittanti** sampayuttadhammānaṃ, yasmiṃ
 santāne uppajjati, tassa ca dūsanena visasāṃsaṭṭhapūtimuttasadisena dosena
 padūsitacittaṃ. **Attano cittenāti** attano cetopariyaññāṇena sabbaññutaññāṇena
 vā sahiteṇa cittena. **Paricchinditvāti** ñāṇena paricchinditvā. Itthākārena etīti
 ayo, sukhaṃ. Sabbaso apeto ayo etassa, etasmāti vā **apāyo**, kāyikassa
 cetasikassa ca dukkhassa gati pavattiṭṭhānanti **duggati**, kāraṇāvasena
 vividhaṃ vikārena ca nipātiyanti etthāti **vinipāto**, appakopi natthi ayo
 sukhaṃ etthāti **nirayoti** evamettha attho veditabbo.

44. Catutthe **saddhāpasādena pasannanti** saddhāsaṅkhātena pasādena
 pasannaṃ, na indriyānaṃ avippasannaṭṭāya. **Sukhassa gatinti** sukhasa
 pavattiṭṭhānaṃ. Sukhamevettha gacchanti, na dukkhanti vā **sugati**.
 Manāpiyarūpāditāya saha aggehīti **saggaṃ**, lokam.

45. Pañcame pariḷāhavūpasamakaro rahado etthāti rahado, udakapuṇṇo rahado **udakarahado**. Udaḥaṃ dahati dhāretīti **udakadahō**. **Āviloti** kalalabahulatāya ākulo. Tenāha “**avippasanno**”ti. **Luḷitoti** vātena āloḷito. Tenāha “**aparisaṇṭhito**”ti. Vātābhigghātena vīcitarāṅgamalasamākulatāya hi parito na saṇṭhito vā **aparisaṇṭhito**. Vātābhigghātena udakassa ca appabhāvena kalalībhūto kaddamabhāvappatthoti āha “**kaddamībhūto**”ti. **Sippiyo** muttasippi-ādayo. **Sambukā** saṅkhasalākavisesā. **Carantampi tiṭṭhantampi**ti yathālābhavacanametaraṃ daṭṭhabbamaṃ. Tameva hi yathālābhavacanataṃ dassetuṃ “**etthā**”ti-ādi āradḍham.

Pariyonaddhenāti paṭicchādītena. Tayidaṃ kāraṇena āvilabhāvassa dassanaṃ. Diṭṭhadhamme imasmiṃ attabhāve bhavo **diṭṭhadhammiko**, so pana lokiyopi hoti lokuttaropīti āha “**lokiyalokuttaramissako**”ti. Pecca samparetabbato¹ **samparāyo**, paraloko. Tenāha “**so hi parattha atthoti parattho**”ti. Iti dvidhāpi sakasantatipariyāpanno eva gahitoti itarampi saṅgahetvā dassetuṃ “**apicā**”ti-ādimāha. **Ayanti** kusalakammamapathasaṅkhāto dasavidho dhammo. **Satthantarakappāvasāneti** idaṃ tassa āsannabhāvaṃ sandhāya vuttaṃ. Yassa kassaci antarakappassāvasāneti vedītabbamaṃ. **Ariyānaṃ yuttanti** ariyānaṃ ariyabhāvāya yuttaṃ, tato eva **ariyabhāvaṃ kātuṃ samatthamaṃ**. Ñāṇameva ñeyyassa paccakkhakaṇaṇaṭṭhena **dassananti** āha “**ñāṇameva hī**”ti-ādi. Kiṃ pana tanti āha “**dibbacakkhū**”ti-ādi.

46. Chaṭṭhe **acchoti** tanuko. Tanubhāvame hi sandhāya “**abahalo**”ti vuttaṃ. Yasmā pasanno nāma accho na bahalo, tasmā “**pasannotipi vaṭṭati**”ti vuttaṃ. **Vippasannoti** visesena pasanno. So pana sammā pasanno nāma hotīti āha “**suṭṭhu pasanno**”ti. **Anāviloti** akaluso. Tenāha “**parisuddho**”ti-ādi. **Saṅkhanti** khuddakasevālaṃ, yaṃ “**tilabījakaṇaṇaṭṭhena**”ti vuccati. **Sevānti** kaṇṇikasevālaṃ. **Paṇakanti** udakamalaṃ. Cittassa āvilabhāvo nīvaraṇaṇetukoti āha “**anāvilenāti pañcanīvaraṇavimuttanā**”ti.

1. Sampādetabbato (Sī, Ka)

47. Sattame **rukkhajātānī**ti ettha jātasaddena padavaḍḍhanameva kataṃ yathā “kosajātan”ti āha “**rukkhānamevetam adhivacanan**”ti. **Koci hi rukkho vaṇṇena aggo hoti** yathā taṃ rattacandanādi. **Koci gandhena** yathā taṃ gosītacandanam. **Koci rasena** khadirādi. **Koci thaddhatāya** campakādi. Maggaphalāvahatāya vipassanāvasena **bhāvitampi** gahitam. “Tattha tattheva sakkhibhabbatam pāpuṇāti”ti¹ vacanato “**abhiññāpādakacatutthajjhānacittameva āvuso**”ti phussamittatthero vadati.

48. Aṭṭhame cittassa parivattanam uppādanīrodhā evāti āha “**evam lahuṃ uppajjitvā lahuṃ nirujjhanakan**”ti. **Adhimattapamāṇattheti** atikkantapamāṇatthe, pamāṇātītātāyanti attho. Tenāha “**ativiya na sukarā**”ti. **Cakkhuviññānampi adhippetamevāti** sabbassapi cittassa samānakhaṇattā vuttam. Cittassa ativiya lahuparivattibhāvam theravādena dīpetum “**imasmim panatthe**”ti-ādi vuttam. **Cittasaṅkhārāti** sasampayuttam cittam vadati. **Vāhasatānam kho mahārāja vīhīnanti** potthakesu likhanti, “vāhasatam kho mahārāja vīhīnan”ti pana pāṭhena bhavitabban. **Milindapañhepi**² hi katthaci ayameva pāṭho dissati. “Vāhasatānan”ti vā paccatte sāmivacanam byattayena vuttanti daṭṭhabban. **Adḍhacūlanti** thokena ūnam upaḍḍham. Kassa pana upaḍḍhanti? Adhikārato vāhassāti viññāyati. “Adḍhacuddasan”ti keci. “Adḍhacatutthan”ti apare. Sādhikam diyaḍḍhasatam vāhāti daḷham katvā vadanti, vīmaṃsitabban. Catunālīko **tumbo. Pucchāya abhāvenāti** “sakkā pana bhante upamam kātun”ti evam pavattāya pucchāya abhāvena **na katā upamā. Dhammadesanāpariyosāneti** sannipatitaparisāya yathāraddhadhammadesanāya pariyosāne.

49. Navame **pabhassaranti** pariyodātam sabhāvaparissuddhaṭṭhena. Tenāha “**paṇḍaram parisuddhan**”ti. Pabhassaratādayo nāma vaṇṇadhātuyam labbhanakavisesāti āha “**kiṃ pana cittassa vaṇṇo nāma atthī**”ti. Itaro arūpatāya “natthī”ti paṭikkhipitvā pariyāyakathā ayaṃ tādissassa cittassa parisuddhabhāvanādīpanāyāti dassento “**nīlādīnan**”ti-ādimāha. Tathā hi “so evam samāhite citte parisuddhe pariyodāte”ti³

1. Am 1. 259 piṭṭhe.

2. Khu 11. 109 piṭṭhe.

3. Dī 1. 76, 77; Ma 1. 314, 315, 346, 347; Vi 1. 5 piṭṭhesu.

vuttam. Tenevāha “**idampi nirupakkilesatāya parisuddhanti pabhassaran**”ti. Kim pana bhavaṅgacittam nirupakkilesanti? Āma sabhāvato nirupakkilesam, āgantuka-upakkilesavasena pana siyā upakkiliṭṭham. Tenāha “**tañca kho**”ti-ādi. Tattha attano tesañca bhikkhūnam paccakkhabhāvato pubbe “**idan**”ti vatvā idāni paccāmasanavasena “**tan**”ti āha. Ca-saddo atthūpanayane. Kho-saddo vacanālaṅkāre, avadhāraṇe vā. Vakkhamānassa atthassa nicchitabhāvato bhavaṅgacittena sahāvaṭṭhānābhāvato upakkilesānam āgantukatāti āha “**asahajātehi**”ti-ādi. Rāgādayo upecca cittasantānam kilissanti vibādhenti upatāpenti cāti āha “**upakkilesehi rāgādīhi**”ti. Bhavaṅgacittassa nippariyāyato upakkilesehi upakkiliṭṭhatā nāma natthi asaṁsaṭṭhabhāvato, ekasantatipariyāpannatāya pana siyā upakkiliṭṭhatāpariyāyoti āha “**upakkiliṭṭham nāmāti vuccati**”ti. Idāni tamattham upamāya vibhāvetum “**yathā hi**”ti-ādimāha. Tena bhinnasantānagatāyapi nāma iriyāya loke gārayhatā dissati, pageva ekasantānagatāya iriyāyāti imam visesam dasseti. Tenāha “**javanakkhaṇe -pa- upakkiliṭṭham nāma hoti**”ti.

50. Dasame **bhavaṅgacittameva cittanti** “pabhassaramidam bhikkhave cittan”ti vuttam bhavaṅgacittameva. Yadaggena bhavaṅgacittam tādīsapaccayasamavāye upakkiliṭṭham nāma vuccati, tadaggena tabbidhurapaccayasamavāye upakkilesato vimuttanti vuccati. Tenāha “**upakkilesehi vipparamuttam nāma hoti**”ti. Sesamettha navamasutte vuttanayānasārena veditabham.

Paṇihita-acchavaggavaṇṇanā niṭṭhitā.

6. Accharāsaṅghātavaggavaṇṇanā

51. Chaṭṭhassa paṭhame **assutavāti** ettha “sādhu paññāṇavā naro”ti-ādīsu¹ atthitāmattassa bodhako vā-saddo. “Sīlavā hoti kalyāṇadhammo”ti-ādīsu² pasamsāvisiṭṭhāya atthitāya. “Paññavā

1. Khu 6. 45 piṭṭhe Ummānantijātake.

2. Ma 3. 299 piṭṭhe.

hoti udayatthagāminiyā paññāya samannāgato”ti-ādīsu¹ atisayatthavisiṭṭhāya atthitāya, tasmā yassa pasattham atisayena vā sutam atthi, so sutavā, samkilesaviddhamśanasamattham pariyattidhammassaganam, tam sutvā tathāttāya paṭipatti ca “sutavā”ti iminā padena pakāsītā. Sotabbayuttam sutvā kattabbanipphattivasena suṇīti vā sutavā, tappatikkhepena na sutavāti **assutavā**.

Ayam hi akāro “ahetukā dhammā², abhikkhuko āvāso”ti-ādīsu³ taṁsamāyoganivattiyaṁ diṭṭho. “Appaccayā dhammā”ti² taṁsambandhibhāvanivattiyaṁ. Paccayuppannam hi paccayasambandhīti apaccayuppannattā atāmsambandhitā ettha jotitā. “Anidassanā dhammā”ti² taṁsabhāvanivattiyaṁ. Nidassanam hi ettha daṭṭhabbatā. Atha vā passatīti nidassanam, cakkhuvīññānam. Taggahetabbatānivattiyaṁ, tathā “anāsavā dhammā”ti⁴. “Appaṭighā dhammā² anārammaṇā dhammā”ti⁵ taṁkiccanivattiyaṁ. “Arūpino dhammā acetasikādharmā”ti taṁsabhāvanivattiyaṁ. Tadaññatā hi ima pakāsītā. “Amanusso”ti tabbhāvamattānivattiyaṁ. Manussattamattam natthi, aññam taṁsadisanti. Sadisatā hi ettha sūcitā. “Assamaṇo samaṇapaṭiñño abrahmacārī brahmacārīpaṭiñño”ti⁶ ca taṁsambhāvanīyaguṇanivattiyaṁ. Garahā hi idha ñāyati. “Kacci bhoto anāmayaṁ⁷ anudarā kaññā”ti ca tadanappabhāvanivattiyaṁ. “Anuppannā dhammā”ti⁸ taṁsadisabhāvanivattiyaṁ. Atītānam hi uppannapubbattā uppādidhammānaṁ paccayekadesasiddhiyā āraddhuppadabhāvato kālavinimuttassa ca vijjāmānattā uppannānukūlatā, pageva paccuppannānantī tabbidhuratā hettha viññāyati. “Asekkhā dhammā”ti⁹ tadapariyosānanivattiyaṁ. Tanniṭṭhānam hettha pakāsītanti evam anekesaṁ atthānam jotako. Idha pana “arūpino dhammā⁴, acetasikā dhammā”ti-ādīsu⁵ viya taṁsabhāvanivattiyaṁ daṭṭhabbo, aññattheti attho. Etenassa sutādiññānaviraḥam dasseti. Tena vuttam “**āgamādhigamābhāvā ñeyyo assutavā itī**”ti.

1. Dī 3. 198; Ma 2. 19, 229 piṭṭhesu.

4. Abhi 1. 5 piṭṭhe.

7. Khu 5. 327; Khu 6. 77 piṭṭhesu.

2. Abhi 1. 4 piṭṭhesu.

5. Abhi 1. 9 piṭṭhe.

8. Abhi 1. 3 piṭṭhe.

3. Vi 2. 412 piṭṭhe.

6. Am 1. 107 piṭṭhe.

9. Abhi 1. 2 piṭṭhe.

Idāni tassatthaṃ vivaranto “**yohī**”ti-ādimāha. Tattha yasmā khandhadhātādikosallenapi upakkilesa-upakkiliṭṭhānaṃ jānanahetubhūtaṃ bāhusaccaṃ hoti. Yathāha “kittāvatā nu kho bhante bahussuto hoti? Yatokho bhikkhu khandhakusalo hoti. Dhātu -pa-. Āyatana -pa-. Paṭṭiccasamuppādakusalo hoti. Ettāvatā kho bhikkhu bahussuto hoti”ti. Tasmā “**yassa ca khandhadhātu-āyatanapaccayākārasatipatṭhānādīsū**”ti-ādi vuttaṃ. Tattha vācuggatakaraṇaṃ **uggaho**. Atthaparipucchanaṃ **paripucchā**. Kusalehi saha codanāpariharaṇavasena vinicchayakaraṇaṃ **vinicchayo**. Ācariye pana payirupāsivā atthadhammānaṃ āgamaṇaṃ sutamayaññavasena avabujjhanaṃ **āgamo**. Maggaphalanibbānaṇaṃ sacchikiriya **adhigamo**.

Bahūnaṃ nānappakārānaṃ sakkāyadiṭṭhādīnaṃ avihatattā tā janenti, tāhi vā janitāti **puthujjanā**. Avighātameva vā jana-saddo vadati. **Puthu sathārānaṃ mukhullokikā**ti ettha puthū janā sattha paṭiññā etesanti **puthujjanā**. **Sabbagatīhi avuṭṭhitā**ti ettha janetabbā, jāyanti vā ettha sattāti janā, gatiyo, tā puthū etesanti **puthujjanā**. Ito pare jāyanti etehīti janā, abhisankhārādayo, te etesaṃ puthū vijjantīti **puthujjanā**. Abhisankhārādi-attho eva vā jana-saddo daṭṭhabbo. **Oghā** kāmoghādayo. Rāgaggi-ādayo **santāpā**. Te eva sabbepi vā kilesā **parilāhā**. **Puthu pañcasu kāmaguṇesu rattāti** ettha jāyatīti jano, rāgo gedhoti evamādiko, puthu jano etesanti **puthujjanā**. Puthūsu janā jātā rattāti evaṃ rāgādi-attho eva vā jana-saddo daṭṭhabbo.

Rattāti vatthaṃ viya raṅgajātena cittassa vipariṇāmakarena chandarāgena rattā sārattā. **Giddhāti** abhikaṅkhanasabhāvena abhigijjhanena giddhā gedhaṃ āpannā. **Gadhitāti** ganthitā viya dummocanīyabhāvena tattha paṭibaddhā. **Mucchitāti** kilesavasena visaññibhūthā viya anaññakiccā¹ mohamāpannā. **Ajjhopannāti** anaññasādhāraṇe viya katvā gilitvā pariniṭṭhāpetvā ṭhitā. **Laggāti** vaṅkakaṇṭake viya āsattā, mahāpalipe yāva nāsikaggā² palipannapuriso viya uddharitum asakkuṇeyyabhāvena

1. Anaññakiccaṃ (Ka)

2. Paharanāsikaggā (Ka), paharanāsikaggo (Sī)

nimuggā. **Laggitā**ti makkaṭālepe ālaggabhāvena sammasito viya makkaṭo pañcannam indriyānam vasena ālaggitā. **Palibuddhā**ti sambaddhā, upaddutā vā. **Āvutā**ti āvaritā. **Nivutā**ti nivāritā. **Ovutā**ti paliguṇṭhitā, pariyonaddhā vā. **Pihitā**ti pidahitā. **Paṭicchannā**ti chādītā. **Paṭikujjitā**ti heṭṭhāmukhajātā.

“Assutavā”ti etena avijjandhatā vuttāti āha “**andhaputhujjano vutto**”ti. **Cittaṭṭhiti citta-pariggaho natthi**ti yāya paṭipattiyā cittassa upakkilesam tato vippamuttiṇca yathāsabhāvato jāneyya, sā cittabhāvanā cittaṭṭhiti. Ekārammaṇe suṭṭhu samādhānavasena avatṭhitim pādakam katvā pavattitā sampayuttadhammehi nissayārammaṇehi ca saddhim cittassa pariggahasaññitā vipassanābhāvanāpi natthi, yāya vuttamattham yathāsabhāvato jāneyya.

52. Dutiye **sutavā**ti padassa attho anantarasutte vuttoyeva.

Ariyasāvakoti ettha catukkam sambhavatīti tam dassetum “**atthi ariyo**”ti-ādi āraddham. Paccekam saccāni buddhavantoti **paccekabuddhā**. Nanu sabbepi ariyā paccekameva saccāni paṭivijjhanti dhammassa paccattavedanīyabhāvato? Nayidamīdisam paṭivedham sandhāya vuttam. Yathā pana sāvaka aññesam nissayena saccāni paṭivijjhanti paratoghosena vinā tesam dassanamaggassa anuppajjanato. Yathā ca sammāsambuddhā aññesam nissayabhāvena saccāni abhisambujjhanti, na evamete, ete pana aparameyyā hutvā aparānāyakabhāvena saccāni paṭivijjhanti. Tena vuttam “paccekam saccāni buddhavantoti paccekabuddhā”ti.

Atthi sāvako na ariyoti ettha pothujjanikāya saddhāya ratanattaye abhippasanno saddhopi gahito eva. **Gihī anāgataphaloti** idam pana nidassanamattam daṭṭhabbam. Yathāvuttapuggalo hi saraṇagamanato paṭṭhāya sotāpatti-phalasacchikiriyāya paṭipanno-icceva vattabbatam labhati. Svāyamatto **dakkhināvisuddhisuttena**¹ dīpetabbo. **Sutavā**ti ettha vutta-attho nāma attahitaparahitappaṭipatti, tassa vasena sutasampanno. Yam sandhāya vuttam “so ca hoti sutena upaṇno,

1. Ma 3. 298 piṭṭhe.

appampi ce sahitaṃ bhāsamāno”ti ca ādi. **Ariyasāvakoti veditabboti** ariyassa bhagavato dhammassavanakicce yuttappayuttabhāvato vuttaṃ. Upakkilesehi vippamutti anupakkiliṭṭhatā, tassā yathāsabhāvajānanam dalhatarāya ve cittabhāvanāya sati hoti, na aññathāti **“balavavipassanā kathitā”**ti vuttaṃ.

53. Tatiye **aggikkhandhopamasuttanta-aṭṭhuppattiyanti** aggikkhandhopamasutte¹ desanā-aṭṭhuppattiyāṃ. Taṃdesanāhetukaṃ hi ekaccānaṃ bhikkhūnaṃ micchāpaṭipattiṃ nimittaṃ katvā bhagavā imaṃ suttaṃ desesi. **Avijahitameva hoti** sabbakālaṃ suppatiṭṭhitasatisampajaññattā. Yasmā buddhānaṃ rūpakāyo bāhirabbhantarehi malehi anupakkiliṭṭho sudhotajātimaṇisadiso, tasmā vuttaṃ **“upaṭṭhākānuggahatthaṃ sarīraphāsukatthañca”**ti. **Vītināmetvāti** phalasaṃpattīhi vītināmetvā. Kālaparicchedavasena vivittāsane vītināmanaṃ vivekaninnatāya ceva paresaṃ diṭṭhānugati-āpajjanatthañca. **Nivāsetvāti** viharānivāsanaparivattanavasena nivāsetvā. Kadāci ekakassa, kadāci bhikkhusaṃghaparivutassa, kadāci pakatīyā, kadāci pāṭihāriyehi vattamānehi ca gāmapaveso tathā tathā vinetabbapuggalavasena. **Upasaṃharitvāti** himavantādīsu pupphitarukkhādito ānetvā. Oṇatuṇṇatāya bhūmiyā satthu padanikkhepasamaye samabhāvāpatti, sukhasamphassavikasitapadumasamapācchanañca suppatiṭṭhitapādatāya nissandaphalaṃ, na iddhinimmānaṃ. Nidassanamattañcetaṃ sakkharākathalakaṇṭakasaṅkukalalādi-apagamo sucibhāvāpattīti vemādīnampi tadā labbhanato.

Indakhīlassa anto ṭhapitamatteti idaṃ yāvadeva veneyyajanavinayatthāya satthu pāṭihāriyaṃ pavattanti katvā vuttaṃ, **dakkhiṇapādeti** idaṃ buddhānaṃ sabbapadakkhiṇatāya. **“Chabbaṇṇarasmiyo”**ti vatvāpi **“suvaṇṇarasapiñjarāni viyā”**ti idaṃ buddhānaṃ sarīre pītābhāya yebhuyyatāya vuttaṃ. **Madhurenākārena saddaṃ karonti** daṭṭhabbasārassa diṭṭhatāya. Bheri-ādīnaṃ pana saddāyanaṃ dhammatāva. **Paṭimānentīti** “sudullabhaṃ idaṃ ajja amhehi labbhati, ye mayāṃ īdisena paṇītena āhārena bhagavantaṃ upaṭṭhahāmā”ti patītamānasā mānenti pūjenti. **Tesaṃ santānāni**

1. Am 2. 495 piṭṭhe.

oloketvā tesam tathā upaṭṭhākānaṃ puggalānaṃ atīte etarahi ca pavattacittasantānāni oloketvā. Arahatte paṭiṭṭhahantīti sambandho. **Tatthā**ti vihāre. **Gandhamāṇḍalamā**leti catujjātiyagandhena kataparibhaṇḍe maṇḍalamāle.

Dullabhā khaṇasampattīti sahipi manussattappaṭilābhe patirūpadesavāsa-indriyāvekallassaddhāpaṭilābhādayo guṇā dullabhāti attho. **Cātumahārājika -pa- vasavattibhavanaṃ gacchantī**ti idaṃ tattha suññavimānāni sandhāya vuttaṃ. Bhagavā gandhakuṭṭim pavisitvā pacchābhattaṃ tayo bhāge katvā paṭhamabhāge sace ākaṅkhati, dakkhiṇena passena sīhaseyyaṃ kappeti. Sace ākaṅkhati, buddhāciṇṇaphalasamāpattim samāpajjati. Atha yathākālaparicchedaṃ tato vuṭṭhahitvā dutiyabhāge pacchimayāme tatiyakotṭhāse viya lokam voloketi veneyyānaṃ ñāṇaparipākam passitum. Tenāha “**sace ākaṅkhati**”ti-ādi.

Kālayuttanti pattakallam, “imissā velāya imassa evaṃ vattabban”ti taṃkālanurūpaṃ. **Samayayuttanti** tasseva vevacanaṃ, aṭṭhuppatti-anurūpaṃ vā. **Samayayuttanti** vā ariyasamayasaṃyuttaṃ. Desakālanurūpameva hi buddhā bhagavanto dhammaṃ desenti, desentā ca ariyasammataṃ¹ paṭiccasamuppādanayaṃ dīpentāva desenti. Atha vā **samayayuttanti** hetudāharaṇasahitaṃ. Kālena sāpadesaṃ hi bhagavā dhammaṃ deseti, **kālam veditvā parisam uyyojeti**, na yāva samandhakārā dhammaṃ deseti.

Utuṃ gaṇhāpeti, na pana malaṃ pakkhāletīti adhippāyo. Na hi bhagavato kāye rajojallaṃ upalimpati. **Tato tatoti** attano attano divāṭṭhānādito. **Okāsaṃ labhamānā**ti purebhattapacchābhattapurimayāmesu okāsaṃ alabhitvā idāni majjhimayāme okāsaṃ labhamānā, bhagavatā vā katokāsatāya okāsaṃ labhamānā. Pacchābhattassa tīsu bhāgesu paṭhamabhāge sīhaseyyakappaṇaṃ ekantikaṃ na hotīti āha “**purebhattato paṭṭhāya nisajjāpīlitaṃ sarīrassā**”ti. Teneva hi tattha “sace ākaṅkhati”ti tadā sīhaseyyakappaṇassa anibaddhatā vibhāvitā. **Kilāsubhāvo**

1. Ariyadhammataṃ (Sī)

parissamo. Sihaseyyaṃ kappeti sarīrassa kilāsubhāvamocanattanti
yojetabbaṃ. **Buddhacakkhunā lokam voloketi**ti idaṃ pacchimayāme
bhagavato bahulaṃ āciṇṇavasena vuttaṃ. Appekadā avasiṭṭhabalañāṇehi
sabbaññutaññāṇeneva ca bhagavā tamatthaṃ sādhetīti.

Imasmim yeva kicceti pacchimayāmakicce. Balavatā paccanutāpena
saṃvaḍḍhamānena karajakāye mahāpariḷāho uppajjati āha “**nāmakāye
santatte karajakāyo santatto**”ti. **Nidhānagatanti** sannicitalohitaṃ sandhāya
vuttaṃ. **Uḥam lohitaṃ mukhato uggañchi**ti lohitaṃ uḥam hutvā mukhato
uggañchi. **Thānanti** bhikkhupaṭiñṇaṃ. **Tam pāpaṃ vaḍḍhamānanti**
bhikkhupaṭiñṇāya avijahitattā tathā pavaḍḍhamānapāpaṃ. Antimavatthu-
ajjhāpannānampi upāyena pavattiyamāno yonisomanasikāro sātthako
hotiyevāti dassento “**jātasamvegā**”ti-ādimāha. **Aho sallekhitanti** aho ativiya
sallekhena itaṃ pavattaṃ. **Kāsāvapajjototi** bhikkhūnaṃ bahubhāvato ito cito
ca vicarantānaṃ tesaṃ kāsāvajutiyaṃ pajjotito. **Isivātaparivātoti**
sīlakkhandhādīnaṃ nibbānassa ca esanato isīnaṃ bhikkhūnaṃ
guṇagandhena¹ ceva guṇagandhavāsitena² sarīragandhena ca parito
samantato vāyito.

Dhammasamvego uppajji anāvajjanena pubbe tassa atthassa
asaṃviditattā. **Dhammasamvegoti** ca tādise atthe dhammatāvasena
uppajjanakaṃ sahottappañāṇaṃ. **Assāsattḥānanti** cittassāsakāraṇaṃ
kammaṭṭhānaṃ. Sabbesaṃ kiccānaṃ pubbabhāgo **sabbapubbabhāgo**.
“Sabbesattā averā hontū”ti-ādinā hi cittassa paṭṭhānaṃ upaṭṭhānaṃ
hitapharaṇaṃ. Itaraṃ ito thokaṃ mahantanti katvā idaṃ
“**cūḷhaccharāsaṅghātasuttan**”ti vuttaṃ. Accharāsaṅghāto vuccati
aṅguliphoṭanakkhaṇo akkhinimisakālo, yo ekassa akkharassa
uccāraṇakkhaṇo. Tenāha “**dve aṅguliyo paharivā saddakaraṇamattan**”ti.
Sabbasattānaṃ hitapharaṇacittanti sabbesampi sattānaṃ sammadeva
hitesitavasena pavattacittaṃ. **Avajjento āsevatīti** hitesitavasena āvajjento.
Āvajjanena ābhujantopi āsevati nāma ñāṇavippayuttana. **Jānantoti** tathā
ñāṇamattaṃ uppādentopi. **Passantoti** tathā ñāṇacakkhunā paccakkhato viya
vipassantopi. **Paccavekkhantoti** tamatthaṃ

1. Paṇḍagandhena (Ka)

2. Paṇḍagandhavāsitena (Ka)

pati pati avekkhantopi. **Saddhāya adhimuccantoti**-ādi pañcannaṃ indriyānaṃ vasena vuttaṃ. **Abhiññeyyanti**-ādi catusaccavasena vuttaṃ. Sabbameva cetāṃ vitthārato, sāmāññena āsevanadassanamevāti idhādhippetameva āsevanatthaṃ dassetuṃ “**idha panā**”ti-ādi vuttaṃ.

Arittajjhānoti avirahitajjhāno. **Atucchajjhānoti** jhānena atuccho. Cāgo vā vevacananti¹ āha “**apariccattajjhāno**”ti. **Viharatīti** padassa **vibhaṅge**² āgatanayena atthaṃ dassento “**viharatīti iriyatī**”ti-ādimāha. Ayaṃ panettha saddattho—**viharatīti** ettha **vi**-saddo vicchedatthajotano. **Haratīti** neti, pavattetīti attho, vicchinditvā harati viharatīti vuttaṃ hoti. So hi ekaṃ iriyāpathabādhanāṃ aññena iriyāpathena vicchinditvā aparipatantaṃ attabhāvaṃ harati pavatteti, tasmā “**viharatī**”ti vuccati. **Iriyatīti** ṭhānanisajjādikiriyaṃ karonto pavattati. **Pavattatīti** ṭhānādisamaṅgī hutvā pavattati. **Pāletīti** ekaṃ iriyāpathabākhanaṃ iriyāpathantarehi rakkhanto pāleti. **Yapeti yāpetīti** tasseva vevacanaṃ. Ekaṃ hi iriyāpathabādhanāṃ aññena iriyāpathena vicchinditvā aparipatantaṃ attabhāvaṃ pāleno yapeti yāpetīti vuccati. **Caratīti** ṭhānanisajjādisu aññatarasamaṅgī hutvā pavattati. **Iminā padenāti** “**viharatī**”ti iminā padena.

Iriyāpathavihāroti ettha iriyaṇaṃ pavattanaṃ iriyā, kāyappayogo kāyikakiriya. Tassā pavattanūpāyabhāvato iriyāya patho iriyāpatho, ṭhānanisajjādi. Na hi ṭhānanisajjādīhi avatthāhi vinā kiñci kāyikakiriyaṃ pavattetuṃ sakkā. Ṭhānasamaṅgī vā hi kāyena kiñci kareyya, gamanādisu aññatarasamaṅgī vā. Vihaṇaṇaṃ, viharati etenāti vā vihāro, iriyāpathova vihāro **iriyāpathavihāro**, so ca atthato ṭhānanisajjādi-ākārappavatto catusanta tirūpappabandho eva. Ovādānusāsanīnaṃ ekānekavārādivisiṭṭhoyeva bhedo, na pana paramatthato tesāṃ nānākaraṇanti dassetuṃ “**paramatthato panā**”ti-ādimāha. Tattha **ese eke ekatṭheti**-ādīsu eso eko ekatthoti-ādinā attho veditabbo.

1. Viricananti (?)

2. Abhi 2. 262 piṭṭhe.

Raṭṭhassa, raṭṭhato vā laddho piṇḍo raṭṭhapiṇḍo. Tenāha “**ñātiparivaṭṭam pahāyā**”ti-ādi. Tattha “amhākamete”ti viññāyantīti ñātī, pitāmahapituputtādivasena parivaṭṭanaṭṭhena parivaṭṭo, ñātiyeva parivaṭṭo **ñātiparivaṭṭo**. **Theyyaparibhogo nāma** anarahassa paribhogo. Bhagavatā hi attano sāsane sīlavato paccayā anuññātā, na dussīlassa. Dāyakānampi sīlavato eva pariccāgo, na dussīlassa attano kārānaṃ mahapphalabhāvassa paccāsīsanato¹. Iti satthārā ananuññātattā dāyakehi ca apariccattattā saṃghamajjhepi nisīditvā paribhuñjantassa dussīlassa paribhogo theyyāya paribhogo theyyaparibhogo. Iṇavasena paribhogo **iṇaparibhogo** paṭiggāhakato dakkhiṇāvisuddhiyā abhāvato iṇaṃ gahetvā paribhogo viyāti attho.

Dātabbaṭṭhena dāyaṃ, taṃ ādiyantīti dāyādā, puttānametaṃ adhivacanāṃ, tesāṃ bhāvo dāyajjāṃ, dāyajjivasena paribhogo **dāyajjaparibhogo**, puttabhāvena paribhogoti vuttaṃ hoti. Sekkhā hi bhikkhū bhagavato orasaputtā, te pitu santakānaṃ dāyādā hutvā te paccaye paribhuñjanti. Kiṃ pana te bhagavato paccaye paribhuñjanti, udāhu gihīnanti? Gihīhi dinnāpi bhagavatā anuññātattā bhagavato santakā ananuññātesu sabbena sabbāṃ paribhogābhāvato, anuññātesuyeva ca paribhogasambhavato. **Dhammadāyādasutta**²ñcettha sādhaṃ.

Vītarāgā eva taṇhāya dāsabyaṃ atītattā sāmīno hutvā paribhuñjantīti āha “**khīṇāsavassa paribhogo sāmiparibhogo nāmā**”ti. Avītarāgānaṃ hi taṇhāparavasatāya paccayaparibhoge sāmibhāvo natthi, tadabhāvena vītarāgānaṃ tattha sāmibhāvo yathāruciparibhogasambhavato. Tathā hi te paṭikūlampi appaṭikūlākārena, appaṭikūlampi paṭikūlākārena, tadubhayampi vajjetvā ajjhupekkhanākārena paccaye paribhuñjanti, dāyakānañca manorathaṃ pūrenti. Yo paṇāyaṃ sīlavato paccavekkhitaparibhogo, so iṇaparibhogassa paccanīkattā āṇaṇyaparibhogo nāma hoti. Yathā hi iṇāyiko attano ruciyā icchitaṃ desaṃ gantuṃ na labhati, evaṃ iṇaparibhogayutto

1. Paccāsīmsanato (Sī)

2. Ma 1. 15 piṭṭhe.

lokato nissarituṃ na labhatīti tappatipakkhattā sīlavato paccavekkhitaparibhogō “āṇaṇyaparibhogō”ti vuccati, tasmā nippariyāyato catuparibhogavinimutto visumyevāyaṃ paribhogoti veditabbo. So idha visuṃ na vutto, dāyajjaparibhogeyeva vā saṅgahaṃ gacchati. Sīlavāpi hi imāya sikkhāya samannāgatattā “sekho”tveva vuccati. Imesu paribhogesu sāmiparibhogō dāyajjaparibhogō ca ariyānaṃ puthujjanānaṃ vaṭṭati, iṇaparibhogō na vaṭṭati. Theyyaparibhoge kathāyeva natthi. Kathaṃ panettha sāmiparibhogō dāyajjaparibhogō ca puthujjanānaṃ sambhavati? Upacārasena. Yo hi puthujjanassapi sallekhaṇṇapattiyāṃ ʾhitassa paccayagedhaṃ pahāya tattha anupalittena cittaṇa paribhogō, so sāmiparibhogō viya hoti. Sīlavato pana paccavekkhitaparibhogō dāyajjaparibhogō viya hoti dāyakānaṃ manorathassa avirāḍḍhanato. Kalyāṇaputhujjanassa paribhoge vattabbameva natthi tassa sekkhasaṅgahato. **Sekkhassuttaṃ**¹ hetassa atthassa sādhaṃ.

Imassa bhikkhunoti accharāsaṅghātamattampi kālaṃ mettacittaṃ āsevanassa bhikkhuno. **Amogho raṭṭhapiṇḍaparibhogoti** “ayaṃ pabbajito samaṇo bhikkhūti āmisaṃ dentānaṃ tāya mettāsevanāya attano santāne dosamalassa vā tadekaṭṭhānaṃ pāpadhammānaṃ pabbājanato vūpasamanato saṃsāre ca bhayassa sammāva-ikkhaṇato ajjhāsayaṃsa avisaṃvādanenassa amogho raṭṭhapiṇḍaparibhogō. **Mahaṭṭhiyanti** mahatthikaṃ mahāpayojanaṃ. **Mahapphalanti** vipulapphalaṃ. **Mahānisamsanti** mahānissandapphalaṃ. **Mahājutikanti** mahānubhāvaṃ. **Mahāvippahārenti** mahāvitthāraṃ. Ettha ca paṭhamāṃ kāraṇaṃ mettāsevanāya tassa bhikkhuno sāmi-ādibhāvena raṭṭhapiṇḍaparibhogārahataṃ, dutiyaṃ parehi dinnassa dānassa mahaṭṭhiyabhāvakāraṇaṃ. **Ko pana vādoti** mettāya āsevanamattampi evaṃmahānubhāvaṃ, ko pana vādo bahulīkāre, ettha vattabbameva natthīti attho.

54. Catutthe **uppādeti vaḍḍhetīti** ettha bhāvanāsaddassa uppādanavaḍḍhanatthataṃ pubbe vuttā eva.

1. Saṃ 3. 12 piṭṭhe.

55. Pañcame **imesu dvīsūti** catutthapañcomesu. “Tatiye vuttanayeneva veditabban”ti vatvā tathā veditabbataṃ dassetuṃ **“yo hi āsevati”**ti-ādi vuttaṃ. Tena āsevanābhāvanāmanasikārānaṃ atthavisesābhāvamāha. Yadi evaṃ suttantassa desanā kathanti āha **“sammāsambuddho panā”**ti-ādi. **Yāya dhammadhātuyāti** sabbaññutaññāṇamāha. Tena hi dhammānaṃ ākārabhedanā nātvā tadanurūpaṃ ekampi dhammaṃ tathā vibhajitvā bhagavā dasseti. **Tihi koṭṭhāsehi**ti āsevanābhāvanāmanasikārabhāgehi. Mettā hi sabbavatthuno mettāyanavasena ānītā sevanā āsevanā, tassā vaḍḍhanā bhāvanā, avissajjtvā manasi ṭhapanāṃ manasikāro.

56. Chaṭṭhe **aniyamitavacanaṃ** “ime nāmā”ti niyametvā avuttattā. **Niyamitavacanaṃ** “akusalā”ti sarūpeneva vuttattā. **Asesato pariyādinnaṃ honti** appakassapi akusalabhāgassa aggahitassa abhāvato. Akusalaṃ bhajantīti **akusalabhāgiyā**. Akusalapakkhe bhavāti **akusalapakkhikā**. Tenāha **“akusalāyevā”**ti-ādi. **Paṭhamataraṃ gacchatīti** paṭhamataraṃ pavattati, paṭhamo padhāno hutvā vattatīti attho. Ekuppādādivasena hi ekajjhaṃ pavattamānesu catūsu arūpakkhandhesu ayameva paṭhamāṃ upparijjatīti idaṃ natthi, lokuttaramaggesu viya pana paññindriyassa, lokiyaadhammesu manindriyassa puretarassa bhāvo sātisaṃyoti **“sabbete manopubbaṅgamā”**ti vuttaṃ. Tathā hi **abhidhammepi**¹ “yasmim samaye kāmāvacaraṃ kusalaṃ cittaṃ uppannaṃ hoti”ti cittaṃ pubbaṅgamaṃ jeṭṭhaṃ katvā desanā pavattā. Suttasupi vuttaṃ “manopubbaṅgamā dhammā”², chadvārādhīpati rājā”ti³. Tenāha **“ete hi”**ti-ādi. **Tesaṃ mano uppādakoti** ca yadaggena mano sampayuttadhammānaṃ jeṭṭhako hutvā pavattati, tadaggena te attānaṃ anuvattāpento te tathā uppādentō nāma hotīti katvā vuttaṃ. Aṭṭhakathāyaṃ pana cittassa jeṭṭhakabhāvameva sandhāya rājagamanaññāyena sahuppattipi paṭhamuppatti viya katvā vuttatīti ayamattho dassito. **Anvadevāti** eteneva cittassa khaṇavasena paṭhamuppattiyā abhāvo dīpitoti daṭṭhabbo. Tenevāha **“ekatoṇevāti attho”**ti.

1. Abhi 1. 17 piṭṭhe.

2. Khu 1. 13 piṭṭhe Dhammapade.

3. Dhammapada-Ṭīha 2. 150 piṭṭhe.

57. Sattame **catubhūmakāpi kusalā dhammā kathitā**ti “ye keci kusalā dhammā”ti anavasesapariyādānato vuttaṃ.

58. Aṭṭhame **idanti** līṅgavipallāsenā niddeso, nipātapadaṃ vā etaṃ “yadidan”ti-ādīsu viyāti āha “**ayaṃ pamādoti attho**”ti. **Pamajjanākāro**ti pamādāpatti. **Cittassa vossaggo**ti imesu ettakesu ṭhānesu satiyā aniggaṇhitvā cittassa vossajjanaṃ sativiraho. **Vossaggānuppadānanti** vossaggassa anu anu padānaṃ punappunaṃ vissajjanaṃ. **Asakkaccakiriyatā**ti etesaṃ dānādīnaṃ kusaladhammānaṃ pavattane puggalassa vā deyyadhammassa vā asakkaccakiriyā. Satatabhāvo sātaccam, sātaccena kiriyā sātaccakiriyā, sāyeva sātaccakiriyatā, na sātaccakiriyatā **asātaccakiriyatā**. **Anaṭṭhitakiriyatā**ti anīṭṭhitakiriyatā nirantaraṃ na anuṭṭhitakiriyatā ca. **Olīnavuttitā**ti nirantarakaraṇasaṅkhātassa vipphārassa abhāvena olīnavuttitā. **Nikkhattachandatā**ti kusalakiriyāya vīriyachandassa nikkhattabhāvo. **Nikkhattadhuratā**ti vīriyadhurassa oropanaṃ, osakkitaṃ mānasatāti attho. **Anamiṭṭhānanti** kusalakaraṇe appaṭiṭṭhitabhāvo. **Ananuyogoti** ananuyuñjanaṃ. Kusaladhammesu āsevanādīnaṃ abhāvo **anāsevanādayo**. **Pamādoti** sarūpaniddeso. **Pamajjanā**ti ākāraṇiddeso. **Pamajjitanti** bhāvaniddeso. **Parihāyanti**ti iminā pamādassa sāvajjatanā dasseti. Tayidaṃ lokiyānaṃ vasena, na lokuttarānanti āha “**uppanā -pa- idan**”ti-ādī.

59. Navame na pamajjati etenāti **appamādo**, pamādassa paṭipakkho satiyā avippavāso. Atthato niccaṃ upaṭṭhitāya satiyā etaṃ nāmaṃ. Pamādo pana satiyā satisampajañṇassa vā paṭipakkhabhūto akusalacittuppādo daṭṭhabbo. Tenāha “**pamādassa paṭipakkhavasena vitthārato veditabbo**”ti.

60. Dasame kucchitaṃ sīdatīti kusīto da-kārassa ta-kāraṃ katvā, tassa bhāvo **kosajjam**, ālasiyanti attho.

Accharāsaṅghātavaggavaṇṇanā niṭṭhitā.

7. Vīriyārambhādivaggavaṇṇanā

61. Sattamassa paṭhame vīraṇaṃ kammanti vīriyaṃ, vidhinā vā īrayitabbaṃ pavattetabbanti vīriyaṃ, tadeva kusalakiriyāya padhānaṭṭhena ārambho **vīriyārambho**. Āraddhavīriyatā paggahitavīriyatā paripuṇṇavīriyatāti paccekaṃ vīriyatāsaddo yojetabbo.

62. Dutiye mahatī icchā etassāti mahiccho, tassa bhāvo **mahicchatā**. Mahāvisayo lobho **mahālobho** mahantānaṃ vatthūnaṃ bahūnaṃca abhigijjhanato. **Itarītarāti**-ādinā pabbajitānaṃ uppajjanamahicchatā vuttā. **Pañcahi kāmaguṇehīti**-ādi gahaṭṭhānaṃ vasena vuttaṃ. **Ichhāti** sabhāvaniddeso. **Ichhāgatāti** icchāpavattā. **Mahicchatāti** mahā-icchatā. Atthato paṇāyaṃ rāgo evāti vuttaṃ “**rāgo sārāgo**”ti-ādi.

63. Tatiye **appicchassāti** ettha **appa**-saddo abhāvattho “appābādho hoti appātaṅko”ti-ādīsu¹ viyāti āha “**anicchassā**”ti. Loke pākaṭassa hi akkhirogakucchirogādibhedassa ābādhassa abhāvaṃ sandhāya “appābādho”ti vuttaṃ. Idāni vuttamevatthaṃ pākaṭataraṃ kātum “**ettha hī**”ti-ādi vuttaṃ. Byañjanaṃ sāvasesaṃ viya parittakepi appasaddassa dissamānattā. Attho pana niravaseso sabbaso paccayicchāya abhāvassa adhippetattā. Tenāha “**na hī**”ti-ādi.

Ichhāya abhāveneva appiccho nāma hotīti imamatthaṃ pakārantarena dīpetum “**apicā**”ti-ādi vuttaṃ. **Atricchatā nāma** atra atra icchā.

Asantaḡuṇasambhāvanatāya pāpā lāmikā nihīnā icchā **pāpicchatā**. Yāya paccayuppādanatthaṃ attani vijjamaṇaḡuṇe sambhāveti, paccayānaṃ paṭiggahaṇe ca na mattaṃ jānāti, ayaṃ **mahicchatā**.

Asantaḡuṇasambhāvanatāti attani avijjamaṇānaṃ ḡuṇānaṃ vijjamaṇānaṃ viya paresaṃ pakāsanā. **Santaḡuṇasambhāvanatāti** icchācāre ṭhatvā attani vijjamaṇasīladhutadhammādiḡuṇavibhāvanā. Tādisassapi paṭiggahaṇe amattaññutāpi hoti, sāpi abhidhamme āgatāyevāti sambandho.

Dussantappayoti duttappayo.

1. Ma 2. 255 piṭṭhe.

Atilūkhabhāvanti pattacīvaravasena ativiya lūkhabhāvaṃ. Tadassa disvā manussā “ayaṃ amaṅgaladivaso, sumbhakasiniddhapattacīvaro ayyo pubbaṅgamo kātabbo”ti cintetvā “bhante thokaṃ bahi hothā”ti āhaṃsu. **Ummujjīti** manussānaṃ ajānantānaṃyeva pathaviyaṃ nimujjitvā gaṇhantoyeva ummuji. Yadi thero “khīṇāsavabhāvaṃ jānantū”ti iccheyya, na naṃ manussā “bahi hothā”ti vadeyyuṃ, khīṇāsavānaṃ pana tathācittameva na uppajjeyya.

Appicchatāpadhānaṃ puggalādhiṭṭhānaṃ catubbidha-icchāpabhedaṃ dassetvā punapi puggalādhiṭṭhānena catubbidhaṃ icchābhedaṃ dassento “**aparopi catubbidho appiccho**”ti-ādimāha. **Paccaya-appiccho**ti paccayesu icchārahito. **Dhutaṅga-appiccho**ti dhutaṅgasambhāvanāya icchārahito. **Pariyatti-appiccho**ti bahussutasambhāvanāya icchārahito. **Adhigama-appiccho**ti “ariyo”ti sambhāvanāya icchārahito. **Dāyakassa vasanti** appaṃ vā yaṃ dātukāmo bahuṃ vāti dāyakassa cittassa vasaṃ, ajjhāsayanti attho. **Deyyadhammassa vasanti** deyyadhammassa abahubhāvaṃ. **Attano thāmanti** attano paṃāṇaṃ. Yattakena attā yāpeti, tattakasseva gahaṇaṃ. **Yadi hīti**-ādi saṅkhepato vuttassa atthassa vivaraṇaṃ. **Pamāṇenevāti** yāpanappamāṇeneva.

Ekabhikkhupi nāññāsīti sosānikavatte sammadeva vattitattā ekopi bhikkhu na aññāsī. **Abbokiṇṇanti** avicchedaṃ. **Dutiyo maṃ jāneyyāti** dutiyo sahāyabhūtopi yathā maṃ jānituṃ na sakkuṇeyya, tathā saṭṭhi vassāni nīrantaraṃ susāne vasāmi, tasmā **ahaṃ aho sosānikuttamo**. **Upakāro hutvāti** uggahaparipucchādīhi pariyattidhammavasena upakāro hutvā.

Dhammakathāya janapadaṃ khobhetvāti

lomahaṃsanāsādhukāradānacelukkhepādivasena sannipatitaṃ itaraṇca “kathaṃ nu kho appaṃ ayyassa santike dhammaṃ sossāmā”ti kolāhalavasena mahājanaṃ khobhetvā. Yadi thero bahussutabhāvaṃ jānāpetuṃ iccheyya, pubbeva janapadaṃ khobhento dhammaṃ katheyya. **Gatoti** “ayaṃ so, yena rattiyaṃ dhammakathā katā”ti jānanabhāvena pariyatti-appicchatāya purāruṇāva gato.

Tayo kulaputtā viyāti pācīnavamsadāye sāmaggivāsaṃvuṭṭhā anuruddho nandiyo kimiloti ime tayo kulaputtā viya. Etesupi hi anuruddhattherena bhagavatā “atthi pana vo anuruddhā evaṃ appamattānaṃ ātāpīnaṃ pahitattānaṃ viharantānaṃ uttarimanussadhammo alamariyañāṇadassanapiseso adhigato phāsuvihāro”¹ti puṭṭhena “idha pana mayāṃ bhante yāvadeva ākaṅkhāma, vivicceva kāmehi vivicca akusalehi dhammehi savitakkaṃ savicāraṃ vivekajaṃ pītisukhaṃ paṭhamāṃ jhānaṃ upasampajja viharāma”²ti-ādinā¹ anupubbavīhārasamāpattīsu ārocitāsu itare therā na icchimsu. Tathā hi te pakkante bhagavati āyasmantaṃ anuruddhaṃ etadavocuṃ “kinnu mayāṃ āyasmato anuruddhassa evamārocimha ‘imāsaṇca imāsaṇca vihārasamāpattīnaṃ mayāṃ lābhino’²ti. Yaṃ no āyasmā anuruddho bhagavato sammukhāpi āsavānaṃ khayāṃ pakāseti”²ti. Ghaṭṭikāropi attano ariyabhāve kikissa rañño bhagavatā ārocite na attamano ahosi. Tenāha “**ghaṭṭikārakumbhakāro viyā**”²ti. **Imasmim panattheti** “yathayidaṃ bhikkhave appicchatā”²ti vutte appicchatāsaṅkhāte atthe. **Balava-alobhenāti** dalhatarappavattikena alobhena.

64. Catutthe natthi etassa santuṭṭhīti asantuṭṭhi, tassa bhāvo **asantuṭṭhitā**. Taṃ pana sarūpato dassento “**asantuṭṭhe puggale -pa- lobho**”²ti āha. **Sevantassāti**-ādīni aññaṃaññavevacanāni.

65-67. Pañcame tussanaṃ tuṭṭhi, samaṃ, sakena, santena vā tuṭṭhi etassāti santuṭṭhi, tassa bhāvo **santuṭṭhikā**. Yassa santosassa atthitāya bhikkhu “santuṭṭho”²ti vuccati, taṃ dassento “**itarītarapaccayasantosena samannāgatassā**”²ti āha, cīvarādi ke yattha katthaci kappiye paccaye santussanena samaṅgībhūtaṃ attho. Atha vā itaraṃ vuccati hīnaṃ paṇītato aññattā, tathā paṇītampi itaraṃ hīnato aññattā. Apekkhāsiddhā hi itaratā. Iti yena dhammena hīnena vā paṇītena vā cīvarādipaccayena santussati, so tathā pavatto lobho **itarītarapaccayasantoso**, tena

1. Ma 1. 268 piṭṭhe.

2. Ma 1. 270 piṭṭhe.

samannāgatassa. Yathālābhaṃ attano lābhānurūpaṃ santoso **yathālābhasantoso**. Sesapadadvayepi eśeva nayo. Labbhatīti vā lābho, yo yo lābho yathālābho, tena santoso **yathālābhasantoso**. **Balanti** kāyabalaṃ. **Sāruppanti** bhikkhuno anucchavikatā.

Yathāladdhato aññassa apatthanā nāma siyā appicchatāpi pavatti-ākāroti tato vinivecitameva santosassa sarūpaṃ dassento **“labhantopi na gaṇhātī”**ti āha. Taṃ parivattetvā pakatidubbalādīnaṃ garucīvaraṃ aphāsubhāvāvahaṃ sarīrakhedāvahaṃ hotīti payojanavasena na atricchatādivasena taṃ parivattetvā lahukacīvaraparibhogo santosavirodhi na hotīti āha **“lahukena yāpentopi santuṭṭhova hotī”**ti. Mahagghacīvaraṃ bahūni vā cīvarāni labhitvā tāni vissajjetvā tadaññassa gahaṇaṃ yathāsāruppanaye ṭhitattā na santosavirodhīti āha **“tesaṃ -pa- dhārentopi santuṭṭhova hotī”**ti. Evaṃ sesapaccayesupi yathāsāruppaniddese api-saddaggaṇe adhippāyo veditabbo. **Muttaharītakanti** gomuttaparibhāvitāṃ, pūtibhāvena vā chaḍḍitaṃ harītakaṃ. **Buddhādīhi vaṇṇitanti** appicchatāsantuṭṭhīsu bhikkhū niyojetuṃ “pūtimuttābhesajjaṃ nissāya pabbajjā”ti-ādinā¹ buddhādīhi pasatthaṃ. **Paramasantuṭṭhova hoti** paramena ukkaṃsagatena santosena samannāgatattā. **Yathāsāruppasantosova aggoti** tattha tattha bhikkhu sāruppaṃyeva nissāya santussanavasena pavattanato aggo. Chaṭṭhasattamesu natthi vattabbaṃ.

68-69. Aṭṭhamanavamesu na sampajānātīti asampajāno, tassa bhāvo **asampajāññaṃ**. Vuttappaṭipakkhena **sampajāññaṃ** veditabbaṃ.

70. Dasame **pāpamittā** devadattasadiśā. Te hi hīnācārātāya, dukkhassa vā sampāpakatāya “pāpā”ti vuccanti. **Tenākārena pavattānanti** yo pāpamittassa khanti ruci adhimutti tanninnatāṃsavaṇkatādi-ākāro, tenākārena pavattānaṃ. **Catunnaṃ khandhānamevetarṃ nāmanti** catunnaṃ

1. Vi 3. 73, 133 piṭṭhesu.

arūpakkhandhānaṃ “pāpamittatā”ti etaṃ nāmaṃ. Yasmā assaddhiyādipāpadhammasamannāgatā puggalā visesato pāpā puññadhammavimokkhatāya, te yassa mittā sahāyā, so pāpamitto, tassa bhāvo **pāpamittatā**. Tenāha “**ye te puggalā assaddhā**”ti-ādi.

Vīriyārambhādivaggavaṇṇanā niṭṭhitā.

8. Kalyāṇamittādivaggavaṇṇanā

71. Aṭṭhamassa paṭhame buddhā, sārīputtādayo vā **kalyāṇamittā**. **Vuttapaṭipakkhanayenāti** “pāpamittatā”ti pade vuttassa paṭipakkhanayena.

72-73. Dutiye **yogoti** samaṅgībhāvo. **Payogoti** payuñjanaṃ paṭipatti. **Ayogoti** asamaṅgībhāvo. **Appayogoti** appayuñjanaṃ appaṭipatti. **Anuyogenāti** anuyogahetu.

74. Catutthe **bujjhanakasattassāti** catunnaṃ ariyasaccānaṃ paṭivijjhanakapuggalassa. **Aṅgabhūtāti** tasseva paṭivedhassa kāraṇabhūtā. Ettha ca cattāri ariyasaccāni bujjhati, aññāṇaniddāya vāpi bujjhatīti bodhīti laddhanāmo ariyasāvako bujjhanakasatto, tassa bujjhanakasattassa. **Bodhiyāti** tassā dhammasāmaggisāṅkhātāya bodhiyā. Bujjhanaṭṭhena bodhiyo, bodhiyo eva saccasamapaṭibodhassa aṅgāti vuttaṃ “**bujjhantīti bojjaṅgā**”ti. Vipassanādīnaṃ kāraṇānaṃ bujjhitabbānañca saccānaṃ anurūpaṃ bujjhanato **anubujjhantīti bojjaṅgā**, paṭimukhaṃ paccakkhabhāvena abhimukhaṃ bujjhanato **paṭibujjhantīti bojjaṅgā**, sammā aviparītato bujjhanato **sambujjhantīti bojjaṅgā**ti evaṃ atthavisesadīpakehi upasaggehi **anubujjhantīti**-ādi vuttaṃ. Bodhisaddo sabbavisesayuttaṃ bujjhanasāmaññena saṅgaṇhāti. **Bodhāya saṃvattantīti** iminā tassā dhammasāmaggiyā bujjhanassa ekantakāraṇataṃ dasseti. **Evaṃ panetaṃ padaṃ vibhattamevāti** vuttappakārena etaṃ “**bojjaṅgā**”ti padaṃ niddese **paṭisambhidāmagge**¹ vibhattameva.

1. Khu 9. 302 piṭṭhe.

75. Pañcame **yāthāvasarasabhūmī**ti yāthāvato sakiccakaraṇabhūmi. **Sāti** yāthāvasarasabhūmi. **Vipassanā**ti balavavipassanā. Keci “bhaṅgañāṇato paṭṭhāyā”ti vadanti. Vipassanāya pāda-kajjhāne ca sati-ādayo bojjaṅgapakkhikā eva pariyāyabodhipakkhiyabhāvato. **Tatthā**ti-ādi catubbidhānaṃ bojjaṅgānaṃ bhūmivibhāvadassanaṃ.

76. Chaṭṭhe **tesaṃ antare**ti tesaṃ bhikkhūnaṃ antare. Kāmaṃ saṅgīti-āruḥhasena appakamidaṃ suttapadaṃ, bhagavā panettha sannipatitaparisaṃ ajjhāsayaṇurūpaṃ vitthārikaṃ karotīti katvā idaṃ vuttaṃ “**mahatī desanā bhavissati**”ti. **Gāmanigamādikathā natthī**ti tassā kathāya atiracchānakathābhāvamāhu. Tathā hi sā pubbe bahuñātikaṃ ahosi bahupakkhaṃ, idāni appaṇātikaṃ appapakkhanti aniccatāmukhena niyyānikapakkhikā jātā. **Etāyā**ti yathāvuttāya parihāniyā. **Patikiṭṭhanti** nihīnaṃ. **Mama sāsane**ti idaṃ kammassakatajjhānapaññānampi viśesanameva. Tadubhayampi hi bāhirakānaṃ tappaññādvayato sātisaṃyameva sabbaññubuddhānaṃ desanāya laddhaviśesato vivatṭūpanissayato ca.

77. Sattame **tesaṃ cittācāraṃ** ñatvāti tathā kathentānaṃ tesaṃ bhikkhūnaṃ tattha upagamanena attano desanāya bhājanabhūtaṃ cittappavattiṃ ñatvā. **Kammassakatādīti ādi**-saddena jhānapaññādināṃ catunnampi paññānaṃ gahaṇaṃ.

78-80. Aṭṭhamādīsu **heṭṭhā vuttanayenevā**ti “yā esa mama sāsane”ti-ādinā heṭṭhā vuttanayeneva. Sesamettha uttānatthameva.

Kalyāṇamittādivaggavaṇṇanā niṭṭhitā.

81-82. Navame vagge natthi vattabbaṃ.

10. Dutiyapamādādivaggavaṇṇanā

98-115. Dasame vagge ajjhattasantāne bhavaṃ **ajjhattikaṃ**. Ajjhattasantānato bahiddhā bhavaṃ **bāhiraṃ**. **Vuttapaṭipakkhanayenā**ti “avināsāyā”ti evamādinā attho gahetabbo. **Catukkoṭiketi** “anuyogo

akusalānaṃ, ananuyogo kusalānaṃ, anuyogo kusalānaṃ, ananuyogo akusalānaṃ”ti evaṃ pariyosānasutte¹ āgatanayaṃ gahetvā “nāhaṃ bhikkhave aññaṃ ekadhammampi samanupassāmi”ti-ādinā² āgatasuttānaṃ samañña jāta.

130. Suttantanaye yathācodanā saṃkilesadhammānaṃ vipariyesanaṃ, taṃtaṃdhammakotṭhāsānañca ūnato adhikato ca pavedanaṃ **adhammaṃ dhammoti dīpanaṃ**. Tesāṃyeva pana aviparītato anūnādhikato ca pavedanaṃ **dhammaṃ dhammoti dīpanaṃ**. Evaṃ vinayappaṭipattiyaṃ ayathāvidhippavedanaṃ **adhammaṃ dhammoti dīpanaṃ**. Yathāvidhippavedanaṃ **dhammaṃ dhammoti dīpanaṃ**. Suttantanayena pañcavidho saṃvaravinayo pahānavinayo ca **vinayo**, tappaṭipakkhena **avinayo**. Vinayanayena vatthusampadādinā yathāvidhippaṭipatti eva vinayo, tabbipariyāyena avinayo veditabbo. **Timsa nissaggiyā pācittiya**ti ettha itisaddo ādyattho. Tena dvenavuti pācittiya cattāro pāṭidesaniyā satta adhikaraṇasamathāti imesaṃ saṅgaho. **Ekatimsa nissaggiyā**ti ettha “tenavuti pācittiya”ti-ādinā vattabbaṃ. Sesamettha suviññeyyameva.

Adhigantabbato **adhigamo**, maggaphalāni. Nibbānaṃ pana antaradhānābhāvato idha na gayhati. Paṭipajjanaṃ **paṭipatti**, sikkhattayasamāyogo. Paṭipajjitabbato vā **paṭipatti**. Pariyāpuṇitabbato **pariyatti**, **piṭakattayaṃ**. Maggaggahaṇena gahitāpi tatiyavijjāchatṭhābhiñña vijjābhiññāsāmañña³ “**tisso vijjā cha abhiñña**”ti punapi gahitā. **Tato paraṃ cha abhiñña**ti vassasahassato paraṃ cha abhiñña nibbattetuṃ sakkonti, na paṭisambhidāhi adhippāyo. **Tatoti** abhiññākālato pacchā. **Tāti** abhiññāyo. Pubbabhāge jhānasinehābhāvena kevalāya vipassanāya ṭhatvā aggaphalappattā **sukkhavipassakā** nāma, maggakkhaṇe pana “jhānasineho natthi”ti na vattabbo “samathavipassanaṃ yuganaddhaṃ bhāveti”ti⁴ vacanato. **Pacchimakassāti** sabbapacchimassa. Kiñcāpi ariyo

1. Am 1. 16 piṭṭhe.

2. Am 1. 2 piṭṭhe.

3. Tatiyavijjā vijjābhiññāsāmañña (Sī), tatiyavijjā cha-abhiññāsāmañña (Ka)

4. Am 1. 475 piṭṭhe.

aparihānadhammo, sotāpannessa pana uddham jīvitapariyādānā adhigatadhammo uppanno nāma natthi, paccayasāmaggiyā asati yāva uparivisesaṃ nibbattetuṃ na sakkonti, tāva adhigamassa asamabhavo evāti āha “**sotāpannessa -pa- nāma hoti**”ti. Tassidaṃ manussalokavasena vuttanti daṭṭhabbhaṃ.

Na codentiti aññamaññasmiṃ vijjamānaṃ dosaṃ jānantāpi na codenti na sārenti. **Akukkuccakā honti**ti kukkuccaṃ na uppādentī. “Asakkaccakārino honti”ti ca paṭhanti, sāthalikatāya sikkhāsu asakkaccakārino honti attho. **Bhikkhūnaṃ satepi sahassepi dharamāneti** idaṃ bāhullavasena vuttaṃ. Antimavatthu-anajjhāpannesu katipayamattesupi bhikkhūsu dharantesu, ekasmiṃ vā dharante paṭipatti anantarahitā eva nāma hoti. Tenevāha “**pacchimakassa -pa- antarahitā hoti**”ti.

Antevāsike gahetunti antevāsikesaṅgahetuṃ. **Atthavasena**ti aṭṭhakathāvasena. **Matthakato paṭṭhāyāti** uparito paṭṭhāya. **Upasathakkhandhakamattanti** Vinayamātikāpālimāha. Āḷavakapañhādīnaṃ viya devesu pariyattiyā pavatti appamāṇanti āha “**manussesū**”ti.

Oṭṭhaṭṭhivaṇṇanti oṭṭhānaṃ aṭṭhivaṇṇaṃ, dantakasāvaṃ ekaṃ vā dve vā vāre rajitvā dantavaṇṇaṃ katvā dhārentīti vuttaṃ hoti. **Kesesu vā alliyāpentī**ti tena kāsāvakhaṇḍena¹ kese bandhantā alliyāpentī. Bhikkhugottassa abhibhavanato vināsanato **gotrabhuno**. Atha vā vottaṃ vuccati sādharmaṇaṃ nāmaṃ, mattasaddo luttaniddiṭṭho, tasmā “samaṇā”ti gottamattaṃ anubhavanti dhārentīti **gotrabhuno**, nāmamattasamaṇāti attho. Kāsāvagatakaṇṭhatāya, kāsāvaggaḥaṇḍaḥetu-uppajjanakasokatāya vā **kāsāvakaṇṭhā**. **Samghagatanti** samghaṃ uddissa dinnattā samghagataṃ. **Taṃ sarīranti** taṃ dhātusarīraṃ.

Tenevāti pariyatti-antaradhānamūlakattā eva itara-antaradhānassa. Sakko devarājā chātakabhaye paratīragamanāya bhikkhū ussukkamakāsīti adhippāyo. **Neti** ubhayepi paṃsukūlikatthere dhammakathikatthere ca. **Therāti** tattha ṭhitā sakkhibhūtā therā. Dhammakathikattherā “**yāva**

1. Kāsāvakhaṇḍaṃ (Si)

tiṭṭhanti suttantā -pa- yogakkhemā na dhamṣatī”ti idaṃ suttam āharitvā **“suttante rakkhite sante, paṭipatti hoti rakkhita”**ti iminā vacanena paṃsukūlikatthere appaṭibhāne akamsu. Idāni pariyattiyā anantaradhānameva itaresaṃ anantaradhānahetūti imamatthaṃ byatirekato anvayato ca upamāhi vibhāvetuṃ **“yathā hī”**ti-ādi vuttam. Taṃ suviññeyyameva.

Dutiyapamādādivaggavaṇṇanā niṭṭhitā.

140-150. Ekādasamadvādasamavaggā suviññeyyā eva.

13. Ekapuggalavaggavaṇṇanā

170. **Ekapuggalassāti** ekapuggalavaggassa. Tenāha **“paṭhame”**ti. **Ekoti** gaṇanaparicchedo, tato eva **dutiyādiṭṭhikhepattho**. Padhānāsahāyatthopi ekasaddo hotīti tannivattanatthaṃ **“gaṇanaparicchedo”**ti āha. Sammutiyā desanā **sammutidesanā**. Paramatthassa desanā **paramatthadesanā**. **Tatthāti** sammutiparamatthadesanāsu, na sammutiparamatthesu. Tenāha **“evarūpā sammutidesanā, evarūpā paramatthadesanā”**ti. Tatrīdaṃ sammutiparamatthānaṃ lakkhaṇaṃ—yasmaṃ bhinne, buddhiyā vā avayavavinibbhoge kate na taṃsamaññā, sā ghaṭapaṭāḍḍipabhedā sammuti, tabbipariyāyena paramatthā. Na hi kakkhaḷaphusaṇādisabhāve so nayo labbhati. Tattha rūpādidhammasamūhaṃ santānavasena pavattamānaṃ upādāya puggalavohāroti **puggaloti sammutidesanā**. Sesapadesupi eseva nayo. Uppādavayavanto sabhāvadhammā na niccāti aniccāti āha **“aniccanti paramatthadesanā”**ti. Esa nayo sesapadesupi. Nanu khandhadesanāpi sammutidesanāva. Rāsattā vā hi khandhattho koṭṭhāsattā vāti? Saccametaṃ, ayaṃ pana khandhasamaññā phassādīsu pavattatajjāpaññatti viya paramatthasannissayā tassa āsannatarā, puggalasamaññādayo viya na dūreti paramatthasaṅgahā vuttā. Khandhasīsena vā tadupādānasabhāvadhammā eva gahitā. Nanu ca sabhāvadhammā sabbepi sammutimukheneva desanaṃ ārohani, na samukhenāti sabbāpi desanā sammutidesanāva siyāti? Nayidamevaṃ, desetabbadhammavibhāgena desanāvibhāgassa adhippetattā. Na hi saddo kenaci pavattinimittena vinā atthaṃ pakāsetīti.

Sammutivasena desanāṃ sutvāti “idhekacco puggalo attantapo hoti attaparitāpānuyogamanuyutto”ti-ādinā¹ sammutimukhena pavattitadesanāṃ sutamayañāṇuppadavasena sutvā. **Atthaṃ paṭivijjhivā**ti tadanusārena catusaccasaṅkhātāṃ atthaṃ saha vipassanāya maggapaññāya paṭivijjhivā. **Mohaṃ pahāyā**ti tadekaṭṭhakilesehi saddhiṃ anavasesaṃ mohaṃ pajahivā. **Visesanti** aggaphalanibbānasaṅkhātāṃ visesaṃ. **Tesanti** tādīsānaṃ veyyānaṃ. **Paramatthavasena**ti “pañcimāni bhikkhave indriyāni”ti-ādinā² paramatthadhammavasena. Sesāṃ anantaranaye vuttasadisameva.

Tatrāti tassāṃ sammutivasena paramatthavasena ca desanāyaṃ. **Desabhāsākusaloti** nānādesabhāsāsu kusalo. **Tiṇṇaṃ vedānanti** nidassanamattaṃ, tiṇṇaṃ vedānaṃ sippuggahaṇaṭṭhānānampīti adhippāyo. Teneva sippuggahaṇaṃ parato vakkhati. Sippāni vā vijjāṭṭhānabhāvena vedantogadhāni katvā “tiṇṇaṃ vedānaṃ”ti vuttaṃ. **Kathetabbabhāvena ṭhitāni**, na katthaci sannicitabhāvenāti vedānampi kathetabbabhāveneva ṭhānaṃ dīpento “guhā tiṇi nihitā na gayhanti”ti-ādimicchāvādaṃ paṭikkhipati. Nānāvidhā desabhāsā etesanti **nānādesabhāsā**.

Paramo uttamo attho **paramattho**, dhammānaṃ yathābhūtasabhāvo. Lokasaṅketamattasiddhā **sammuti**. Yadi evaṃ kathaṃ sammutikathāya saccatāti āha “**lokasammutikāraṇā**”ti, lokasamaññaṃ nissāya pavattanatoti attho. Lokasamañña hi abhinivesena viññeyyā, nāññāpanā ekaccassa sutassa sāvanā viya na musā anātidhāvitabbato tassā. Tenāha bhagavā “janapadaniruttiṃ nābhiniveseyya, samaññaṃ nātidhāvaye”ti. **Dhammānanti** sabhāvadhammānaṃ. **Bhūtakāraṇā**ti yathābhūtakāraṇā yathābhūtaṃ nissāya pavattanato. **Sammutiṃ voharantassā**ti “puggalo, satto”ti-ādinā lokasamaññaṃ kathentassa.

Hirōtappadīpanatthanti lokapālanakicce hirōtappadhamme kiccato pakāsetuṃ. Tesāṃ hi kiccaṃ sattasantāne eva pakātaṃ hotīti puggalādhiṭṭhānāya kathāya taṃ vattabbaṃ. Esa nayo sesesupi. Yasmiṃ

1. Abhi 3. 164 piṭṭhe.

2. Saṃ 3. 170 piṭṭhe.

hi cittuppāde kammaṃ uppannaṃ, taṃsantāne eva tassa phalassa uppatti **kammassakatā**. Evaṃ hi kataviññāṇanāso akatāgamo ca natthīti sā puggalādhiṭṭhānāya eva desanāya dīpetabbā. Tehi sattehi kātabbapuññakiriya **paccattapurisakāro**. Sopi santānavasena niṭṭhapetabbato puggalādhiṭṭhānāya eva kathāya dīpetabbo. **Ānantariyadīpanatthanti** cuti-anantaraṃ phalaṃ anantaraṃ nāma, tasmim̐ anantare niyuttāni taṃnibbattanena anantarakaraṇasīlāni, anantarakaraṇapayojanāni vāti **ānantariyāni**, mātughātādīni, tesāṃ dīpanatthaṃ. Tānipi hi santānavasena niṭṭhapetabbato “mātaraṃ jīvītā voropeti”ti-ādinā¹ puggalādhiṭṭhānāya eva kathāya dīpetabbāni, tathā “so mettāsahagatena cetasā ekaṃ disaṃ pharitvā viharatī”ti-ādinā², “so anekavihitaṃ pubbenivāsaṃ anussarati ekampi jātin”ti-ādinā³, “atthi dakkhiṇā dāyakato visujjhati, no paṭiggāhakato”ti-ādinā⁴ ca pavattā **brahmavihārapubbenivāsadakkhiṇāvisuddhikathā** puggalādhiṭṭhānā eva katvā dīpetabbā sattasantānavisayattā. “Atṭha purisapuggalā⁵ na samayavimutto puggalo”ti-ādinā⁶ ca paramatthakathaṃ kathentopi lokasammutiyā appahānatthaṃ puggalakathaṃ katheti. Etena vuttāvasesāya kathāya puggalādhiṭṭhānabhāve payojanaṃ sāmāññavasena saṅgahitanti daṭṭhabbaṃ. Kāmaṃ cetāṃ sabbaṃ apariññātavattukānaṃ vasena vuttaṃ, pariññātavattukānampi pana evaṃ desanā sukhāvahā hoti.

Ekapuggaloti visiṭṭhasamācārāpassayavirahito ekapuggalo. Buddhānaṃ hi sīlādiguṇena sadevake loke visiṭṭho nāma koci natthi, tathā sadisopi samānakāle. Tenāha “na imasmim̐ loke parasmim̐ vā pana buddhena seṭṭho sadiso ca vijjati”ti⁷, tasmā sadisopi koci natthi. Hīnopi apassayabhūto nattheva. Tena vuttaṃ “visiṭṭhasamācārāpassayavirahito ekapuggalo”ti.

1. Abhi 8. 148 piṭṭhe paṭṭhāne.

2. Dī 1. 234; Dī 3. 187; Ma 1. 46; Ma 2. 263; Ma 3. 185; Abhi 2. 284 piṭṭhesu.

3. Dī 1. 76, 77; Ma 1. 101, 315, 346; Vi 1. 5 piṭṭhesu.

4. Ma 3. 299 piṭṭhe.

5. Saṃ 1. 222 piṭṭhe.

6. Abhi 3. 114 piṭṭhe.

7. Khu 2. 95; Abhi 4. 403 piṭṭhe.

Ye ca silādiḡuṇehi natthi etesaṃ samāti asaṃā, purimakā sammāsambuddhā. Tehi samo majjhe bhinnasuvaṇṇanekkhāṃ viya nibbisiṭṭhoti asamasamaṭṭhenapi ekapuggalo aññassa tādisassa abhāvā. Tena vuttaṃ “**asadisatṭhenā**”ti-ādi.

Sattaloko adhippeto sattanikāye uppajjanato. **Manussaloke eva uppajjati** devabrahmalokānaṃ buddhānaṃ uppattiyā anokāsabhāvato. Kāmadevaloke tāva nupajjati brahmacariyavāsassa aṭṭhānabhāvato tathā anacchariyabhāvato. Acchariyadhammā hi buddhā bhagavanto. Tesāṃ sā acchariyadhammatā devattabhāve ṭhitānaṃ loke na pākāṭa hoti yathā manussabhūtānaṃ. Devabhūte hi sammāsambuddhe disamānaṃ buddhānubhāvaṃ devānubhāvato va loke dahati, na buddhānubhāvato. Tathā sati “ayaṃ sammāsambuddho”ti nādhimuccati na sampasīdati, issarakuttaḡgāhaṃ na vissajjeti, devattabhāvassa ca cirakālāvaṭṭhānato ekaccasassatavādato na parimuccanti. **Brahmaloke nuppajjati**ti etthāpi ese va nayo. Sattānaṃ tādisaḡgāhavinimocanattamaṃ hi buddhā bhagavanto manussasugatiyaṃ eva uppajjanti, na devasugatiyaṃ. Yasmā imaṃ cakkavāḷaṃ majjhe katvā iminā saddhiṃ cakkavāḷānaṃ dasasahassasse va jātikkhettabhāvo dīpito ito aññassa buddhānaṃ uppattiṭṭhānassa tepiṭake buddhavacane āgataṭṭhānassa abhāvato. Tasmā vuttaṃ “**imasmimye va cakkavāḷe uppajjati**”ti.

Idha uppajjantopi kasmā jambudīpe eva uppajjati, na sesadīpesūti? Keci tāva āhu “yasmā pathaviyā nābhibhūtā buddhabhāvasahā acalaṭṭhānabhūtā bodhimaṇḡdabhūmi jambudīpe eva, tasmā jambudīpe eva uppajjati”ti. Etene va “tattha majjhimadese eva uppajjati”ti etampi saṃvaṇṇitanti daṭṭhabbaṃ tathā itaresampi avijahitaṭṭhānānaṃ tatthe va labbhanato. Yasmā purimabuddhānaṃ mahābodhisattānaṃ paccekabuddhānaṃ nibbattiyā sāvakabodhisattānaṃ sāvakabodhiyā abhinīhāro sāvakapāramiyā sambharaṇaparipācanaṃ buddhakkhettabhūte imasmimye va cakkavāḷe jambudīpe eva ijjhati, na aññattha. Veneyya janavinayanattho ca buddhuppādo, tasmā aggasāvakamahāsāvakādiveneyyavisesāpekkhāya imasmim jambudīpe eva buddhā nibbattanti, na sesadīpesu. Ayaṃ nayo sabbabuddhānaṃ āciṇṇasamāciṇṇoti tesāṃ

uttamapurisānaṃ tattheva uppatti sampatticakkānaṃ viya
aññaṃaññūpanissayatāya daṭṭhabbā. Tena vuttaṃ **aṭṭhakathāyaṃ**¹ “tīsu
dīpesu buddhā na nibbattanti, jambudīpe eva nibbattantīti dīpaṃ passī”ti.

Ubhayampidaṃ vippakatavacanameva uppādakiriyāya
vattamānakālikattā. **Uppajjamānoti** vā uppajjitum samattho. Satti-attho
cāyaṃ **māna**-saddo. Yāvata hi sāmattihiyena mahābodhisattānaṃ
carimabhava uppatti icchitabbā, tattakena bodhisambhārasambhūtena
paripuṇṇena samannāgatoti attho. **Bhedoti** viseso. Tameva hi tividhaṃ
visesaṃ dassetuṃ “**esa hi**”ti-ādi vuttaṃ. Aṭṭhaṅgasamannāgatassa
mahābhinihārassa siddhakālato paṭṭhāya mahābodhisatto buddhabhāvāya
niyatabhāvappattatāya bodhisambhārapaṭipadaṃ paṭipajjamāno
yathāvuttasāmattihiyayogena uppajjamāno nāmāti attho uppādassa
ekantikattā. **Pariyesantoti** vicinanto. **Paripakkagate** **ñāṇeti** iminā tato pubbe
ñāṇassa aparipakkatāya eva laddhāvasarāya kammapiḷḷiyā vasena
bodhisatto tathā mahāpadhānaṃ padahīti dasseti. **Arahattaphalakkhaṇe**
uppanno nāma “uppanno hoti”ti vattabbattā. **Āgatova nāma** hetusampadāya
sammadeva nipphannattā.

Hitatthāyāti lokiyalokuttarassa hitassa siddhiyā. **Sukhatthāyāti** etthāpi
eseva nayo. **Tassāti** tassa sattalokassa. So panāyaṃ sattaloko yena
anukkamena dhammābhisamayāṃ pāpuṇi, taṃ teneva anukkamena dassento
“**mahābodhimaṇḍe**”ti-ādimāha. **Yāvajjadivasāti** ettha **ajja**-saddena sāsana
avaṭṭhānakālaṃ vadati. **Devamanussānanti** ukaṭṭhaniddesoti dassetuṃ “**na**
kevalan”ti-ādi vuttaṃ. **Etesampīti** nāgasupaṇṇādīnampi.

Ayaṃ pucchāti iminā “katamo”ti padassa sāmāññato pucchābhāvo
dassito, na visesatoti tassa pucchāvisesabhāvañāpanatthaṃ **mahāniddese**²
āgatā sabbāpi pucchā atthuddhāranayena dasseti “**pucchā ca nāmesā**”ti-
ādinā. Adiṭṭhaṃ jotiyati etāyāti **adiṭṭhajotanā**. Diṭṭhaṃ saṃsandīyati etāyāti
diṭṭhasaṃsandanaṃ. Saṃsandanaṃ

1. Dī-Ṭṭha 2. 22; Buddhavaṃsa-Ṭṭha 318 piṭṭhesu.

2. Khu 7. 263 piṭṭhe.

sākacchāvasena vinicchayakaraṇaṃ. Vimatiṃ chindati etāyāti **vimaticchedanā**. Anumatiyā pucchā **anumatipucchā**. “Taṃ kiṃ maññatha bhikkhave”ti-ādi pucchāya “kā tumhākaṃ anumati”ti anumati pucchitā hoti. **Kathetukamyatāpucchā**ti kathetukamyatāya pucchā. **Lakkhaṇanti** nātuṃ icchito yo koci sabhāvo. **Aññātanti** yena kenaci ñāṇena aññātabhāvamāha. **Adiṭṭhanti** dassanabhūtena ñāṇena paccakkhaṃ viya adiṭṭhataṃ. **Atulitanti** “ettakaṃ etan”ti tulābhūtena atulitataṃ. **Atīritanti** tīraṇabhūtena akatañāṇakiriyāsamāpanataṃ. **Avibhūṭanti** ñāṇassa apākaṭabhāvaṃ. **Avibhāvitanti** ñāṇena apākaṭakatabhāvaṃ.

Yehi guṇavisesehi nimittabhūtehi bhagavati “tathāgato”ti ayaṃ samañña pavattā, taṃdassanatthaṃ “**aṭṭhahi kāraṇehi bhagavā tathāgato**”ti-ādi vuttaṃ. Guṇavisesanemittikāneva hi bhagavato sabbāni nāmāni. Yathāha—

“Asaṅkhyeyyāni nāmāni, saṅuṇena mahesino.

Guṇena nāmamuddheyyaṃ, api nāmasahassato”ti¹.

Tathā āgatoti ettha ākāraṇiyamanavasena opammasampañipādanattho **tathā**-saddo. Sāmaññaajotanāpi hi visese avatiṭṭhatīti. Paṭipadāgamanattho **āgata**-saddo, na ñāṇagamanattho “tathalakkaṇaṃ āgato”ti-ādīsu² viya, nāpi kāyagamanattho “āgato kho mahāsamaṇo, magadhānaṃ giribbajan”ti-ādīsu³ viya. Tattha yadākāraṇiyamanavasena opammasampañipādanattho **tathā**-saddo, taṃkaruṇāpadhānattā mahākaruṇāmukhena purimabuddhānaṃ āgamanappaṭipadaṃ udāharaṇavasena sāmaññato dassento yaṃ-taṃ-saddānaṃ ekantasambandhabhāvato “**yathā sabbaloka -pa- āgatā**”ti sādharmaṇato vatvā puna taṃ paṭipadaṃ **mahāpadhānasuttā**dīsu⁴ sambahulaniddesena supākaṭānaṃ āsannānañca vipassi-ādīnaṃ channaṃ sammāsambuddhānaṃ vasena nidassento “**yathā vipassī bhagavā**”ti-ādīmāha. Tattha **yena abhinīhārenāti** manussattaliṅgasampattihetusatthudassanapabbajjā-abhiññādiguṇasampatti-adhikāracchandānaṃ vasena

1. Abhi-Ṭṭha 1. 420; Udāna-Ṭṭha 306; Paṭisambhūti-Ṭṭha 1. 277; Netti-Ṭṭha 119 piṭṭhesu.

2. Dī-Ṭṭha 1. 59; Ma-Ṭṭha 1. 47; Sam-Ṭṭha 2. 265; Am-Ṭṭha 1. 80; Udāna-Ṭṭha 112 piṭṭhesu.

3. Vi 3. 55 piṭṭhe.

4. Dī 2. 2 piṭṭhe.

aṭṭhaṅgasamannāgatena mahāpaṇidhānena. Sabbesaṃ hi buddhānaṃ kāyappaṇidhānaṃ imināva abhinīhārena samijjhatīti. Evaṃ mahābhinihāravisesena “tathāgato”ti padassa atthaṃ dassetvā idāni pāramipūraṇavasena dassetuṃ “**yathā vipassī bhagavā -pa- kassapo bhagavā dānapāramiṃ pūretvā**”ti-ādimāha.

Ettha ca suttantikānaṃ mahābodhippaṭipadāya kosallajananatthaṃ kā panetā pāramiyo, kenatṭhena pāramiyo, katividhā cetā, ko tāsāṃ kamo, kāni lakkhaṇarasapaccupaṭṭhānapadaṭṭhānāni, ko paccayo, ko saṃkilesa, kiṃ vodānaṃ, ko paṭipakkho, kā paṭipatti, ko vibhāgo, ko saṅgaho, ko sampādanūpāyo, kittakena kālena sampādanaṃ, ko ānisaṃso, kiñcetāsāṃ phalanti pāramīsu ayaṃ vitthārakathā veditabbā. Sā panesā icchantena **dīghāgamaṭīkāyaṃ**¹ vuttanayeneva veditabbā, na idha dassitā. Yathāvuttāya paṭipadāya yathāvuttavibhāgānaṃ pāramīnaṃ pūritabhāvaṃ sandhāyāha “**samatiṃsa pāramiyo pūretvā**”ti.

Satipi mahāpariccāgānaṃ dānapāramibhāve pariccāgavisesabhāvadassanatthañceva sudukkarabhāvadassanatthañca mahāpariccāgehi visuṃ gahaṇaṃ. Tatoyeva ca aṅgapariccāgato visuṃ nayanapariccāgaggahaṇaṃ, pariccāgabhāvasāmaññepi dhanarajjapariccāgato puttadārapariccāgaggahaṇaṃ katarā. Gatapaccāgatikavattasaṅkhātāya pubbabhāgappaṭipadāya saddhiṃ abhiññāsamāpattinipphādanaṃ **pubbayogo**. Dānādīsuyeva sātisaṃyappaṭipattinipphādanaṃ **pubbacariyā**. Yā vā cariyāpiṭakasāṅgahitā. “Abhinīhāro pubbayogo, dānādippaṭipatti vā kāyavivekavasena ekacariyā vā pubbacariyā”ti keci. Dānādīnañceva appicchatādīnañca saṃsāranibbānesu ādīnavānisaṃsānañca vibhāvanavasena sattānaṃ bodhittaye patiṭṭhāpanaparipācanavasena ca pavattā kathā **dhammakkhānaṃ**. Ñātīnaṃ atthacariyā **ñātattthacariyā**. Sāpi karuṇāyanavaseneva. **Ādi**-saddena lokatthacariyādayo saṅgaṇhāti. Kammassakatañāṇavasena anavajjakammāyatanasippāyatanavijjāṭṭhānaparicayavasena khandhāyatanādi paricayavasena lakkhaṇattayatīraṇavasena ca ñāṇacāro **buddhicariyā**. Sā pana atthato paññāpāramīyeva, ñāṇasambhāradassanatthaṃ

1. Dī-Ṭī 1. 67 piṭṭhe.

visuṃ gahaṇaṃ. **Koṭṭi** pariyanto, ukkaṃsoti attho. Cattāro satipaṭṭhāne bhāvetvāti sambandho. Tattha **bhāvetvāti** uppādetvā. **Brūhetvāti** vadḍhetvā. Satipaṭṭhānādiggahaṇena āgamanappaṭipadaṃ matthakaṃ pāpetvā dasseti. Vipassanāsahagatā eva vā satipaṭṭhānādayo daṭṭhabbā. Ettha ca “yena abhinīhārenā”ti-ādinā āgamanappaṭipadāya ādiṃ dasseti, “dānapāramin”ti-ādinā majjhaṃ, “cattāro satipaṭṭhāne”ti-ādinā pariyosānanti vedītabbhaṃ.

Sampatijātoti muhuttajāto nikkhantamatto. Nikkhantamattaṃ hi mahāsattaṃ paṭhamaṃ brahmāno suvaṇṇajālena paṭiggaṇhiṃsu, tesaṃ hatthato cattāro mahārājāno ajinappaveṇiyā, tesaṃ hatthato manussā dukūlacumbaṭakena paṭiggaṇhiṃsu, manussānaṃ hatthato muccitvā pathaviyaṃ patiṭṭhito. **Yathāhāti**-ādinā mahāpadānadesanāya¹ vuttavacanaṃ nidasseti. **Setamhi chatteti** dibbasetacchatte. **Anudhāriyamāneti** dhāriyamāne. Ettha ca chattaḡgahaṇeneva khaggādīni pañca kakudhabhaṇḡāni vuttānevāti daṭṭhabbhaṃ.

Khaggatālavaṇṭamoraḡhatthakavālabijani-uṇḡisapaṭṭāpi hi chattenā saha tadā upaṭṭhitā ahesuṃ. Chattādīniyeva ca tadā pañṇāyīṃsu, na chattādiggāhakaṃ.

Sabbā ca disāti dasa disā, nayidaṃ sabbadisāviloḡanaṃ sattaḡpadavītiḡaruttarakālaṃ. Mahāsatto hi manussānaṃ hatthato muccitvā puratthimaṃ disaṃ olokesi, tattha devamanussā gandhamālādīhi pūjayamānā “mahāpurisa² idha tumhehi sadisopi natthi, kuto uttaritaro”ti āhaṃsu. Evaṃ catasso disā catasso anudisā heṭṭhā uparīti sabbā disā anuviloḡetvā sabbattha attanā sadisaṃ adisvā “ayaṃ uttarā disā”ti sattaḡpadavītiḡārena agamāsi. **Āsabhinti** uttamaṃ. **Aggoti** sabbapaṭṭhamaṃ.

Jeṭṭhoti seṭṭhoti ca tasseva vevacanaṃ. **Ayamantimā jāti, natthi dāni punabbhavoti** imasmiṃ attabhāve paṭṭabbaṃ arahattaṃ byākāsi. “**Anekesaṃ visesādhigamānaṃ pubbanimittabhāvenā**”ti saṃkhittena vuttamatthaṃ “**yañhi**”ti-ādinā vitthārato dasseti. Tattha **etthāti**—

1. Dī 2. 13; Ma 3. 164 piṭṭhesu.

2. Mahāpuñña (Ka)

“Anekaśākhāṇca sahaṣṣamaṇḍalaṃ,
Chattaṃ marū dhārayumantalikkhe.
Suvaṇṇadaṇḍā vītipatanti cāmarā,
Na dissare cāmarachattagāhakā ti¹—

imissā gāthāya. Sabbaññutaññāṇameva sabbattha appaṭihatacārātāya anāvaraṇaṇānti āha “**sabbaññutānāvaraṇaṇāpaṭilābhassā**”ti. **Tathā ayaṃ bhagavāpi gato -pa- pubbanimittabhāvenā**ti etena abhijātiyaṃ dhammatāvasena uppajjanakavisesā sabbabodhisattānaṃ sādharmaṇāti dasseti. Pāramitānissandā² hi teti.

Vikkamīti agamāsi. **Marū**ti devā. **Samā**ti vilokanasamatāya samā sadisiyo. Mahāpuriso hi yathā ekaṃ disaṃ vilokesi, evaṃ sesadisāpi, na katthaci vilokane vibandho tassa ahoṣīti. **Samā**ti vā viloketuṃ yuttāti³ attho. Na hi tadā bodhisattassa virūpabībhacchavisamarūpāni viloketuṃ ayuttāni disāsu upaṭṭhahantīti.

“Evaṃ tathā gato”ti kāyagamaṇaṭṭhena gatasaddena tathāgatasaddaṃ niddisitvā idāni ñāṇagamaṇaṭṭhena taṃ dassetuṃ “**atha vā**”ti-ādimāha. Tattha **nekkhammē**ti alobhappadhānena kusalacittuppādena. Kusalā hi dhammā idha nekkhammaṃ, na pabbajjādayo. “Paṭhamajjhānenā”ti ca vadanti. **Pahāyā**ti pajahitvā. **Gato** adhigato, paṭipanno uttarivisesanti attho. **Pahāyā**ti vā pahānāhetu, pahānalakkhaṇaṃ vā. Hetulakkhaṇattho hi ayaṃ pahāyasaddo. Kāmacchandādippahānāhetukaṃ hi “gato”ti ettha vuttaṃ gamaṇaṃ avabodho, paṭipatti eva vā kāmacchandādippahānena ca lakkhīyati. Esa nayo **padāletvā**ti-ādisupi. **Abyāpādenā**ti mettāya. **Ālokasaññāyā**ti vibhūtaṃ katvā manasikaraṇena upaṭṭhita-ālokasaññājanena. **Avikkhepenā**ti samādhinā. **Dhammavavatthānenā**ti kusalādidhammānaṃ yāthāvanicchayena. “Sappaccayanāmarūpavavatthānenā”tipi vadanti. Evaṃ kāmacchandādīnīvaraṇappahānena “abhijjhaṃ loke pahāyā”ti-ādinā⁴ vuttāya paṭhamajjhānassa pubbabhāgappaṭipadāya bhagavato tathāgatabhāvaṃ dassetvā idāni saha upāyena

1. Khu 1. 386 piṭṭhe Suttanipāte.

3. Samāti vā sadisiyo yuttāti (Ka)

2. Pāramitābhisandā (Sī)

4. Abhi 2. 253 piṭṭhe.

aṭṭhahi samāpattihi aṭṭhārasahi ca mahāvipassanāhi taṃ dassetuṃ “**ñāṇena**”ti-ādimāha. Nāmarūpapariggahakaṅkhāvitarāṇaṃ hi vibandhabhūtaṃ mohassa dūrikaraṇena nātapaṇiññāyaṃ igitassa aniccaaññādayo sikkhanti, tathā jhānasamāpattisu abhiratinimittena pāmojjena tattha anabhiratiyā vinoditāya jhānādīnaṃ samadhiḡgamoti samāpattivipassanānaṃ arativinodana-avijjāpadālanādi-upāyo, uppaṭipāṭiniddeso pana nīvaraṇasabhāvāya avijjāya heṭṭhā nīvaraṇesupi saṅghadassanattanti daṭṭhabbo. Samāpattivihārappavesavibandhanena nīvaraṇāni kavāṭasadisānīti āha “**nīvaraṇakavāṭaṃ ugghāṭetvā**”ti.

“Rattim vitakketvā vicāretvā divā kammante payojeti”ti¹ vuttaṭṭhāne vitakkavicārā dhūmayanā adhippetāti āha “**vitakkavicāradhūmaṃ**”ti. Kiñcāpi paṭhamajjhānūpacāreyeva dukkhaṃ, catutthajjhānūpacāreyeva ca sukhaṃ pahīyati, atilayappahānaṃ pana sandhāyāha “**catutthajjhānena sukhadukkhaṃ pahāyā**”ti. **Rūpasaññāti** saññāsīsena rūpāvacarajjhānāni ceva tadārammaṇāni ca vuttāni. Rūpāvacarajjhānampi hi “rūpaṃ”ti vuccati uttarapadalopena “rūpī rūpāni passati”ti-ādīsu². Tassa ārammaṇampi kasiṇarūpaṃ “rūpaṃ”ti vuccati purimapadalopena “bahiddhā rūpāni passati suvaṇṇadubbaṇṇāni”ti-ādīsu³. Tasmā idha rūpe rūpajjhāne taṃsahagataaññā rūpasaññāti evaṃ saññāsīsena rūpāvacarajjhānāni vuttāni. Rūpaṃ saññā assāti rūpasaññāṃ, rūpassa nāmaṃti vuttaṃ hoti. Evaṃ pathavīkasiṇādibhedassa tadārammaṇassa cetāraṃ adhivacananti veditabbaṃ. **Paṭighasaññāti** cakkhādīnaṃ vatthūnaṃ rūpādīnaṃ ārammaṇānaṃca paṭighātena paṭihanānaṃ visayivisayasamodhāne samuppannā dvipaṇcaviññāṇasahagatā saññā paṭighasaññā. **Nānattasaññāyoti** nānatte gocarā pavattā saññā, nānattā vā saññā nānattasaññā, aṭṭha kāmāvacarakusalasaññā, dvādasa akusalasaññā, ekādasa kāmāvacarakusalavipākasaññā, dve akusalavipākasaññā, ekādasa kāmāvacarakiriyasaññāti etāraṃ catucattālīsasaññānametaṃ adhivacanāṃ. Etā hi yasmā rūpasaññādibhede

1. Ma 1. 197 piṭṭhe.

2. Ma 2. 205; Ma 3. 264; Abhi 1. 65; Khu 9. 231 piṭṭhesu.

3. Dī 2. 94; Ma 2. 205, 206; Abhi 1. 64 piṭṭhesu.

nānatte nānāsabhāve gocare pavattanti, yasmā ca nānattā nānāsabhāvā aññamaññaṃ asadisā, tasmā “**nānattasañña**”ti vuccanti.

Aniccassa, aniccanti vā anupassanā **aniccānupassanā**, tebhūmakadhammānaṃ aniccataṃ gahetvā pavattāya anupassanāyetāṃ nāmaṃ. **Niccasaññanti** saṅkhatadhamme “niccā sassatā”ti pavattaṃ micchāsaññaṃ. Saññāsīsena diṭṭhicittānampi gahaṇaṃ daṭṭhabbaṃ. Esa nayo ito paresupi. **Nibbidānupassanāyāti** saṅkhāresu nibbijjanākārena pavattāya anupassanāya. **Nandinti** sappītikataṇhaṃ. **Virāgānupassanāyāti** saṅkhāresu virajjanākārena pavattāya anupassanāya. **Nirodhānupassanāyāti** saṅkhārānaṃ nirodhassa anupassanāya. “Te saṅkhārā nirujjhantiyeva, āyatiṃ samudayavasena na uppajjanti”ti evaṃ vā anupassanā nirodhānupassanā. Tenāvāha “nirodhānupassanāya nirodheti, no samudeti”ti. Muccitukamyatā hi ayaṃ balappattāti. Paṭinissajjanākārena pavattā anupassanā **paṭinissaggānupassanā**. Paṭisaṅkhā santiṭṭhaṇā hi ayaṃ. **Ādānanti** niccādivasena gahaṇaṃ. Santatisamūhakiccārammaṇānaṃ vasena ekattaggahaṇaṃ **ghanasañña**. **Āyūhanaṃ** abhisāṅkharaṇaṃ. Avatthāvisesāpatti **vipariṇāmo**. **Dhuvasaññanti** thirabhāvaggahaṇaṃ. **Nimittanti** samūhādighanavasena sakiccaparicchedatāya ca saṅkhārānaṃ saviggahaggahaṇaṃ. **Paṇidhinti** rāgādipaṇidhiṃ. Sā panatthato taṇhāvasena saṅkhāresu nanditā. **Abhinivesanti** attānudiṭṭhiṃ.

Aniccadukkhādivasena sabbadhammatīraṇaṃ **adhipaññādhammavipassanā**. **Sārādānābhinivesanti** asāre sāraggahaṇavipallāsaṃ. Issarakuttādivasena loko samuppannoti abhiniveso **sammohābhiniveso**. Keci pana “ahosiṃ nu kho ahamatītamaddhānanti-ādinā pavattasaṃsayāpatti sammohābhiniveso”ti vadanti. Saṅkhāresu leṇatāṇabhāvaggahaṇaṃ **ālayābhiniveso**. “Ālayaratā ālayasammuditā”ti¹ vacanato ālayo taṇhā, sāyeva cakkhādīsu rūpādīsu ca abhinivesavasena pavattiyā ālayābhinivesoti keci. “Evaṃvidhā saṅkhārā paṭinissajjīyanti”ti pavattaṃ nāṇaṃ **paṭisaṅkhānupassanā**. Vattato vigatattā vivattaṃ, nibbānaṃ. Tattha ārammaṇakaraṇasaṅkhātena anupassanena pavattiyā **vivaṭṭānupassanā**, gotrabhu. **Samyogābhinivesanti** samyujjanavasena

1. Dī 2. 31; Ma 1. 224; Ma 2. 291; Saṃ 1. 138; Vi 3. 5 piṭṭhesu.

saṅkhāresu abhinivisanam. **Diṭṭhekaṭṭheti** diṭṭhiyā saha jātekaṭṭhe pahānekaṭṭhe ca. **Oḷāriketi** uparimaggavajjhe kilese apekkhitvā vuttam, aññathā dassanapahātabbāpi dutiyamaggavajjhehi oḷārikāti. **Aṇusahagateti** aṇubhūte. Idam heṭṭhimamaggavajjhe apekkhitvā vuttam. **Sabbakileseti** avasiṭṭhasabbakilese. Na hi paṭhamādimaggehipi pahinā kilesā puna pahīyantīti.

Kakkhaḷattam kathinabhāvo. **Paggharaṇam** dravabhāvo. Lokiyavāyunā bhastāya viya yena taṁtaṁkalāpassa uddhumāyanam, thaddhabhāvo vā, taṁ **vitthambhanam**. Vijjamānēpi kalāpantarabhūtānam kalāpantarabhūtehi phuṭṭhabhāve¹ taṁtaṁbhūtavivittatā rūpapariyanto ākāsoṭi yesam yo paricchedo, tehi so asamphuṭṭhova, aññathā bhūtānam paricchedabhāvo na siyā byāpitabhāvāpattito. Yasmiṁ kalāpe bhūtānam paricchedo, tehi asamphuṭṭhabhāvo **asamphuṭṭhalakkhaṇam**. Tenāha bhagavā **ākāsadhātuniddese**² “asamphuṭṭho catūhi mahābhūtehi”ti.

Virodhipaccayasannipāte visadisuppatti **ruppanam**. Cetanāpadhānattā saṅkhārakkhandhadhammānam cetanāvasenetam vuttam “**saṅkhārānam abhisāṅkharanālakkhaṇam**”ti. Tathā hi suttantabhājanīye **saṅkhārakkhandhavibhaṅge**³ “cakkhusamphassajā cetanā”ti-ādinā cetanāva vibhattā. Abhisāṅkharalakkhaṇā ca cetanā. Yathāha “tattha katamo puññābhisāṅkhāro, kusalā cetanā kāmāvacarā”ti-ādi⁴. **Pharaṇam** savipphārikatā. **Assaddhiyeti** assaddhiyahetu. Nimittatthe bhummam. Esa nayo **kosajjeti**-ādīsu. **Vūpasamalakkhaṇanti** kāyacittapariḷāhūpasamalakkhaṇam. Līnuddhaccarahite adhicitte pavattamāne paggahaniggahasampahaṁsanesu abyāvaṭatāya ajjuhekkhanam **paṭisaṅkhānam** pakkhapātupacchedato.

Musāvādādinam visamvādanādikiccatāya lūkhānam apariggāhakānam paṭipakkhabhāvato pariggāhakasabhāvā **sammāvācā**, siniddhabhāvato sampayuttadhamme sammāvācāpaccayasubhāsitanam⁵ sotāraṇca puggalam pariggaṇhātīti sā **pariggahalakkhaṇā**. Kāyikakiriyā kiñci kattabham samuṭṭhāpeti, sayaṇca samuṭṭhahanam⁶ ghaṭanam hotīti sammākammantasāṅkhātā

1. Phuṭṭhābhāve (Ka) 2. Abhi 1. 169 piṭṭhe.

3. Abhi 2. 37 piṭṭhe.

4. Abhi 2. 102 piṭṭhe.

5. Sammāvācāpaccayam subhāsitaṁ (Sī)

6. Samuṭṭhānam (Sī)

viratīpi **samuṭṭhānalakkhaṇā** daṭṭhabbā, sampayuttadhammānaṃ vā ukkhipanaṃ samuṭṭhāpanaṃ kāyikakiriyāya bhārukkhipanaṃ viya. Jīvamānassa sattassa, sampayuttadhammānaṃ vā jīvitindriyapavattiyā, ājīvasseva vā suddhi **vodānaṃ**. “Saṅkhārā”ti idha cetanā adhippetāti vuttaṃ “**saṅkhārānaṃ cetanālakkhaṇaṃ**”ti. **Namaṇaṃ** ārammaṇābhimukhabhāvo. **Āyatanānaṃ** pavattanaṃ. Āyatanavasena hi āyasaṅkhātānaṃ¹ cittacetāsikānaṃ pavatti. **Taṇhāya hetulakkhaṇanti** vaṭṭassa janakahetubhāvo, maggassa pana nibbānasampāpakattanti ayametesāṃ viseso.

Tathalakkhaṇaṃ aviparītasabhāvo. **Ekaraso** aññamaññanātivattanaṃ anūnādhikabhāvo. **Yuganaddhā** samathavipassanāva. “Saddhāpaññā paggaḥāvikkhepā”tipi vadanti. **Khayoti** kilesakkhaya maggo. Anuppādapariyosānatāya **anuppādo** phalaṃ. **Passaddhi** kilesavūpasamo. **Chandassāti** kattukāmatāchandassa. **Mūlalakkhaṇaṃ** paṭiṭṭhābhāvo. **Samuṭṭhānalakkhaṇaṃ** ārammaṇappaṭipādakatāya sampayuttadhammānaṃ uppatihetutā. **Samodhānaṃ** visayādisannipātena gahetabbākāro, yā saṅgatīti vuccati. Samaṃ, saha odahanti anena sampayuttadhammāti vā **samodhānaṃ**, phasso. Samosaranti sannipatanti etthāti **samosaraṇaṃ**. Vedanāya vinā appavattamānā sampayuttadhammā vedanānubhavananimittaṃ samosaṭṭa viya hontīti evaṃ vuttaṃ. Gopānasīnaṃ kūṭaṃ viya sampayuttānaṃ pāmokkhabhāvo **pamukhalakkhaṇaṃ**. Tato, tesāṃ vā sampayuttadhammānaṃ uttari padhānanti **tatuttari**. Paññuttarā hi kusalā dhammā. **Vimuttiyāti** phalassa. Taṃ hi sīlādiḡuṇasārassa paramukkamsabhāvena **sāraṃ**. Ayaṇca lakkhaṇavibhāgo chadhātupañcajhānaṅgādivasena taṃtaṃsuttapadānusārena poraṇaṭṭhakathāyaṃ āgatanayena ca katoti daṭṭhabbaṃ. Tathā hi pubbe vuttopi koci dhammo pariyāyantarappakāsanatthaṃ puna dassito, tato eva ca “chandamūlakā kusalā dhammā manasikārasamuṭṭhānā phassasamodhānā vedanāsamosaraṇā”ti, “paññuttarā kusalā dhammā”ti, “vimuttisāramidaṃ brahmacariyaṃ”ti, “nibbānogadhaṃ hi āvuso brahmacariyaṃ nibbānapariyosānaṃ”ti² ca suttapadānaṃ vasena “chandassa mūlalakkhaṇaṃ”ti-ādi vuttaṃ.

1. Āyatanasaṅkhātānaṃ (Sī)

2. Saṃ 3. 192 piṭṭhe (Atthato samānaṃ)

Tathadhammā nāma cattāri ariyasaccāni aviparītasabhāvattā. **Tathāni** taṃsabhāvattā, **avitathāni** amuśāsabhāvattā, **anaññathāni** aññākārahitattā. **Jātipaccayasambhūtasamudāgataṭṭho** jātipaccayā sambhūtaṃ hutvā sahitassa attano paccayānurūpassa uddhaṃ uddhaṃ āgatabhāvo, anupavattatthoti attho. Atha vā sambhūtaṭṭho ca samudāgataṭṭho ca sambhūtasamudāgataṭṭho, na jātito jarāmaṇaṃ na hoti, na ca jātiṃ vinā aññato hotīti **jātipaccayasambhūtaṭṭho**, itthañca jātito samudāgacchatīti **jātipaccayasamudāgataṭṭho**. Yā yā jāti yathā yathā paccayo hoti, tadanurūpaṃ pātubhāvoti attho. **Avijjāya saṅkhārānaṃ paccayaṭṭho** etthāpi na avijjā saṅkhārānaṃ paccayo na hoti, na ca avijjaṃ vinā saṅkhārā uppajjanti. Yā yā avijjā yesaṃ yesaṃ saṅkhārānaṃ yathā yathā paccayo hoti, ayaṃ avijjāya saṅkhārānaṃ paccayaṭṭho, paccayabhāvoti attho.

Bhagavā taṃ jānāti passatīti sambandho. **Tenāti** bhagavatā. Taṃ vibhajjamānanti yojetabbaṃ. **Tanti** rūpāyatanaṃ. **Itthāniṭṭhādīti** ādi-saddena majjhattaṃ saṅgaṇhāti, tathā atītānāgatapaccuppannaparitta-ajjhatabhahiddhātadubhayādibhedā. **Labbhamānakapadavasenāti** “rūpāyatanaṃ diṭṭhaṃ, saddāyatanaṃ suttaṃ, gandhāyatanaṃ rasāyatanaṃ phoṭṭhabbāyatanaṃ mutaṃ, sabbaṃ rūpaṃ manasā viññātan”¹ti vacanato diṭṭhapadañca viññātapadañca rūpārammaṇe labbhati. **Anekehi nāmehi**ti “rūpārammaṇaṃ iṭṭhaṃ aniṭṭhaṃ majjhattaṃ parittaṃ atītaṃ anāgataṃ paccuppannaṃ ajjhattaṃ bahiddhā diṭṭhaṃ viññātaṃ rūpaṃ rūpāyatanaṃ rūpadhātu vaṇṇanibhā sanidassanaṃ sappatighaṃ nīlaṃ pītakaṃ”²ti evamādīhi anekehi nāmehi. **Terasahi vārehīti** rūpakaṇḍe āgate terasa niddesavāre sandhāyāha. **Dvepaññāsāya nayehīti** ekekasmim vāre catunnaṃ catunnaṃ vavatthāpananayānaṃ vasena dvipaññāsāya nayehi. **Tathamevāti** aviparītadassitāya appaṭivattiyadesanatāya ca tathameva hoti. **Jānāmi abbaññāsīti** vattamānātītakālesu ñāṇappavattidassanena anāgatepi ñāṇappavatti vuttāyevāti datṭhabbā. **Vidīta-saddo** anāmaṭṭhakālaviseso veditabbo “diṭṭhaṃ suttaṃ mutaṃ”²ti-ādīsu² viya. **Na upaṭṭhāsīti** attattaniyavasena na

1. Abhi 1. 201 piṭṭhe.

2. Dī 3. 111; Ma 1. 5; Saṃ 2. 168; Am 1. 332 piṭṭhesu.

upagañchi. Yathā rūpārammaṇādayo dhammā yaṁsabhāvā yaṁpakārā ca, tathā ne passati jānāti gacchatīti **tathāgatoti** evaṁ padasambhavo veditabbo. Keci pana “niruttinayena **pisodarādipakkhepena**¹ vā dassīsaddassa lopaṁ, āgata-saddassa cāgamaṁ katvā tathāgato”ti vaṇṇenti.

Yaṁ rattinti yassaṁ rattiyaṁ. Accantasamyoge cetam upayogavacanam. **Tiṇṇam mārānanti** kilesābhisankhāradeputtasankhātānam tiṇṇam mārānam. **Anupavajjanti** niddosatāya na upavajjam. **Anūnanti** pakkhipitabbābhāvena na ūnam. **Anadhikanti** apanetabbābhāvena na adhikam. **Sabbākāraparipuṇṇanti** atthabyañjanādisampattiya sabbākārena paripuṇṇam. **No aññathāti** “tathevā”ti vuttamevattham byatirekena sampādeti. Tena yadattham bhāsitaṁ, tadatthanipphādanato yathā bhāsitaṁ bhagavatā, tathevāti aviparītadesanataṁ dasseti. **Gadatthoti** etena tatham gadatīti **tathāgatoti** dakārassa ta-kāram katvā niruttinayena vuttanti dasseti. Tathā gatamassāti tathāgato. **Gatanti** ca kāyassa vācāya vā pavattīti attho. **Tathāti** ca vutte yaṁ-taṁ-saddānam abyabhicāritasambandhatāya yathāti ayamattho upaṭṭhitoyeva hoti. Kāyavācākiriyaṇaṁca aññamaññānulomena vacanicchāyaṁ kāyassa vācā, vācāya ca kāyo sambandhabhāvena upaṭṭhatīti imamattham dassento āha “**bhagavato hi**”ti-ādi. Imasmim pana atthe tathāvāditāya tathāgatoti ayampi attho siddho hoti. So pana pubbe pakārantarena dassitoti āha “**evaṁ tathākāritāya tathāgato**”ti.

Tiriyaṁ aparimāṇasu lokadhātūsūti etena yadeke “tiriyaṁ viya upari adho ca santi lokadhātuyo”ti vadanti, taṁ paṭisedheti. Desanāvilāsoyeva **desanāvilāsamayo** yathā “puññamayaṁ dānamayan”ti-ādīsu². Nipātānam vācakasaddasannidhāne tadatthajotanabhāvena pavattanato gata-saddoyeva avagatattham atītatthaṁca vadatīti āha “**gatoti avagato atīto**”ti. Atha vā abhinīhārato paṭṭhāya

1. Pāṇinī 6. 3. 109 suttaṁ.

2. Dī 3. 182; Khu 1. 230; Khu 10. 43 piṭṭhesu.

yāva sambodhi, etthantare mahābodhiyānaṭṭipattiyā
hānaṭṭhānasamkilesanivattīnaṃ abhāvato yathā paṇidhānaṃ, tathā gato
abhinīhārānurūpaṃ paṭipannoti **tathāgato**. Atha vā mahiddhikatāya
paṭisambhidānaṃ ukkaṃsādhigamena anāvaraṇaṇāṇatāya ca katthacipi
paṭighātābhāvato yathā ruci, tathā kāyavācācittānaṃ gatāni gamanāni
pavattiyo etassāti **tathāgato**. Yasmā ca loke vidhayuttagatapakārasaddā
samānatthā dissanti, tasmā yathāvidhā vipassi-ādayo bhagavanto, ayampi
bhagavā tathāvidhoti **tathāgato**. Yathā yuttā ca te bhagavanto, ayampi
bhagavā tathā yuttoti tathāgato. Atha vā yasmā saccaṃ tatvaṃ¹ tacchaṃ
tathanti ñāṇassettaṃ adhivacanaṃ, tasmā tathena ñāṇena āgatoti **tathāgatoti**
evampi tathāgatasaddassa attho veditabbo.

“Pahāya kāmādimale yathā gatā,
Samādhiñāṇehi vipassi-ādayo.
Mahesino sakyamunī jutindharo,
Tathāgato tena tathāgato mato.

Tathāñca dhātāyatanādilakkhaṇaṃ,
Sabhāvasāmaññaṇavibhāgabhedato.
Sayambhuññaṇena jinoyamāgato,
Tathāgato vuccati sakyapuṇḅgavo.

Tathāni saccāni samantacakkhunā,
Tathā idappaccayatā ca sabbaso.
Anaññaṇeyyena yato vibhāvitā,
Yāthāvato² tena jino tathāgato.

Anekabhedāsupi lokadhātusu,
Jinassa rūpāyatanādigocare.
Vicittabhede tathameva dassanaṃ,
Tathāgato tena samantalocano.

1. Tattvaṃ (Sī)

2. Tathā tathā (Sī)

Yato ca dhammaṃ tathameva bhāsati,
 Karoti vācāyanulomamattano.
 Guṇehi lokam abhibhuyyirīyati¹,
 Tathāgato tenapi lokanāyako.
 Yathābhinihāramato² yathāruci,
 Pavattavācā tanucittabhāvato.
 Yathāvidhā yena purā mahesino,
 Tathāvidho tena jino tathāgatoti³.

Saṅgahagāthā mukhamattameva, kasmā? Appamādapadam viya sakalakusaladhammasampañipattiyā sabbabuddhaguṇānaṃ saṅgāhakattā. Tenevāha “**sabbākārenā**”ti-ādi. Sesamettha uttānatthameva.

171. Dutiye **uppattī**ti paṭhamāya jātiyā nibbattiṃ vatvā ariyāya jātiyā nibbattiṃ dassetuṃ “**nipphattī**”ti-āha. Tadā hissa buddhabhāvanipphattīti. “Dullabho”ti-ādiṃ vatvā kāraṇassa dūrasambhārabhāvato tattha kāraṇaṃ dassento “**ekavāraṇ**”ti-ādimāha. Idam vuttaṃ hoti—tattha vāragāṇā nāma māsasaṃvaccharakappagaṇanādikā, kappānaṃ ekaṃ asaṅkhyeyyaṃ dve asaṅkhyeyyāni tīṇi asaṅkhyeyyānīpi pāramiyo pūretvāpi buddhena bhavitum na sakkā, heṭṭhimakoṭiyā pana cattāri asaṅkhyeyyāni kappasatasahassaṇca nīrantaraṃ dasa pāramiyo pūretvāva buddhabhāvaṃ pattum sakkā, na ito aññathāti iminā kāraṇena dullabho pātubhāvo buddhānanti.

172. Tatiye **niccaṃ na hotī**ti abhiṇṇhappavattikaṃ na hoti kadācideva sambhavato. Yebhuyyena manussā acchariyaṃ disvā accharaṃ paharanti, taṃ sandhāya vuttaṃ “**accharaṃ paharivā passitabbo**”ti. **Samannāgatattā**ti etena acchariyā guṇadhammā etasmiṃ santīti **acchariyoti** dasseti. Apica ādito pabhuti abhinīhārāvaho, tato parampi anaññasādhāraṇe guṇadhamme āciṇṇavāti **acchariyoti** āha “**āciṇṇamanussotipi acchariyamanusso**”ti-ādi. Mahābodhiñāṇameva maṇḍabhūtaṃ **mahābodhimāṇḍo**. Sabbaññutaññānapadaṭṭhānaṃ hi maggañāṇaṃ, maggañāṇapadaṭṭhānaṃca

1. Abhibhuyya īrati (Sī, Ka)

2. Yathābhinihāramito (Sī)

3. Dī-Ṭī 110 piṭṭhe.

sabbaññutaññānaṃ “mahābodhī”ti vuccati. **Anivattakenā**ti bodhiyā niyatabhāvāpattiyā mahābodhisattabhāvato anivattanasabhāvena.

Buddhakāradhammānaṃ pūraṇampi na aññassa kassaci āciṇṇanti-ādinā hetu-avatthāya phalāvatthāya sattānaṃ upakārāvatthāya cāti tīsupi avatthāsu lokanātho anaññasādhāraṇānaṃ guṇadhammānaṃ āciṇṇatāya acchariyamanusso vuttoti dasseti.

173. Catutthe kāle kiriyāti **kālakiriyā**. Katarasmim kāle kīdisī kiriyā. Sāmaññaajanā hi visese avatīṭṭhati, visesatthinā ca viseso anuppayojitabboti āha “**ekasmim kāle pākāṭa kiriyā**”ti. Katarasmim pana ekasmim kāle, kathaṇca pākāṭi? Kappānaṃ sataśassādhikāni anekāni asaṅkhyeyyāni abhikkamitvā yathādhīppetamanorathapāripūrivaseṇa samupaladdhe ekasmim kāle, sadevaloke ativiya acchariyamanussassa parinibbānanti accantapākāṭa. **Anutāpakarā**ti cetodukkhāvahā. **Dasasahassacakkavālesūti** vuttaṃ tassa buddhakkhettabhāvena paricchinnatā, tadanñesaṇca avisayattā.

174. Pañcame **dutiyassa buddhassā**ti dutiyassa sabbaññubuddhassa abhāvā. **Sutabuddho** nāma sutamayena ñāṇena bujjhitabbassa buddhattā. **Catusaccabuddho** nāma catunnaṃ ariyasaccānaṃ anavasesato buddhattā. **Paccekabuddho** nāma paccekaṃ attanoyeva yathā catusaccasambodho hoti, evaṃ buddhattā. Sammāsambuddho eva hi yathā sadevakassa lokassa catusaccasambodho hoti, evaṃ saccāni abhisambujjhati. **Cattāri vā aṭṭha vā soḷasa vā**ti idaṃ katamahābhinihārānaṃ mahābodhisattānaṃ paññādhikasaddhādhikavīriyādhikavibhāgavasena vuttaṃ. “Paññādhikānaṃ hi saddhā mandā hoti, paññā tikkhā. Saddhādhikānaṃ paññā majjhimā hoti. Vīriyādhikānaṃ paññā mandā, paññānubhāvena ca sammāsambodhi adhigantabbā”ti **aṭṭhakathāyaṃ**¹ vuttaṃ. Avisesena pana vimutti-paripācanīyadhammānaṃ tikkhamajjhimamudubhāvena tayopete bhedaṃ yuttāti vadanti. Tividhā hi bodhisattā abhinihārakkhaṇe bhavanti ugghaṭṭitaññuvipaṇcitaññuneyyabhedenā.

1. Suttanipāta-Ṭṭha 1. 43; Apadāna-Ṭṭha 1. 155; Cariyāpīṭaka-Ṭṭha 320 piṭṭhesu.

Tesu ugghaṭṭitaññū sammāsambuddhassa sammukhā cātuppadikaṃ gāthaṃ suṇanto tatiyapade apāriyositeyeva chahi abhiññāhi saha paṭisambhidāhi arahattaṃ pattuṃ samatthūpanissayo hoti. Dutiyo satthu sammukhā ekaṃ gāthaṃ suṇanto apāriyositeyeva catutthapade chahi abhiññāhi arahattaṃ pattuṃ samatthūpanissayo hoti. Itaro bhagavato sammukhā cātuppadikagāthaṃ sutvā pariyositāya gāthāya chahi abhiññāhi arahattaṃ pattuṃ samatthūpanissayo hoti. Tayopete vinā kālabbhedena katābhinihārā laddhabyākaraṇā pāramiyo pūrentā yathākkamaṃ yathāvuttabbhedena kālena sammāsambodhi pāpuṇanti, tesu tesu pana kālabbhedeṣu aparipuṇṇesu te te mahāsattā divase divase vessantaradānasadisāṃ dānaṃ dentāpi tadanurūpaṃ sīlādisapāramidhamme ācinantāpi antarā buddhā bhavissantīti akāraṇametaṃ. Kasmā? Ñāṇassa aparipaccanato. Paricchinnakālanipphāditaṃ viya hi sassaṃ paricchinnakāle nipphāditaṃ sammāsambodhi tadantarā sabbussāhena vāyamantenapi na sakkā pāpuṇitunti pāramipūrī yathāvuttakālavisesena sampajjatīti veditabbaṃ. **Saddhinti** samānakāle.

Asahāyoti nippariyāyato vuttaṃ. Saha-ayanaṭṭho hi sahāyaṭṭho. Paṭipattivasena bhagavatā saha samaṃ ayaṇaṃ nāma kassacipi nattheva. Hatthādi-avayavato paṭi paṭi minitabbato **paṭimā** vuccati attabhāvo. **Samattho nāma natthīti** devo vā māro vā brahmā vā koci natthi. **Paṭisamoti** paṭinidhibhāvena samo. **Paṭibhāgaṃ dātunti** “cattāro satipaṭṭhānā”ti-ādinā vuttassa dhammabhāgassa dhammakotṭhāsassa paṭipakkhabhūtaṃ katvā bhāgaṃ koṭṭhāsaṃ paṭivacanaṃ dātuṃ samattho nāma natthi. Natthi etassa sīlādiguṇehi paṭibimbabhūto puggaloti **appaṭipuggalo**. Tenāha “**añño koci**”ti-ādi. Tisahassimahāsahassīnaṃ vibhāgo parato āvi bhavissati. Sesamettha suviññeyyameva.

175. Chaṭṭhādisu **tasmim puggaleti** sammāsambuddhe. **Tanti** paññācakkhu. **Pātubhūtameva hoti** tassa sahassa uppajjanato. **Uppattīti** uppajjanaṃ. **Nipphattīti** parivuddhi. **Kīvarūpassāti** kīdisassa. Sāvakaṇṇasāyeva hatthagataṃ paññācakkhu nāma dvinnaṃ aggasāvakaṇṇasāyeva āha “**sāriputtattherassā**”ti-ādi. **Samādhipaññāti** samādhisahagatā paññā.

“Samādhisaṁvattanikā khippanisanti-ādivisesāvahā paññā”ti keci. **Ālokoti** paññā-āloko eva. Tathā **obhāso. Tīṇipīti** tīṇipi suttāni.

Lokiyalokuttaramissakānīti pubbabhāgapaññāya adhippetattā vuttaṁ.

Uttamadhammānanti attano uttaritarassa abhāvena seṭṭhadhammānaṁ. Daṭṭhabbato dassanaṁ, bhagavato rūpakāyo. Tatthapi visesato rūpāyatanānaṁ. Tenāha “**cakkhuviññāṇena daṭṭhum labhati**”ti. Natthi ito uttaranti anuttaraṁ, tadeva anuttariyaṁ, dassanañca taṁ anuttariyañcāti **dassanānuttariyaṁ**. Sesapadesupi eseva nayo. Ayaṁ pana padaviseso—suyyati **savanaṁ**, bhagavato vacanaṁ. Labbhatīti **lābho**, bhagavati saddhā. Sikkhitabbato **sikkhā**. Silasamādhipaññāparicaraṇaṁ **pāricariyā**, upaṭṭhānaṁ. Anussaraṇaṁ **anussati**, satthu guṇānussaraṇaṁ. **Imesanti** yathāvuttānaṁ channaṁ anuttariyānaṁ. **Pātubhāvo hotīti** tathāgatassa pātubhāvā tappaṭibaddhattā tabbisayattā ca pātubhāvo hoti. “Dassanānuttariyaṁ”ti ca sadevake loke uttaritarassa bhagavato rūpassa na dassanamattaṁ adhippettaṁ, atha kho tassa rūpadassanamukhena aveccappasādena buddhaguṇe okappetvā ogāhetvā dassanaṁ daṭṭhabbaṁ. Tenāha “**āyasmā hī**”ti-ādi. **Idampi dassanānuttariyanti** pubbe vuttato nibbisesattā vuttaṁ. **Dasabalaṁ dassanāya labhivāti** ānandatthero viya pasādabhattimettāpubbakam dasabalaṁ dassanāya labhivā. **Dassanaṁ vaḍḍhetvāti** dassanamukhena pavattaṁ vipassanācāraṁ vaḍḍhetvā. Dassanamukhena yāva anulomaññāṇaṁ vipassanācāraṁ vaḍḍhetvā tadanantaraṁ aṭṭhamakamahābhūmim okkamanto dassanaṁ sotāpattimaggaṁ pāpeti nāma. Idha parato pavattaṁ dassanaṁ **dassanameva nāma, mūladassanaṁ pana** saccadassanassapi kāraṇabhāvato **dassanānuttariyaṁ nāma**. Esa nayo sesānuttariyesupi.

Dasabale saddhaṁ paṭilabhatīti sammāsambuddhe bhagavati saddhaṁ paṭilabhati. **Tisso sikkhā sikkhitvāti** tisso pubbabhāgasikkhā sikkhitvā. **Paricarati**ti upaṭṭhānaṁ karoti. “Itipi so bhagavā”ti-ādinā buddhānussativasena anussatiṭṭhānaṁ uppādetvā taṁ padaṭṭhānaṁ katvā vipassanaṁ vaḍḍhento “**anussatiṁ vaḍḍhetvā**”ti vutto.

Sacchikiriya hotīti paccakkhakaṇaṃ hoti. Maggakkhaṇe hi labbhamānā paṭisambhidā phalakkhaṇe sacchikatā nāma hoti tato paraṃ atthādīsu yathicchitaṃ viniyogakkhamabhāvato. **Catassoti** gaṇanaparicchedo. **Paṭisambhidā**ti pabhedā. Kassa pana pabhedāti? “Atthe ñāṇaṃ atthapaṭisambhidā”ti-ādivacanato¹ ñāṇassetā pabhedā. Tasmā **catasso paṭisambhidā**ti cattāro ñāṇappabhedāti attho. **Atthapaṭisambhidā**ti atthe paṭisambhidā, atthapabhedassa salakkhaṇavibhāvanavavatthānakaraṇasamatthaṃ atthe pabhedagataṃ ñāṇanti attho. Tathā dhammapabhedassa salakkhaṇavibhāvanavavatthānakaraṇasamatthaṃ dhamme pabhedagataṃ ñāṇaṃ **dhammapaṭisambhidā**. Niruttipabhedassa salakkhaṇavibhāvanavavatthānakaraṇasamatthaṃ niruttābhilāpe pabhedagataṃ ñāṇaṃ **niruttipaṭisambhidā**. Paṭibhānapabhedassa salakkhaṇavibhāvanavavatthānakaraṇasamatthaṃ paṭibhāne pabhedagataṃ ñāṇaṃ **paṭibhānapaṭisambhidā**.

Atthesu ñāṇanti-ādīsu **atthoti** saṅkhepato hetuphalaṃ. Taṃ hi hetuvasena araṇīyaṃ gantabbaṃ pattabbaṃ, tasmā “attho”ti vuccati. Pabhedato pana yaṃ kiñci paccayuppannaṃ nibbānaṃ bhāsitattho vipāko kiriyaḃhi ime pañca dhammā “attho”ti veditabbā, taṃ atthaṃ paccavekkhantassa tasmim pabhedagataṃ ñāṇaṃ **atthapaṭisambhidā**. **Dhammoti** saṅkhepato paccayo. So hi yasmā tantim dahati vidahati pavatteti ceva pāpeti ca ṭhapeti ca, tasmā “dhammo”ti vuccati. Pabhedato pana yo koci phalanibbattako hetu ariyamaggo bhāsitaṃ kusalaṃ akusalanti pañcavidhoti veditabbo, taṃ dhammaṃ paccavekkhantassa tasmim dhamme pabhedagataṃ ñāṇaṃ **dhammapaṭisambhidā**.

Atthadhammaniruttābhilāpe ñāṇanti tasmim atthe ca dhamme ca sabhāvaniruttisaddaṃ ārammaṇaṃ katvā paccavekkhantassa tasmim sabhāvanirutti-abhilāpe pabhedagataṃ ñāṇaṃ. Evamayam niruttipaṭisambhidā saddārammaṇā nāma jātā, na paññatti-ārammaṇā. Kasmā? Yasmā saddaṃ sutvā “ayaṃ sabhāvanirutti, ayaṃ na sabhāvanirutti”ti pajānāti. Paṭisambhidāpatto hi “phasso”ti vutte “ayaṃ sabhāvanirutti”ti jānāti, “phassā”ti vā “phassan”ti vā vutte “ayaṃ na sabhāvanirutti”ti jānāti. Vedanādīsipi eseva nayo. Ayaṃ

1. Abhi 2. 307 piṭṭhe.

panesa nāmākhyātopasaggābyayapadampi jānātiyeva sabhāvaniruttiyā yāthāvato jānanato. **Ñānesu ñāṇanti** sabbatthakañāṇaṃ ārammaṇaṃ katvā paccavekkhantassa pabhedagataṃ ñāṇaṃ.

Imā pana catasso paṭisambhidā sekkhabhūmiyaṃ asekkhabhūmiyanti dvīsu thānesu pabhedanāṃ gacchanti. Adhigamo pariyatti savanaṃ paripucchā pubbayogoti imehi pañcahi kāraṇehi visadā honti. **Adhigamo** nāma saccappaṭivedho. **Pariyatti** nāma buddhavacanaṃ. Taṃ hi gaṇhantassa paṭisambhidā visadā honti. **Savanaṃ** nāma dhammassavanaṃ. Sakkaccaṃ dhammaṃ suṇantassapi hi paṭisambhidā visadā honti. **Paripucchā** nāma atṭhakathā. Uggahitapāliyaṃ atthaṃ kathentassapi hi paṭisambhidā visadā honti. **Pubbayogo** nāma pubbayogāvacaratā. Haraṇapaccāharaṇanayena paṭipākaṭakammaṭṭhānassapi¹ paṭisambhidā visadā hontīti. **Lokiyalokuttarāvā**ti ettha tisso paṭisambhidā lokiyā, atthapaṭisambhidā siyā lokiyā, siyā lokuttarāti evaṃ vibhajitvā attho vedītabbo.

Buddhuppādeyevāti avadhāraṇena buddhuppāde eva labbhanato, abuddhuppāde alabbhanato anaññasādhāraṇo paṭivedho adhippeto. Evañca katvā “mahato cakkhussā”ti-ādīsu paññāmahattādikampi anaññasādhāraṇameva adhippetanti daṭṭhabbāṃ. Tathā vijjāvimutti phalasacchikiriyādayopi paresaṃ tabbhāvāvahā daṭṭhabbā. Yā kāci dhātuyo lokiyā lokuttarā vā, sabbā tā imāheva saṅgahitā, ettheva antogadhāti vuttaṃ “**imāva atṭhārassa dhātuyo nānāsabhāvato nānādhātuyo**”ti. Svāyamattho anekadhātunānādhātuñāṇavibhaṅgena² dīpetabbo. “Sacchikiriyā”ti vuttatā “**vijjāti phale ñāṇan**”ti vuttaṃ.

187. Yasmā cakkati aparāparaṃ parivattatīti **cakkaṃ**, tasmā iriyāpathāpi aparāparaṃ parivattanaṭṭhena cakkasadisattā **cakkanti** vuttā, tathā patirūpadasavāsādisampattiyo. **Tato paṭṭhāya dhammacakkaṃ abhinīharati nāmāti** ettha tadā mahāsatto attānaṃ abhinīhārayogaṃ karonto “dhammacakkaṃ abhinīharati nāmā”ti vutto tato paṭṭhāya dhammacakkābhinīhāravibandhakaradhammānuppajjanato. **Abhinīhaṭaṃ nāmāti** etthapi

1. Parihaṭakammaṭṭhānassapi (?)

2. Abhi 2. 323 piṭṭhe.

ayameva nayo. **Arahattamaggaṃ paṭivijjhantopi dhammacakkaṃ uppādetiyeva nāma** tadattham ñāṇam paripācetīti katvā.

Arahattaphalakkhaṇe dhammacakkaṃ uppāditaṃ nāma tasmiṃ khaṇe dhammacakkassa uppādanāya kātabbakiccassa kassaci abhāvā.

Paṭivedhañāṇam hi idha “dhammacakkaṃ”ti adhippetam. Idāni desanāñāṇavasena dhammacakkaṃ dassetuṃ “**kadā pavatteti nāmā**”ti-ādimāha. Na kevalam therasseva, atha kho sabbesampi sāsānikānam dhammakathā bhagavato dhammadesanā catunnam ariyasaccānam catunnaṇca ekattādinayānam avirāddhanatoti dassetuṃ “**yo hi koci bhikkhu vā**”ti-ādi āraddham. Sesam suviññeyyameva.

Ekapuggalavaggavaṇṇanā niṭṭhitā.

14. Etadaggavagga 1. Paṭhamavagga

Etadaggapadavaṇṇanā

188. Etadaggesu paṭhamavaggassa paṭhame **ādimhi dissatīti** ettha aggasaddoti ānetvā yojetabbam. **Ajjataggeti** ajjadivasam ādim katvāti attho. **Aṅgulaggenāti** aṅgulikoṭṭiyā. **Ambilagganti** ambulakotṭhāso. **Koṭṭibhūtāti** paramakoṭṭibhūtā tasmiṃ ṭhāne tādīsānam aññesam abhāvato. Tato eva **setṭhabhūtātipi aggā. Etadaggasannikkhepoti** etadagge ṭhapanam aṭṭhuppatti-ādīhi catūhipi kāraṇehi. Mahāpaññatāya therena etadaggaṭṭhānassa laddhabhāvam vitthārato dassetuṃ “**kathan**”ti-ādimāha. **Dve padantarānīti** kaṇḍambamūle yugandharapabbateti dvīsu ṭhānesu dve padāni dassetvā. **Muṇḍapīṭhakanti** yam sattaṅgam pañcaṅgam vā na hoti, kevalam muṇḍakapīṭham, tam sandhāyetam vuttam. **Avattharitvā nisīdīti** buddhānubhāvena ajjhottharitvā nisīdi. Tenāha “**evam nisīdanto**”ti-ādi. **Kāyasakkhim katvāti** nāmakāyena desanāya sampañcchanavasena sakkhibhūtam katvā. **Kusalā dhammā akusalā dhammā abyākatā dhammāti iti-saddo** ādyattho, tena sabbam abhidhammadesanam saṅgaṇhāti.

Pāṭihāriyatṭhāneti yamakapāṭihāriyassa kataṭṭhāne. **Passathāti** tesam bahubhāvam sandhāya vuttam. **Assāti** manussasamūhassa ekabhāvam.

Ākappanti ākāraṃ. **Mahājanoti** sadevake loke sabbo mahājano. Yathā nirayadassanaṃ saṃvegajananattham, evaṃ devalokadassanampi saṃvegajananatthameva “anupubbikathāyaṃ saggakathā viya evaṃ sabbasampattisamupetopi saggo anicco addhuvo cavanadhammo”ti. **Sajjetvā**¹ samapaṇṇāsāya mucchanāhi yathā kāmena nivādetuṃ sakkā, evaṃ sajjetvā.

Puthujjanapañcakaṃ pañhanti puthujjanapañhaṃ ādim katvā pavattitaṃ khīṇāsavapañhapiyantaṃ pañhapañcakaṃ. **Paṭhamam -pa- pucchīti** puthujjanavisaye pañhaṃ pucchi. Paṭisambhidā yathābhinihāraṃ yathāsakaṃ vipassanābhinihārena paṭhamabhūmiyādayo viya pavattitavisayāti vuttaṃ “**te attano attano paṭisambhidāvisaye thatvā kathayimsū**”ti. **Buddhavisaye pañhaṃ pucchīti**—

“Ye ca saṅkhātadhammāse, ye ca sekhā puthū idha.

Tesaṃ me nipako iriyaṃ, puṭṭho pabrūhi mārisā”ti²—

idaṃ pañhaṃ pucchi. Tattha **Saṅkhātadhammā**ti saṅkhātā ñātā catusaccadhammā, ye ca saṅkhātadhammā catūhi maggehi paṭividdhacatusaccadhammāti attho. Iminā asekkhā kathitā. Puthu-saddo ubhayatthapi yojetabbo “ye puthū saṅkhātadhammā, ye ca puthū sekhā”ti. **Tesanti** tesaṃ dvinnam sekkhāsekkhapuggalānaṃ me puṭṭhoti yojetabbaṃ, mayā puṭṭhoti attho. **Iriyanti** sekkhāsekkhabhūmiyā āgamanappaṭipadaṃ. Iriyati gacchati sekkhabhūmiṃ asekkhabhūmiṃca etāyāti iriyā, taṃ tesaṃ iriyaṃ āgamanappaṭipadaṃ mayā puṭṭho pabrūhi kathehīti attho. Evaṃ bhagavā buddhavisaye pañhaṃ pucchitvā “imassa nu kho sārīputta saṅkhittena bhāsītassa kathaṃ vitthārena attho daṭṭhabbo”ti āha. Thero pañhaṃ oloketvā “satthā maṃ sekkhāsekkhānaṃ bhikkhūnaṃ āgamanappaṭipadaṃ pucchati”ti pañhe nikkaṅkho hutvā “āgamanappaṭipadā nāma khandhādivasena bahūhipi mukhehi sakkā kathetuṃ, katarākārena nu kho kathento satthu ajjhāsayaṃ gaṇhituṃ sakkhissāmi”ti ajjhāsaye kaṅkhi, taṃ sandhāyetaṃ vuttaṃ “**dhammasenāpati -pa- na sakkoti**”ti. Pucchitapañhaṃ vissajjetuṃ paṭibhāne asati disāvilokanaṃ sattānaṃ sabhāvoti dassento “**puratthima -pa- nāsakkhi**”ti āha. Tattha **pañhuppattiṭṭhānanti** pañhuppattikāraṇaṃ.

1. Mucchitvāti (Aṭṭhakathāyaṃ)

2. Khu 1. 434 piṭṭhe Suttanipāte.

Therassa kilamanabhāvaṃ jānitvāti “sāriputto pañhe nikkankho, ajjhāsaye me kaṅkhamāno kilamatī”ti therassa kilamanabhāvaṃ ñatvā. **Catumahābhūtikakāyapariggahanti** etena khandhamukhena nāmarūpapariggaho vutto. **“Bhūtamidanti sāriputta samanupassasī”**ti hi vadantena bhagavatā khandhavasena nāmarūpapariggaho dassito. Evaṃ kirassa bhagavato ahosi “sāriputto mayā naye adinne kathetum na sakkhissati, dinne pana naye mamajjhāsayaṃ gahetvā khandhavasena kathessatī”ti. Therassa saha nayadānena so pañho nayasatena nayasahassena upatṭhāsi. Tenāha **“aññātaṃ bhagavā, aññātaṃ sugatā”**ti.

Arūpāvacare paṭisandhi nāma na hotīti bodhisambhārasambharaṇassa anokāsabhāvato vuttaṃ. Tenāha **“abhabbaṭṭhānattā”**ti, laddhabyākaraṇānaṃ bodhisattānaṃ uppattiyā abhabbadesattāti attho. **Rūpāvacare nibbattīti** kammavasitāsambhavato arūpāvacare anibbattitvā rūpāvacare nibbatti.

Parosahassanti-ādinā parosahassajātakam dasseti. Tattha **parosahassampīti** atirekasahassampi. **Samāgatānanti** sannipatitānaṃ bhāsitaṃ atthaṃ jānitum asakkontānaṃ bālānaṃ. **Kandeyyum te vassasataṃ apaññāti** te evaṃ samāgatā apaññā ime bālattā sasā viya vassasatampi vassasahassampi rodeyyum parideveyyum. Rodamānāpi pana atthaṃ vā kāraṇaṃ vā neva jāneyyunti dīpeti. **Ekova seyyo puriso sapaññoti** evarūpānaṃ bālānaṃ parosahassatopi eko paṇḍitapurisova seyyo varataroti attho. Kīdiso sapaññoti āha **“yo bhāsitaṃ vijānāti atthan”**ti, ayaṃ jeṭṭhantevāsiko viya yo bhāsitaṃ atthaṃ jānāti, so tādiso sapañño varataroti attho. Dutiye parosatajātake **jhāyeyyunti** yāthāvato atthaṃ jānitum samāhitā hutvā cinteyyum. Sesamettha vuttanayameva.

Tatijātake **ye saññinoti** ṭhapetvā nevasaññānāsaññāyatanaalābhino avasesacittakasatte dasseti. **Tepi duggatāti** tassā nevasaññānāsaññāyatanaśamāpattiyā alābhato tepi duggatā dukkhaṃ upagatā saññābhava. “Saññā rogo saññā gaḇḇo saññā

sallan”¹ti hi te saññāya ādīnavadassino. **Yepi asaṇṇinoti** asaṇṇibhave nibbatte acittakasatte dasseti. Tepi imissāyeva samāpattiyā alābhato duggatāyeva. Jhānasukhaṃ **anaṅgaṇaṃ** niddosaṃ yathāvuttadosābhāvato. Balavacittekaggaṭāsabhāvenapi taṃ anaṅgaṇaṃ nāma jātaṃ. **Nevasaṇṇī nāsaṇṇīti āhāti** atīte kira bārāṇasiyaṃ brahmadatte rajjaṃ kārente bodhisatto araṇṇāyatane kālaṃ karonto antevāsikehi puṭṭho “nevasaṇṇī nāsaṇṇī”ti āha. Purimajātake vuttanayeneva tāpasā jeṭṭhantevāsikassa kathaṃ na gaṇhimsu. Bodhisatto ābhassarato āgantvā ākāse ṭhatvā imaṃ gāthamāha. Tena vuttaṃ “**sesaṃ vuttanayeneva veditabban**”ti.

Catutthajātake² candassa viya ābhā etassāti **candābhaṃ**, odātakasiṇaṃ. **Sūriyābhaṃ**ti sūriyassa viya ābhā etassāti sūriyābhaṃ, pītakasiṇaṃ. **Yodha paññāya gādhaṭṭi**ti yo puggalo idha sattaloke idaṃ kasiṇadvayaṃ paññāya gādhati, āramaṇaṃ katvā anuppavisati, tattha vā paṭiṭṭhahati. **Avitakkena dutiyajjhānena ābhassarūpago hotīti** so puggalo tathā katvā paṭiladdhena dutiyena jhānena ābhassarabrahmalokūpago hoti. **Sesaṃ purimanayeneva veditabbanti** iminā imaṃ dasseti³—atīte bārāṇasiyaṃ brahmadatte rajjaṃ kārente bodhisatto araṇṇāyatane kālaṃ karonto antevāsikehi pucchito “candābhaṃ sūriyābhaṃ”ti vatvā ābhassare nibbatto. Tāpasā jeṭṭhantevāsikassa na saddahimsu. Bodhisatto āgantvā ākāse ṭhito imaṃ gātham abhāsi.

Pañcamajātake **āsīsethevāti** āsācchedaṃ akatvā attano kammesu āsaṃ kareyyeva. **Na nibbindeyyāti** na nibbedam upādeyya, na ukkaṇṭheyyāti attho. **Voti** nipātamattaṃ. **Yathā icchinti** ahaṃ hi saṭṭhihatthā narakā uṭṭhānaṃ icchim, somhi tatheva jāto, tato uṭṭhitoyevāti dīpeti.

Atīte⁴ kira bārāṇasiyaṃ brahmadatte rajjaṃ kārente bodhisatto sarabhamigayoniyaṃ nibbattitvā araṇṇe paṭivasati. Rājā migavittako

1. Ma 3. 20 piṭṭhe.

2. Khu 5. 31 piṭṭhe.

3. Jātaka-Ṭṭha 1. 499 piṭṭhe.

4. Jātaka-Ṭṭha 4. 268 piṭṭhepi.

ahosi thāmasampanno. Ekadivasam gantvā amacce āha “yassa passena migo palāyati, teneva so dātabbo”ti. Athekadivasam sarabhamigo uṭṭhāya rañño ṭhitatṭhānena palāyi. Atha nam amaccā uppaṇdesum. Rājā cintesi “ime maṃ parihāsanti, mama pamāṇam na jānanti”ti gālham nivāsetvā pattikova khaggaṃ ādāya “sarabham gaṇhissāmi”ti vegena pakkhandi. Atha nam disvā tīṇi yojanāni anubandhi. Sarabho araṇṇam pāvisi. Rājāpi pāvisiyeva. Tattha sarabhamigassa gamanamagge saṭṭhihatthamatto mahāpūtipātanaṇṇa-āvaṇṇo atthi, so timsahatthamattam udakena puṇṇo tiṇehi ca paṭicchanno. Sarabho udakagandham ghāyitvā āvāṭabhāvaṃ ṇatvā thokaṃ osakkitvā gato. Rājā pana ujukameva āgacchanto tasmim pati.

Sarabho tassa padasaddam asuṇanto nivattitvā tam apassanto “narka-āvaṇṇe patito bhavissati”ti ṇatvā āgantvā olovento tam gambhīre udake appatiṭṭhe kilamantam disvā tena katāparādhamaṃ hadaye akatvā saṇjātakāruṇṇo “mā mayi passante varāko nassatu, imamaṃ tam dukkhā mocessāmi”ti āvāṭatīre ṭhito “mā bhāyi mahārāja, aham tam dukkhā mocessāmi”ti vatvā attano piyaputtam uddharitum ussāham karonto viya tassuddharaṇatthāya silāya yoggaṃ katvā “vijjhissāmi”ti āgataṃ rājānam saṭṭhihatthā narka uddharitvā assāsetvā piṭṭhim āropetvā araṇṇā niharitvā senāya avidūre otāretvā ovādamassa datvā pañcasu silesu patiṭṭhāpesi. Rājā senaṅgaparivuto nagaram gantvā “ito paṭṭhāya sakalapaṭṭhāvāsino pañca sīlāni rakkhantū”ti dhammabherim carāpesi. Mahāsattena pana attano kataggaṃ kassaci akathetvā sāyam nānaggarasabhojanam bhuñjitvā alaṅkatasayane sayitvā paccūsakāle mahāsattassa gaṇam saritvā uṭṭhāya sayanapiṭṭhe pallaṅkena nisīditvā pītipuṇṇena hadayena udānam udānento “āsīsetheva puriso”ti-ādinaṃ imā cha gāthā abhāsi.

Tattha **ahitā hitā cāti** dukkhaphassā sukhaphassā ca, maraṇaphassā jīvitaphassātipi attho. Sattānam hi maraṇaphasso ahito, jīvitaphasso hito. Tesam acintito maraṇaphasso āgacchatīti

dasseti. **Acintitappīti** mayā “āvāṭe patissāmī”ti na cintitaṃ, “sarabham māressāmī”ti **cintitaṃ**. Idāni pana me cintitaṃ naṭṭhaṃ, acintitameva jātanti udānavasena vadati. **Bhogāti** yasaparivārā, ete cintāmayā na honti. Tasmā ñāṇavatā vīriyameva kātabbanti vadati. Vīriyavato hi acintitampi hotiyeva.

Tassetam udānaṃ udānentasseva aruṇaṃ uṭṭhahi. Purohito pātova sukhasēyyapucchanatthaṃ āgantvā dvāre ṭhito tassa udānagītasaddaṃ sutvā cintesi “rājā hiyyo migavaṃ agamāsi, tattha sarabhamigaṃ viddho bhavissati, tena maññe udānaṃ udānetī”ti. Evaṃ brāhmaṇassa rañño paripuṇṇabyañjanaṃ udānaṃ sutvā sumajjite ādāse mukhaṃ olokentassa chāyā viya rañña ca sarabhena ca katakāraṇaṃ pākāṭaṃ ahosi, so nakhaggena dvāraṃ ākoṭesi. Rājā “ko eso”ti pucchi. Ahaṃ deva purohitoti. Athassa dvāraṃ vivaritvā “ito ehācariyā”ti āha. So pavisitvā rājānaṃ jayāpetvā ekamantaṃ ṭhito “ahaṃ mahārāja tayā araṇṇe katakāraṇaṃ jānāmi, tvaṃ ekaṃ sarabhamigaṃ anubandhanto narake patito, atha naṃ so sarabho silāya yoggaṃ katvā narakato uddhari, so tvaṃ tassa guṇaṃ saritvā udānaṃ udānesī”ti vatvā “**sarabham giriduggasmin**”ti-ādinā dve gāthā abhāsi.

Tattha **anusaṛīti** anubandhi. **Vikkantanti** uddharaṇatthāya kataparakkamaṃ. **Anujīvasīti** upajīvasi, tassānubhāvena tayā jīvitaṃ laddhanti attho. **Samuddharīti** uddharaṇaṃ akāsi¹. **Silāya yoggaṃ sarabho karitvāti** silāya sopānasadisāya narakato uddharaṇayoggataṃ karitvā. **Alīnacittanti** saṅkocaṃ appattacittaṃ. **Ta migam vadesīti** suvaṇṇasarabhamigaṃ idha sirisayane nipanno vaṇṇesi. Taṃ sutvā rājā “ayaṃ mayā saddhim na migavaṃ āgato, sabbañca pavattim jānāti, kathaṃ nu kho jānāti, pucchissāmi naṃ”ti cintetvā “**kiṃ tvaṃ nu tatthevā**”ti navamagāthamāha. Tattha **bhimsarūpanti** kiṃ nu te ñāṇaṃ balavajātikaṃ, tenetaṃ jānāsīti vadati. Brāhmaṇo “nāhaṃ sabbaññubuddho, byañjanaṃ amakkhetvā tayā kathitagāthāya pana mayhaṃ attho upaṭṭhātī”ti dīpento “**na cevahan**”ti

1. Uttari (Ka)

dasamagāthamāha. Tattha **subhāsītānanti** byañjanaṃ amakkhetvā suṭṭhu bhāsītānaṃ. **Atthaṃ ta’dānenti**ti yo tesaṃ attho, taṃ ānenti upadhārentīti attho. Tadā purohito dhammasenāpati ahosi. Tenevāha “**atītepi**”ti-ādi. Sesaṃ uttānatthameva.

Aññāsikoṇḍaññattheravatthu

Aññāsikoṇḍaññattherādayoti-ādīsu pana **yāthāvasarasaguṇavasena**ti yathāsabhāvaguṇavasena. Pabbajjāvasena paṭivedhavasena suciraṃ sunipuṇaṃ rattindivaparicchedañānāvasena ca rattaññutā veditabbāti taṃ dassento “**ṭhapetvā hi sammāsambuddhan**”ti-ādimāha. **Pākaṭova hotīti** satipaññāvepullappattito pākaṭo vibhūto hoti. **Aññāsikoṇḍaññoti** sāvakesu sabbapaṭhamāṃ cattāri ariyasaccāni ñābhakoṇḍañño. **Sabbesupi etadaggesūti** sabbesupi etadaggasuttesu, sabbesu vā etadaggaṭṭhapanesu.

Dhurapattānīti pattānaṃ pamukhabhūtāni bāhirapattāni. **Navutihatthānīti** majjhimapurisassa hatthena navutiratanāni. Padumeneva taṃ taṃ padesaṃ uttarati atikkamatīti **padumuttaro**, bhagavā. **Gandhadāmamālādāmādīhi**ti ādi-saddena pattadāmādiṃ saṅgaṇhāti. Tattha gandhadāmehi katamālā **gandhadāmaṃ**. Lavaṅgatakkolajātipupphādīhi katamālā **mālādāmaṃ**. Tamālapattādīhi katamālā **pattadāmaṃ**. **Vaṅgapaṭṭeti** vaṅgadese uppannaghanasukhumavatthe. **Uttamasukhumavatthanti** kāsikavatthamāha.

Teparivaṭṭadhammacakkappavattanasuttantapariyosāneti ettha “idaṃ dukkhaṃ ariyasaccan”ti-ādinā saccavasena, “dukkhaṃ ariyasaccaṃ pariññeyyan”ti-ādinā kiccavasena, “dukkhaṃ ariyasaccaṃ pariññātan”ti-ādinā katavasena ca tihi ākārehi parivaṭṭetvā catunnaṃ saccānaṃ desitattā tayo parivaṭṭā etassa atthīti tiparivaṭṭaṃ, tiparivaṭṭameva teparivaṭṭaṃ, teparivaṭṭaṅca taṃ dhammacakkappavattanañcāti **teparivaṭṭadhammacakkappavattanaṃ**, tadeva suttantaṃ, tassa pariyosāneti attho.

Sāligabbhaṃ phāletvā ādāyāti sāligabbhaṃ phāletvā tattha labbhamānaṃ sālikhīrasaṃ ādāya. **Anucchavikanti** buddhānaṃ anucchavikaṃ khīrapāyasaṃ pacāpema. Veṇiyo purisabhāvavasena bandhitvā

kalāpakaraṇe **kalāpaggaṃ**. Khale kalāpānaṃ ṭhapanadivase **khalaggaṃ**. Madditvā vīhinaṃ rāsikaraṇadivase **khalabhaṇḍaggaṃ**. Koṭṭhesu hi dhaññassa pakkhipanadivase **koṭṭhaggaṃ**.

Dve gatiyoti dve eva nipphattiyo, dve niṭṭhāti attho. **Tasmiṃ kumāre sabbaññūtam** patteti koṇḍaññaṃ māṇavasseva laddhiyaṃ ṭhatvā itarepi cha janā putte anusāsimsu. Bodhirukkhamūle pācīnapassaṃ **acalaṭṭhānaṃ** nāma, yaṃ “vajirāsanaṃ” tipī vuccati. Mahataṃ mahatiyo vahaṭṭi “pācīnamukho” ti avatvā **“pācīnalokadhātu-abhimukho”** ti vuttaṃ. Maṃsacakkhupi lokanāthassa appaṭighātaṃ mahāvisayañcāti. **Caturaṅgasamannāgatanti** “kāmaṃ taco ca nhāru ca, aṭṭhi ca avasissatū” ti-ādinā¹ vuttacaturaṅgasamannāgataṃ.

Idaṃ pana sabbamevāti “kassa nu kho ahaṃ paṭhamāṃ dhammaṃ desessāmi” ti-ādinayappavattaṃ² sabbameva. **Parivitaṅkamattameva** tathā atthasiddhiyā abhāvato. **Pupphitaphalitaṃ katvāti** abhiññāpaṭisambhidāhi sabbapāliphullaṃ³, maggaphalehi sabbaso phalabhārabharitaṃ ca karonto pupphitaṃ phalitaṃ katvā. **Apakkamitukāmo hutvāti** dvepi aggasāvake attano nipaccakāraṃ karonte disvā tesāṃ guṇāṭirekataṃ⁴ bahu maññaṃto buddhānaṃ santikā apakkamitukāmo hutvā. **Tatthevāti** Chaddantadahaṭṭireyeva.

Sāriputta-moggallānattheravatthu

189-190. Dutiyatatiyesu **iddhimantānanti** ettha **manta-saddo** atisayatthavisayoti therassa atisayika-iddhitaṃ dassetuṃ **“iddhiyā sampannānaṃ”** ti vuttaṃ. Saha paṃsūhi kīlīmsūti **sahapaṃsukīlītā**. **Idhalokattabhāvamevāti** diṭṭhadhammika-atṭabhāvameva. **Soḷasa pañña paṭivijjhivā ṭhitoti** majjhimanikāye **anupadasuttantadesanāya** “mahāpañño bhikkhave sāriputto, puthupañño bhikkhave sāriputto, hāsapañño bhikkhave sāriputto, javanapañño bhikkhave sāriputto, tikkhapañño bhikkhave sāriputto, nibbedhikapañño bhikkhave sāriputto” ti⁵

1. Ma 2. 146; Saṃ 1. 266, 464; Aṃ 1. 52; Khu 7. 379 piṭṭhesu.

2. Ma 1. 226; Ma 2. 294; Vi 3. 10 piṭṭhesu.

4. Guṇāṭirekatamaṃ (Ka)

3. Sabbapāliphullaṃ (Sī, Ka)

5. Ma 3. 75 piṭṭhe.

evamāgatā mahāpaññādikā cha, tasmimyeva sutte āgatā navānupubbavīhārasamāpattipaññā, arahattamaggapaññāti¹ imā soḷasavidhā paññā paṭivijjhita sacchikatvā t̥hito.

Pañhassakacchanti pañhassa pucchanavasena vissajjanavasena ca sākacchaṃ karoti. **Atthikehi upaññātaṃ magganti** etaṃ anubandhanassa kāraṇavacanaṃ. Idaṃ hi vuttaṃ hoti—yaṃnūnāhaṃ imaṃ bhikkhuṃ piṭṭhito piṭṭhito anubandheyyaṃ. Kasmā? Yasmā idaṃ piṭṭhito piṭṭhito anubandhanaṃ nāma atthikehi upaññātaṃ maggaṃ, ñāto ceva upagato ca maggoti attho. Atha vā atthikehi amhehi maraṇe sati amatenapi bhavitabbanti evaṃ kevalaṃ atthiṭi upaññātaṃ, anumānañāṇena upagantvā ñātaṃ nibbānaṃ nāma atthi, taṃ magganto pariyasantoti evampettha attho daṭṭhabbo.

Nesaṃ parisāyāti dvinnāṃ aggasāvakānaṃ parivārabhūtaparisāya. **Dve aggasāvaketi** sārīputtamoggallāne dve mahānubhāve sāvake. **Ṭhānantareti** aggasāvakattasaññite ṭhānantare t̥hapesi. Kasmā panettha “aggasāvake”ti avatvā “mahāsāvake”ti vuttaṃ. Yadi aññepi mahātherā abhiññātādiguṇavisesayogena “mahāsāvakā”ti vattabbattaṃ labhanti, imeyeva pana sāvakesu anaññasādhāraṇabhūtā visesato “mahāsāvakā”ti vattabbāti dassanattamaṃ **“dvepi mahāsāvake”**ti vuttaṃ.

Mahākassapattheravattu

191. Catutthe yasmā dhutavādadhutadhammadhutaṅgāni dhutamūlakāni, tasmā **“dhuto veditabbo”**ti āradhmaṃ, tattha kilese dhuni dhutavāti **dhuto**, dhutakilesa puggalo, kilesadhunano vā dhammo, **kilesadhunano dhammoti** ca sapubbabhāgo ariyamaggo daṭṭhabbo. Taṃ dhutasaññitaṃ kilesadhunanadhammaṃ vadati, pare tattha paṭiṭṭhāpeti **dhutavādo**. Catukkañcetha sambhavaṭi taṃ dassetuṃ **“ettha pana”**ti-ādi āradhmaṃ. **Tayidanti** nipāto, tassa so ayanti attho. Dhutabhūtassa dhutabhūtā dhammā **dhutadhammā**. **Appicchatā santuṭṭhitā** heṭṭhā vuttā

1. Ma 3. 75 piṭṭhe.

eva. Kilese sammā likhati tacchatīti sallekho, kilesajegucchī, tassa bhāvo **sallekhatā**. Dvīhipi kāmehi viviccatīti paviveko, yonisomanasikārabahulo puggalo, tassa bhāvo **pavivekatā**. Iminā sarīraṭṭhapanamattena atthīti idamaṭṭhi ttha-kārassa ttha-kāraṃ katvā, tassa bhāvo **idamaṭṭhitā**, imehi vā kusaladhammehi atthi idamaṭṭhi, yena ñāṇena “pabbajitena nāma paṃsukūlikaṅgādīsu patiṭṭhitena bhavitabban”ti yathānusiṭṭhaṃ dhutaguṇe samādiyati ceva pariharati ca, taṃ ñāṇaṃ **idamaṭṭhitā**. Tenāha **“idamaṭṭhitā ñāṇamevā”**ti. **Dhutadhammā nāmāti** dhutaṅgasevanāya paṭipakkhabhūtānaṃ pāpadhammānaṃ dhunanavasena pavattiyā dhutoti laddhanāmāya dhutaṅgacetanāya upakārakā dhammāti katvā dhutadhammā nāma. **Anupatantīti** tadantogadhā tappariyāpannā honti tadubhayasseva pavattivisesabhāvato. **Paṭikkhepavatthūsūti** dhutaṅgasevanāya paṭikkhipitabbavatthūsu pahātabbavatthūsu.

Paṃsukūlikaṅgaṃ -pa- nesajjikaṅganti uddesopi peyyālanayena dassito. Yadettha vattabbaṃ, taṃ sabbaṃ **visuddhimagge**¹ vitthārato vuttaṃ. Dhutavādaggahaṇeneva therassa dhutabhāvopi gahito hotīti **“dhutavādānaṃ”**teva vuttaṃ. **Ayaṃ mahāti** abhinīhārādimaṇṭatāyapi sāsanaṃ upakāritāyapi ayaṃ therō mahā, guṇamaṇṭatāya paṃsāvacanameva vā etaṃ therassa yadidaṃ mahākassapoti yathā **“mahāmogallāno”**ti.

Satthu dhammadesanāya vatthuttaye sañjātappasādatāya upāsakabhāve ṭhitattā vuttaṃ **“uposathaṅgāni adhiṭṭhāyā”**ti-ādi. Etassa aggabhāvassāti yojetabbaṃ. **Saccakāro**ti saccabhāvāvaho kāro, avisaṃvādanavasena vā tadatthasāadhanoti attho. **Kolāhalanti** kutūhalavipphāro. Satthā sattame sattame saṃvacchare dhammaṃ kathento sattānaṃ savanayoggaṃ kālāṃ sallakkhento divā sāyanhasamayāṃ katheti, ratthiyaṃ sakalayāmaṃ. Tenāha **“brāhmaṇo brāhmaṇe āha ‘bhoti kiṃ ratthiṃ dhammaṃ suṇissasi, divā’**ti”. **Vissāsikoti** vissāsikabhāvo. “Tato paṭṭhāya so”ti vā pāṭho.

1. Visuddhi 1. 57 piṭṭhe.

Dve asaṅkhyeyyāni pūritapāramissāti idaṃ sā paramparāya sotapatitaṃ atthaṃ gahetvā āha. **Adinnavipākassāti** avipakkavipākassa. **Bhaddake kāleti** yutte kāle. **Nakkhattanti** nakkhattena lakkhitaṃ chaṇaṃ. Tasmim̐ tasmim̐ hi nakkhatte anubhavitabbachaṇāni nakkhattāni nāma, itarāni pana chaṇāni nāma. Sammāpatitadukkhato vimocanena tato niyyānāvahatāya icchitatthassa labhāpanato ca **niyyānikaṃ**. **Tesanti** suvaṇṇapadumānaṃ. **Olambakāti** suvaṇṇaratanavicittā ratanadāmā. **Puññaniyāmenāti** puññānubhāvasiddhena niyāmena. Svassa bārāṇasirajjaṃ dātuṃ katokāso. **Phussarathanti** maṅgalarathaṃ. Setacchatta-unḥisavālabhijanikhaggamaṇipādukāni **pañcavidhaṃ rājakakudhabhaṇḍanti** vadanti. Idha pana setacchattaṃ visuṃ gahitanti sīhāsanaṃ pañcamaṃ katvā vadanti. **Pārupanakaṇṇanti** pārupanavatthassa dasantaṃ. Dibbavatthadāyipuññānubhāvacodito “**nanu tātā thūlan**”ti āha. **Aho tapassīti** aho kapaṇo ahaṃ rājāti attho. **Buddhānaṃ saddahitvāti** buddhānaṃ sāsanaṃ saddahitvā. **Caṅkamanasatānīti iti**-saddo ādyattho. Tena hi aggisālādīni pabbajitasārappāni thānāni saṅgaṇhāti.

Sādhukīlanti ariyānaṃ parinibbutaṭṭhāne kātabbasakkāraṃ vadati. **Nappamajji, nirogā ayyāti** pucchitākāradassanaṃ. **Parinibbutā devāti** devī paṭivacanaṃ adāsi. **Paṭiyādetvāti** niyyātetvā. **Samaṇakapabbajjanti** samitapāpehi ariyehi anuṭṭhātabbapabbajjaṃ. So hi rājā paccekabuddhānaṃ vesassa diṭṭhattā “idameva bhaddakan”ti tādisaṃyeva līgaṃ gaṇhi. **Tatthevāti** brahmaloke eva. Vīsatiṃ vasse sampatteti āharitvā sambandho. Brahmalo kato cavitvā nibbattattā, brahmacariyādhikāraṃ ca cirakālasambhūtattā “**evarūpaṃ kathaṃ mā kathethā**”ti āha. Vīsati dharaṇāni **nikkhanti** vadanti, pañcapalaṃ **nikkhanti** apare. **Itthākaroti** itthiratanassa uppattiṭṭhānaṃ. **Ayyadhītāti** amhākaṃ ayyassa dhītā, bhaddakāpilānīti attho. **Samānapaṇṇanti** sadisapaṇṇaṃ sadisalekhaṃ kumārassa kumārikāya ca yuttaṃ paṇṇalekhaṃ. Te purisā samāgataṭṭhānato magadharaṭṭhe mahātitthagāmaṃ maddaraṭṭhe sāgalanagarañca uddissa apakkamantā aññaṃaññaṃ vissajjantā nāma hontīti “**ito ca etto ca pesesun**”ti vuttā.

Pupphadāmanti hatthihatthappamānaṃ pupphadāmaṃ. **Tānīti** tāni ubhohi ganthāpitāni dve pupphadāmāni. **Teti** ubho bhaddā ceva pippalikumāro

ca. **Lokāmisenā**ti kāmassādena. **Asaṁsaṭṭhā**ti na saṁyuttā ghaṭe jalantena viya padīpena ajjhāsaye samujjalantena vimokkhabījēna samussāhitacittatā. **Yantabaddhā**ti sassasampādanattham tattha tattha dvārakavāṭayojanavasena baddhāni nikkhamanatumbāni. **Kammantoti** kasikammakaraṇaṭṭhānam. **Dāsikagāmā**ti dāsānam vasanagāmā. **Osāretvā**ti pakkhipitvā. **Ākappakuttavasenā**ti ākāravasena kiriyāvasena. **Ananucchavikanti** pabbajitabhāvassa ananurūpaṁ. **Tassa matthaketi** dvedhāpathassa Dvidhābhūtaṭṭhāne. Etesaṁ saṅghaṁ kātuṁ vaṭṭatīti nisīdatīti sambandho. Sā pana tattha satthu nisajjā edisīti dassetuṁ “**nisīdanto panā**”ti-ādi vuttaṁ. Tattha yā buddhānam aparimitakālasambhūtācinteyyāpariññeyyapuññasambhārūpacayanibhattā rūpappabhāvabuddhaguṇavijjotitā dvattiṁsamahāpurisalakkhaṇa-asīti-anubyañjanasamujjalitā byāmappabhāketumālālaṅkatā sabhāvasiddhitāya akittimā rūpakāyasirī, taṁyeva mahākassapassa adiṭṭhapubbappasādasamvaddhanattham aniggūhitvā nisinno bhagavā “**buddhavesaṁ gahetvā -pa- nisīdī**”ti vutto. Asītihatthappadesaṁ byāpetvā pavattiyā **asītihatthā**ti vuttā. **Satasākhoti** bahuśākho anekasākho. **Suvaṇṇavaṇṇova ahosi** nirantaraṁ buddharasmīhi samantato samokīṇṇabhāvato.

Tīsu ṭhānesūti dūrato nātidūre āsanneti tīsu ṭhānesu. **Tīhi ovādehī**ti “tasmātiha te kassapa evaṁ sikkhitabbaṁ ‘tibbaṁ me hirottappaṁ paccupaṭṭhitaṁ bhavissati thesesu navesu majjhimesū’ti, evaṁ hi te kassapa sikkhitabbaṁ. Tasmā tiha te kassapa evaṁ sikkhitabbaṁ ‘yaṁ kiñci dhammaṁ suṇissāmi kusalūpasamhitam, sabbaṁ taṁ aṭṭhiṁ katvā manasi karitvā sabbaṁ cetasā samannāharitvā ohitasoto dhammaṁ suṇissāmī’ti, evaṁ hi te kassapa sikkhitabbaṁ. Tasmātiha te kassapa evaṁ sikkhitabbaṁ ‘sātasahagatā ca me kāyagatāsati na vijahissatī’ti, evaṁ hi te kassapa sikkhitabbaṁ”ti¹ imehi tīhi ovādehi. Ettha hi bhagavā paṭhamam ovādam therassa brāhmaṇajātikattā jātimānappahānatthamabhāsi, dutiyam bāhusaccaṁ nissāya uppajjanaka-ahamkārapahānattham, tatiyam upadhisampattiṁ nissāya

1. Saṁ 1. 420 piṭṭhe.

uppajjanaka-attasinehappahānatthaṃ. **Mudukā kho tyāyanti** mudukā kho te ayaṃ. Kasmā pana bhagavā evamāha? Therena saha cīvaraṃ parivattetukāmatāya. Kasmā parivattetukāmo jātoti? Therāṃ attano ṭhāne ṭhapetukāmatāya. Kiṃ sārīputtamoggallānā natthīti? Atthi, evaṃ panassa ahosi “ime na ciraṃ ṭhassanti, kassapo pana vīsativassasatāyuko, so mayi parinibbute sattapaṇṇiguhāyaṃ vasitvā dhammavinayasasaṅgahaṃ katvā mama sāsanaṃ pañcavassasahassaparimāṇakālappavattanakaṃ karissatīti attano ṭhāne ṭhapesi. Evaṃ bhikkhū kassapassa sussūsitabbaṃ maññissanti”ti. Tasmā evamāha.

Candūpamoti candasadiṣo hutvā. Kiṃ parimaṇḍalatāya? No, apica kho yathā cando gaganatalaṃ pakkhandamāno na kenaci saddhiṃ santhavaṃ vā sinehaṃ vā ālayaṃ vā karoti, na ca na hoti mahājanassa piyo manāpo, ayampi evaṃ kenaci saddhiṃ santhavādīnaṃ akaraṇena bahujaṇassa piyo manāpo candūpamo hutvā khattiyakulādīni cattāri kulāni upasaṅkamatīti attho. **Apakasseva kāyaṃ apakassa cittanti** teneva santhavādīnaṃ akaraṇena kāyaṇca cittaṇca apakaḍḍhitvā, apanetvāti attho. **Niccaṃ navoti** niccanavakova, āgantukasadiṣo hutvāti attho. Āgantuko hi paṭipāṭiyā samattagehaṃ pavisitvā sace naṃ gharasāmikā disvā “amhākampi puttabhātaro vippavāsaṃ gantvā evaṃ vicariṃsū”ti anukampamānā nisīdāpetvā bhojenti, bhuttamattoyeva “tumhākaṃ bhājanaṃ gaṇhathā”ti uṭṭhāya pakkamati, na tehi saddhiṃ santhavaṃ vā karoti, kiccakaraṇīyāni vā saṃvidahati, evamayampi paṭipāṭiyā sampattaṃ gharaṃ pavisitvā yaṃ iriyāpathe pasannā manussā denti, taṃ gahetvā chinnaśanthavo tesāṃ kiccakaraṇīye abyāvaṭo hutvā nikkhamatīti dīpeti.

Appagabbhoti¹ nappagabbho, atṭhaṭṭhānena kāyapāgabbhiyena, catuṭṭhānena vacīpāgabbhiyena, anekaṭṭhānena manopāgabbhiyena ca virahitoti attho. Atṭhaṭṭhānaṃ kāyapāgabbhiyaṃ nāma saṃghagaṇapuggalabhojanasālaṇṭhāgharaṇaṇatitṭhabhikkhācāramaggesu antaragharapavesane ca kāyena appatirūpakaraṇaṃ. Catuṭṭhānaṃ vacīpāgabbhiyaṃ nāma saṃghagaṇapuggala-antaragharesu appatirūpavācānicchāraṇaṃ. Anekaṭṭhānaṃ manopāgabbhiyaṃ nāma tesu

1. Appagabboti (Sī)

tesu ṭhānesu kāyavācāhi ajjhācāraṃ anāpajjitvāpi manasā kāmavitakkādīnaṃ vitakkanāṃ. Sabbesampi imesaṃ pāgabbhiyānaṃ abhāvena appagabbho hutvā kulāni upasaṅkamatīti attho. Kassapasaṃyuttēna ca candūpamappaṭipadādītherassa dhutavādesu aggabhāvassa bodhitattā vuttaṃ “**etadeva kassapasaṃyuttaṃ aṭṭhuppattim katvā**”ti.

Anuruddhattheravatthu

192. Pañcame **bhojanapapañcamattanti** gocaragāme piṇḍāya caraṇāhāraparibhogasaññitaṃ bhojanapapañcamattaṃ. **Dīparukkhānanti** lohadantakaṭṭhamayānaṃ mahantānaṃ dīparukkhānaṃ. Lohamāyesupi hi tesu dīpādhāresu dīparukkhakāti ruḷhiresā daṭṭhabbā. Olambakadīpamaṇḍaladīpasañcaraṇadīpādikā **sesadīpā**.

Anupariyāyi padakkhiṇakaraṇavasena. **Ahaṃ tenāti**¹ yena tuyhaṃ attho, ahaṃ tena padhāremi, tasmā taṃ āharāpetvā gaṇhāti attho. **Suvaṇṇapātiyaṃyevassa bhattaṃ uppajjīti** devatānubhāvena uppajji, na kiñci pacanakiccaṃ atthi. **Satta mahāpurisavitakke vitakkesīti** “appicchassāyaṃ dhammo, nāyaṃ dhammo mahicchassā”ti-ādike² satta mahāpurisavitakke vitakkesi. **Aṭṭhameti** “nippapañcārāmassāyaṃ dhammo, nāyaṃ dhammo papañcārāmassā”ti² etasmiṃ purisavitakke.

Mama saṅkappamaññāyāti “appicchassāyaṃ dhammo, nāyaṃ dhammo mahicchassā”ti² ādinā mahāpurisavitakkavasena āradhamattaṃ³ matthakaṃ pāpetuṃ asamatthabhāvena ṭhitaṃ mama saṅkappaṃ jānitvā. **Manomāyēnāti** manomāyena viya manasā nimmitasādisena, pariṇāmitenāti attho. **Iddhiyāti** “ayaṃ kāyo idaṃ cittaṃ viya hotū”ti evaṃ pavattāya adhiṭṭhāniddhiyā.

Yadā me ahu saṅkappoti yasmiṃ kāle mayhaṃ “kīdiso nu kho aṭṭhamo mahāpurisavitakko”ti parivitakko ahosi, yadā me ahu saṅkappo, tato mama saṅkappamaññāya iddhiyā upasaṅkami, uttari desayīti yojanā. **Uttari desayīti** “nippapañcārāmassāyaṃ dhammo

1. Aṭṭhakathāyaṃ nu dissati.

2. Dī 3. 249, 250; Am 3. 65 piṭṭhesu.

3. Āradhamatthaṃ (?)

nippapañcaratino, nāyaṃ dhammo papañcārāmassa papañcaratino”¹ti imaṃ aṭṭhamāṃ mahāpurisavitakkaṃ pūrento upari desayi. Taṃ pana desitaṃ dassento āha “**nippapañcarato buddho, nippapañcamadesayī**”ti, papañcā nāma rāgādayo kilesā, tesāṃ vūpasamanatāya tadabhāvato ca lokuttaradhammā nippapañcā nāma. Yathā taṃ pāpuṇāti, tathā dhammaṃ desesi, sāmukkaṃsikaṃ catusaccadesanaṃ adesayīti attho.

Tassāhaṃ dhammamaññāyāti tassa satthu desanādhammaṃ jānitvā. **Vihāsinti** yathānusiṭṭhaṃ paṭipajjanto viharim. **Sāsane ratoti** sikkhattayasaṅgahe sāsane abhirato. **Tisso vijjā anuppattā**ti pubbenivāsañāṇaṃ dibbacakkhuñāṇaṃ āsavakkhayañāṇanti imā tisso vijjā mayā anuppattā sacchikatā. Tato **eva kataṃ buddhassa sāsanaṃ**, anusīṭṭhi ovādo anuṭṭhitoti attho.

Bhaddiyattheravatthu

193. Chaṭṭhe ucca-saddena samānattho uccā-saddoti āha “**uccākulikānanti ucce kule jātāna**”ti. **Kālī sā devī**ti kālavaṇṇatāya kālī sā devī. Kulānukkamena rajjānuppatti mahākulinassevāti vuttaṃ “**soyeva cā**”ti-ādi.

Lakuṇḍakabhaddiyattheravatthu

194. Sattame **rittakoti** deyyavatthurahito. **Guṇe āvajjetvā**ti bhagavato rūpaguṇe ceva ākappasampadādiguṇe ca attano adhippāyaṃ ñatvā ambapakkassa paṭiggahaṇaṃ paribhuñjananti evamādi ke yathā-upaṭṭhite guṇe āvajjetvā.

Piṇḍolabhāradvājattheravatthu

195. Aṭṭhame atītanādabhāvena sīhassa viya nādo sīhanādo, so etesaṃ atthīti sīhanādikā, tesāṃ **sīhanādikānaṃ**. Garahitabbapasāmsitabbadhamme yāthāvato jānantasseva garahā

1. Dī 3. 249, 250; Am 3. 65 piṭṭhesu.

pasamsā ca yuttarūpāti āha “**buddhā ca nāmā**”ti-ādi. **Khīṇājātī**ti-ādīhi paccavekkhaṇāñāṇassa bhūmiṃ dasseti. Tena hi ñāṇena ariyasāvako paccavekkhanto “**khīṇā jātī**”ti-ādiṃ pajānāti. Katamā panassa jātī khīṇā, kathaṇca pajānātīti? Na tāvassa atītā khīṇā pubbeva khīṇattā, na anāgatā anāgate vāyāmābhāvato, na paccuppannā vijjamānattā. Yā pana maggassa abhāvitattā uppajjeyya ekacatupañcavokārabhavesu ekacatupañcakkhandhappabhedā jātī, sā maggassa bhāvitattā anuppādadhammataṃ āpajjanena khīṇā. Taṃ so maggabhāvanāya pahīnakilese paccavekkhitvā “**kilesābhāve vijjamānampi kammaṃ āyatīṃ appaṭisandhikaṃ hotī**”ti jānanto pajānāti.

Vusitanti vuṭṭhaṃ parivuṭṭhaṃ, kataṃ caritaṃ niṭṭhitanti attho. **Brahmacariyanti** maggabrahmacariyaṃ. Puthujjanakalyāṇakena hi saddhiṃ satta sekkhā maggabrahmacariyaṃ vasanti nāma, khīṇāsavo vuṭṭhavāso. Tasmā ariyasāvako attano brahmecariyavāsaṃ paccavekkhanto vusitaṃ brahmecariyaṃ”ti pajānāti. **Kataṃ karaṇīyanti** catūsu saccesu catūhi maggehi pariññāpahānasacchikiriyābhāvanābhisamayavasena soḷasavidhaṃ kiccaṃ niṭṭhāpitanti attho. Puthujjanakalyāṇakādayo hi taṃ kiccaṃ karonti, khīṇāsavo katakaraṇīyo. Tasmā ariyasāvako attano karaṇīyaṃ paccavekkhanto “**kataṃ karaṇīyaṃ**”ti pajānāti. **Nāparaṃ itthattāyāti** idāni puna itthabhāvāya evaṃ soḷasavidhakiccabhāvāya, kilesakkhayāya vā maggabhāvanāya kiccaṃ me natthīti pajānāti. Atha vā **itthattāyāti** itthabhāvato imasmā evaṃpakārā idāni vattamānakkhandhasantānā aparāṃ khandhasantānaṃ mayhaṃ natthi, ime pana pañcakkhandhā pariññātā tiṭṭhanti chinnaṃulakā rukkhā viya, te carimakaviññāṇanirodhena anupādāno viya jātavedo nibbāyissanti pajānāti.

Mantāpīputta-puṇṇattheravatthu

196. Navame aṭṭharasasupī vijjāṭṭhānesu nipphattiṃ gatattā “**sabbasippesu kovido hutvā**”ti vuttaṃ. Abhidaya-abbhaññāvahasveva¹ dhammassa tattha upalabbhanato “**mokkhadhammaṃ adisvā**”ti² vuttaṃ. Tenāha “**idam vedattayam**

1. Abbhudaya-abbhaññāvahasveva (?)

2. Mokkhadhammaṃ gavesanto adisvāti (Sī, Ka)

nāmā”ti-ādi. Tathā hi anena duggatiparimuccanampi dullabham, abhiññāparivārānaṃ aṭṭhannaṃ samāpattīnaṃ lābhitāya sayam ekadesena upasanto paramukkaṃsagataṃ uttamadamathasamathaṃ anaññasādhāraṇaṃ bhagavantaṃ sambhāvento “**ayaṃ puriso**”ti-ādimāha. **Piṭakāni gahetvā āgacchantīti** phalabhājanāni gahetvā assāmikāya¹ āgacchanti. **Buddhānanti** gāravavasena bahuvacananiddeso kato. **Paribhuñjīti** devatāhi pakkhittadibbojaṃ vanamūlaphalāphalaṃ paribhuñji. Patte patiṭṭhāpitasamanantarameva hi devatā tattha dibbojaṃ pakkhipimsu. **Sammasitvāti** paccavekkhitvā, parivattetvāti ca vadanti. **Arahattaṃ pāpuṇimsūti** mahādevattherassa anumodanakathāya anupubbikathāsakkhikāya suvisodhitacittasantānā arahattaṃ pāpuṇimsu.

Dasahi kathāvatthūhīti appicchakathā santuṭṭhikathā pavivekakathā asaṃsaggakathā vīriyārambhakathā sīlasampadākathā samādhisampadākathā paññāsampadākathā vimuttisampadākathā vimuttiñāṇadassanasampadākathāti imehi dasahi kathāvatthūhi. **Jātibhūmiratṭhavāsīnoti** jātibhūmivantadesavāsīno, satthu jātadesavāsīnoti attho. **Sīsānulokikoti** purato gacchantassa sīsaṃ anu anu passanto. **Okāsaṃ sallakkhetvāti** sākacchāya avasaraṃ sallakkhetvā. **Sattavisuddhikkamaṃ pucchīti** “kiṃ nu kho āvuso sīlavisuddhatthaṃ bhagavati brahmacariyaṃ vussatī”ti-ādinā² satta visuddhiyo pucchi. **Dhammakathikānaṃ aggaṭṭhāne ṭhapesi** savisesena dasakathāvatthulābhitāya.

Mahākaccānattheravatthu

197. Dasame **saṅkhittena kathitadhammassāti** madhupiṇḍikasuttantadesanāsu viya saṅkhepena desitadhammassa. **Taṃ desanaṃ vitthāretvāti** taṃ saṅkhepadesanaṃ āyatanādivasena vitthāretvā. **Atthaṃ vibhajamānānanti** tassā saṅkhepadesanāya atthaṃ vibhajitvā kathentānaṃ. **Atthavasena vāti** “ettakā etassa atthā”ti atthavasena vā desanaṃ pūretuṃ sakkonti. **Byañjanavasena vāti** “ettakāni ettha byañjanāni desanāvasena vattabbāni”ti byañjanavasena vā pūretuṃ sakkonti. **Ayaṃ pana mahākaccānatthero ubhayavasenaṃ sakkoti** tassa saṅkhepena uddiṭṭhassa vitthārena satthu

1. Assamaṃ (Sī)

2. Ma 1. 201 piṭṭhe.

ajjhāsayānurūpaṃ desanato, kasmā tattha aggoti vutto. **Vuttanayenevāti** “pātova subhōjanam bhuñjitvā uposathaṅgāni adhiṭṭhāyā”ti-ādinā heṭṭhā vuttanayeneva. **Aññehīti**¹ aññasam itthīnam keschi ativiya dīghā. Na kevalaṇca dīghā eva, atha kho siniddhanīlamudukañcikā ca. **Nikkesīti** appakesī yathā “anudarā kaññā”ti.

Paṇiyanti vikketabbabhaṇḍam. **Āvajjetvāti** upanissayam kesānam pakatibhāvāpattim ca āvajjetvā. **Gāravenāti** muṇḍasīsāpi there gāravena ekavacaneneva āgantvā. **Nimantetvāti** svātanāya nimantetvā. **Imissā itthiyāti** yathāvuttaseṭṭhihītarāmāha. **Diṭṭhadhammikovāti** avadhāraṇam aṭṭhānapayuttam, diṭṭhadhammiko yasapaṭilābhova ahoṣīti attho. **Yasapaṭilābhoti** ca bhavasampattipaṭilābho. Sattasu hi javanacetanāsu paṭhamā diṭṭhadhammavedanīyaphalā, pacchimā upapajjavedanīyaphalā, majjhe pañca aparāpariyavedanīyaphalā, tasmā paṭhamam ekaṃ cetanam ṭhapetvā sesā yathāsakam paripuṇṇaphaladāyino honti, paṭhamacetanāya pana diṭṭhadhammiko yasapaṭilābhova ahoṣi.

Paṭhamavaggavaṇṇanā niṭṭhitā.

2. Dutiyavaggavaṇṇanā

Cūḷapanthakattheravatthu

198-200. Dutiyassa paṭhame **manena nibbattitanti** abhiññāmanena uppāditam. **Manena katakāyoti** abhiññācittena desantaram pattakāyo. **Manena nibbattitakāyoti** abhiññāmanasā nimmitakāyo “aññam kāyam abhinimmināti”ti-ādīsu² viya. **Ekasadiseyevāti** attasadiseyeva. **Ekavidhamevāti** attanā katappakārameva. Etapparamo hi yebhuyyena sāvakānam iddhinimmānavidhi. **Aggo nāma jāto** ekadesena satthu iddhinimmānanuvidhānato.

1. Aññāhīti (Aṭṭhakathāyam)

2. Dī 1. 73; Khu 9. 389 piṭṭhesu.

Lābhitāyāti ettha lābhīti ikāro atisayattho. Tena therassa catunnaṃ rūpāvacarajjhānānaṃ atisayena savisesalābhitāṃ dasseti.

Arūpāvacarajjhānānaṃ lābhitāyāti etthāpi eseṇa nayo. Na kevalañcetā cetosaññāvivaṭṭakusalatā rūpārūpajjhānalābhitāya eva, atha kho imehipi kāraṇehīti dassetuṃ “**cūlapanthako cā**”ti-ādi **vuttaṃ**. **Cetoti** cettha cittaśīsena samādhī vutto, tasmā cetaso samādhissa vivaṭṭanaṃ cetovivaṭṭo, ekasmiṃyevārammaṇe samādhicittaṃ vivaṭṭetvā heṭṭhimassa heṭṭhimassa uparūpari hāpanato rūpāvacarajjhānalābhī **cetovivaṭṭakusalo nāma**. “Sabbaso rūpasaññānaṃ”ti-ādinā¹ vuttasaññā atikkamitvā

“ākāsānañcāyatanasaññāsahagataṃ -pa-nevasaññānāsaññāyatanasaññāsahagataṃ”ti¹ saññāsīsena vuttajjhānānaṃ vivaṭṭakusalo, tathā itthipurisādisaññā niccasaññādito cittaṃ vivaṭṭetvā kevale rūpārūpadhammatte asaṅkhate nibbāne ca visesato vaṭṭanato ca suññatānupassanābahulo **saññāvivaṭṭakusalo**. **Samādhikusalatāya** cetovivaṭṭakusalatā tabbahulavihāritāya. Tathā **vipassanākusalatāya** saññāvivaṭṭakusalatā. **Ekoti** cūlapanthakattheraṃ vadati. **Samādhilakkhaṇeti** savitakkasavicārādisamādhisabhāve. Puna **ekoti** mahāpanthakattheramāha.

Vipassanālakkhaṇeti satta-anupassanā-aṭṭhārasamahāvipassanādivipassanāsabhāve. **Samādhigāḷhoti** samādhismiṃ ogāḷhacitto subhāvitabhāvanatā. **Aṅgasamkhitteti** caturaṅgikativaṅgikādivasena jhānaṅgānaṃ saṅkhipane.

Ārammaṇasamkhitteti kasiṇugghāṭimākāsādinibbattanena kasiṇādi-ārammaṇānaṃ saṅkhipane. **Aṅgavavatthāpaneti** vitakkādīnaṃ jhānaṅgānaṃ vavatthāpane. **Ārammaṇavavatthāpaneti** pathavīkasiṇādi-jjhānārammaṇānaṃ vavatthāpane.

Jhānaṅgehīti rūpāvacarajjhānaṅgehi, jhānaṅgāneva jhānaṃ. Puna **jhānaṅgehīti** arūpāvacarajjhānaṅgehi. **Bhātāti** jeṭṭhabhātā. **Assāti** kuṭumbiyassa. **Suvaṇṇapūjanti** sovaṇṇamayāṃ pupphapūjāṃ katvā. **Devapureti** tāvatimsabhavane Sudassanamahānagare. **Aggadvārenāti** tasmim divase aggaṃ sabbapaṭṭhamāṃ vivaṭṭena nagaradvārena nikkhamitvā.

1. Abhi 1. 68 piṭṭhe.

Kokanadanti padumavisesanam yathā “kokāsakan”ti. Tam kira bahupattam vaṇṇasampannam atisugandhañca hoti. “Kokanadam nāma setapaduman”tipi vadanti. **Pātoti** pageva. Ayaṃ hettha attho—yathā kokanadasaṅkhātam padumam pāto sūriyuggamanavelāyam phullam vikasitam avītagandham siyā virocamaṇam, evaṃ sarīragandhena guṇagandhena ca sugandham saradakāle antalikkhe ādiccamiva attano tejasā tapantam aṅgehi niccharaṇakajutiyā aṅgīrasam sammāsambuddham passāti.

Cūḷapanthako kira kassapasammāsambuddhakāle pabbajitvā paññavā hutvā aññatarassa dandhabhikkhuno uddesagahaṇakāle parihāsakeḷim akāsi. So bhikkhu tena parihāsenā lajjito neva uddesam gaṇhi, na sajjhāyamakāsi. Tena kammenāyam pabbajitvāva dandho jāto, tasmā gahitagahitapadam upari-uparipadam gaṇhantassa nassati. **Iddhiyā abhisāṅkharitvā suddham coḷakhaṇḍam adāsīti** tassa pubbaḥetum disvā tadanurūpe kammaṭṭhāne niyojento suddham coḷakhaṇḍam adāsi. So kira pubbe rājā hutvā nagaram padakkhiṇam karonto nalāṭato sede muccante parisuddhena sāṭakena nalāṭam puñchi, sāṭako kiliṭṭho ahosi. So “imaṃ sarīram nissāya evarūpo parisuddhasāṭako pakatiṃ jahitvā kiliṭṭho jāto, aniccā vata saṅkhārā”ti aniccasaññaṃ paṭilabhi. Tena kāraṇenassa rajoharaṇameva paccayo jāto.

Lomānīti coḷakhaṇḍatantagata-aṃsuke vadati. **Kiliṭṭhadhātukānīti** kiliṭṭhasabhāvāni. **Evaṃgatikamevāti** idaṃ cittampi bhavaṅgavasena pakatiyā paṇḍaram parisuddham rāgādisampayuttadhammavasena saṃkiliṭṭham jātanti dasseti. **Nakkhattam samānetvāti** nakkhattam samannāharitvā, āvajjetvāti attho. **Biḷārassatthāyāti** biḷārassa gocaratthāya. **Jalapathakammikenāti** samuddakammikena. **Cārinti** khāditabbaṭṭam. **Saccakāranti** saccabhāvāvaham kāram, “attannā gahite bhaṇḍe aññesaṃ na dātabban”ti vatvā dātabbalañjanti vuttam hoti. **Tatiyena paṭihārenāti** tatiyena sāsanena. **Pattikā hutvāti** sāmīno hutvā.

Appakenapīti thokenapi parittenapi. **Medhāvīti** paññavā. **Pābhatenāti** bhaṇḍamūlena. **Vicakkhaṇoti** vohāraṇakusalo. **Samuṭṭhāpeti attānanti** mahantam dhanam yasañca uppādetvā tattha attānam saṇṭhapeti

patiṭṭhāpeti. Yathā kiṃ? **Aṇuṃ aggimva sandhamam**, yathā paṇḍito puriso parittakam aggim anukkamena gomayacuṇṇādīni pakkhipitvā mukhavātena dhamento samuṭṭhāpeti vaḍḍheti, mahantaṃ aggikkhandham karoti, evameva paṇḍito thokampi pābhataṃ labhitvā nānā-upāyehi payojetvā dhanañca yasañca vaḍḍheti, vaḍḍhetvā puna tattha attānaṃ patiṭṭhāpeti. Tāya eva vā pana dhanassa mahantatāya attānaṃ samuṭṭhāpeti, abhiññātaṃ pākaṭaṃ karotīti attho.

Subhūtittheravatthu

201-202. Tatiye **raṇāti hi rāgādayo kilesā vuccantīti** “saraṇā dhammā”ti-ādīsu¹ rāgādayo kilesā “raṇā”ti vuccanti. Raṇanti etehīti **raṇā**. Yehi abhibhūtā sattā nānappakārena kandanti paridevanti, tasmā te rāgādayo “raṇā”ti vuttā. **Desitaniyāmato anokkamitvāti** desitānokkamanato anupagantvā deseti, satthārā desitaniyāmeneva anodissakam katvā dhammaṃ desetīti vuttaṃ hoti. **Evanti** evaṃ mettājhānato vuṭṭhāya bhikkhāgahaṇe sati. **Bhikkhādāyakānaṃ mahapphalaṃ bhavissatīti** idam **Cūlaccharāsaṅghātasuttena**² dīpetabbaṃ. Accharāsaṅghātamattampi hi kālaṃ mettacittaṃ āsevantassa bhikkhuno dinnadānaṃ mahapphalaṃ hoti mahānisaṃsaṃ, tena ca so amoghaṃ raṭṭhapiṇḍaṃ bhuñjatīti ayamatto tattha āgatoyeva. **Nimittaṃ gaṇhitvāti** ākāraṃ sallakkhetvā.

Khadiravaniyarevatattheravatthu

203. Pañcame **vanasabhāgati** sabhāgaṃ vanaṃ, **sabhāganti** ca sappāyanti attho. Yaṃ hi pakativiruddhaṃ byādhiviruddhañca na hoti, taṃ “sabhāgaṃ”ti vuccati. **Udakasabhāgati**-ādīsupi imināva nayena attho veditabbo. **Kalyāṇakammāyūhanakkhaṇoti** kalyāṇakammūpacayassa okāso. **Tiṇṇaṃ bhātikānanti** upatisso cundo upasenoti imesaṃ tiṇṇaṃ jeṭṭhabhātikānaṃ. **Tissannañca bhaginīnanti** cālā upacālā sīsupacālāti imesaṃ tissannaṃ jeṭṭhabhaginīnaṃ. Ettha ca sārīputtatthero sayam

1. Abhi 1. 13 piṭṭhe.

2. Am 1. 9 piṭṭhe.

pabbajitvā cālā upacālā sīsūpacālāti tisso bhaginiyo, cundo upasenoti ime bhātaro pabbājesi, revatakumāro ekova gehe avasissati. Tena vuttaṃ “**amhākaṃ -pa- pabbājenti**”ti. **Mahallakatarāti** vuddhatarā. Idañca kumārikāya cirajīvitam abhikaṃkhamānā āhaṃsu. Sā kira tassa ayyikā vīsativassasatikā khaṇḍadantā palitakesā valittacā tilakāhatagattā gopānasivaṅkā ahosi. **Pidhāvanikanti** vidhāvanakīlikam. **Tissannaṃ sampattīnanti** anussavavasena manussadevamokkhasampattiyo sandhāya vadati, manussadevabrahmasampattiyo vā. **Sīvalissa puññaṃ vīmaṃsissāmāti** “sīvalinā katapuññaṃ vipākadānaṭṭhānamidan”ti ñatvā evamāha. **Sabhāgaṭṭhānanti** samam desam.

Tam bhūmirāmaṇeyyakanti kiñcāpi arahanto gāmate kāyavivekaṃ na labhanti, cittavivekaṃ pana labhanteva. Tesam hi dibbappaṭibhāgānipi ārammaṇāni cittaṃ cāletum na sakkonti, tasmā gāmo vā hotu araṇṇādīnaṃ vā aññatarāṃ, yattha arahanto viharanti, tam bhūmirāmaṇeyyakam, so bhūmippadeso ramaṇīyo evāti attho.

Kaṅkhārevatatttheravattu

204. Chaṭṭhe **akappiyo āvuso guḷoti** ekadivasam thero antarāmagge guḷakaraṇam okkamitvā guḷe piṭṭhampi chārikampi pakkhitte disvāna “akappiyo guḷo, sāmiso na kappati guḷo vikāle paribhuñjitun”ti kukkucāyanto evamāha. **Akappiyā muggāti** ekadivasam antarāmagge vacce muggam jātam disvā “akappiyā muggā, pakkāpi muggā jāyanti”ti kukkucāyanto evamāha. Sesamettha sabbam uttānameva.

Soṇakoḷivisattheravattu

205. Sattame **hāpetabbameva ahosi** accāraddhavīriyattā. **Udakena samupabyūlheti** udakena thalam ussāretvā tattha tattha rāsikate. **Haritūpalittāyāti** gomayaparibhaṇḍakatāya. **Tividhena udakena posentīti** khīrodakam gandhodakam kevalodakanti evam tividhena udakena posenti paripārenti. **Parissāvetvāti** parisodhetvā gahite taṇḍuleti yojetabban. **Devo maññeti** devo

viya. **Vīṇovādenā**ti “taṃ kiṃ maññasi soṇa yadā te vīṇāya tantiyo accāyatā honti, api nu te vīṇā tasmim̐ samaye saravatī vā hoti kammaññā vāti. No hetam̐ bhanteti. Evameva kho soṇa accāraddhavīriyam̐ uddhaccāya saṃvattati, atisithilavīriyam̐ kosajjāya saṃvattati. Tasmātiha tvaṃ soṇa vīriyasamataṃ adhiṭṭhaha, indriyānañca samataṃ paṭivijjhā”¹ti¹ evaṃ vīṇaṃ upamaṃ katvā pavattitena vīṇopamovādena. **Vīriyasamathayojanattthāyā**ti vīriyassa samathena yojanattthāya.

Soṇakuṭikaṇṇattheravatthu

206. Aṭṭhame **kuṭikaṇṇoti vuccatī**ti “koṭikaṇṇo”ti vattabbe “kuṭikaṇṇo”ti voharīyati. Kulaghare bhavā **kulagharikā**. Sā kira avantiraṭṭhe kulaghare mahāvibhavassa seṭṭhissa bhariyā. **Dasabalassa dhammakatham̐ sutvā sotāpattiphale paṭiṭṭhāya cintesī**ti idaṃ aṅguttarabhāṇakānaṃ matena vuttaṃ. **Suttanipātaṭṭhakathāyam**² pana “sapaṇiso bhagavantaṃ upasaṅkamma dhammadesanaṃ assosi, na ca kañci visesaṃ adhigañchi. Kasmā? So hi dhammaṃ suṇanto hemavataṃ anussarivā ‘āgato nu kho me sahāyako, no’ti disādisaṃ”³ oloketvā taṃ apassano ‘vañcito me sahāyo, yo evaṃ vicittappaṭibhānaṃ bhagavato desanaṃ na suṇātī’ti vikkhittacitto ahoṣī”ti vuttaṃ.

Yasmā paṭisandhijāti-abhinikkhamanabodhiparinibbānesveva dvattimsa pubbanimittāni hutvāva paṭivigacchanti, na ciraṭṭhitikāni honti, **dhammacakkappavattane**⁴ pana tāni savisesāni hutvā cirataraṃ ṭhatvā nirujjhanti, tasmā vuttaṃ “**tiyojanasahassaṃ himavantaṃ akālapupphitaṃ disvā**”ti-ādi. **Aggabalakāyā**ti sabbapurato gacchantā balakāyā. **Kena pupphitabhāvaṃ jānāsī**ti kena kāraṇena himavantassa pupphitabhāvaṃ jānāsīti, yena kāraṇena imaṃ akālapupphapāṭihāriyaṃ jātaṃ, taṃ jānāsīti vuttaṃ hoti. **Tassa pavattitabhāvanti** tassa dhammacakkassa bhagavatā pavattitabhāvaṃ. **Sadde nimittaṃ gaṇhī**ti sadde ākāraṃ sallakkhesi. **Tatoti** “ahaṃ ‘etaṃ amatadhammaṃ

1. Am̐ 2. 330; Vi 3. 269 piṭṭhesu.

3. Disānudisaṃ (Sī)

2. Suttanipāta-Ṭṭha 1. 196 piṭṭhe.

4. Saṃ 3. 368; Vi 3. 14; Khu 9. 329 piṭṭhesu.

tampi jānāpessāmī'ti tava santikaṃ āgatosmī'ti yaṃ vuttaṃ, tadanantaranti attho.

Sātāgiro hemavatassa buddhuppādaṃ kathetvā taṃ bhagavato santikaṃ ānetukāmo **“ajja pannaraso”**ti-ādigāthamāha. Tattha¹ **ajjāti** ayaṃ rattindivo pakkhagaṇanato **pannaraso**, upavasitabbato **uposatho**. Tīsu vā uposathesu ajja pannaraso uposatho, na cātuddasi-uposatho, na sāmaggī-uposatho. Divi bhavāni dibbāni, dibbāni ettha atthīti **dibbāni**. Kāni tāni? Rūpāni. Taṃ hi rattim devānaṃ dasasahassilokadhātuto sannipatitānaṃ sarīravatthābharaṇavimānappabhāhi abbhādi-upakkilesavirahitāya candappabhāya ca sakalajambudīpo alaṅkato ahoṣīti ativiya alaṅkato ca parivissuddhidevassa bhagavato sarīrappabhāya. Tenāha **“dibbā ratti upaṭṭhita”**ti.

Evam rattiguṇavaṇṇanāpadesenapi sahāyassa cittaṃ pasādaṃ janento buddhuppādaṃ kathetvā āha **“anomanāmaṃ satthāraṃ, handa passāma gotaman”**ti. Tattha anomehi alāmakehi sabbākāraparipūrehi guṇehi nāmaṃ assāti anomanāmo. Tathā hissa “bujjhita saccānīti buddho, bodhetā pajāyāti buddho”ti-ādinā² nayena buddhoti anomehi guṇehi nāmaṃ. “Bhaggarāgoti bhagavā, bhaggadosoti bhagavā”ti-ādinā³ nayena bhagavāti anomehi guṇehi nāmaṃ. Esa nayo “araḥaṃ sammāsambuddho vijjācaraṇasampanno”ti-ādīsu. Diṭṭhadhammikādi-atthehi devamanusse anusāsati “imaṃ pajahatha, imaṃ samādāya vattathā”ti satthā. Taṃ **Anomanāmaṃ satthāraṃ. Handāti** vacasāyatthe nipāto. **Passāmāti** tena attānaṃ saha saṅgahetvā paccuppannabahuvacanaṃ. **Gotamanti** gotamagottaṃ. Idaṃ vuttaṃ hoti—
“satthā, na satthā”ti mā vimatiṃ akāsi, ekantabyavasito hutvāva ehi passāma gotamanti.

Evam vutte hemavato “ayaṃ sātāgiro ‘anomanāmaṃ satthāraṇ’ti bhaṇanto tassa sabbaññutaṃ pakāseti, sabbaññuno ca dullabhā loke, sabbaññupaṭiññehi pūraṇādisadiseheva loko upadduto. So pana yadi sabbaññū, addhā tādilakkhaṇaṃ patto bhavissati, tena evaṃ

1. Suttanipāta-Ṭṭha 1. 197 piṭṭhepi passitabbaṃ.

2. Khu 7. 364; Khu 8. 197; Khu 9. 172, 197 piṭṭhesu.

3. Khu 7. 162 piṭṭhe.

gahessāmī”ti cintetvā tādilakkhaṇaṃ pucchanto āha “**kacci mano**”ti-ādi. Tattha **kaccīti** pucchā. **Manoti** cittaṃ. **Supaṇihitoti** suṭṭhu ṭhapito acalo asampavedhī. Sabbesu bhūtesu **sabbabhūtesu**. **Tādinoti** tādilakkhaṇaṃ pattasseva sato. Pucchā eva vā ayaṃ “so tava satthā sabbabhūtesu tādī, udāhu no”ti. **Itṭhe anitṭhe cāti** evarūpe ārammaṇe. **Saṅkappāti** vitakkā. **Vasīkatāti** vasaṃ gamitā. Idaṃ vuttaṃ hoti—yaṃ taṃ satthāraṃ vadasi, tassa te satthuno kacci tādilakkhaṇaṃ sampattassa sato sabbabhūtesu mano supaṇihito, udāhu yāva paccayaṃ na labhati, tāva supaṇihito viya khāyati. So vā te satthā kacci sabbabhūtesu sattesu tādī, udāhu no, ye ca itṭhānitṭhesu ārammaṇesu rāgadosavasena saṅkappā uppajjeyyūṃ, tyāssa kacci vasīkatā, udāhu kadāci tesampi vasena vattatīti.

Tīṇi vassānīti soṇassa pabbajitadivasato paṭṭhāya tīṇi vassāni. Tadā kira bhikkhū yebhuyyena majjhimadeseyeva vasiṃsu, tasmā tattha katipayā eva ahesuṃ. Te ca ekasmiṃ nīgame eko dveti evaṃ visuṃ visuṃ vasiṃsu, therānaṃ katipaye bhikkhū ānetvā aññesu ānīyamānesu pubbaṃ ānīta kenacideva karaṇīyena pakkamiṃsu, kañci kālāṃ āgametvā puna tesu ānīyamānesu itare pakkamiṃsu, evaṃ punappunaṃ ānayanena sannipāto cireneva ahosi, thero ca tadā ekavīhārī ahosi. Tena vuttaṃ “**tīṇi vassāni gaṇaṃ pariyesitvā**”ti. **Tīṇi vassānīti** ca accantasāmyoge upayogavacanaṃ. **Satthu adhippāyaṃ ñatvāti** attano āṇāpaneneva “iminā saddhiṃ ekagandhakuṭiyaṃ vasitukāmo bhagavā”ti satthu adhippāyaṃ jānitvā. Bhagavā kira yena saddhiṃ ekagandhakuṭiyaṃ vasitukāmo, tassa senāsanapaññattiyaṃ ānandattheraṃ āṇāpeti.

Ajjhokāse vītināmetvāti ajjhokāse nisajjāya vītināmetvā. Yasmā bhagavā āyasmato soṇassa samāpattisamāpajjanena paṭisanthāraṃ karonto sāvakasādhāraṇā sabbā samāpattiyo anulomappaṭilomaṃ samāpajjanto bahudeva rattim ajjhokāse nisajjāya vītināmetvā pāde pakkhāletvā vihāraṃ pāvīsi, tasmā āyasmāpi soṇo bhagavato adhippāyaṃ ñatvā tadanurūpaṃ sabbā tā

samāpattiyo samāpajjanto bahudeva rattim ajjhokāse nisajjāya vītināmetvā pāde pakkhāletvā vihāram pāvisīti vadanti. Pavisitvā ca bhagavatā anuññāto cīvaratirokaraṇiyam katvā bhagavato pādapasse nisajjāya vītināmesi.

Ajjhosīti āṇāpesi. **Paṭibhātu bham bhikkhu dhammo bhāsītūti** bhikkhu tuyham dhammo bhāsītum upaṭṭhātu, ñāṇamukham āgacchatu, yathāsutam yathāpariyattam dhammam bhaṇāhīti attho. **Aṭṭhakavaggiyānīti** aṭṭhakavaggabhūtāni **kāmasuttādi**¹soḷasasuttāni. **Suggahitoti** sammā uggahito. **Sabbe vare yācīti** vinayadharapañcamena gaṇena upasampadā dhuvanhānam cammattharaṇam gaṇaṅgaṇūpāhanam cīvaravippavāsoti ime pañca vare yāci. **Sutte āgatamevāti** udānapāḷiyam āgatasuttam² sandhāya vadati.

Sīvalittheravatthu

207. Navame **sākacchitvā sākacchitvāti** raññā saddhim paṭivirujjhanavasena punappunam sākaccham katvā. **Guḷadadhinti** paṭthinnaṃ guḷasadisam kaṭhinadadhim. **Ati-añchitūti** ativiya ākaḍḍhitum. **Kaṇḍhiyam vāhetvāti** dadhimatthum pavāhetvā, parissāvetvāti attho. “Dadhito kaṇḍhiyam gahetvā”tipi pāṭho. **Nanti** suppvāsam. Bijapacchim phusāpentīti iminā sambandho. **Yāva na ukkaḍḍhantīti** yāva dāne na ukkaḍḍhanti, dātukāmāva hontīti adhippāyo **mahādukkham anubhosīti** pasavanibandhanam mahantaṃ dukkham anubhosi. **Sāmikam āmantetvāti** sattāham mūḷhagabbhā tībbaḥi kharāhi dukkhavedandāhi phuṭṭhā “sammāsambuddho vata so bhagavā, yo imassa evarūpassa dukkhassa pahānāya dhammam deseti. Suppaṭipanno vata tassa bhagavato sāvakasamgho, yo imassa evarūpassa dukkhassa pahānāya paṭipanno. Susukham vata nibbānam, yatthīdam evarūpaṃ dukkham na samvijjati”ti³ imehi tīhi vitakkehi tam dukkham adhivāsenti satthu santikam pesetukāmatāya sāmikam āmantetvā. **Pure maraṇāti** maraṇato puretameva. **Ingīti** akāram. **Jīvitabhānti** jīvitasamsaye dātabbabbhāntam. **Sabbakammakkhamo ahoṣīti** sattavassikehi dārakehi kātabbam yam kiñci kammam kātuṃ samatthatāya sabbassa kammassa khamo ahoṣi. Teneva so sattāham

1. Khu 7. 1 piṭṭhe.

2. Khu 1. 144 piṭṭhe.

3. Khu 1. 93 piṭṭhe Udāne.

mahādāne dīyamāne jātadivasato paṭṭhāya dhammakaraṇaṃ ādāya
saṃghassa udakaṃ parissāvetvā adāsi.

Yomanti-ādigāthāya “yo bhikkhu imaṃ rāgapalipathañceva
kilesaduggaṇca saṃsāravaṭṭaṇca catunnaṃ saccānaṃ
appaṭivijjhanakamohaṇca atīto cattāro oghe tiṇṇo hutvā pāraṃ anuppatto,
duvidhena jhānena **jhāyī**, taṇhāya abhāvena **anejo**, kathaṃkathāya abhāvena
akathaṃkathī, upādānānaṃ abhāvena **anupādiyitvā** kilesanibbānena nibbuto,
tamahaṃ brāhmaṇaṃ vadāmi”ti attho.

**Sabbesaṃyeva pana kesānaṃ oropanaṇca arahattasacchikiriyā ca
apacchā apurimā ahoṣīti** iminā therassa khuraggeyyeva arahattuppatti dīpitā.
Ekacce pana ācariyā evaṃ vadanti “heṭṭhā vuttanayena dhammasenāpatinā
ovāde dinne ‘yaṃ mayā kātuṃ sakkā, tamahaṃ jānissāmi’ti pabbajitvā
vipassanākammaṭṭhānaṃ gahetvā taṃ divasaṃyeva aññataraṃ vicittaṃ
kuṭikaṃ disvā pavisitvā mātukucchiyaṃ satta vassāni attanā
anubhūta dukkhaṃ anussaritvā tadanusārena atītānāgate ñāṇaṃ¹ nentassa
ādittā viya tayo bhavā upaṭṭhahimsu. Ñāṇassa paripākaṃ gatattā
vipassanāvīthiṃ otaritvā tāvadeva maggappaṭipāṭiyā sabbepi āsave khepento
arahattaṃ pāpuṇī”ti. Ubhayathāpi therassa arahattuppattiyeva² pakāsitā,
thero pana pabhinnappaṭisambhido chaḷabhiñño ahoṣi.

Vakkalitheravattu

208. Dasame **āhārakaraṇa**velanti bhojanakiccavelaṃ. **Adhigacche
padaṃ santanti** saṅkhārūpasamaṃ sukhanti laddhanāmaṃ santaṃ padaṃ
nibbānaṃ adhigaccheyya. **Paṭhamapādena pabbate ṭhitoyevā**ti paṭhamena
pādena gijjhakūṭe pabbate ṭhitoyeva. Sesamettha suviññeyyameva.

Dutiyavaggavaṇṇanā niṭṭhitā.

1. Nayaṃ (Ka)

2. Arahattappattiyeva (Sī)

3. Tatiyavaggavaṇṇanā

Rāhula-raṭṭhapālatheravattu

209-210. Tatiyassa paṭhamadutiyesu **tisso sikkhā**ti adhisīla-adhicitta-adhipaññāsāṅkhātā tisso sikkhā. **Cuddasa bhattacchede katvā**ti sattāhaṃ nirāhāratāya ekekasmim divase dvinnam bhattacchedānam vasena cuddasa bhattacchede katvā.

Tesanti tesam tāpasānam. **Lābubhājanādiparikkhāram saṃvidhāyā**ti lābubhājanādītāpasaparikkhāram saṃvidahitvā. **Sapariḷāhakāyadhātukoti** ussannapittatāya sapariḷāhakāyasabhāvo. **Satasahassā**ti satasahassaparimāṇā. Satasahassam parimāṇam etesanti satasahassā uttarapadalopena yathā “rūpabhavo rūpan”ti, atthi-atthe vā akārapaccayo daṭṭhabbo. Pāṇātipātādi-akusaladhammasamudācārasāṅkhāto āmagandho kuṇapagandho natthi etesanti **nirāmagandhā**, yathāvuttakilesasamudācārarahitāti attho. Kilesasamudācāro hettha “āmagandho”ti vutto. Kim kāraṇa? Amanuññattā kilesa-asucimissattā sabbhi jigucchitattā paramaduggandhabhāvāvahattā ca. Tathā hi ye ye ussanakilesā sattā, te te atiduggandhā honti. Teneva nikkilesānam matasarīrampi duggandham na hoti. **Dānaggaparivahanaketi** dānaggadhuravahanake. **Māpakoti** divase divase parimitaparibbayadānavasena dhaññamāpako.

Pāḷiyanti vinayapāḷiyam¹. **Migajātakam āharitvā kathesī**ti atīte kira bodhisatto migayoniyam nibbattitvā migagaṇaparivuto araññe vasati. Athassa bhaginī attano puttakam upanetvā “bhātika imam bhāgineyyam migamāyam sikkhāpehī”ti āha. Bodhisatto “sādhū”ti paṭissuṇitvā “gaccha tāta, asukavelāyam nāma āgantvā sikkheyyāsī”ti āha. So mātulena vuttavelam anatikkamitvā tam upasaṅkamitvā migamāyam sikkhi. So ekadivasam vane vicaranto pāsena baddho baddharavam viravi. Migagaṇo palāyitvā “putto te pāsena baddho”ti tassa mātuyā ārocesi. Sā bhātu santikam gantvā “bhātika

1. Vi 3. 115 piṭṭhe.

bhāgineyyo te migamāyaṃ sikkhāpito”ti pucchi. Bodhisatto “mā tvaṃ puttassa kiñci pāpakaṃ āsaṅki, suggahitā tena migamāyā, idāni taṃ hāsayaṃāno āgacchissatī”ti vatvā “**migaṃ tipallatthan**”ti-ādimāha.

Tattha **miganti** bhāgineyyamigaṃ. Tipallatthaṃ vuccati sayanaṃ, ubhohi passehi ujukameva ca nipannakavasena tīhākārehi pallatthaṃ assa, tīṇi vā pallatthāni assāti tipallattho, taṃ **tipallatthaṃ**. **Anekamāyanti** bahumāyaṃ bahuvañcanaṃ. **Aṭṭhakkhuranti** ekekaṃ pāde dvinnā dvinnāṃ vasena aṭṭhahi khurehi samannāgataṃ. **Aḍḍharattāpapāyinti** purimayāmaṃ atikkamitvā majjhimayāme araṇṇato āgama pāṇiyassa pivanato aḍḍharatte āpaṃ pivatīti aḍḍharattāpapāyī. “Aḍḍharatte āpapāyin”ti pīṭho. Mama bhāgineyyaṃ migam ahaṃ sādhukaṃ migamāyaṃ uggaṇhāpesim. Kathaṃ? Yathā ekena sotena chamāyaṃ assasanto chahi kalāhi atibhoti bhāgineyyo. Idaṃ vuttaṃ hoti—ahaṃ hi tava puttaṃ tathā uggaṇhāpesim, yathā ekasmiṃ uparimanāsikāsote vātaṃ sannirumbhitvā pathaviyaṃ allīnena ekena heṭṭhimanāsikāsotena tatheva chamāyaṃ assasanto chahi kalāhi luddakaṃ atibhoti, chahi koṭṭhāsehi ajjhottharati vañcetīti attho. Katamehi chahi? Cattāro pāde pasāretvā ekena passena seyyāya, khurehi tiṇapaṃsukhaṇanena, jivhāninnāmanena, udarassa uddhumātabhāvakaṇanena, uccārapassāvavissajjanena, vātassa nirumbhanenāti. Atha vā tathā naṃ uggaṇhāpesim, yathā ekena sotena chamāyaṃ assasanto. **Chahīti** heṭṭhā vuttehi chahi kāraṇehi. **Kalāhīti** kalāyissati, luddakaṃ vañcessatīti attho. **Bhotīti** bhaginiṃ ālāpati. **Bhāgineyyoti** evaṃ chahi kāraṇehi vañcakaṃ bhāgineyyaṃ niddisati.

Evaṃ bodhisatto bhāgineyyassa migamāyaṃ sādhukaṃ uggaṇhitabhāvaṃ vadanto bhaginiṃ samassāsesi. Sopi migapotako pāse baddho anibandhitvāyeva bhūmiyaṃ mahāphāsukapassena pāde pasāretvā nipanno pādānaṃ āsannaṭṭhāne khurehi eva paharitvā paṃsum ca tiṇāni ca uppāṭetvā uccārapassāvaṃ vissajjetvā sīsaṃ pātetvā jivhaṃ ninnāmetvā sarīraṃ khelaḥkilinnaṃ katvā vātaggahaṇena udaraṃ uddhumātakaṃ katvā akkhīni parivattetvā heṭṭhānāsikāsotena vātaṃ sañcarāpento

uparimanāsikāsotena vātaṃ sannirumbhitvā sakalasarīraṃ thaddhabhāvaṃ gāhāpetvā matakākāraṃ dassesi, nīlamakkhikāpi naṃ samparivāresuṃ, tasmim tasmim ṭhāne kākā nilīyimsu. Luddo āgantvā udare hatthena paharitvā “pātova baddho bhavissati, pūtika jāto”ti tassa bandhanarajjūṃ mocetvā “ettheva dāni naṃ ukkantitvā maṃsaṃ ādāya gamissāmi”ti nirāsaṅko hutvā sākāpālāsaṃ gahetuṃ āraddho. Migapotakopi utthāya catūhi pādehi ṭhatvā kāyaṃ vidhunitvā gīvaṃ pasāretvā mahāvātena chinnavalāhako viya vegena mātu santikaṃ agamāsi. Satthā “na bhikkhave rāhulo idāneva sikkhākāmo, pubbepe sikkhākāmoyevā”ti evaṃ migajātakam āharitvā kathesi.

Ambalaṭṭhiyarāhulovādaṃ desesīti “passasi no tvaṃ rāhula imaṃ parittaṃ udakāvasesaṃ udakādāne ṭhapitanti. Vaṃ bhante. Evaṃ parittakaṃ kho rāhula tesaṃ sāmāññaṃ, yesaṃ natthi sampajānamusāvāde lajjā”ti evamādinā **ambalaṭṭhiyarāhulovādaṃ**¹ kathesi. **Gehasitaṃ vitakkaṃ vitakkentassāti** āyasmā kira rāhulo bhagavato piṭṭhito piṭṭhito gacchantova pādatalato yāva upari kesantā tathāgataṃ olokesi, so bhagavato buddhavesavilāsaṃ disvā “sobhati bhagavā dvattiṃsamahāpurisalakkhaṇavicittasārīro byāmapabbhāparikkhittatāya vippakiṇṇasuvannaṇacūṇṇamajjhagato viya vijjulatāparikkhitto kanakapabbato viya yantasamākaḍḍhitaratanavicittasuvannaṇa-agghikaṃ viya paṃsukūlacīvarappaṭicchannopi rattakambalaparikkhittakanakapabbato viya pavāḷalatāpaṭimaṇḍitasuvannaṇaghaṭikaṃ viya cīnapiṭṭhacūṇṇapūjitasuvannaṇacetiyaṃ viya lākhārasānulitto kanakathūpo viya rattavalāhakantaragato taṅkhaṇamuggatapūṇṇacando viya aho samatiṃsapāramitānubhāvena sajjitassa attabhāvassa sirisampattī”ti cintesi. Tato attānampi oloketvā “ahampi sobhāmi, sace bhagavā catūsu mahādīpesu cakkavattirajjaṃ akarissa, mayhaṃ pariṇāyakaṭṭhānantaramadassa, evaṃ sante ativiya jambudīpatalaṃ atisobhissā”ti attabhāvaṃ nissāya gehasitaṃ chandarāgaṃ uppādesi. Taṃ sandhāyetaṃ vuttaṃ “**satthu ceva attano ca rūpasampattiṃ disvā gehasitaṃ vitakkaṃ vitakkentassā**”ti.

1. Ma 2. 77 piṭṭhe.

Bhagavāpi purato gacchantova cintesi “paripuṇṇacchavimaṃsalohito dāni rāhulassa attabhāvo, rajanīyesu rūpārammaṇādīsu cittassa pakkhandanakālo jāto, nipphalatāya nu kho rāhulo vītināmeti”ti. Atha sahāvajjaneneva pasanne udake macchaṃ viya parisuddhe ādāsamaṇḍale mukhanimittam viya ca tassa taṃ cittuppādam addasa, disvā ca “ayaṃ rāhulo mayhaṃ atrajo hutvā mama pacchato āgacchanto ‘ahaṃ sobhāmi, mayhaṃ vaṇṇāyatanam pasannan’ti attabhāvam nissāya gehasitam chandarāgam uppādeti, atitthe pakkhando, uppatham paṭipanno, agocare carati, disāmūḷha-addhiko viya agantabbaṃ disaṃ gacchati, ayaṃ kho panassa kilesa abbhantare vaḍḍhanto attatthampi yathābhūtam passitum na dassissati paratthampi ubhayatthampi, tato nirayepi paṭisandhim gaṇhāpessati, tiracchānayanoyampi pettivisayepi asurakāyepi sambādhepi mātukucchisminti anamatagge saṃsāravaṭṭe paripātessati. Yathā kho pana anekaratanapūrā mahānāvā bhinnaphalakantarena udakam ādiyamānā muhuttampi na ajjhupekkhitabbā hoti, vegena vegenassā vivaram pidahitum vaṭṭati, evameva ayampi na ajjhupekkhitabbo. Yāvassa ayaṃ kilesa abbhantare sīlaratanādīni na vināseti, tāvadeva naṃ niggaṇhissāmī”ti ajjhāsayaṃ akāsi. Tato rāhulam āmantetvā “yaṃ kiñci rāhula rūpaṃ atītānāgatapaccuppannam ajjhattaṃ vā bahiddhā vā oḷārikaṃ vā sukhumaṃ vā hīnaṃ vā paṇītaṃ vā yaṃ dūre santike vā, sabbaṃ rūpaṃ ‘netam mama, nesohamasmi, na meso attā’ti evametaṃ yathābhūtam sammappaññāya daṭṭhabbanti. Rūpameva nu kho bhagavā rūpameva nu kho sugatāti. Rūpampi rāhula, vedanāpi rāhula, saññāpi rāhula, saṅkhārāpi rāhula, viññāṇampi rāhulā”ti **mahārāhulovādasuttam**¹ abhāsi. Taṃ dassetuṃ “**yaṃ kiñci rāhula -pa- kathesi**”ti vuttaṃ.

Saṃyuttake pana rāhulovādoti rāhulasamīyutte vuttarāhulovādam sandhāya vadanti. Tattha “sādhu me bhante bhagavā saṃkhittena dhammaṃ desetu, yamaṃ bhante bhagavato dhammaṃ sutvā eko vūpakaṭṭho appamatto ātāpī pahitatto vihareyyan”ti therena yācito “taṃ kiṃ maññasi rāhula, cakkhu niccaṃ vā aniccaṃ vāti. Aniccaṃ bhante. Yaṃ

1. Ma 2. 84 piṭṭhe.

panāniccam, dukkham vā taṃ sukham vāti. Dukkham bhante. Yaṃ panāniccam dukkham vipariṇāmadhammaṃ, kallaṃ nu taṃ samanupassitum ‘etaṃ mama, esohamasmi, eso me attā’ti”ādina **rāhulovādam**¹ ārabhi.

Therassa vipassanācāroyeva, na pana mahārāhulovādo viya vitakkūpacchedāya vuttoti adhippāyo.

Athassa satthā ñānaparipākam ñatvāti-ādīsu bhagavato kira rahogatassa paṭisallīnassa evaṃ cetaso parivitakko udapādi “paripakkā kho rāhulassa vimutti-paripācanīyā dhammā, yannūnāhaṃ rāhulaṃ uttari āsavānaṃ khaye vineyyan”ti. Athassa bhagavā pubbaṇhasamayaṃ nivāsetvā pattacīvaramādāya sāvatthiyaṃ piṇḍāya caritvā pacchābhattaṃ piṇḍapāta-paṭikkanto āyasmantaṃ rāhulaṃ āmantesi “gaṇhāhi rāhula nisīdanaṃ, yena andhavanaṃ tenupasaṅkamissāma divāvihārāyā”ti. “Evaṃ bhante”ti kho āyasmā rāhulo bhagavato paṭissutvā nisīdanaṃ ādāya bhagavato piṭṭhito piṭṭhito anubandhi. Tena kho pana samayena anekāni devatāsahassāni bhagavantaṃ abhivanditvā anubandhitā honti “ajja bhagavā āyasmantaṃ rāhulaṃ uttari āsavānaṃ khaye viñessatī”ti. Atha kho bhagavā andhavanaṃ ajjhogāhetvā aññatarasmiṃ rukkhamaṇe paññatte āsane nisīdi. Āyasmāpi rāhulo bhagavantaṃ “taṃ kiṃ maññasi rāhula, cakkhu niccam vā aniccam vāti. Aniccam bhante. Yaṃ panāniccam, dukkham vā taṃ sukham vāti. Dukkham bhante. Yaṃ panāniccam dukkham vipariṇāmadhammaṃ, kallaṃ nu taṃ samanupassitum ‘etaṃ mama, esohamasmi, eso me attā’ti”ti-ādina **rāhulovādam**² adāsi. Taṃ sandhāyetaṃ vuttaṃ “**andhavane nisinno cūlarāhulovādam kathesi**”ti.

Koṭṭisatasahassadevatāhīti āyasmatā rāhulena padumuttarassa bhagavato pādamaṇe pathavindhararājakāle patthanaṃ ṭhapentena saddhiṃ patthanaṃ ṭhapitadevatāyevetā. Tāsu pana kāci bhūmiṭṭhadevatā, kāci antalikkhaṇakā, kāci cātumahārājikādivaloke, kāci brahmaloke nibbattā, imasmiṃ pana divase sabbā ekaṭṭhāne andhavanasmimyeva sannipatitā.

1. Sam 1. 439 piṭṭhe.

2. Sam 2. 324 piṭṭhe.

Ābhidosikanti pārivāsikaṃ ekarattātikkantaṃ pūtibhūtaṃ.

Ekarattātikkantasessa hi nāmasañña esā, yadidaṃ ābhidosikoti. Ayaṃ panettha vacanatto—pūtibhāvadosena abhibhūtoti abhidoso, abhidoso yeva **ābhidosiko**. **Kummāsanti** yavakummāsaṃ. **Adhivāsetvāti** “tena hi tāta raṭṭhapāla adhivāsehi svātanāya bhattan”ti pitarā nimantito svātanāya bhikkhaṃ adhivāsetvā. Ettha ca thero pakatiyā ukkaṭṭhasapadānacāriko svātanāya bhikkhaṃ nāma nādhivāseti, mātu anuggahena pana adhivāseti. Mātu kirassa therāṃ anussarivā anussarivā mahāsoko uppajjati, rodaneneva dukkhī viya jātā, tasmā thero “sacāhaṃ taṃ apassivā gamissāmi, hadayampissā phaleyyā”ti anuggahena adhivāsesi. Paṇḍitā hi bhikkhū mātāpitūnaṃ ācariyupajjhāyānaṃ vā kātappaṃ anuggahaṃ ajjhupekkhitvā dhutaṅgasuddhikā na bhavanti.

Alaṅkatapaṭiyatte itthijaneti pitarā uyyojite itthijane. Pitā kirassa dutiyadivase sakanivesane mahantaṃ hiraññasuvaṇṇassa puñjaṃ kārāpetvā kilañjehi paṭicchādāpetvā Ayasmato Raṭṭhapālassa purāṇadatiyikāyo “etha tumhe vadhū, yena alaṅkārena alaṅkatā pubbe Raṭṭhapālassa kulaputtassa piyā hotha manāpā, tena alaṅkārena alaṅkaroṭhā”ti āṇāpetvā paṇītaṃ khādanīyaṃ bhojanīyaṃ paṭiyādāpetvā kāle ārocite āgantvā paññatte āsane nisinnaṃ “idaṃ te Raṭṭhapāla mattikaṃ dhaṇaṃ, aññaṃ pettikaṃ, aññaṃ pitāmahaṃ, sakkā Tāta Raṭṭhapāla bhoge ca bhuñjitum, puññaṇi ca kātum. Ehi tvaṃ Tāta Raṭṭhapāla, sikkhaṃ paccakkhāya hīnāyāvattitvā bhoge ca bhuñjassu, puññaṇi ca karohi”ti yācitvā tena paṭikkhipitvā dhamme desite “ahaṃ imāṃ uppabbājessāmi”ti ānayaṃ, so “dāni me dhammakathaṃ kātum āraddho, alaṃ me vacanaṃ na karissati”ti utthāya gantvā tassa orodhānaṃ dvāraṃ vivarāpetvā “ayaṃ vo sāmiko, gacchatha, yaṃ kiñci katvāna gaṇhitum vāyamatha”ti uyyojesi. Tīsu vayesu tṭhitā nāṭakitthiyo therāṃ parivārayiṃsu. Tāsu ayaṃ asubhasaññaṃ uppādesi. Tena vuttaṃ **“alaṅkatapaṭiyatte itthijane asubhasaññaṃ uppādetvā”ti**.

Ṭhitakova dhammaṃ desetvāti—

“Passa cittakataṃ bimbaṃ, arukāyaṃ samussitaṃ.
 Āturaṃ bahusaṅkappaṃ, yassa natthi dhuvāṃ ṭhiti.

Passa cittakataṃ rūpaṃ, maṇinā kuṇḍalena ca.
 Aṭṭhiṃ tacena onaddhaṃ, saha vatthehi sobhati.

Alattakakatā pādā, mukhaṃ cuṇṇakamakkhitaṃ.
 Alaṃ bālassa mohāya, no ca pāragavesino.

Aṭṭhāpadakatā kesā, nettā añjanamakkhita.
 Alaṃ bālassa mohāya, no ca pāragavesino.

Añjanīvaṇṇavā citta, pūtikāyo alaṅkato.
 Alaṃ bālassa mohāya, no ca pāragavesino.

Odahi migavo pāsaṃ, nāsadā vāguraṃ migo.
 Bhutvā nivāpaṃ gacchāmi, kandante migabandhake”¹—

imāhi gāthāhi dhammaṃ desetvā.

Ākāsaṃ uppatitvāti ākāsaṃ pakkhanditvā. Kasmā pana thero ākāseṇa gato? Pitā kirassa seṭṭhi sattaṣu dvārakoṭṭhakesu aggaḷāni dāpetvā malle āṇāpesi “sace nikkhamitvā gacchati, hatthapādesu naṃ gahetvā kāsāyāni haritvā gihivesaṃ gaṇhāpethā”ti. Tasmā thero “ete mādisaṃ mahākhīṇāsavaṃ hatthe vā pāde vā gahetvā apuññaṃ pasaveyyuṃ, taṃ nesaṃ mā ahoṣi”ti cintetvā ākāseṇa agamāsi. **Migacīranti** evaṃnāmakāṃ uyyānaṃ. **Catupārijuññaṇapaṭimaṇḍitanti** jarāpārijuññaṃ byādhipārijuññaṃ bhogapārijuññaṃ ñātipārijuññaṇanti imehi catūhi pārijuññehi paṭimaṇḍitaṃ. **Pārijuññaṇanti** ca parihānīti attho. Sesamettha suviññeyyameva.

Kuṇḍadhānattheravatthu

211. Tatiye salākaṃ gaṇhantīti **salākagāhaka**. Sunāparantajanapadaṃ gacchantepi paṭhamameva salākaṃ gaṇhīti sambandho. **Chabbassantareti**

1. Ma 2. 253; Khu 2. 325 piṭṭhesu.

channaṃ vassānaṃ abbhantare. **Mettīti** mittabhāvo. **Bhedake satīti** bhedakaraṇe sati. **Gumbasabhāgatoti** gumbasamīpato, ayameva vā pāṭho. **Itthī hutvāti** itthī viya hutvā, manussitthivaṇṇaṃ māpetvāti attho. **Dīgharattānugatoti** dīghakālaṃ anubandho. **Ettakaṃ addhānanti** ettakaṃ kālaṃ. **Handāvusoti** gaṇhāvuso. **Atthaṃ gahetvāti** bhūtatthaṃ gahetvā, ayameva vā pāṭho. **Koṇḍo jātoti** dhutto jāto.

Māvoca pharusāṃ kañcīti kañci ekapuggalaṃ pharusāṃ mā avoca. **Vuttā paṭivadeyyu tanti** tayā pare dussīlāti vuttā tampi tatheva paṭivadeyyuṃ. **Dukkhā hi sārambhakathāti** esā kāraṇuttarā yugaggāhakathā nāma dukkhā. **Paṭidaṇḍā phuseyyu tanti** kāyadaṇḍādīhi paraṃ paharantassa tādisāva paṭidaṇḍā tava matthake pateyyuṃ.

Sace neresi attānanti sace attānaṃ niccalaṃ kātuṃ sakkhissasi. **Kaṃso upahato yathāti** mukhavaṭṭiyaṃ chinditvā talamattaṃ katvā ṭhapitaṃ kaṃsatālaṃ viya. Tādisaṃ hi hatthehi pādehi daṇḍena vā pahatampi saddaṃ na karoti. **Esa pattosi nibbānanti** sace evarūpo bhavituṃ sakkhissasi, imaṃ paṭipadaṃ pūrayamāno eso tvaṃ idāni appattopi nibbānaṃ pattosi nāma. **Sārambho te na vijjatīti** “evañca sati tvaṃ dussīlo, ahaṃ susīlo”ti evamādiko uttarikaraṇavācālakkhaṇo sārambho te na vijjati, na bhavissatiyevāti attho. **Parikkilesenāti** saṃkilesahetunā.

Vaṅṇīsatttheravattu

212. Catutthe **sampannapaṭibhānānanti** paripuṇṇapaṭibhānānaṃ. **Cutiṃ yo vedi -pa- sabbasoti** yo sattānaṃ cutiñca paṭisandhiñca sabbākārena pākaṭaṃ katvā jānāti, taṃ ahaṃ alaggaṇatāya **asattaṃ**, paṭipattiyā suṭṭhu gatattā **sugataṃ**, catunnaṃ saccānaṃ sambuddhattā **buddhaṃ** brāhmaṇaṃ vadāmīti attho. **Yassa gatinti** yassete devādayo gatiṃ na jānanti, tamahaṃ āsavānaṃ khīṇatāya **khīṇāsavaṃ**, kilesehi ārakattā **arahantaṃ** brāhmaṇaṃ vadāmīti attho.

Upasenavaṅgantaputtattheravatthu

213. Pañcame **sabbapāsādikānanti** sabbaso pasādaṃ janentānaṃ. **Kintāyanti** kim te ayaṃ. **Atilahunti** atisīghaṃ. Yassa tasmim attabhāve uppañjānārahānaṃ maggaphalānaṃ upanissayo natthi, taṃ buddhā “moghapuriso”ti vadanti ariṭṭhalāḷudāyi-ādike viya. Upanissaye satipi tasmim khaṇe magge vā phale vā asati “moghapurisā”ti vadantiyeva dhaniyattherādike viya. Imassapi tasmim khaṇe maggaphalānaṃ abhāvato “moghapurisā”ti āha, tucchamanussāti attho. **Bāhullāyāti** parisabāhullāya. **Anekapariyāyenāti** anekakāraṇena.

Icchāmahaṃ bhikkhaviti bhagavā kira taṃ addhamāsaṃ na kañci bodhaneyyasattaṃ addasa, tasmā evamāha, evaṃ santēpi tantivasena dhammadesanā kattabbā siyā. Yasmā panassa etadahosi “mayi okāsaṃ kāretvā paṭisallīne bhikkhū adhammikaṃ katikavattaṃ karissanti, taṃ upaseno bhindissati, ahaṃ tassa pasīditvā bhikkhūnaṃ dassanaṃ anujānissāmi. Tato maṃ passitukāmā bahū bhikkhū dhutaṅgaṇi samādiyissanti, ahañca tehi ujjhitasanthatapaccayā sikkhāpadam paññāpessāmi”ti, tasmā evamāha. **Therassāti** upasenattherassa. **Manāpāni te bhikkhu paṃsukūlānī**ti “bhikkhu tava imāni paṃsukūlāni manāpāni attano ruciya khantiya gahitāni”ti pucchati. **Na kho me bhante manāpāni paṃsukūlānī**ti bhante na mayā attano ruciya khantiya gahitāni, galaggāhena viya matthakatāḷanena viya ca gāhito mayāti dasseti. **Pāliyaṃ āgatamevāti** vinayapāḷim¹ sandhāya vadati.

Dabbattheravatthu

214. Chaṭṭhe **aṭṭhārasasu mahāvihāresūti** rājagahassa samantato ṭhitesu aṭṭhārasasu mahāvihāresu. **Upavijaññāti** āsannapasūtikālā. **Rahogatoti** rahasi gato. **Saṅghassa veyyāvaccakaraṇe kāyaṃ yojetukāmo cintesīti** thero kira attano katakiccabhāvaṃ disvā “ahaṃ imaṃ sarīraṃ dhāremi, tañca kho vātamukhe ṭhitapadīpo viya aniccatāmukhe ṭhitaṃ nacirasseva nibbāyanadhammaṃ

1. Vi 1. 336 piṭṭhe.

yāva na nibbāyati, tāva kiṃ nu kho ahaṃ saṃghassa veyyāvaccam kareyyan”ti cintento iti paṭisaṅcikkhati “tīroraṭṭhesu bahū kulaputtā bhagavantam adisvāva pabbajanti, te ‘bhagavantam passissāma ceva vandissāmā’ti ca dūratopi āgacchanti, tatra yesam senāsanaṃ nappahoti, te silāpattakepi seyyam kappenti. Pahomi kho panāham attano ānubhāvena tesam tesam kulaputtānam icchāvasena pāsādavihāra-aḍḍhayogādāni mañcapīṭhattharaṇāni nimminivā dātum. Punadivase cettha ekacce ativiya kilantarūpā honti, te gāravena bhikkhūnam purato ṭhatvā bhattānīpi na uddisāpenti, aham kho pana tesam bhattānīpi uddisitam pahomī”ti. Iti paṭisaṅcikkhanto “yamnūnāham saṃghassa senāsanaṃ pañṇapeyyam, bhattāni ca uddiseyyan”ti cintesi. **Sabhāgasabhāgānanti** suttantikādiguṇavasena sabhāgānam, na mittasanthavavasena. Thero hi yāvatikā suttantikā honti, te uccinitvā uccinitvā ekato tesam anurūpameva senāsanaṃ pañṇāpeti.

Venayikābhiddhammikakammaṭṭhānikakāyadaḥhibahulesupi eseva nayo. Teneva **pāḷiyam**¹ vuttam “yete bhikkhū suttantikā, tesam ekajjham senāsanaṃ pañṇāpeti”ti-ādi.

Aṅguliya jalamānāyāti tejokasiṇacatutthajjhānam samāpajjitvā vuṭṭhāya abhiññāṇaṇena aṅgulijalanam adhiṭṭhahitvā teneva tejodhātusamāpattijanitena aggijālena aṅguliya jalamānāya. **Ayam mañcoti-**ādīsu pana there “ayam mañco”ti-ādīm vadante nimmitāpi attano attano gatattāhāne “ayam mañco”ti-ādīm vadanti. Ayam hi nimmitānam dhammatā.

Ekasmiṃ bhāsamānasmiṃ, sabbe bhāsanti nimmitā.

Ekasmiṃ tuṇhimāsine, sabbe tuṇhī bhavanti teti².

Yasmiṃ pana vihāre mañcapīṭhādāni na paripūrenti, tattha attano ānubhāvena pūrenti, tena nimmitānam avatthukam vacanam na hoti sabbattha mañcapīṭhādānam sabbhāvato. Sabbavihāresu ca gamanamagge samappamāṇe katvā adhiṭṭhāti. Katikasaṇṭhānādānam pana nānappakārattā tasmim tasmim vihāre katikavattāni visum visum kathāpetūti veditabban.

1. Vi 1. 244 piṭṭhe.

2. Dī 2. 172 piṭṭhe.

Aniyametvā nimmitānaṃ hi “ekasmiṃ bhāsamānasmiṃ”ti-ādidhammatā vuttā. Tathā hi ye vaṇṇavayasarīrāvayavaparikkhāraṃ kiriyāvisesādīhi niyamaṃ akatvā nimmitā honti, te aniyametvā nimmitattā iddhimatā sadisāva honti. Thānanisajjādīsu bhāsitatupphībhāvādīsu vā yaṃ yaṃ iddhimā karoti, taṃ tadeva karonti. Sace pana nānappakāre kātukāmo hoti, keci paṭhamavaye, keci majjhimavaye, keci pacchimavaye, tathā dīghakese upaddhamuṇḍe missakakese upaddharattacīvare paṇḍukacīvare, padabhāṇadhammakathā sarabhañña pañhapucchana pañhavissajjana rajana pacana cīvarasibbana dhovanādīni karonte, aparepi vā nānappakāre kātukāmo hoti, tena pādakajjhānato vuṭṭhāya “ettakā bhikkhū paṭhamavayā hontū”ti-ādinā nayena parikammaṃ katvā puna samāpajjitvā vuṭṭhāya adhiṭṭhite adhiṭṭhānacittena saddhiṃ icchitcchitappakārāyeva honti. **Puna attano vasanaṭṭhānameva āgacchatīti** tehi saddhiṃ janapadakathaṃ kathento anisīditvā attano vasanaṭṭhānaṃ veḷuvanameva paccāgacchati. **Pāliyanti** vinayapāliyaṃ.

Pilindavacchattheravatthu

215. Sattame **piyānanti** piyāyitabbānaṃ. **Manāpānanti** manavaḍḍhanakānaṃ. **Pilindoti panassa gottaṃ, vacchoti nāmanti** ettha vuttavipariyāyenapi vadanti “pilindoti nāmaṃ, vacchoti gottaṃ”ti. Teneva ācariyadhammapālattherena **theragāthāsaṃvaṇṇanāya**¹ vuttaṃ “pilindotissa nāmaṃ akaṃsu, vacchoti pana gottaṃ. Tena so aparabhāge pilindavacchoti paññāyitthā”ti. **Saṃsandetvāti** ekato katvā.

Satthu dhammadesanaṃ sutvā paṭiladdhasaddho pabbajitvāti idaṃ aṅguttarabhāṇakānaṃ kathāmaggena vuttaṃ. Apare pana bhaṇanti— anuppanneyeva amhākaṃ bhagavati sāvatthiyaṃ brāhmaṇagehe nibbattitvā pilindavacchoti paññāto saṃsāre saṃvegabahulatāya paribbājakapabbajjaṃ pabbajitvā cūḷagandhāraṃ nāma vijjaṃ sādhetvā ākāsacārī paracittavidū ca hutvā rājagahe lābhaggayasaggappatto paṭivasati. Atha yadā amhākaṃ bhagavā abhisambuddho hutvā anukkamena rājagahaṃ upagato, tato paṭṭhāya

1. Theragāthā-Ṭṭha 1. 63 piṭṭhe.

buddhānubhāvena tassa sā vijjā na sampajjati, attakiccaṃ na sādheti. So cintesi “sutaṃ kho pana metaṃ ‘ācariyapācariyānaṃ bhāsamānānaṃ yattha mahāgandhāravijjā dharati, tattha cūḷagandhāravijjā na sampajjati”ti. Samaṇassa pana gotamassa āgatakālato paṭṭhāya nāyaṃ mama vijjā sampajjati, nissamsayaṃ samaṇo gotamo mahāgandhāravijjaṃ jānāti, yannūnāhaṃ taṃ payirupāsītva tassa santike vijjaṃ pariyāpuṇeyyaṃ”ti. So bhagavantam upasaṅkamitvā etadavoca “ahaṃ mahāsamaṇa tava santike ekaṃ vijjaṃ pariyāpuṇitukāmo, okāsaṃ me karohi”ti. Bhagavā “tena hi pabbajā”ti āha. So “vijjāya parikammaṃ pabbajjā”ti maññaṃāno pabbajīti. **Paravambhanavasenā**ti paresaṃ garahanavasena.

Akakkasanti aphaṇusaṃ. **Viññāpaninti** atthaviññāvanim. **Saccanti** bhūtatthaṃ. **Nābhisajeti** yāya girāya aññaṃ kujjhāpanavasena na lagāpeyya, khīṇāsavo nāma evarūpameva giram na bhāseyya, tasmā tamahaṃ brūmi brāhmaṇaṃ vadāmīti attho.

Anuvicinitvāti anuvicāretvā. **Caṇḍikataṃ gacchantanti** sīghagatiyā gacchantam.

Bāhiyadārucīriyattheravatthu

216. Aṭṭhame **ekarattivāse**na gantvāti devatānubhāvena gantvā. “Buddhānubhāvenā”tipi vadanti. Evaṃ gato ca vihāraṃ pavisitvā sambahule bhikkhū bhuttaṭṭarāse kāyālasiyavimocanattāya abbhokāse caṅkamante disvā “kahaṃ etarahi satthā”ti pucchi. Bhikkhū “sāvattiyaṃ piṇḍāya pavittṭho”ti vatvā taṃ pucchimsu “tvaṃ pana kuto āgato”ti. Suppārakā¹ āgatomhīti. Kadā nikkhantosīti. Hiyyo sāyaṃ nikkhantomhīti. Dūrato āgato, tava pāde dhovitvā telena makkhetvā thokaṃ vissamāhi, āgatakāle satthāraṃ dakkhissatīti. Ahaṃ bhante satthu vā attano vā jīvitantarāyaṃ na jānāti, ekarattenevampi katthaci aṭṭhatvā anisīditvā vīssayojanasatikaṃ maggaṃ āgato, satthāraṃ passitvā vā vīssamissāmīti. So evaṃ vatvā taramānarūpo sāvattiṃ pavisitvā bhagavantam anopamāya buddhasiriyā piṇḍāya carantaṃ

disvā “cirassaṃ vata me diṭṭho sammāsambuddho”ti diṭṭhaṭṭhānato paṭṭhāya oṇatasarīro gantvā antaravīthiyameva pañcapaṭiṭṭhitena vanditvā gopphakesu daḥhaṃ gahetvā evamāha “desetu me bhante bhagavā dhammaṃ, desetu me sugato dhammaṃ, yaṃ mamassa dīgharattaṃ hitāya sukhāyā”ti¹.

Atha naṃ satthā “akālo kho tāva bāhiya, antaragharāṃ pavīṭṭhomhi piṇḍāyā”ti paṭikkhipi. Taṃ sutvā bāhiyo “bhante saṃsāre saṃsarantena kabaḷikārāhāro na no laddhapubbo, tumhākaṃ vā mayhaṃ vā jīvitantarāyaṃ na jānāmi, desetha me dhammaṃ”ti. Satthā dutiyampi paṭikkhipiyeva. Evaṃ kirassa ahosi “imassa maṃ diṭṭhakālato paṭṭhāya sakalasarīraṃ pītiyā nīrantaraṃ ajjhotthaṭaṃ hoti, balavapīṭivegena dhammaṃ sutvāpi na sakkhissati paṭivijjhitaṃ majjhattupekkaṃ tāva tiṭṭhatu, ekaratteneva vīsayojanasataṃ maggaṃ āgatattā darathopissa balavā, sopi tāva paṭippassambhatū”ti. Tasmā dvikkhattuṃ paṭikkhipitvā tatiyaṃ yācito antaravīthiyaṃ ṭhitova “tasmātiha te bāhiya evaṃ sikkhitabbaṃ diṭṭhe diṭṭhamattaṃ bhavissati”ti-ādinā¹ nayena dhammaṃ deseti. Imamatthaṃ saṃkhipitvā dassento “**satthāraṃ piṇḍāya pavīṭṭhan**”ti-ādimāha. Tattha **antaraghareti** antaravīthiyaṃ.

Aparipuṇṇapattacīvaratāya pattacīvaraṃ pariyesantoti so kira vīsativassasahassāni samaṇadhammaṃ karonto “bhikkhunā nāma attano paccaye labhitvā aññaṃ anoloketvā sayameva bhuñjitum vaṭṭati”ti ekabhikkhussapi pattena vā cīvarena vā saṅghaṃ nākāsi. Tenassa “iddhimayapattacīvaraṃ na uppajjissati”ti ñatvā ehibhikkhubhāvena pabbajjaṃ na adāsi. Tāvadeva ca pabbajjaṃ yācito “paripuṇṇaṃ te pattacīvaraṃ”ti pucchitvā “aparipuṇṇaṃ”ti vutte “tena hi pattacīvaraṃ pariyesāhi”ti vatvā pakkāmi. Tasmā so pattacīvaraṃ pariyesanto saṅkāraṭṭhānato coḷakhaṇḍāni saṃkaḍḍhati.

Sahassamapīti paricchedavacanaṃ. Ekasahassaṃ dvesahassānīti evaṃ sahasseṇa ce paricchinṇā gāthā honti, tā ca **anattapadasaṃhitā** ākāsaṇṇapabbatavaṇṇādīni pakāsakehi anibbānadīpakehi anattakehi padehi saṃhitā yāva bahukā honti, tāva pāpikā evāti

1. Khu 1. 85 piṭṭhe Udāne.

attho. **Ekaṃ gāthāpadam seyyoti** “appamādo amatapadam -pa- yathā matā”¹ti¹ evarūpā ekagāthāpi seyyoti attho.

Kumārakassapattheravatthu

217. Navame **ekaṃ buddhantaram sampattim anubhavamānoti** sāvakabodhiyā niyatatāya puññasambhārassa ca sātisayattā vinipātāṃ agantvā ekaṃ buddhantaram devesu ca manussesu ca sampattim anubhavamāno. “**Ekissā kuladārikāya kucchimhi uppanno**”ti vatvā tamevassa uppannabhāvaṃ mūlato paṭṭhāya dassetum “**sā cā**”ti-ādi vuttam. Tattha **sāti** kuladārikā. **Ca**-saddo byatirekattho. Tena vuccamānaṃ visesaṃ jotayati. **Kulagharanti** patikulagehaṃ. **Gabbhanimittanti** gabbhassa saṇṭhitabhāvaviggahaṃ. Satipi visākhāya sāvatthivāsikulapariyāpannatte tassā tattha padhānabhāvadassanattam “**visākhāñcā**”ti-ādi vuttam yathā “brāhmaṇā āgatā, vāsiṭṭhopi āgato”ti. Bhagavatā evaṃ gahitanāmattāti yojanā. Yasmā rājaputtā loka “kumārā”ti voharīyanti, ayañca rañño kittimaputto, tasmā āha “**rañño -pa- sañjānimsū**”ti.

Pañcadasa pañhe abhisankharitvāti “bhikkhu bhikkhu ayaṃ vammiko rattim dhūpāyati, divā pajjalati”ti-ādinā **vammikasutte**² āgatanayena pañcadasa pañhe abhisankharitvā. **Pāyāsiraññoti** “natthi paraloko, natthi sattā opapātikā, natthi sukatadukkaṭānaṃ kammānaṃ phalaṃ vipāko”ti³ evaṃladdhikassa pāyāsirājassa. Rājā hi tadā anabhisitto hutvā pasenadinā kosalena dinnasetabyanagaraṃ ajjhāvasanto imaṃ diṭṭhiṃ gaṇhi. **Pañcadasahi pañhehi paṭimaṇḍetvāti** “taṃ kiṃ maññasi rājāñña, ime candimasūriyā imasmiṃ vā loka parasmaṃ vā devā vā te manussā”ti evamādihi³ pañcadasahi pañhehi paṭimaṇḍitaṃ katvā. **Suttanteti** pāyāsīsuttante⁴.

Mahākoṭṭhikattheravatthu

218. Dasamaṃ uttānatthameva.

Tatīyavaggavaṇṇanā niṭṭhitā.

1. Khu 1. 16 piṭṭhe Dhammapade.

3. Dī 2. 255 piṭṭhe.

2. Ma 1. 196 piṭṭhe.

4. Dī 2. 253 piṭṭhe.

4. Catutthavaggavaṇṇanā

Ānandattheravattthu

219-223. Catutthavaggassa paṭhame **heṭṭhā vuttappamāṇanti** heṭṭhā Koṇḍaññattherassa vatthumhi “tassa dhurapattāni navutihatthāni honti, kesaram tiṁsahattham, kaṇṇikā dvādasahatthā, pādena patiṭṭhitatthānam ekādasahatthan”ti evam vuttappamāṇam. **Raṇṇo pesesīti** paccantassa kupitabhāvam ārocetvā pesesi. **Theragāthāsamvaṇṇanāyam**¹ pana “paccantassa kupitabhāvam raṇṇo anārocetvā sayameva taṁ vūpasamesi, taṁ sutvā rājā tuṭṭhamānaso puttam pakkosāpetvā ‘varam te sumana dammi, gaṇhāhī’ti āhā”ti vuttam. **Na metam cittam atthīti** mama evarūpam cittam natthi. **Avañjhanti** atuccham. **Aññam varehīti** aññam patthehi, aññam gaṇhāhīti vuttam hoti. **Udakaṁ adhiṭṭhāyāti** “udakaṁ hotū”ti adhiṭṭhahitvā. **Gatenāti** gamanena. **Na āmisacakkhukāti** cīvarādipaccayasaṅkhātam āmisam na olokenti.

Vasanaṭṭhānasabhāgeyevāti vasanaṭṭhānasamīpeyeva². **Ekantavallabhoti** upaṭṭhākaṭṭhāne ekantena vallabho. **Etassevāti** etasseva bhikkhussa. **Dvejjhakathā na hontīti**³ dvidhābhūtakathā na honti, anekantikakathā na hontīti vuttam hoti. **Anibaddhāti** aniyatā. **Lohitena galantenāti** itthambhūtakkhāne karaṇavacanam, galantena lohiteṇa yuttoti attho. **Anvāsattoti** anugato. **Uṭṭhehi Āvuso Ānanda, uṭṭhehi Āvuso Ānandāti** turite idamāmeditavacanam. **Duvidhena udakenāti** sītudakena uṇhudakena ca. **Tividhena dantakaṭṭhenāti** khuddakam mahantam majjhimanti evam tippakārena dantakaṭṭhena. **Nava vāre anupariyāyatīti** satthari pakkosante paṭivacanadānāya thinamiddhavinodanattam navakkhattum anupariyāyati. Tenevāha “**evaṇhissa ahoṣī**”ti-ādi. Sesamettha suviññeyyameva.

Uruvelakassapattheravattthu

224. Dutīye yaṁ vattabham, taṁ vitthārato vinayapāḷiyam āgatameva.

1. Theragāthā-Ṭṭha 2. 412 piṭṭhe.

2. Vasatṭhānasamīpeyeva ṭṭhāne (Ka)

3. Advējjhakathā hontīti (Aṭṭhakathāyam)

Kāḷudāyittheravattu

225. Tatiye **gamanākappanti** gamanākāraṃ. Sesamettha uttānameva.

Bākulattheravattu

226. Catutthe **nirābādhānanti** ābādharahitānaṃ. Yathā “dvāvīsati dvattiṃsā”ti-ādimhi vattabbe “bāvīsati bāttiṃsā”ti-ādīni vuccanti, evamevaṃ dve kulāni assāti dvikulo, dvekuloti vā vattabbe bākuloti vuttanti āha “**bākuloti dvīsu kulesu vaḍḍhitattā evaṃladdhanāmo**”ti. Upayogenāti ānubhāvena. **Phāsukakāleti** arogakāle. **Gadduhanamattampīti** goduhanamattampi kālaṃ. Idha pana na sakalo goduhanakkhaṇo adhippeto, atha kho gāviṃ thane gahetvā ekakhīrabinduduhanakālamattaṃ adhippetam. **Ārogyasālanti** āturānaṃ arogabhāvakaraṇatthāya katasālaṃ.

Nimuḍḍjanummujjanavasenati jāṇuppaṃāṇe udae thokaṃyeva nimuḍḍjanummujjanavasena. **Chaḍḍetvā palāyīti** macchassa mukhasamīpeyeva chaḍḍetvā palāyi. **Dārakassa tejenāti** dārakassa puññatejena. **Māriyamānāva marantīti** daṇḍādīhi pothetvā māriyamānāva maranti, na jālena baddhatāmatteṇa amāriyamānā. **Nīhaṭamattova matoti** nīhaṭakkhaṇeyeva mato. Tenassa māraṇatthaṃ upakkamo na kato, yena upakkamena dārakassa ābādho siyā. **Tanti** macchaṃ. **Sakalamevāti** avikalameva paripuṇṇāvayavameva. **Na keḷāyatīti** na nandati¹, kismiñci na maññati. **Piṭṭhito phālentīti** dārakassa puññatejena piṭṭhito phālentī. **Bheriṃ carāpetvāti** “puttaṃ labhin”ti ugghosana vasena bheriṃ carāpetvā. **Pakatiṃ ācikkhīti** attano puttabhāvaṃ kathesi. **Kucchiyā dhāritattā amātā kātuṃ na sakkāti** janani bhāvato amātā kātuṃ na sakkā. **Macchaṃ gaṇhantāpīti** macchaṃ vikkhiṇitvā gaṇhantāpi. Tathā gaṇhantā ca tappariyāpannaṃ sabbaṃ gaṇhanti nāmāti āha “**vakkayakanādīni bahi katvā gaṇhantā nāma natthi**”ti. **Ayampi amātā kātuṃ na sakkāti** dinnaputtabhāvato na sakkā.

1. Na nandayati (Ka)

Sobhitattheravattthu

227. Pañcamaṃ uttānatthameva.

Upālitttheravattthu

228. Chaṭṭhe **bhārukacchakavattthunti** aññataro kira
bhārukacchadesavāsī bhikkhu supinante purāṇadutiyikāya methunaṃ
dhammaṃ paṭisevitvā “assamaṇo ahaṃ vibbhamissāmī”ti bhārukacchaṃ
gacchanto antarāmagge āyasmantaṃ upāliṃ passitvā etamatthaṃ ārocesi.
Āyasmā upāli evamāha “anāpatti āvuso supinantenā”ti. Yasmā supinante
avisayattā evaṃ hoti. Tasmā upālittthero bhagavatā avinicchitapubbampi
imaṃ vatthuaṃ nayaggāhena evaṃ vinicchini. Gahapatino dve dārakā honti
putto ca bhāgineyyo ca. Atha so gahapahi gilāno hutvā āyasmantaṃ ajjukaṃ
etadavoca “imaṃ bhante okāsaṃ yo imesaṃ dārakānaṃ saddho hoti
pasanno, tassa ācikkheyyāsī”ti. Tena ca samayena tassa ca gahapatino
bhāgineyyo saddho hoti pasanno. Athāyasmā ajjuko taṃ okāsaṃ tassa
dārakassa ācikkhi. So tena sāpateyyena kuṭumbaṇca saṇṭhapesi, dānaṇca
paṭṭhapesi. Atha tassa gahapatino putto āyasmantaṃ ānandaṃ etadavoca “ko
nu kho bhante ānanda pituno dāyajjo¹ putto vā bhāgineyyo vā”ti. Putto kho
āvuso pituno dāyajjoti. Āyasmā bhante ayyo ajjuko amhākaṃ sāpateyyaṃ
amhākaṃ methunakassa ācikkhīti. Assamaṇo āvuso so ajjukoti. Athāyasmā
ajjuko āyasmantaṃ ānandaṃ etadavoca “dehi me āvuso ānanda
vinicchayan”ti. Te ubhopi upālitttherassa santikaṃ agamaṃsu. Athāyasmā
upāli āyasmantaṃ ānandaṃ etadavoca “yo nu kho āvuso ānanda sāmikena
‘imaṃ okāsaṃ itthannāmassa ācikkhā’ti vutto, tassa ācikkhati, kiṃ so
āpajjati”ti. Na bhante kiñci āpajjati antamaso dukkaṭamattampīti. Ayaṃ
āvuso āyasmā ajjuko sāmikena “imaṃ okāsaṃ itthannāmassa ācikkhā”ti
vutto tassa ācikkhati, anāpatti āvuso āyasmato ajjukassāti. Bhagavā taṃ
sutvā “sukathitaṃ bhikkhave upālinā”ti

1. Dāyādo (?)

vatvā sādhu-kāramadāsi, taṃ sandhāyetaṃ vuttaṃ. **Kumārakassapavattu** pana heṭṭhā¹ āgatameva.

Channaṃ **khattiyānanti** bhaddiyo sakyarājā anuruddho ānando bhagu kimilo devadattoti imesaṃ channaṃ khattiyānaṃ. **Pasādhakoti** maṇḍayitā. **Pāliyanti** saṃghabhedakkhandhakapāliyanti².

Nandakattheravattu

229. Sattame **ekasamodhāneti** ekasmiṃ samodhāne, ekasmiṃ sannipāteti attho. Sesāṃ suviññeyyameva.

Nandattheravattu

230. Aṭṭhame **na taṃ catusampajañña**vasena aparicchinditvā oloketi ti satta-kasappāyagocara-asammohasampajañña-saṅkhātānaṃ catunnaṃ sampajaññaṇaṃ vasena aparicchinditvā taṃ disaṃ na oloketi. So hi āyasmā “yamevāhaṃ indriyesu aguttadvārataṃ nissāya sāsane anabhirati-ādivippakārappatto, tameva suṭṭhu niggahessāmi”ti ussāhajāto balavahirottappo, tattha ca katādhikārattā indriya-saṃvaro ukkaṃsapāramippatto catusampajaññaṃ amuñcitvāva sabbadisāṃ āloketi. Vuttaṃ cetāṃ bhagavatā—

“Sace bhikkhave nandassa puratthimā disā āloketabbā hoti, abbaṃ cetaso samannāharitvā nando puratthimaṃ disaṃ āloketi ‘evaṃ me uratthimaṃ disaṃ ālokeyato nābhijjhādomanassā pāpakā ‘akusalā hammā anvāsavissanti’ti. Itiha tattha sampajāno hoti. Sace bhikkhave nandassa pacchimā disā, uttarā disā, dakkhiṇā disā, uddham, adho, anudisā nuviloketabbā hoti, sabbaṃ cetaso samannāharitvā nando anudisaṃ anuviloketi ‘evaṃ me anudisaṃ anuvilokayato -pa-sampajāno hoti’ti”³.

1. Am-Ṭṭha 1. 220 piṭṭhe.

2. Vi 4. 336 piṭṭhe.

3. Am 3. 14 piṭṭhe.

Abhisekagehapavesana-āvāhamaṅgalesu vattamānesūti idha tīṇi maṅgalāni vuttāni, vinayaṭṭhakathāyaṃ pana “taṃ divasameva nandakumārassa kesavissajjanaṃ paṭṭabandho gharamaṅgalaṃ chattamaṅgalaṃ āvāhamaṅgalanti pañca maṅgalāni hontī”ti vuttaṃ. Tattha kulamariyādasena kesoropanaṃ **kesavissajjanaṃ**. Yuvarājapaṭṭabandhanaṃ **paṭṭabandho**. Abhinavagharappavesanamaho **gharamaṅgalaṃ**. Vivāhakaṛaṇamaho **āvāhamaṅgalaṃ**. Yuvarājachattamaho **chattamaṅgalaṃ**.

Nandakumāraṃ abhisekamaṅgalaṃ na tathā pīlesi, yathā janapadakalyāṇiṃ vuttavacananti ajjhāharitabbaṃ. Tadeva pana vacanaṃ sarūpato dassetuṃ “**pattam ādāya gamanakāle**”ti-ādi vuttaṃ. **Janapadakalyāṇi**ti janapadamhi kalyāṇi uttamā chasarīradosarahitā pañcakalyāṇasamannāgatā. Sā hi yasmā nātidīghā nātirassā nātikisā nātithulā nātikālī nāccodātāti atikkantā mānusaṇṇaṃ, asampattā dibbaṇṇaṃ, tasmā **chasarīradosarahitā**. Chavikalyāṇaṃ māṃsakalyāṇaṃ nhārukalyāṇaṃ aṭṭhikalyāṇaṃ vayakalyāṇanti imehi pana kalyāṇehi samannāgatattā **pañcakalyāṇasamannāgatā** nāma. Tassā hi āgantukobhāsakiccaṃ natthi, attano sarīrobhāseneva dvādasahatthe ṭhāne ālokaṃ karoti, piyaṅgusāmā vā hoti suvaṇṇasāmā vā, ayamassā **chavikalyāṇatā**. Cattāro panassā hatthapādā mukhapariyosānaṃ lākhārasaparikkamaṃ viya rattapavālarattakambalasadisāṃ hoti, ayamassā **māsakalyāṇatā**. Vīsati pana nakhapattāni māṃsato amuttaṭṭhāne lākhārasapūritāni viya, muttaṭṭhāne khīradhārāsadisāni honti, ayamassā **nhārukalyāṇatā**. Dvattimsa dantā suphusitā¹ sudhotavajirapanti viya khāyanti, ayamassā **aṭṭhikalyāṇatā**. Vīsaṃvassasatikāpi samānā soḷasavassuddesikā viya hoti nippalitena, ayamassā **vayakalyāṇatā**. Iti imehi pañcahi kalyāṇehi samannāgatattā “janapadakalyāṇi”ti vuccati. **Tuvaṇanti** sīghaṃ.

Imasmim ṭhāne nivattessati, imasmim ṭhāne nivattessatīti cintentamevāti so kira tathāgate gāravavasena “pattam vo bhante gaṇhathā”ti vattum avisahanto evaṃ cintesi “sopānasīse pattam

gaṇhissatī”ti. Satthā tasmimpi ṭhāne na gaṇhi. Itaro “sopānapādamūle gaṇhissatī”ti cintesi. Satthā tatthāpi na gaṇhi. Itaro “rājaṅgaṇe gaṇhissatīti cintesi. Satthā tatthāpi na gaṇhi. Evaṃ “idha gaṇhissati, ettha gaṇhissatī”ti cintentameva satthā vihāraṃ netvā pabbājesi.

Mahākappinattheravatthu

231. Navame **sutavittakoti** dhammassavanapiyo. **Paṭihārakassāti** dovārikassa. **Saccakārenāti** saccakiriyāya. **Satthā** “**uppalavaṇṇā āgacchatū**”ti cintesi. **Therī āgantvā sabbā pabbājetvā bhikkhunī-upassayaṃ gatāti** idaṃ aṅguttarabhāṇakānaṃ kathāmaggaṃ dassentena vuttaṃ. Teneva **dhammapadaṭṭhakathāyaṃ**¹ vuttaṃ—

“Tā satthāraṃ vanditvā ekamantaṃ ṭhitā pabbajjaṃ yācimsu. Evaṃ kira vutte satthā uppalavaṇṇāya āgamaṇaṃ cintesīti ekacce vadanti. Satthā pana tā upāsikāyo āha ‘sāvattim gantvā bhikkhunī-upassaye pabbājethā’ti. Tā anupubbena janapadacārikaṃ caramānā antarāmagge mahājanena abhihaṭasakkārasammānā padasāva vīsayojanasatikāṃ maggaṃ gantvā bhikkhunī-upassaye pabbajitvā arahattaṃ pāpuṇimsū”ti.

Dhammapīti dhammapāyako, dhammaṃ pivantoti attho. Dhammo ca nāmesa na sakkā bhājanena yāgu-ādīni viya pātum, navavidhaṃ pana lokuttaradhammaṃ nāmakāyena phusanto ārammaṇato sacchikaronto pariññābhisamayādīhi dukkhādīni ariyasaccāni paṭivijjhanto dhammaṃ pivati nāma. **Sukhaṃ setīti** desanāmattametaṃ, catūhipi iriyāpathehi sukhaṃ viharatīti attho. **Vippasannenāti** anāvilena nirupakkilesena. **Ariyappavediteti** buddhādīhi ariyehi pavedite satipaṭṭhānādibhede bodhipakkhiyadhamme. **Sadā ramatīti** evarūpo dhammapīti vippasannena cetasa viharanto paṇḍiccena samannāgato sadā ramati abhiraṃ. Bāhitapāpattā “**brāhmaṇā**”ti therāṃ ālapati.

1. Dhammapada-Ṭṭha 1. 358 piṭṭhe.

Sāgatattheravatthu

232. Dasame **chabbaggiyānaṃ vacanenā**ti kosambikā kira upāsakā āyasmantaṃ sāgataṃ upasaṅkamitvā abhivādetvā ekamantaṃ ʈhitā evamāhaṃsu “kiṃ bhante ayyānaṃ dullabhañca manāpañca, kiṃ paṭiyādemā”ti. Evaṃ vutte chabbaggiyā bhikkhū kosambike upāsake etadavocuṃ “atthāvuso kāpotikā nāma pasannā bhikkhūnaṃ dullabhā ca manāpā ca, taṃ paṭiyādethā”ti. Atha kosambikā upāsakā ghare ghare kāpotikaṃ pasannaṃ paṭiyādetvā āyasmantaṃ sāgataṃ piṇḍāya carantaṃ disvā etadavocuṃ “pivatu bhante ayyo sāgato kāpotikaṃ pasannaṃ, pivatu bhante ayyo sāgato kāpotikaṃ pasannaṃ”ti. Athāyasmā sāgato ghare ghare kāpotikaṃ pasannaṃ pivitvā nagaramhā nikkhamanto nagaradvāre pati. Tena vuttaṃ “**chabbaggiyānaṃ vacanena sabbagehesu kāpotikaṃ pasannaṃ paṭiyādetvā**”ti-ādi. Tattha **kāpotikā** nāma kapotapādasamānavañṇā rattobhāsā. **Pasannā**ti surāmaṇḍassetāṃ adhivacanaṃ. **Vinaye samuṭṭhanti** surāpānasikkhāpade¹ āgataṃ.

Rādhatheravatthu

233. Ekādasame **sattā sārīputtattherassa saññaṃ adāsī**ti brāhmaṇaṃ pabbājetuṃ saññaṃ adāsī, āṇāpesīti vuttaṃ hoti. Bhagavā kira taṃ brāhmaṇaṃ pabbajjaṃ alabhitvā kisaṃ lūkhaṃ dubbaṇṇaṃ uppaṇḍuppaṇḍukajātaṃ disvā bhikkhū āmantesi “ko bhikkhave tassa brāhmaṇassa adhikāraṃ saratī”ti. Evaṃ vutte āyasmā sārīputto bhagavantaṃ etadavoca “ahaṃ kho bhante tassa brāhmaṇassa adhikāraṃ sarāmī”ti. Kiṃ pana tvaṃ sārīputta brāhmaṇassa adhikāraṃ sarasīti. Idha me bhante so brāhmaṇo rājagahe piṇḍāya carantassa kaṭacchubhikkhaṃ dāpesi, imaṃ kho ahaṃ bhante tassa brāhmaṇassa adhikāraṃ sarāmī”ti. Sādhū sādhū sārīputta. Kataññuno hi sārīputta sappurisā katavedino, tena hi tvaṃ sārīputta taṃ brāhmaṇaṃ pabbājehi upasampādehīti. **Aṭṭhuppattiyaṃ āgato**ti alīnacittajātakassa² aṭṭhuppattiyaṃ³ āgato.

1. Vi 2. 144 piṭṭhe.

2. Khu 5. 37 piṭṭhe.

3. Jātaka-Ṭṭha 2. 16 piṭṭhe.

Nidhīnanti tattha tattha nidahitvā ṭhapitānaṃ hiraṇṇasuvaṇṇādipūrānaṃ nidhikumbhīnaṃ. **Pavattāraṇti** kicchajīvike¹ duggatamanusse anukampaṃ katvā “ehi, te sukhena jīvanupāyaṃ dassessāmi”ti nidhiṭṭhānaṃ netvā hatthaṃ pasāretvā “imaṃ gahetvā sukhaṃ jīvā”ti ācikkhitāraṃ viya. **Vajjadassinanti** dve vajjadassino “iminā naṃ asāruppena vā khalitena vā saṃghamajjhe niggaṇhissāmi”ti randhagavesako ca, anaññātaṃ nāpanatthāya nātaṃ anuggaṇhanatthāya sīlādīnamassa vuddhikāmatāya taṃ taṃ vajjaṃ olokanena ullumpanasabhāvasaṇṭhito ca. Ayaṃ idha adhippeto. Yathā hi duggatamanusso “imaṃ gaṇhāhi”ti tajjetvāpi pothetvāpi nidhiṃ dassente kopāṃ na karoti, pamuditova hoti, evamevaṃ evarūpe puggale asāruppaṃ vā khalitaṃ vā disvā ācikkhante kopo na kātabbo, tuṭṭheneva bhavitabbaṃ. “Bhante mahantaṃ vo kammaṃ kataṃ mayhaṃ ācariyupajjhāyaṭṭhāne ṭhatvā ovaḍantehi, punapi maṃ vadeyyāthā”ti pavāretabbameva.

Niggayhavādinti ekacco hi saddhivihārikādīnaṃ asāruppaṃ vā khalitaṃ vā disvā “ayaṃ me mukhodakadānādīhi sakkaccaṃ upaṭṭhahati, sace naṃ vakkhāmi, na maṃ upaṭṭhahissati, evaṃ me parihāni bhavissatī”ti taṃ vattuṃ avisahanto na niggayhavādī nāma hoti, so imasmiṃ sāsane kacavaraṃ ākirati. Yo pana tathārūpaṃ vajjaṃ disvā vajjānurūpaṃ tajjento paṇāmento daṇḍakammaṃ karonto vihārā nīharanto sikkhāpeti, ayaṃ niggayhavādī nāma seyyathāpi sammāsambuddho. Vuttaṃ hetāṃ “niggayha niggayhāhaṃ ānanda vakkhāmi, pavayha pavayha ānanda vakkhāmi, yo sāro, so ṭhassatī”ti². **Medhāvinti** dhammojapaññāya samannāgataṃ. **Tādisanti** evarūpaṃ **paṇḍitaṃ bhajeyya** payirupāseyya. Tādisaṃ hi ācariyaṃ **bhajamānassa** antevāsikassa **seyyo hoti na pāpiyo**, vaḍḍhiyeva hoti, no parihānīti.

Mogharājattheravatthu

234. Dvādasame **kaṭṭhavāhananagareti** kaṭṭhavāhanena gahitattā evaṃladdhanāmake nagare. Atīte kira bārāṇasivāsī eko rukkhavaḍḍhaki sake ācariyake adutiyo. Tassa soḷasa sissā ekamekassa sahasaṃ antevāsikā. Evaṃ te sattarasādhikā soḷasa sahasā

1. Kicchajīvite (Sī, Ka)

2. Ma 3. 159 piṭṭhe.

ācariyantevāsikā sabbepi bārāṇasim upanissāya jīvikam kappentā pabbatasamīpaṃ gantvā rukkhe gahetvā tattheva nānāpāsādavikatiyo niṭṭhāpetvā kullaṃ bandhitvā gaṅgāya bārāṇasim ānetvā sace rājā atthiko hoti, rañño ekabhūmakam vā sattabhūmakam vā pāsādam yojetvā denti. No ce, aññesampi vikkiṇitvā puttadāraṃ posenti. Atha nesam ekadivasam ācariyo “na sakkā vaḍḍhakikammena niccam jīvitum, dukkaram hi jarākāle etaṃ kamman”ti cintetvā antevāsike āmantesi “tātā udumbarādayo appasārarukkhe ānethā”ti. Te “sādhū”ti paṭissuṇitvā ānayimsu. So tehi kaṭṭhasakuṇaṃ katvā tassabbhantaraṃ pavisitvā vātena yantaṃ pūresi. Kaṭṭhasakuṇo suvaṇṇaḥamsarājā viya ākāse laṅghitvā vanassa upari caritvā antevāsinaṃ purato oruhi.

Athācariyo sisse āha “tātā idisāni kaṭṭhavāhanāni katvā sakkā sakalajambudīpe rajje gahetum, tumhepi tātā etāni karoṭha, rajjaṃ gahetvā jīvissāma, dukkaram vaḍḍhakisippena jīvitum”ti. Te tathā katvā ācariyassa paṭivedesuṃ. Tato ne ācariyo āha “katamaṃ tātā rajjaṃ gaṇhāmā”ti. Bārāṇasirajjaṃ ācariyāti. Alaṃ tātā mā etaṃ rucittha¹, mayaṃ hi taṃ gahetvāpi “vaḍḍhakirājā, vaḍḍhakiyuvarājā”ti vaḍḍhakivādā na muccissāma, mahanto jambudīpo, aññattha gacchāmāti. Tato saputtadārakā kaṭṭhavāhanāni abhiruhitvā sajjāvudhā hutvā himavantābhimukhā gantvā himavati aññataraṃ nagaraṃ pavisitvā rañño nivesaneyeva paccuṭṭhasu. Te tattha rajjaṃ gahetvā ācariyaṃ rajje abhisiñciṃsu. So “kaṭṭhavāhano rājā”ti pākāto ahosi, taṃ nagaraṃ tena gahitattā “kaṭṭhavāhananagaraṃ”teva nāmaṃ labhi.

Tapacāranti tapacaraṇaṃ. **Pāsānacetiye piṭṭhipāsāṇe nisīdīti** pāsāṇakacetiyaṃ laddhavohāre piṭṭhipāsāṇe sakkena māpīte mahāmaṇḍape nisīdi. Tattha kira mahato pāsāṇassa upari pubbe devaṭṭhānaṃ ahosi, uppanne pana bhagavati vihāro jāto, so teneva purimavohārena “pāsānacetiyaṃ”ti vuccati.

Tena puccite dutiyo hutvā satthāraṃ pañhaṃ pucchīti—

“Muddhaṃ muddhādhipātāṇca, bāvarī paripucchati.
Taṃ byākarohi bhagavā, kaṅkhaṃ vinaya no ise”¹—

evaṃ tena pañhe pucchite bhagavatā ca—

“Avijjā muddhāti jānāhi, vijjā muddhādhipātini.
Saddhāsatisamādhīhi, chandavīriyena saṃyutā”¹—

pañhe vissajjite dutiyo hutvā pañhaṃ pucchi.

Athassa -pa- pañhaṃ kathesīti—

“Kathaṃ lokaṃ avekkhantaṃ, maccurājā na passatī”²—

tena pañhe pucchite—

“Suññato lokaṃ avekkhassu, mogharāja sadā sato.
Attānudiṭṭhiṃ ūhacca, evaṃ maccutaro siyā.
Evaṃ lokaṃ avekkhantaṃ, maccurājā na passatī”³—

pañhaṃ vissajjesi.

Sesajanāti tasmim samāgame sannipatitā sesajanā. **Na kathīyantī**ti
“ettakā sotāpannā”^{ti}-ādinā na vuccanti. **Evaṃ pārāyane vatthu samuṭṭhanti**
pārāyanavagge³ idaṃ vatthu samuṭṭhitaṃ.

Catutthavaggavaṇṇanā niṭṭhitā.

Therapāḷisaṃvaṇṇanā niṭṭhitā.

5. Pañcamavaggavaṇṇanā

Mahāpajāpati gotamītherīvatthu

235. Theripāḷisaṃvaṇṇanāya paṭhame **yadidaṃ mahāgotamī**ti ettha
“yadidaṃ mahāpajāpati gotamī”^{ti} ca paṭhanti. Tattha **gotamī**ti gottam.

1. Khu 1. 433 piṭṭhe.

2. Khu 1. 447 piṭṭhe.

3. Khu 1. 448 piṭṭhe Suttanipāte.

Nāmakaraṇadivase panassā laddhasakkārā brāhmaṇā lakkhaṇasampattiṃ disvā “sace ayaṃ dhītaraṃ labhissati, cakkavattirañño mahesī bhavissati. Sace puttāṃ labhissati, cakkavattirājā bhavissati”ti ubhayathāpi “mahatīyevassā pajā bhavissati”ti byākarimṣu, tasmā puttapajāya ceva dhītupajāya ca mahantatāya “mahāpajāpati”ti voharimṣu. Tadubhayaṃ pana saṃsandetvā “**mahāpajāpatigotamī**”ti vuttaṃ. **Vārabhikkhanti** vārena dātabbaṃ bhikkhaṃ. **Nāmaṃ akaṃsūti** gottāmyeva nāmaṃ akaṃsu. **Mātucchanti** cūlamātaraṃ. Mātubhaginī hi mātucchāti vuccati. **Kalahavivādasuttapariyosāneti** “kutopahūtā kalahā vivādā”ti-ādinā suttanipāte āgatassa **kalahavivādasuttassa**¹ pariyosāne. Idañca aṅguttarabhāṇakānaṃ kathāmaggānusārena vuttaṃ. Apare pana “tasmiṃyeva suttanipāte ‘attadaṇḍābhayaṃ jātan’ti-ādinā āgatassa **attadaṇḍasuttassa**² pariyosāne”ti vadanti. **Nikkhamitvā pabbajitānanti** ettha ehibhikkhupabbajjāya ete pabbajitāti vadanti. Teneva suttanipāte **attadaṇḍasuttasamvaṇṇanāya**³ vuttaṃ “desanāpariyosāne pañcasatā sākiyakumārā koḷiyakumārā ca ehibhikkhupabbajjāya pabbajitā. Te gahetvā bhagavā mahāvanaṃ pāvisī”ti. Sesamettha suviññeyyameva.

Khemātherivattu

236. Dutiye **parapariyāpannā sutvāti** paresaṃ dāsiṃ hutvā. **Suvaṇṇarasapiṇjaro ahoṣīti** suvaṇṇarasapiṇjaro viya ahoṣi.

Makkaṭakova jālanti yathā nāma makkaṭako suttajālaṃ katvā majjhaṭṭhāne nābhimaṇḍale nipanno pariyante patitaṃ paṭaṅgaṃ vā makkhikaṃ vā vegena gantvā vijjhitvā tassa rasaṃ pivitvā punāgantvā tasmiṃyeva ṭhāne nipajjati, evameva ye sattā rāgarattā dosapaduṭṭhā mohamūlā sayamkataṃ taṇhāsotaṃ anupatanti, te taṃ samatikkamituṃ na sakkonti, evaṃ duratikkamaṃ. **Etampi chetvāna vajanti dhīrāti** paṇḍitā etaṃ bandhanaṃ chinditvā **anapekkhino** nirālayā hutvā arahattamaggena sabbaṃ dukkhaṃ pahāya vajanti gacchantīti attho.

1. Khu 1. 413 piṭṭhe Suttanipāte.

2. Khu 1. 424 piṭṭhe Suttanipāte.

3. Suttanipāta-Ṭṭha 2. 285 piṭṭhe.

Uppalavaṇṇātherīvatthu

237. Tatiyaṃ uttānatthameva.

Paṭācārātherīvatthu

238. Catutthe **paṭihārasatenapī**ti dvārasatenapi. Paṭihārasaddo hi dvāre dovārike ca dissati. **Kulasabhāganti** attano gehasamīpaṃ.

Tāṇāyāti tāṇabhāvāya paṭiṭṭhānatthāya. **Bandhavāti** putte ca pitaro ca ṭhapetvā avasesā ñāṭisuhajjā. **Antakenā dhipannassāti** maraṇena abhibhūtaṃ. Pavattiyaṃ hi puttādayo annapānādiddānena ceva uppannakiccanittharaṇena ca tāṇā hutvāpi maraṇakāle kenaci upāyena maraṇaṃ paṭibāhituṃ asamattatāya tāṇatthāya leṇatthāya na santi nāma. Teneva vuttaṃ “**natthi ñāṭisu tāṇatā**”ti.

Etamatthavasanti etaṃ tesāṃ aññamaññassa tāṇaṃ bhavituṃ asamattabhabhāvasaṅkhātāṃ kāraṇaṃ jānitvā **paṇḍito** catupārisuddhisīlena samvuto rakkhitaḥḥapito hutvā **nibbānagamaṇaṃ** aṭṭhaṅgikaṃ **maggam** sīghaṃ sodheyyāti attho.

Dhammadinnātherīvatthu

239. Pañcame **parāyattatṭhāneti** paresaṃ dāsiṭṭhāne. **Sujātattherassa adhikārakammaṃ katvāti** sā kira attano kese vikkiṇitvā sujātattherassa nāma aggasāvakassa dānaṃ datvā patthanaṃ akāsi. Taṃ sandhāyetaṃ vuttaṃ. **Hatthe pasāriteti** tassa hatthāvalambanattamaṃ pubbāciṇṇavasena hatthe pasārite. So kira anāgāmī hutvā gehaṃ āgacchanto yathā aññesu divasesu ito cito ca olovento sitaṃ kurumāno hasamāno āgacchati, evaṃ anāgantvā santindriyo santamānaso hutvā agamāsi. Dhammadinnā sīhapañjaraṃ ugghāṭetvā vīthiṃ olokayamānā tassa āgamanākāraṃ disvā “kiṃ nu kho etan”ti cintetvā tassa paccuggamaṇaṃ kurumānā sopānasīse ṭhatvā olambanattamaṃ hattham pasāresi. Upāsako attano hattham samīñjesi¹.

1. Samañcheti (Ka)

Sā “pātarāsabhojanakāle jānissāmī”ti cintesi. Upāsako pubbe tāya saddhim ekato bhuñjati. Taṃ divasaṃ pana taṃ anapaloketvā yogāvacarabhikkhu viya ekakova bhuñji. Tenāha “**bhuñjamānopi imaṃ detha, imaṃ harathāti na byāharī**”ti. Tattha **imaṃ dethāti** imaṃ khādanīyaṃ vā bhojanīyaṃ vā detha. **Imaṃ harathāti** imaṃ khādanīyaṃ vā bhojanīyaṃ vā apaharatha. **Santhavavasenāti** kilesasanthavavasena. Cirakālaparibhāvitāya ghaṭadīpajālāya viya abbhantare dibbamānāya hetusampattiyā codiyamānā āha “**evaṃ sante -pa- mayhaṃ pabbajjaṃ anujānāthā**”ti.

Ayaṃ tāva seṭṭhi gharamajjhe ʈhitova dukkhassantaṃ akāsīti sā kira “dhammadinne tuyhaṃ doso natthi, ahaṃ pana ajja paṭṭhāya santhavavasena -pa- kulagharaṃ gacchā”ti vutte evaṃ cintesi “pakatipuriso evaṃ vattā nāma natthi, addhā etena lokuttaradhammo nāma paṭividdho”ti. Tenassā ayaṃ saṅkappo ahosi “ayaṃ tāva seṭṭhi gharamajjhe ʈhitova dukkhassantaṃ akāsī”ti. **Majjhimanikāyaṭṭhakathāyaṃ**¹ pana “atha kasmā mayā saddhim yathāpakatiyā ālāpasallāpamattampi na karoṭhāti so cintesi ‘ayaṃ lokuttaradhammo nāma garu bhāriyo na pakāsetabbo, sace kho paṇāhaṃ na kathessāmi, ayaṃ hadayaṃ phāletvā ettheva kālaṃ kareyyā’ti tassā anuggahatthāya kathesi ‘dhammadinne ahaṃ satthu dhammadesanaṃ sutvā lokuttaradhammaṃ nāma adhigato, taṃ adhigatassa evarūpā lokiyakiriyaṃ na vaṭṭatī’ti” vuttaṃ.

Pañcakkhandhādivasena pañhe pucchīti “sakkāyo sakkāyoti ayye vuccati, katamo nu kho ayye sakkāyo vutto bhagavatā”ti-ādinā cūḷavedallasutte² āgatanayena pucchi. **Pucchitaṃ pucchitaṃ vissajjesīti** “pañca kho ime āvuso visākha upādānakkhandhā sakkāyo vutto bhagavatā”ti² ādinā tattheva āgatanayena vissajjesi. **Sūrabhāvanti** tikkhabhāvaṃ. Anadhigata-arahattamaggassa uggahena vinā tattha pañho na upaṭṭhātīti āha “**uggahavasena arahattamaggepi pucchī**”ti. **Taṃ nivattentīti** “vimuttiyā panāyye kiṃ paṭibhāgo”ti³ pucchite “vimuttiyā kho āvuso visākha nibbānaṃ paṭibhāgo”ti³ vutte “nibbānassa panāyye kiṃ paṭibhāgo”ti³ puna pucchite taṃ nivattentī

1. Ma-Ṭṭha 2. 256 piṭṭhe.

2. Ma 1. 373 piṭṭhe.

3. Ma 1. 378 piṭṭhe.

“accasarāvuso visākhā”ti-ādimāha. Tattha **accasarāti** apucchitabbaṃ pucchanto pañhaṃ atikkāmitā ahoṣīti attho. **Nāsakkhi pañhānaṃ pariyantaṃ gahetunti** pañhānaṃ paricchedappamāṇaṃ gahetuṃ nāsakkhi. Pañhānaṃ hi paricchedaṃ gahetuṃ yuttaṭṭhāne aṭṭhatvā tato paraṃ pucchanto nāsakkhi pañhānaṃ pariyantaṃ gahetuṃ. Appaṭibhāgadhammassa ca paṭibhāgaṃ pucchi. Nibbānaṃ nāmetaṃ appaṭibhāgaṃ, na sakkā nīlaṃ vā pītakaṃ vāti kenaci dhammena saddhiṃ paṭibhāgaṃ katvā dassetuṃ, tañca tvaṃ iminā adhippāyena pucchasiṭi attho. **Nibbānogadhanti** nibbānaṃ ogāhetvā ṭhitāṃ, nibbānantogadhaṃ nibbānaṃ anuppaviṭṭhanti attho. **Nibbānaparāyaṇanti** nibbānaṃ paraṃ ayanamassa parāgati, na tato paraṃ gacchatīti attho. Nibbānaṃ pariyosānaṃ avasānaṃ assāti **nibbānapariyosānaṃ**.

Pureti atītesu khandhesu. **Pacchāti** anāgatesu khandhesu. **Majjheti** paccuppannesu khandhesu. **Akiñcananti** yassa etesu tīsu taṇhāgāhasaṅkhātāṃ kiñcanaṃ natthi, tamahaṃ rāgakiñcanādīhi akiñcanaṃ kassaci gahaṇassa abhāvena **anādānaṃ** brāhmaṇaṃ vadāmīti attho.

Paṇḍitāti dhātu-āyatanādikusalatāsāṅkhātēna paṇḍiccena samannāgatā. Vuttaṃ hetam—

“Kittāvatā nu kho bhante paṇḍito hoti? Yato kho ānanda bhikkhu dhātukusalo ca hoti āyatanakusalo ca paṭiccasamuppādakusalo ca hānāṭṭhānakusalo ca, ettāvatā kho ānanda bhikkhu paṇḍito hoti”ti¹.

Mahāpaññāti mahante atthe mahante dhamme mahantā niruttiyo mahantāni paṭibhānāni pariggahaṇe samatthāya paññāya samannāgatā. Imissā hi theriyā asekkhappaṭisambhidāppattatāya paṭisambidāyo pūretvā ṭhitatāya paññāmahattaṃ. **Yathā taṃ dhammadinnāyāti** yathā dhammadinnāya bhikkhuniyā byākataṃ, ahaṃ evameva byākareyyanti attho. **Tanti** nipātamattaṃ.

1. Ma 3. 107 piṭṭhe.

Nandātherīvatthu

240. Chaṭṭhe aññaṃ maggaṃ apassantīti aññaṃ upāyaṃ apassantī.
Vissatthāti nirāsaṅkā. Itthinimittanti itthiyā subhanimittam, subhākāraṇi
vuttaṃ hoti. Dhammapade gāthaṃ vatvāti—

“Aṭṭhīnaṃ nagaraṃ kataṃ, maṃsalohitalepanaṃ.

Yattha jarā ca maccu ca, māno makkho ca ohito”ti¹—

imaṃ gāthaṃ vatvā. Tatrāyamadhippāyo—yatheva hi
pubbaṇṇāparaṇṇādīnaṃ odahanatthāya kaṭṭhāni ussāpetvā vallīhi bandhitvā
mattikāya vilimpitvā nagarasaṅkhātāṃ bahiddhā gehaṃ karonti, evamidam
ajjhāttikampi tīṇi aṭṭhisatāni ussāpetvā nhāruvinaddham
maṃsalohitalepanaṃ tacapaṭicchannaṃ jīraṇalakkhaṇāya jarāya
maraṇalakkhaṇassa maccuno ārogyasampadādīni paṭicca
uppaṇṇalakkhaṇassa mānassa sukatakāraṇavināsanalakkhaṇassa makkhassa
ca odahanatthāya nagaraṃ kataṃ. Evarūpo eva hi ettha kāyikacetasiko
ābādho ohito, ito uddham kiñci gayhūpagaṃ natthīti.

Suttaṃ abhāsīti—

“Caram vā yadi tiṭṭham, nisinno uda vā sayam.

Samiñjeti pasāreti, esā kāyassa iñjanā.

Aṭṭhinahārusamyutto, tacamaṃsāvalepano.

Chaviyā kāyo paṭicchanno, yathābhūtaṃ na dissahī”ti²—

ādinā suttaṃ abhāsī.

Soṇātherīvatthu

241. Sattame sabbepi visum visum gharāvāse patitṭhāpesīti ettha
sabbepi visum visum gharāvāse patitṭhāpetvā “puttāva maṃ paṭijaggissanti,
kiṃ me visum kuṭumbenā”ti sabbaṃ sāpateyyampi vibhajitvā adāsīti
veditabbaṃ. Teneva hi tato patṭhāya “ayaṃ amhākaṃ kiṃ karissatī”ti attano
santikaṃ āgataṃ “mātā”ti saññampi na karimsu. Tathā hi naṃ
katipāhaccayena jetṭhaputtassa bhariyā “aho amhākaṃ ayaṃ

1. Khu 1. 36 piṭṭhe Dhammapade.

2. Khu 1. 307 piṭṭhe Suttanipāte.

jeṭṭhaputto meti dve koṭṭhāse datvā viya imameva gehaṃ āgacchatī”ti āha. Sesaputtānaṃ bhariyāyopi evamevaṃ vadiṃsu. Jeṭṭhadhītaraṃ ādiṃ katvā tāsāṃ gehaṃ gatakāle thāpi naṃ evameva vadiṃsu. Sā avamānappattā hutvā “kiṃ me imesaṃ santike vutthena, bhikkhunī hutvā jīvissāmi”ti bhikkhunī-upassayaṃ gantvā pabbajjaṃ yāci, tā naṃ pabbājesuṃ. Imameva vatthum dassento “**bahuputtikasonā tesāṃ attani agāravabhāvaṃ ñatvā ‘gharāvāsena kiṃ karissāmi’ti nikkhamitvā pabbajī**”ti āha.

Vihāraṃ gacchantiyoti bhikkhuvihāraṃ gacchantiyo.

Dhammamuttamanti navavidhalokuttaradhammaṃ. So hi uttamadhammo nāma yo hi taṃ na passati, tassa vassasatampi jīvanato taṃ dhammaṃ passantassa paṭivijjhaṇṭassa **ekāhampi** ekakkhaṇampi jīvitaṃ seyyo.

Āgantukajanoti vihāragataṃ bhikkhunījanaṃ sandhāya vadati.

Anupadhāretvāti asallakkhetvā.

Bakulātherīvatthu

242. Aṭṭhamāṃ uttānatthameva.

Kuṇḍalakesātherīvatthu

243. Navame **catukketi** vīthicatukke. Catunnaṃ samāhāro catukkaṃ. **Cārakatoti** bandhanāgārato. **Ubbāṭṭetvāti** uddharitvā.

Muhuttamapi cintayeti muhuttaṃ taṅkhaṇampi ṭhānupattikapaññāya taṅkhaṇānurūpaṃ atthaṃ cintituṃ sakkuṇeyya. **Sahassamapi ce gāthā, anattapadasaṃhitāti** ayaṃ gāthā dārucīriyattherassa bhagavatā bhāsītā, idhāpi ca sāyeva gāthā dassitā. **Therigāthāsaṃvaṇṇanāyaṃ**¹ ācariyadhammapālattherenapi kuṇḍalakesittheriyā vatthumhi ayameva gāthā vuttā. **Dhammapadaṭṭhakathāyaṃ**² pana kuṇḍalakesittheriyā vatthumhi—

“Yo ca gāthāsataṃ bhāse, anattapadasaṃhitā.

Ekam dhammapadam seyyo, yaṃ sutvā upasammatī”ti³—

ayaṃ gāthā āgatā. Taṃtaṃbhāṇakānaṃ kathāmaggānusārena tattha tattha tathā vuttanti na idha ācariyassa pubbāparavirodho saṅkitabbo.

1. Therīgāthā-Ṭṭha 105 piṭṭhe.

2. Dhammapada-Ṭṭha 1. 417 piṭṭhe.

3. Khu 1. 28 piṭṭhe.

Bhaddākāpilānītherī-bhaddākaccānātherīvatthu

244-245. Dasamaṃ ekādasamañca uttānatthameva.

Kisāgotamītherīvatthu

246. Dvādasame **tīhi lūkhehī**ti vatthalūkha¹
suttalūkharajanalūkhasaṅkhātehi tīhi lūkhehi. **Siddhatthakanti** sāsapabījāṃ.

Taṃ puttapasusammattanti taṃ rūpabalādisampanne putte ca pasū ca labhitvā “mama puttā abhirūpā balasampannā paṇḍitā sabbakiccasamatthā, mama goṇo arogo abhirūpo mahābhāravaho, mama gāvī bahukhīrā”ti evaṃ puttehi ca pasūhi ca sammattaṃ naraṃ. **Byāsattamanasanti** cakkhuviññeyyādīsu ārammaṇesu hiraññasuvaṇṇādīsu pattacīvarādīsu vā yaṃ yaṃ laddhaṃ hoti, tattha tattheva lagganāya sattamānasam². **Suttaṃ gāmanti** niddaṃ upagataṃ sattakāyaṃ. **Mahoghovāti** yathā evarūpaṃ gāmaṃ gambhīrato vitthārato ca mahanto mahānadi-ogho antamaso sunakhampi asesetvā sabbaṃ ādāya gacchati, evaṃ vuttappakāraṃ naraṃ maccu ādāya gacchatīti attho. **Amataṃ padanti** maraṇarahitaṃ koṭṭhāsaṃ, amataṃ mahānibbānanti attho. Sesamettha uttānameva.

Siṅgālakamātātherīvatthu

247. Terasamaṃ uttānatthameva.

Theripālisaṃvaṇṇanā niṭṭhitā.

1. Satthalūkha (Sī)

2. Byāsattamanasanti hiraññasuvaṇṇādīsu vā pattacīvarādīsu vā kiñcideva labhitvā tato uttaritaraṃ patthanāya āsattamānasam vā. Cakkhuviññeyyādīsu ārammaṇesu vuttappakāresu vā parikkhāresu yaṃ yaṃ laddhaṃ hoti, tattha tattha laggananāya byāsattamānasam (Sī) Dhammapada-Ṭṭha 2. 270 piṭṭhepi passitabbaṃ.

6. Chaṭṭhavaggavaṇṇanā

Tapussa-bhallikavatthu

248. Upāsakapāḷisaṁvaṇṇanāya paṭhame **sabbapaṭhamam saraṇam gacchantānanti** sabbesaṁ paṭhamam hutvā saraṇam gacchantānam. **Ito paranti** sattasattāhato param. **Gamanupacchedam akāsīti** gamanavicchedam akāsi. Yathā te goṇā dhuraṁ chaḍḍetvā pothiyamānāpi na gacchanti, tathā akāsīti attho. **Tesanti** Tapussabhallikānam. **Adhimuccitvāti** āvisitvā. Yakkhassa āvaṭṭo **yakkhāvaṭṭo**. Evaṁ sesesupi. **Atītabuddhānam āciṇṇam olokesīti** atītabuddhā kena bhājanena paṭiggaṇhimsūti buddhāciṇṇam olokesi. **Dvevācike saraṇe patiṭṭhāyāti** saṁghassa anuppannatā buddhadhammavasena dvevācike saraṇe patiṭṭhahitvā. **Cetiyanti** pūjanīyavatthum. **Jīvakesadhātuyāti** jīvamānassa bhagavato kesadhātuyā.

Anāthapiṇḍikasetṭhivatthu

249. Dutiye **teneva guṇenāti** teneva dāyakabhāvasaṅkhātena guṇena. So hi sabbakāmasamiddhatāya vigatamaccheratāya karuṇādiguṇasamaṅgitāya ca niccakālam anāthānam piṇḍamadāsi. Tena sabbakālam upaṭṭhito anāthānam piṇḍo etassa atthīti anāthapiṇḍikoti saṅkham gato. **Yojanikavihāre kāretvāti** yojane yojane ekamekaṁ vihāraṁ kāretvā. **“Evarūpaṁ dānam pavattesi”**ti vatvā tameva dānam vibhajitvā dassento **“devasikaṁ pañca salākabhaddāni honti”**ti-ādimāha. Tattha salākāya gāhetabbaṁ bhattaṁ **salākabhaddaṁ**. Ekasmiṁ pakkhe ekadivasam dātabbaṁ bhattaṁ **pakkhikabhaddaṁ**. Dhuragehe ṭhapetvā dātabbaṁ bhattaṁ **dhurabhaddaṁ**. Āgantukānam dātabbaṁ bhattaṁ **āgantukabhaddaṁ**. Evaṁ sesesupi. **Pañca āsanasaṭṭhāni gehe niccapaññattāneva honti**ti gehe nisīdāpetvā bhuñjantānam pañcannaṁ bhikkhusatānam pañca āsanasaṭṭhāni niccapaññattāni honti.

Cittagahapativatthu

250. Tatiye migā eva **migarūpāni**. **Bhikkhaṁ samādāpetvāti** “bhante mayhaṁ anuggahaṁ karoṭha, idha nisīditvā bhikkhaṁ gaṇhathā”ti bhikkhāgahaṇatthaṁ

samādāpetvā. Vivaṭṭaṃ uddissa upacitaṃ nibbedhabhāgiyakusalaṃ

upanissayo. Saḷāyatanavibhattimeva desesīti

saḷāyatanavibhāgappaṭisaṃhyuttameva dhammakathaṃ kathesi. **Therenā**ti tattha sannihitānaṃ sabbesaṃ jeṭṭhena mahātherena. **Pañhaṃ vissajjetuṃ asakkontenā**ti cittaṇa gahapatinā “yā imā bhante therā anekavihitā diṭṭhiyo loke uppajjanti, ‘sassato loko’ti vā, ‘asassato loko’ti vā, ‘antavā loko’ti vā, ‘anantavā loko’ti vā, ‘taṃ jīvaṃ taṃ sarīraṃ’ti vā, ‘aññaṃ jīvaṃ aññaṃ sarīraṃ’ti vā, ‘hoti tathāgato paraṃ maraṇā’ti vā, ‘na hoti tathāgato paraṃ maraṇā’ti vā, ‘hoti ca na hoti ca tathāgato paraṃ maraṇā’ti vā, ‘neva hoti na na hoti tathāgato paraṃ maraṇā’ti vā yāni cimāni dvāsaṭṭhi diṭṭhigatāni brahmajāle gaṇitāni, imā nu kho bhante diṭṭhiyo kismiṃ sati honti, kismiṃ asati na honti”ti evamādinā¹ pañhe puṭṭhe taṃ pañhaṃ vissajjetuṃ asakkontena. Imaṃ kira pañhaṃ yāvatatiyaṃ puṭṭho mahāthero tuṇhī ahosi. Atha isidattatthero cintesi “ayaṃ therō neva attanā byākaroti, na aññaṃ ajjhesati, upāsako ca bhikkhusaṃghaṃ vihesati, ahametaṃ byākaritvā phāsuvihāraṃ katvā dassāmī”ti. Evaṃ cintetvā ca āsanato vuṭṭhāya therassa santikaṃ gantvā “byākaromahaṃ bhante cittaṇa gahapatino etaṃ pañhaṃ”ti² āha. Evaṃ vutte therō “byākarohi tvaṃ āvuso isidatta cittaṇa gahapahino etaṃ pañhaṃ”ti isidattaṃ ajjhesi. Tena vuttaṃ “**pañhaṃ vissajjetuṃ asakkontena ajjhiṭṭho**”ti.

Pañhaṃ vissajjetvāti “yā imā gahapati anekavihitā diṭṭhiyo loke uppajjanti ‘sassato loko’ti vā, ‘asassato loko’ti vā -pa- yāni cimāni dvāsaṭṭhi diṭṭhigatāni Brahmajāle gaṇitāni, imā kho gahapati diṭṭhiyo sakkāyadiṭṭhiyā sati honti, sakkāyadiṭṭhiyā asati na honti”ti-ādinā² nayena pañhaṃ vissajjetvā. **Gihisahāyakabhāve ñātetī** therassa gihisahāyakabhāve cittaṇa gahapatinā ñāte. Citto kira gahapati tassa pañhaveyyākaṇe tuṭṭho “kuto bhante ayyo isidatto āgacchaṭī”ti vatvā “avantiyā kho ahaṃ gahapati āgacchāmī”ti vutto “atthi bhante

1. Saṃ 2. 477 piṭṭhe.

2. Saṃ 2. 478 piṭṭhe.

avantiyā isidatto nāma kulaputto amhākaṃ adiṭṭhasahāyo pabbajito, diṭṭho so āyasmatā”ti pucchi. Thero ca “evaṃ gahapati”ti vatvā “kahaṃ nu kho bhante so āyasmā etarahi viharatī”ti puna puṭṭho tuṇhī ahosi. Atha citto gahapati “ayyo no bhante isidatto”ti pucchitvā “evaṃ gahapati”ti vutte attano gihisahāyabhāvaṃ aññāsi.

Tejosamāpattipāṭihāriyaṃ dassetvāti ekasmiṃ kira divase citto gahapati “sādhu me bhante ayyo uttarimanussadhammā iddhipāṭihāriyaṃ dassetū”ti mahātheraṃ yāci. Thero “tena hi tvaṃ gahapati ālīnde uttarāsaṅgaṃ paññāpetvā tattha tiṇakalāpaṃ okirā”ti vatvā tena ca tathā kate sayāṃ vihāraṃ pavisitvā ca ghaṭikaṃ datvā tathārūpaṃ iddhābhisaṅkhāraṃ abhisaṅkhāresi, yathā tālacchiggaḷena ca aggaḷantarikāya ca acci nikkhamitvā tiṇāni jhāpeti, uttarāsaṅgaṃ na jhāpeti. Atha citto gahapati uttarāsaṅgaṃ papphoṭetvā saṃviggo lomahaṭṭhajāto ekamantaṃ ṭhito therāṃ bahi nikkhamantaṃ disvā “abhiramatu bhante ayyo macchikāsaṇḍe, ramaṇiyaṃ ambāṭakavanaṃ, ahaṃ ayyassa ussukkaṃ karissāmi cīvara piṇḍapāta senāsana gilānapaccayabhesajjaparikkhārānaṃ”ti āha. Tato thero “na dāni idha vasitum sakkā”ti tamhā viharā pakkāmi. Taṃ sandhāyetaṃ vuttaṃ “**tejosamāpattipāṭihāriyaṃ dassetvā ‘idāni idha vasitum na yuttan’ti yathāsukhaṃ pakkāmi**”ti. **Dve aggasāvakaṭi**-ādīsu yaṃ vattabbaṃ, taṃ vitthārato **vinayapāliyaṃ**¹ āgatameva.

Saddhoti lokiyalokuttarāya saddhāya samannāgato. **Sīlenāti** agāriyasīlaṃ anagāriyasīlanti duvidhaṃ sīlaṃ, tesu idha agāriyaṃ sīlaṃ adhippetāṃ, tena samannāgatoti attho. **Yasobhogasamappitoti** yādiso anāthapiṇḍikādīnaṃ pañca-upāsakasataparivārasaṅkhāto agāriyo yaso, tādiseneva yasena, yo ca dhanadhaññādiko ceva sattavidha-ariyadhanasaṅkhāto cāti duvidho bhogo, tena ca samannāgatoti attho. **Yaṃ yaṃ padesanti** puratthimādīsu disāsu evarūpo kulaputto yaṃ yaṃ padesaṃ bhajati, tattha tattha evarūpena lābhasakkārena pūjitova hotīti attho.

1. Vi 3. 50 piṭṭhe.

2. Anagāriyaṃ (Ka)

Hatthaka-āḷavakavatthu

251. Catutthe **catubbidhena saṅgahavatthunā**ti dānapiyavacana-atthacariyāsamānattatāsankhātena catubbidhena saṅgahavatthunā. “**Sve bhattacāṭiyā saddhim Āḷavakassa pesetabbo aho**”ti vuttamattham pākaṭam katvā dasseturū “**tatrāyaṃ anupubbikathā**”ti-ādimāha. **Migavatthāya araṇṇaṃ gantvā**ti āḷavako rājā vividhanātakūpabhogaṃ chaḍḍetvā corappaṭibāhanatthañca paṭirājanisedhanatthañca byāyāmakaraṇatthañca sattame sattame divase migavaṃ gacchanto ekadivasaṃ balakāyena saddhim “yassa passena migo palāyati, tasseva so bhāro”ti katakatikavatto migavatthāya araṇṇaṃ gantvā. **Ekam miganti** attano ṭhitatṭhānena palātaṃ eṇimigaṃ. **Anubandhitvā**ti tiyojanamaggaṃ ekakova anubandhitvā. Javasampanno hi rājā dhanuṃ gahetvā pattikova tiyojanaṃ taṃ migamanubandhi. **Ghātetvā**ti yasmā eṇimigā tiyojanavegā eva honti, tasmā parikkhīṇajavaṃ taṃ migam udakaṃ pavisitvā ṭhitaṃ ghātetvā. **Dvidhā chetvā dhanukoṭiyaṃ lagetvā nivattetvā āgacchantoti** anatthikopi maṃsena “nāsakkhi migam gahetun”ti apavādamocanatthaṃ dvidhā chinnaṃ dhanukoṭiyaṃ lagetvā āgacchanto. **Sandacchāyanti** ghanacchāyaṃ bahalapattapalāsaṃ.

Rukkhe adhivatthā devatāti āḷavakaṃ yakkhaṃ sandhāya vadati. So hi mahārājūnaṃ santikā varaṃ labhitvā majjhanhikasamaye tassa rukkhassa chāyāya phuṭṭhokāsaṃ pavitṭhe paṇino khādanto tattha paṭivasati. **Āḷavakassa nisīdanapallaṅke nisīdī**ti yattha abhilakkhitesu maṅgaladivasādīsu āḷavako nisīditvā sirim anubhoti, tasmimyeva dibbaratanapallaṅke nisīdi. **Attano gamane asampajjamāne “kim nu kho kāraṇaṃ”ti āvajjenti**ti tadā kira sātāgirahe mavatā bhagavantam jetavaneyeva vanditvā “yakkhasamāgamaṃ gamissāmā”ti saparivārā nānāyānehi ākāseṇa gacchanti, ākāse ca yakkhānaṃ na sabbattha maggo atthi, ākāsaṭṭhāni vimānāni pariharitvā maggaṭṭhāneneva maggo hoti, āḷavakassa pana vimānaṃ bhūmaṭṭhaṃ suguttaṃ pākāraparikkhitaṃ susamvihitadvāraṭṭālakagopuraṃ upari kamsajālasaṇchannamañjūsāsadisam tiyojanaṃ ubbedhena, tassa upari maggo hoti, te taṃ padesaṃāgama

gantumasamatthā ahesuṃ. Buddhānaṃ hi nisinnokāsassa uparibhāgena yāva bhavaggā koci gantumasamattho, tasmā attano gamane asampajjamāne “kiṃ nu kho kāraṇaṃ”ti āvajjesuṃ. **Tesaṃ kathaṃ sutvā cintesī**ti yasmā assaddhassa saddhākathā dukkathā hoti dussīlādīnaṃ sīlakathādayo viya, tasmā tesaṃ yakkhānaṃ santikā bhagavato paṣaṃsaṃ sutvā eva aggimhi pakkhittaloṇasakkharā viya abbhantare uppannakopena paṭapaṭāyamānahadayo hutvā cintesi. **Pabbatakūṭanti** kelāsapabbatakūṭaṃ.

Ito paṭṭhāya ālavakayuddhaṃ vitthāretabbanti so kira manosilātale vāmapādena ṭhatvā “passatha dāni tumhākaṃ vā satthā mahānubhāvo, ahaṃ vā”ti dakkhiṇapādena satṭhiyojanamattaṃ kelāsakūṭapabbataṃ akkami, taṃ ayokūṭappahato viya niddhanta-ayapiṇḍo papaṭikāyo muñci. So tatra ṭhatvā “ahaṃ ālavako”ti ugghosesi, sakalajambudīpaṃ saddo phari. Tiyojanasahassavittathahimavāpi sampakampi yakkhassānubhāvena. So **vātamaṇḍalaṃ** samuṭṭhāpesi “eteneva samaṇaṃ palāpessāmī”ti. Te puratthimādibhedā vātā samuṭṭhahitvā adḍhayojanayojanadvijoyanatiyojanappamāṇāni pabbatakūṭāni padāletvā vanagaccharukkhādīni ummūletvā ālavinagaraṃ pakkhandā jīṇṇahatthisālādīni cuṇṇentā chadaniṭṭhakā ākāse bhamentā. Bhagavā “mā kassaci uparodho hotū”ti adhiṭṭhāsi. Te vātā dasabalaṃ patvā cīvarakaṇṇamattampi cāletuṃ nāsakkhiṃsu. Tato **mahāvassaṃ** samuṭṭhāpesi “udakena ajjhottharivā samaṇaṃ māressāmī”ti. Tassānubhāvena uparūpari satapaṭālasahassapaṭalādibhedā valāhakā uṭṭhahitvā pavassīṃsu. Vuṭṭhidhārāvegena pathavī chiddā ahosi. Vanarukkhādīnaṃ upari mahogho āgantvā dasabalassa cīvare ussāvabindumattampi temetuṃ nāsakkhi. Tato **pāsāṇavassaṃ** samuṭṭhāpesi. Mahantāni mahantāni pabbatakūṭāni dhūmāyantāni pajjalantāni ākāsenāgantvā dasabalaṃ patvā dibbamālāguḷāni sampajjiṃsu. Tato **paharaṇavassaṃ** samuṭṭhāpesi. Ekatothārā ubhatodhārā asisattikhurappādayo dhūmāyantā pajjalantā ākāsenāgantvā dasabalassa pādāmūle dibbapupphāni ahesuṃ.

Tato **aṅgāravassam** samuṭṭhāpesi. Kimsukavaṇṇā aṅgārā ākāsenāgatvā dasabalassa pādamūle dibbapupphāni hutvā vikiriṃsu. Tato **kukkuḷavassam** samuṭṭhāpesi. Accuṇho kukkuḷo ākāsenāgantvā dasabalassa pādamūle candanacuṇṇaṃ hutvā nipati. Tato **vālikavassam** samuṭṭhāpesi. Atisukhumā vālikā dhūmāyantā pajjalantā ākāsenāgantvā dasabalassa pādamūle dibbapupphāni hutvā nipatiṃsu. Tato **kalalavassam** samuṭṭhāpesi. Taṃ dhūmāyantaṃ pajjalantaṃ ākāsenāgantvā dasabalassa pādamūle dibbagandhaṃ hutvā nipati. Tato **andhakāram** samuṭṭhāpesi “bhimsetvā samaṇaṃ palāpessāmi”ti. Caturaṅgasamannāgataṃ andhakārasadisaraṃ hutvā dasabalaṃ patvā sūriyappabhāvihatamivandhakāraṃ antaradhāyi. Evaṃ yakkho imāhi navahi vātavassapāsāṇapaharaṇaṅgārakukkuḷavālikakalalandhakāravuṭṭhihi bhagavantaṃ palāpetumasakkonto nānāvidhappaharaṇaḥattha-anekappakārarūpabhūtagaṇasamākulāya caturaṅginīyā senāya sayameva bhagavantaṃ abhigato. Te bhūtagaṇā anekappakāravikāre katvā “gaṇhatha hanathā”ti bhagavato upari āgacchantā viya ca honti. Apica kho niddhantalohapiṇḍaṃ viya makkhikā bhagavantaṃ alliyitumasamatthā eva ahesuṃ.

Evaṃ sabbarattim anekappakāravibhimsākāradassanenapi¹ bhagavantaṃ cāletumasakkonto ālavako cintesi “yaṃnūnāhaṃ kenaci ajeyyaṃ dussāvudhaṃ muñceyya”ti. Sace hi so duṭṭho ākāse taṃ dussāvudhaṃ muñceyya, dvādasa vassāni devo na vasseyya. Sace pathaviyaṃ muñceyya, sabbarukkhatipādini sussitvā dvādasavassantaraṃ na puna ruheyyuṃ. Sace samudde muñceyya, tattakapāle udakabindu viya sabbaṃ susseyya. Sace sinerupabbate muñceyya, khaṇḍākhaṇḍaṃ hutvā vikireyya. So evaṃmahānubhāvaṃ dussāvudhaṃ uttarisāṭakaṃ muñcitvā aggahesi. Yebhuyyena dasasahassilokadhātudevatā vegena sannipatiṃsu “ajja bhagavā ālavakaṃ damessati, tattha dhammaṃ sossāma”ti. Yuddhadassanakāmāpi devatā sannipatiṃsu. Evaṃ sakalampi ākāsaṃ devatāhi paripuṇṇaṃ ahosi. Athālavako bhagavato samīpe uparūpari vicarivā vatthāvudhaṃ

1. Anekappakāravihesākāradassanenapi (Ka)

muñci. Taṃ asanicakkaṃ viya ākāse bheravasaddaṃ karontaṃ
dhūmāyantaṃ pajjalantaṃ bhagavantaṃ patvā yakkhassa
mānamaddanattaṃ pādapuñchanacoḷaṃ hutvā pādamūle nipati. Āḷavako
taṃ disvā chinnavisāṇo viya usabho, uddhaṭṭadāṭho viya sappo nittejo
nimmado nipātitaṃ mānaddhajo ahosi. Evamidaṃ āḷavakayuddhaṃ
vitthāretabbaṃ.

Aṭṭha pañhe pucchīti—

“Kiṃ sūda vittaṃ purisassa seṭṭhaṃ,
Kiṃ su suciṇṇaṃ sukhamāvahāti.
Kiṃ su have sādutaraṃ rasānaṃ,
Kathaṃ jīvaṃ jīvitamāhu seṭṭhaṃ”^{ti}¹—

ādinā aṭṭha pañhe pucchi. **Satthā vissajjesīti—**

“Saddhīdha vittaṃ purisassa seṭṭhaṃ,
Dhammo suciṇṇo sukhamāvahāti.
Saccaṃ have sādutaraṃ rasānaṃ,
Paññājīvaṃ jīvitamāhu seṭṭhaṃ”^{ti}¹—

ādinā vissajjesi. **Vikkandamānāyāti** accantaṃ paridevamānāya.

Mahānāmasakkavatthu

252. Pañcame **satthā tato paraṃ paṭiññaṃ nādāsīti** saṃvaccharato
paraṃ sikkhāpadapaññattiya paccayappavāraṇāsādiyanassa vāritattā
“paṭiññaṃ nādāsī”^{ti} vuttaṃ. Tathā hi bhagavā tatiyavārepi mahānāmena
sakkena “icchāmaṃ bhante saṃghaṃ yāvajīvaṃ bhesajjena pavāretuṃ”^{ti}²
vutte “sādhu sādhu mahānāma, tena hi tvaṃ mahānāma saṃghaṃ yāvajīvaṃ
bhesajjena pavārehī”^{ti}² paṭiññaṃ adāsiyeva. Evaṃ paṭiññaṃ datvā pacchā
chabbaggiyehi bhikkhūhi mahānāmassa sakkassa viheṭṭhitabhāvaṃ sutvā
chabbaggiye bhikkhū vigarahitvā sikkhāpadaṃ paññāpesi “agilānena
bhikkhunā cātumāsappaccayapavāraṇā sāditaṃ āññatra punappavāraṇāya
āññatra niccappavāraṇāya. Tato ce uttari sādīyeyya, pācittiyaṃ”^{ti}². Tasmā
paṭhamāṃ anujānitvāpi pacchā sikkhāpadabandhanena vāritattā “paṭiññaṃ
nādāsī”^{ti} vuttaṃ.

1. Saṃ 1. 216; Khu 1. 306 piṭṭhesu.

2. Vi 2. 136, 137 piṭṭhesu.

Uggagahapatyādivatthu

253-256. Chaṭṭhasattamaṭṭhamanavamāni suviññeyyāneva.

Nakulapitugahapativatthu

257. Dasame **Susumāragirinagareti** evaṃnāmake nagare. Tassā kira nagarassa vatthupariggahadivase avidūre udakarahade susumāro saddamakāsi, giram nicchāresi. Atha nagare anantarāyena māpīte tameva susumāragirakaraṇaṃ subhanimittam katvā “susumāragiri” tvevassa nāmaṃ akaṃsu. Keci pana “susumārasaṇṭhānattā susumāro nāma eko giri, so tassa nagarassa samīpe, tasmā taṃ susumāragiri etassa atthīti susumāragirīti vuccatī” ti vadanti. **Bhesakalāvaneti** bhesakalānāmake vane. “Bhesakalāvane” tipī pāṭho. Kathaṃ pana bhagavati nesaṃ puttasaññā patiṭṭhāsīti āha “**Ayaṃ kirā**” ti-ādi. **Daharasseva daharā ānītāti** me daharasseva sato daharā ānītāti attho. **Aticaritāti** atikkamitvā caranto.

Upāsakapālisamvaṇṇanā niṭṭhitā.

7. Sattamavaggavaṇṇanā

Sujātāvatthu

258. Upāsikāpālisamvaṇṇanāya paṭhamam suviññeyyameva.

Visākhāvatthu

259. Dutiye **mahālatāpasādhana**ssāti mahālatāpīḷandhanassa. Tasmim ca piḷandhane catasso vajiranāḷiyo upayogaṃ agamaṃsu. Muttānaṃ ekādasa nāḷiyo, pavāḷassa dvāvīsati nāḷiyo, padumarāgamaṇīnaṃ tettiṃsa nāḷiyo. Iti etehi ca aññehi ca indanīlādīhi nīlapīṭalohitodātamañjīṭṭhasāmakabaravaṇṇavasena sattavaṇṇehi vararatanehi niṭṭhānaṃ agamāsi, taṃ sīse paṭimukkam yāva pādapiṭṭhiyā bhassati,

pañcannaṃ hatthīnaṃ balaṃ dhārayamānāva naṃ itthī dhāretuṃ sakkoti.
Anto-aggi bahi na nīharitabboti-ādīnaṃ attho upari āvi bhavissati.
 Sesamettha suviññeyyameva.

Khujjuttarā-sāmāvatīvattu

260-261. Tatiyacatutthesu **pāyāsassā**ti bahalatarassa pāyāsassa. **Taṃ pāyāsaṃ bhuñjantesū**ti taṃ bahalataraṃ garusiniddhaṃ pāyāsaṃ bhuñjantesu. **Jirāpetuṃ asakkontoti** antarāmagge appāhāratāya mandagahaṇikattā jirāpetuṃ asakkonto. **Vālamigaṭṭhāneti** vālamigehi adhiṭṭhitatṭhāne. **Anuvijjantoti** vicārento. **Sālāti** naḷakārasālā. **Mudhā na karissatī**ti mūlyaṃ vinā na karissati. **Ālimpesīti** aggim adāsi, aggim jālesīti attho. **Pekkhāti** āgamehi. **Upadhisampadāti** sarīrasampatti. **Vaṭarukkhaṃ patvāti** nigrodharukkhaṃ patvā. **Suvaṇṇakaṭaketi** suvaṇṇavalaye. **Abbhūmeti** me avaḍḍhīti attho. **Anto asodhetvāti** paṇṇasālāya anto kassaci atthibhāvaṃ vā natthibhāvaṃ vā anupadhāretvā. **Sesaṃ suviññeyyameva**.

Uttarānandamātāvattu

262. Pañcame **upanissayaṃ disvāti** iminā yathā visesādhigamassa satipi paccuppannapaccayasamavāye avassaṃ upanissayasampadā icchitabbā, evaṃ diṭṭhadhammavedanīyabhāvena vipaccanakassa kammassapi paccuppannasamavāyo viya upanissayasampadāpi savisesā icchitabbāti dasseti. Tathā hi ukkaṃsagatasappurisūpanissayayonisomanasikāresu labbhamānesupi upanissayarahitassa visesādhigamo na sampajjatevāti. **Kappiyaṃ katvāti** yathā kappiyaṃ hoti, tathā katvā. **Patte patitṭhapeyyāti** āhāraṃ dānamukhe vissajjeyya. **Tīhi cetanāhīti** pubbabhāgamuñca-anumodanācetanāhi. Vuttaṃ hetam—

“Pubbeva dānā sumano, dadaṃ cittaṃ pasādaye.
 Datvā attamano hoti, esā puñṇassa sampadā”ti¹.

1. Am 2. 296; Khu 2. 159 piṭṭhesu.

Tava manam sandhārehīti “ajja bhattam cirāyitan”ti kodhato tava cittam sandhārehi, mā kujjhīti attho. **Olokitolokitattāhanam -pa-samparikiṇṇam viya aho**sīti tena kasitattāhanam sabbam suvaṇṇabhāvāpattiyā mahākosātakipupphehi sañchannam viya aho. **Tādiseti** tayā sadise. **Na kopemīti** na vināsemi, jātiyā na hīlemi. **Pūjam karotīti** sammāsambuddhassa pūjam karoti. **Antaravatthunti** gehaṅgaṇam. **Bhoti** sambodhane nipāto. **Jeti** avaṇṇālapanam. Sayam ariyasāvikābhāvato satthuvassena “**sapitikā dhītā**”ti vatvā satthu sammukhā dhammassavanena tassā visesādhigamam paccāsīsanāti “**dasabale khamanteyeva khamissāmī**”ti āha. **Kadariyanti** thaddhamaccharim.

Suppavāsāvatthu

263. Chaṭṭhe **paṇītaḍāyikānanti** paṇītarasavatthūnam dāyikānam. Āyuno ṭhītihetum bhojanam dentī **āyurm deti** nāma. Esa nayo **vaṇṇam detīti**-ādīsu. Tenāha “**pañca ṭhānānī**”ti. Kammasarikkhakañcetaṃ phalanti dassento “**āyurm kho pana datvā**”ti-ādimāha. Tattha **datvāti** dānāhetu. **Bhāginīti** bhāgavatī laddhum bhabbā.

Suppiyāvatthu

264. Sattame **ūrumamsam chinditvā dāsiyā adāsīti** āgataphalā viññātasāsanā ariyasāvikā attano sarīradukkhā acintetvā tassa bhikkhuno rogavūpasamameva paccāsīsanāti attano ūrumamsam chinditvā dāsiyā adāsī. Satthāpi tassā tathāpavattam ajjhāsayasampattiṃ disvā “mama sammukhībhāvūpagamanenevassā vaṇo ruhitvā sañchavi¹ jāyati, phāsubhāvo hotī”ti ca disvā “**pakkosatha nan**”ti āha. **Sā cintesīti** “sabbalokassa hitānukampako satthā na mam dukkhāpetum pakkosati, atthettha kāraṇam”ti cintesi. **Attanā katakāraṇam sabbam kathesīti** buddhānubhāvavibhāvanattham kathesi, na attano dalhājjhāsayatāya vibhāvanattham. **Gilānupaṭṭhākīnam aggatṭhāne ṭhapesīti** agañitattadukkhā gilānānam bhikkhūnam gelaṇṇāvūpasamane yuttappayuttāti gilānupaṭṭhākīnam aggatṭhāne ṭhapesīti.

Kātiyānīvatthu

265. Aṭṭhame **aveccappasannānanti** ratanattayaguṇe yāthāvato ñatvā pasannānaṃ, so panassa pasādo maggenāgatattā kenaci akampanīyo. **Adhigatenā**ti maggādhigameneva adhigatena. “Avigatenā”ti vā pāṭho, tassattho “kadāci avigacchantenā”ti. So appadhamāsiyo ca hoti, tasmā vuttaṃ “**adhigatena acalappasādenā**”ti. Tattha **kāyasakkkhīṃ katvāti** pamukhaṃ katvā, vacanatthato pana nāmakāyena desanāya sampañicchanavasena sakkkhibhūtaṃ katvāti attho. **Ummaggaṃ khanitvāti** gharasandhicchedanena antopavisanamaggaṃ khanitvā. **Dullabhassavananti** dullabhasaddhammassavanānaṃ. **Mahāpathavī pavisitabbā bhaveyyāti** avīcippavesanaṃ vadati.

Nakulamātāvattthu

266. Navame vissāsakathaneneva nakulamātā nakulapitā ca satthuvissāsikā nāma jātāti vuttaṃ “**vissāsikānanti vissāsakathaṃ kathentīnaṃ upāsikānaṃ**”ti. **Gahapatānī**ti geḥasāminī. **Vuttamevāti** upāsakapāḷiyaṃ nakulapitukathāyaṃ vuttanayameva.

Kāḷīkuraragharikāvattthu

267. Dasame **anussavenevāti** paccakkhato rūpadassanena satthu sammukhā dhammassavanena ca vinā kevalaṃ anussavaneneva parassa vacanaṃ anugatassavaneneva uppannena pasādena. **Anussavikappasādanti** anussavato āgatappasādaṃ.

Upāsikāpāḷisaṃvaṇṇanā samattā.

Niṭṭhitā ca manorathapūraṇiyā aṅguttaranikāyaṭṭhakathāya

Etadaggavaggavaṇṇanāya anuttānatthadīpanā.

15. Aṭṭhānapāli 1. Paṭhamavaggavaṇṇanā

268. Aṭṭhānapāli vaṇṇanāyaṃ aviṇṇamānaṃ ṭhānaṃ **aṭṭhānaṃ**, natthi ṭhānanti vā **aṭṭhānaṃ**. **Anavakā**soti etthāpi ese va nayo. Tadattathanigamanameva¹ hi “netam ṭhānaṃ vijjati”ti vacananti. Tenāha “**ubhayenapi**”ti-ādi. **Yanti** kāraṇatthe paccattavacanam. Hetu-attho cettha kāraṇatthoti āha “**yanti yena kāraṇenā**”ti. Ukkatṭhaniddesenettha diṭṭhisampatti veditabbāti vuttam “**maggadiṭṭhiyā sampanno**”ti. Kuto paṇāyamatto labbhatīti? Liṅgato, liṅgaṃ cetassa niccato upagamanappaṭikkhepo. **Catubhūma**kesūti idam catutṭhabhūmakasaṅkhārānaṃ ariyasāvakassa visayabhāvūpagamanato vuttam, na pana te ārabha niccato upagamanasabbhāvato. Vakkhati hi “tadabhāve catutṭhabhūmakasaṅkhārā panā”ti-ādinā. Abhisāṅkhataṣaṅkhārā-abhisāṅkharāṇakasaṅkhārānaṃ sappadesattā nippadesasaṅkhārāggahaṇattham “**saṅkhataṣaṅkhāresū**”ti vuttam, lokuttaraṣaṅkhārānaṃ pana nivattane kāraṇam sayameva vakkhati. **Etaṃ kāraṇam natthī**ti tathā upagamane setughāto natthi. **Tejussadattā**ti saṃkilesavidhamanatejassa adhikabhāvato. Tathā hi te gambhīrabhāvena duddasā akusalānaṃ ārammaṇam na hontīti. Idam pana pakaraṇavasena vuttam. Appahīnavipallāsānaṃ hi santānesu kusaladhammānampi te ārammaṇam na honti.

269. Asukhe sukhanti vipallāso ca idha sukhato upagamanassa ṭhānanti dassento “**ekanta -pa- attadiṭṭhivasenā**”ti padhānadiṭṭhimāha. **Gūthanti** gūthaṭṭhānaṃ, diṭṭhiyā nibbānassa avisayabhāvo heṭṭhā vutto evāti kasiṇādi paṇṇattisaṅghatthanti vuttam.

270. **paricchedoti** paricchandanam paricchijja tassa gahaṇam. Svāyam yesu niccādito upagamanam sambhavati, tesam vasenayeva kātābboti dassento “**sabbavāresu vā**”ti-ādimāha. **Sabbavāresū**ti “niccato upagaccheyyā”ti-ādinā āgatesu sabbesu suttapadesu. **Puthujjano hīti hi-**saddo hetu-attho. Yasmā yaṃ yaṃ saṅkhāram puthujjano niccādivasena gaṇhāti, tam tam ariyasāvako aniccādivasena gaṇhanto

1. Tadattathanigamanatthameva (Sī)

yāthāvato jānanto taṃ gāhaṃ taṃ diṭṭhiṃ gissajjeti, tasmā yattha gāho, tattha vissajjanāti catubhūmakasaṅkhārā idha saṅkhāraggahaṇena na gayhantīti attho.

271. Puttasambandhena mātupitusamaññā dattakittimādivasenapi puttavohāro loka dissati, so ca kho pariyāyenāti nippariyāyena siddhaṃ taṃ dassetuṃ **“janikāva mātā, janakova pitā”**ti vuttaṃ. Tathā ānantariyakammassa adhippetattā **“manussabhūtova khīṇāsavo arahāti adhippeto”**ti vuttaṃ. **“Aṭṭhānametan”**ti-ādinā **“mātu-ādīnaṃyeva jīvitā voropane ariyasāvakaṃ abhabbhāvadassanato tadanñāṃ ariyasāvako jīvitā voropetīti idaṃ atthato āpannamevā”**ti maññamāno vadati **“kiṃ pana ariyasāvako aññaṃ jīvitā voropeyyā”**ti. **“Aṭṭhānametan** anavakāso, yaṃ diṭṭhisampanno puggalo sañcicca paṇaṃ jīvitā voropeyya, netarṃ ṭhānaṃ vijjati”ti vacanato **“etampi aṭṭhānan”**ti vuttaṃ. Tenevāha **“sace hī”**ti-ādi. Evaṃ sante kasmā **“mātaran”**ti-ādinā visesetvā vuttanti āha **“puthujjanabhāvassa panā”**ti-ādi. Tattha **baladīpanatthanti** saddhādibalasamannāgamadīpanattham. Ariyamaggenāgatasaddhādhibalavasena hi ariyasāvako tādisaṃ sāvajjaṃ na karoti.

275. **Pañcahi kāraṇehīti** idamettha nipphādakāni tesam pubbabhāgiyāni ca kāraṇāni kāraṇabhāvasāmaññena ekajjhaṃ gahetvā vuttaṃ, na pana sabbesaṃ samānayogakkhamattā. **Ākārehīti** kāraṇehi. **Anussāvanenāti** anurūpaṃ sāvanena. Bhedassa **anurūpaṃ** yathā bhedo hoti, evaṃ bhinditabbānaṃ bhikkhūnaṃ attano vacanassa **sāvanena** viññāpanena. Tenāha **“nanu tumhe”**ti-ādi. **Kaṇṇamūle vacībhedaṃ katvāti** etena pākaṭaṃ katvā bhedakaravattudīpanaṃ vohāro, tattha attano nicchitamatthaṃ rahassavasena viññāpanaṃ anussāvananti dasseti.

Kammameva uddeso vā pamāṇanti tehi saṃghabhedasiddhito vuttaṃ, itare pana tesam sambhārabhūtā. Tenāha **“vohārā”**ti-ādi. **Tatthāti** vohāraṇe. Cuti-anantaraṃ phalaṃ anantaraṃ nāma, tasmim anantare niyuttāni, tannibbattanena anantarakaraṇasīlāni, anantarappayojanāni cāti ānantariyāni, tāni eva kammānīti **ānantariyakammāni**.

Kammatoti “evaṃ ānantariyakammaṃ hoti, evaṃ ānantariyakammasadisā”ti evaṃ kammavibhāgato. **Dvāratoti** kāyadvārato. **Kappaṭṭhitiyatoti** “idaṃ kappaṭṭhitiyavipākaṃ, idaṃ na kappaṭṭhitiyavipākaṃ”ti evaṃ kappaṭṭhitiyavibhāgato. **Pākasādhāraṇādīhīti** “idamettha vipaccati, idaṃ na vipaccati”ti vipaccanavibhāgato, gahaṭṭhapabbajitānaṃ sādharmaṇāsādhāraṇato, **ādi**-saddena vedanādivibhāgato ca.

Kammato tāva vinicchayo vuccatīti sambandho. Yasmā manussatthabhāve ṭhitasseva kusaladhammānaṃ tikkhavisadabhāvāpatti, yathā tiṇṇaṃ bodhisattānaṃ bodhittayanibbattiyaṃ, evaṃ manussabhāve ṭhitasseva edisānaṃ akusaladhammānampi tikkhavisadabhāvāpattīti āha “**manussabhūtassevā**”ti. Pākatikamanussānampi ca kusaladhammānaṃ visesappatti vimānavatthu-aṭṭhakathāyaṃ vuttanayeneva veditabbā. Yathāvutto ca attho samānajātiyassa vikopane garutaro, na tathā vijātiyassāti vuttaṃ “**manussabhūtaṃ mātaraṃ vā pitaraṃ vā**”ti. Liṅgaparivatte ca so eva ekakammanibbatto bhavaṅgappabandho jīvitindriyapabandho ca, na aññoti āha “**api parivattaliṅgaṃ**”ti. Arahattaṃ pattepi eseva nayo. **Tassa vipākanti**-ādi kammaṃ ānantariyabhāvasamatthanaṃ. Catukkoṭiyaṃ cettha sambhavati. Tattha paṭhamā koṭi dassitā, itarāsu viśaṅketabhāvaṃ dassetuṃ “**yo panā**”ti-ādi vuttaṃ. Yadiapi tattha viśaṅketo, kammaṃ pana garutaraṃ ānantariyasadisāṃ bhāyitabbanti āha “**bhāriyaṃ -pa- tiṭṭhati**”ti. **Ayaṃ paññoti** nāpanicchānibbattā kathā.

Abhisandhināti adhippāyena. **Ānantariyaṃ phusatīti** maraṇādhippāyeneva ānantariyavatthuno vikopitattā vuttaṃ. **Ānantariyaṃ na phusatīti** ānantariyavatthu-abhāvato ānantariyaṃ na hoti. Sabbattha hi purimaṃ abhisandhicittaṃ appamāṇaṃ, vadhakacittaṃ pana tadārammaṇaṃ jīvitindriyaṇca ānantariyabhāve pamāṇanti daṭṭhabbaṃ. Saṅgāmacatukkaṃ sampattavasena yojetabbam. Yo hi parasenāya aññaṇca yodhaṃ pitaraṇca kammaṃ karonte disvā yodhassa usuraṃ khipati “etaṃ vijjhivā mama pitaraṃ vijjhissati”ti, yathādhippāyaṃ gate pitughātakoti hoti. “Yodhe viddhe mama pitā palāyissati”ti khipati, usuraṃ ayathādhippāyaṃ gantvā pitaraṃ māreti, vohāravasena pitughātakoti vuccati, ānantariyaṃ pana natthīti. Coracatukkaṃ pana ho “coraṃ

māressāmī”ti coravesena gacchantam pitaram māreti, ānantariyam phusatīti-
ādinā yojetabbam. **Tenevāti** teneva payogena. **Arahantaghātako hotiyevāti**
arahato mārītattā vuttam. **Puthujjanasseva tam dinnam hotīti**
etthāyamadhippāyo—yathā vadhakacetanā paccuppannārammaṇāpi
pabandhavicchedanavasena jīvitindriyam ārammaṇam katvā pavattati, na
evam cāgacetanā. Sā hi cajitabbavatthum ārammaṇam katvā
cajanamattameva hoti, aññasantakabhāvakaraṇaṇca tassa cajanam, tasmā
yassa tam santakam kataṃ, tasseva dinnam hotīti.

Lohitam samosaratīti abhigātena pakuppamānam sañcitam hoti.
Mahantataranti garutaram. **Sarīrappaṭijaggane viyāti**
satthurūpakāyappaṭijaggane viya.

Asannipatiteti idam sāmaggīyadīpanam. **Bhedo ca hotīti** saṃghassa
bhedo ca hoti. **Vaṭṭatīti saññāyāti** “īdisam karaṇam saṃghabhedaṃ na
hoti”ti saññāya. **Tathā navato ūnāparisāyāti** navato ūnāparisāya karontassa
tathāti yojetabbam. **Tathāti** ca iminā “na ānantariyakamman”ti imam
ākaddhati, na pana “bhedova hoti”ti idam. Heṭṭhimantena hi navannameva
vasena saṃghabhedo. **Dhammavādino anavajjāti** yathādhammam
anavaṭṭhānato. Saṃghabhedassa pubbabhāgo **saṃgharāji**.

Kāyadvārameva pūrenti kāyakammabhāveneva lakkhitabbato.
Sanṭhahantehi kappe -pa- muccatīti idam **kappaṭṭhakathāya**¹ na sameti.
Tattha hi **aṭṭhakathāya**² vuttam “āpāyikoti idam suttam yaṃ so ekam
kappam asītibhāge katvā tato ekabhāgamattam kalam tiṭṭheyya, tam
āyukappam sandhāya vuttan”ti. **Kappavināseyevāti** ca āyukappavināse evāti
atthe sati natthi virodho. Ettha ca **sanṭhahanteti** idampi “sveva vinassissatī”ti
viya abhūtaparikappavasena vuttam. **Ekadivasameva niraye paccati**, tato
param kappaḃhāve āyukappassapi abhāvatoti avirodhato atthayojanā
daṭṭhabbā. **Sesānīti** saṃghabhedato aññāni ānantariyakammāni.

Yadi tāni ahosikammasaṅkham gacchanti, evam sati katham nesam
ānantariyatā cuti-anantaram vipākadānābhāvato. Atha sati phaladāne

1. Abhi 4. 345 piṭṭhe.

2. Abhi-Ṭṭha 3. 234 piṭṭhe.

cuti-anantaro eva etesaṃ phalakālo, na aññoti phalakālaniyamena niyatatā icchitā, na phaladānaniyamena. Evampi niyataphalakālānaṃ aññesampi upapajjavedanīyānaṃ diṭṭhadhammavedanīyānaṃ niyatatā āpajjeyya, tasmā vipākadhammadhammānaṃ paccayantaravikalatādīhi avipaccamānānampi attano sabhāvena vipākadhammatā viya balavatā ānantariyena vipāke dinne avipaccamānānampi ānantariyānaṃ phaladāne niyatasabhāvā ānantariyasabhāvā ca pavattīti attano sabhāvena phaladānaniyameneva niyatā ānantariyatā ca veditabbā. Avassaṇca ānantariyasabhāvā tato eva niyatasabhāvā ca tesāṃ pavattīti sampañicchitabbametāṃ, aññassa balavato ānantariyassa abhāve sati cuti-anantaraṃ ekantena phaladānato.

Nanu evaṃ aññesampi upapajjavedanīyānaṃ aññasmiṃ vipākadāyake asati cuti-anantameva ekantena phaladānato niyatasabhāvā ānantariyasabhāvā ca pavatti āpajjatīti? Nāpajjati asamānajātikena cetopaṇidhivasena upaghātakena ca nivattetabbavipākattā anantare ekantaphaladāyakattābhāvā, na pana ānantariyānaṃ paṭhamajjhānādīnaṃ dutiyajjhānādīni viya asamānajātikaṃ phalanivattakaṃ atthi sabbānantariyānaṃ avīcīphalattā, na ca heṭṭhūpapattiṃ icchato sīlavato cetopaṇidhi viya uparūpapattijanakkammaphalaṃ ānantariyaphalaṃ nivattetuṃ samattho cetopaṇidhi atthi anicchantasseva avīcīpātanato, na ca ānantariyopaghātakaṃ kiñci kammaṃ atthi, tasmā tesāmyeva anantare ekantavipākajanakasabhāvā pavattīti. Anekāni ca ānantariyāni katāni ekantena vipāke niyatasabhāvattā uparatāvipaccanasabhāvāsāṅkattā nicchitāni sabhāvato niyatāneva. Tesu pana samānasabhāvesu ekena vipāke dinne itarāni attanā kattabbakiccassa teneva katattā na dutiyaṃ tatiyampi ca paṭisandhiṃ karonti, na samatthatāvighātattāti natthi tesāṃ ānantariyakatānivatti, garugarutarabhāvo pana tesāṃ labbhatevāti samghabhedassa siyā garutarabhāvoti “**yena -pa- vipaccatī**”ti āha. Ekassa pana aññāni upatthambhakāni hontīti daṭṭhabbāni. **Paṭisandhivasena vipaccatīti** vacanena itaresāṃ pavattivipākadāyitā anuññātā viya dissati. **No vā tathā sīlavatīti** yathā pitā sīlavā, tathā

sīlavatī no vā hotīti yojanā. Sace mātā sīlavatī, mātugthāto paṭisandhivasena vipaccatīti yojanā.

Pakatattoti anukkhitto. **Samānasamvāsakoti** apārājiko. **Samānasīmāyanti** ekasīmāyaṃ.

276. **Satthu kiccaṃ kātuṃ asamatthoti** yaṃ satthārā kātabbakiccaṃ anusāsanādi, naṃ kātuṃ asamatthoti bhagavantam paccakkhāya. **Aññaṃ titthakaranti** aññaṃ satthāraṃ. Vuttam hetam—

“Tittham jānitabbaṃ, titthakaro jānitabbo, titthiyā jānitabbā, titthiyasāvakā jānitabbā. Tattha **tittham** nāma dvāsaṭṭhi diṭṭhiyo. Ettha hi sattā taranti uplavanti ummujjanimuḍḍam karonti, tasmā titthanti vuccanti. Tādisānaṃ diṭṭhinaṃ uppādetā **titthakaro** nāma pūraṇakassapādiko. Tassa laddhiṃ gahetvā pabbajitā **titthiyā** nāma. Te hi titthe jātāti titthiyā. Yathāvuttam vā diṭṭhigahasankhātāṃ tittham etesaṃ atthīti titthikā, titthikā eva titthiyā. Tesam paccayadāyakā **titthiyasāvakā**ti veditabbā”ti¹.

277. Abhijāti-ādīsu pakampanadevatūpasankamanādinā jātacakkavāḷena samānayogakkhamam dasasahassapariṃāṇam cakkavāḷam **jātikhettaṃ**. Saraseneva āṇāpavattanaṭṭhānam **āṇākhettaṃ**. Visayabhūtaṃ ṭhānam **visayakhettaṃ**. **Dasasahassī lokadhātūti** imāya lokadhātuyā saddhiṃ imaṃ lokadhātuṃ parivāretvā ṭhitā dasasahassī lokadhātu. Tattakānaṃyeva jātikhettabhāvo dhammatāvasena veditabbo. “Pariggahavasenā”ti keci, “sabbesaṃyeva buddhānaṃ tattakaṃyeva jātikhettaṃ tannivāsīnaṃyeva devatānaṃ dhammābhisamayo”ti ca vadanti. Mātukucchi-okkamanakālādīnaṃ channaṃ eva gahaṇaṃ nidassanamattaṃ mahābhinihārādīkālepi tassa pakampanassa labbhanato. **Āṇākhettaṃ nāma** yaṃ ekajjham samvaṭṭati vivaṭṭati ca, **āṇā pavattati** āṇāya tannivāsīdevatānaṃ sirasā sampaṭicchana, taṃca kho kevalaṃ buddhānaṃ ānubhāveneva, na adhippāyavasena.

1. Ma-Ṭṭha 1. 313 piṭṭhe.

Adhippāyavasena pana “yāvatā vā pana ākaṅkheyyā”¹ti vacanato tato parampi āṇa vatteyyeva.

Na uppajjantīti pana atthīti “na me ācariyo atthi, sadiso me na vijjati”²ti-ādim² imissā lokadhātuyā tathā vadantena bhagavatā “kiṃ panāvuso sārīputta atthetarahi aññe samaṇā vā brāhmaṇā vā bhagavatā samasamā sambodhiyanti, evaṃ puṭṭho ahaṃ bhante ‘no’³ti vadeyyan”³ti vatvā tassa kāraṇaṃ dassetuṃ “atthānametaṃ anavakāso, yaṃ ekissā lokadhātuyā dve arahanto sammāsambuddhā apubbaṃ acarimaṃ uppajjeyyun”⁴ti imaṃ **suttaṃ**⁴ āharantena dhammasenāpatinā ca buddhakhettabhūtaṃ imaṃ lokadhātuṃ tathāpetvā aññattha anuppatti vuttā hotīti adhippāyo.

Ekatoti saha, ekasmiṃ kāleti attho, so pana kālo kathaṃ paricchinnoti carimabhava paṭisandhiggahaṇato paṭṭhāya yāva dhātuparinibbānāti dassento “**tatthā**”⁵ti-ādimāha. **Anacchariyattāti** dvīsupi uppajjamānesu acchariyattābhāvatoti attho. Dvīsupi uppajjamānesu anacchariyatā, kimaṅgaṃ pana bahūsūti dassento “**yadi cā**”⁶ti-ādimāha. Buddhā nāma majjhe bhinnasuvaṇṇaṃ viya ekasadisāti tesaṃ desanāpi ekarasā ekadhāti āha “**desanāya ca visesābhāvato**”⁷ti. Etenapi anacchariyattameva sādheti. **Vivādabhāvatoti** etena vivādābhāvatthaṃ dve buddhā ekato na uppajjantīti dasseti. **Etaṃ kāraṇanti** etaṃ anacchariyatādikāraṇaṃ. **Tatthāti** milindapañhe.

Ekam eva buddhaṃ dhāretīti **ekabuddhadhāraṇī**. Etena evaṃsabhāvā ete buddhaguṇā, yena dutiyabuddhaguṇe dhāretuṃ asamatthā ayaṃ lokadhātūti dasseti. Paccayavisesanipphannaṃ hi guṇadhammaṇaṃ bhāriyo viseso mahāpathaviyāpi dussahoti sakkā viññātum. Tathā hi abhisambodhisamaye upagatassa lokanāthassa guṇabhāraṃ bodhirukkhasa tīsupi disāsu mahāpathavī sandhāretuṃ nāsakkhi. Tasmā “na dhāreyyā”⁸ti vatvā tameva adhāraṇaṃ pariyāyantarehi pakāsento “**caleyyā**”⁹ti-ādimāha. Tattha **caleyyāti** paripphandeyu. **Kampeyyāti**

1. Am 1. 229 piṭṭhe.

2. Ma 1. 227; Vi 3. 12; Abhi 4. 218 piṭṭhesu.

3. Dī 3. 94 piṭṭhe.

4. Am 1. 29; Abhi 2. 349; Ma 3. 110; Khu 11. 231 piṭṭhesu.

pavedheyya. **Nameyyā**ti ekapassena nameyya. **Onameyyā**ti osīdeyya. **Vinameyyā**ti vividhaṃ ito cito ca nameyya. **Vikireyyā**ti vātena thusamuṭṭhi viya vippakireyya. **Vidhameyyā**ti vinasseyya. **Viddhamseyyā**ti sabbaso viddhastā bhavēyya. Tathābhūtā ca na katthaci tiṭṭheyyāti āha “**na ṭhānamupagaccheyyā**”ti.

Idāni tattha nidassanaṃ dassento “**yathā mahārāja**”ti-ādimāha. Tattha **eke**¹ puriseti ekasmiṃ purise. **Samupādikā**ti samaṃ uddhaṃ pajjati pavattatīti samupādikā, udakassa upari samaṃ gāminīti attho. “Samuppādikā”tipi paṭhanti, ayamevattho. **Vaṇṇenā**ti saṇṭhānena. **Pamāṇenā**ti ārohena. **Kisathūlenā**ti kisathūlabhāvena, pariṇāhenāti attho. **Dvinnampī**ti dvepi, **dvinnampi** vā sarīrabhāraṃ.

Chādentanti rocentaṃ ruciṃ uppādentanti. **Tandikatoti** tena bhojanena tandibhūto. **Anonamitadaṇḍajātoti** yāvadatthaṃ bhojanena onamitum asakkuṇeyyatāya anonamanadaṇḍo viya jāto. **Sakiṃ bhutto vameyyā**ti² ekampi ālopaṃ ajjhoharivā vameyyāti attho.

Atidhammabhārena pathavī calatīti dhammena nāma pathavī tiṭṭheyya. Sā kiṃ teneva calati vinassatīti adhippāyena pucchati. Puna thero “ratanam nāma loke kuṭumbaṃ sandhārentaṃ abhimatañca lokena attano garusabhāvātāya sakaṭabhaṅgassa kāraṇaṃ atibhārabhūtaṃ diṭṭhaṃ. Evaṃdhammo ca hitasukhavisesehi tamsamaṅgīnaṃ dhārento abhimato ca viññūnaṃ gambhīrappameyyabhāvena garusabhāvattā atibhārabhūto pathavīcalanassa kāraṇaṃ hoti”ti dassento “**idha mahārāja dve sakaṭā**”ti-ādimāha. Eteneva tathāgatassa mātukucchi-okkamanādikāle pathavīkampanakāraṇaṃ saṃvaṇṇitanti datṭhabbaṃ. **Ekassā**ti ekasmā, **ekassa** vā sakaṭassa ratanaṃ, tasmā sakaṭā gahetvāti attho.

Osāritanti uccāritaṃ, vuttanti attho. **Aggoti** sabbasattehi aggo. **Jeṭṭhoti** vuddhataro. **Seṭṭhoti** pasatthataro. Visiṭṭhehi sīlādīhi guṇehi samannāgatattā **visiṭṭho**. Uggatatamoti **uttamo**.

1. Ekasmiṃ (Aṭṭhakathāyaṃ)

2. Sakiṃ bhuttova mareyyāti (Aṭṭhakathāyaṃ)

Pavaroti tasseva vevacanaṃ. Natthi etassa samoti **asamo**. Asamā pubbabuddhā, tehi samoti **asamasamo**. Natthi etassa paṭisamo paṭipuggaloti **appaṭisamo**. Natthi etassa paṭibhāgoti **appaṭibhāgo**. Natthi etassa paṭipuggaloti **appaṭipuggalo**.

Sabhāvapakatikāti sabhāvabhūtā akittimā pakati. **Kāraṇamahantattā**ti kāraṇānaṃ mahantatāya, mahantehi buddhakaradhammehi pāramisaṅkhātehi kāraṇehi buddhaguṇānaṃ nibbattitoti vuttaṃ hoti. Pathavī-ādīni mahantāni vatthūni, mahantā cakkavāḷadayo attano attano visaye ekekāva, evaṃ sammāsambuddhopi mahanto attano visaye eko eva. Ko ca tassa visayo? Buddhabhūmi, yāvatakaṃ vā ñeyyaṃ. “Ākāso viya anantavisayo bhagavā eko eva hoti”ti vadanto paracakkavāḷesupi dutiyassa buddhassa abhāvaṃ dasseti.

Imināva padenāti “ekissā lokadhātuyā”ti iminā eva padena. **Dasa cakkavāḷasahassāni gahitānī**ti jātikhettāpekkhāya gahitāni. **Ekacakkavāḷenevāti** iminā eva ekacakkavāḷena, na yena kenaci. Yathā “imasmimyeva cakkavāḷe uppajjantī”ti vutte imasmimpi cakkavāḷe jambudīpe eva, tatthāpi majjhimadesa evāti paricchinditum vaṭṭati, evaṃ “ekissā lokadhātuyā”ti jātikhette adhippetepi imināva cakkavāḷena paricchinditum vaṭṭati.

Paṭhamavaggavaṇṇanā niṭṭhitā.

15. Aṭṭhānapāli 2. Dutiyavaggavaṇṇanā

278. **Vivādupacchedatoti** vivādupacchedakāraṇā. Dvīsu uppannesu yo vivādo bhaveyya, tassa¹ anuppādoyevettha vivādupacchedo. **Ekasmim dīpeti**-ādīnā dīpantarepi ekajjhaṃ na uppajjati, pageva ekadīpeti dasseti. **Sopi parihāyethāti** cakkavāḷassa padese eva pavattitabbattā parihāyeyya.

1. Tasmā (Sī)

279-280. **Manussattanti** manussabhāvo tasseva pabbajjādiguṇānaṃ yoggabhāvato. **Liṅgasampattīti** purisabhāvo. **Hetūti** manovacīpaṇidhānapubbikā hetusampadā. **Satthāradassananti** satthusammukhībhāvo. **Pabbajjāti** kammakiriyavādīsu tāpasesu, bhikkhūsu vā pabbajjā. **Guṇasampattīti** abhiññādiguṇasampadā. **Adhikāroti** buddhe uddissa adhiko kāro, savisesā upakārakiriyā adhiko sakkāroti vuttam hoti. Chandova **chandatā**, sammāsambodhiṃ uddissa sātisayo kattukamyatākusalacchando. **Aṭṭhadhammasamodhānāti** etesaṃ aṭṭhannaṃ dhammānaṃ samāyogena. **Abhinīhāroti** kāyapaṇidhānaṃ. **Samijjhatīti** nipphajjati. Ayamettha saṅkhepo, vitthāro pana paramatthadīpaniyā **cariyāpiṭakavaṇṇanāya**¹ vuttanayena veditabbo. **Sabbākāraparipūramevāti** paripuṇṇalakkaṇatāya sattuttamādīhi sabbākārena sampannameva. Na hi itthiyā kosohitavattthaguyhatādi sambhavati. Dutiyapakati ca nāma paṭhamapakatito nihīnā eva. Tenevāha anantaravāre “**yasmā**”ti-ādi.

281. **Idha purisassa tattha nibbattanato**ti imasmim manussaloke purisabhūtaṃ tattha brahmaloke brahmattabhāvena nibbattanato. Tena asatīpi purisaliṅge purisākārā brahmāno hontīti dasseti. Taṃyeva ca purisākāraṃ sandhāya vuttam bhagavatā “yaṃ puriso brahmattaṃ kāreyyā”ti. Tenevāha “**samānepī**”ti-ādi. Yadi evaṃ itthiyo brahmaloke na uppajjeyyunti āha “**brahmattan**”ti-ādi.

290-295. “Kāyaduccaritassā”ti-ādipāliyaṃ kammaniyāmo nāma kathito. Samañjanaṃ samaṅgo, samannāgamo, so etassa atthīti samaṅgī, samannāgato, samañjanasīlo vā samaṅgī, pubbabhāge upakaraṇasamudāyato pabhubhi āyūhanavasena **āyūhanasamaṅgitā**, sannīṭṭhāpakacetanāvasena **cetanāsamaṅgitā**. Cetanāsantativasena vā **āyūhanasamaṅgitā**, taṃtaṃcetanākkaṇavasena **cetanāsamaṅgitā**. Katūpacitassa avipakkavipākassa kammassa vasena **kammasamaṅgitā**. Kamme pana vipaccitum āraddhe vipākappavattivasena **vipākasamaṅgitā**. Kammādīnaṃ upaṭṭhānakālavasena **upaṭṭhānasamaṅgitā**. **Kusalākusalakammāyūhanakkhaṇeti** kusalakammassa

1. Cariyāpiṭaka-Ṭīha 274 piṭṭhe.

akusalakammasa ca samīhanakkhaṇe. **Tathā**ti iminā kusalākusalakammapadam ākaḍḍhati. Yathā kataṃ kammaṃ phaladānasamattam hoti, tathā kataṃ **upacitaṃ**. **Vipākārahanti** dutiyabhavādīsu vipaccanārahaṃ. Uppajjamānānaṃ upapattinimittam upaṭṭhātīti yojanā. Upapattiyā uppajjanassa nimittam kāraṇanti **upapattinimittam**, kammaṃ kammanimittam gatinimittañca. Aṭṭhakathāyaṃ pana gatinimittavaseneva yojanā dassitā. Kammakammanimittānampi upaṭṭhānaṃ yathārahaṃ daṭṭhabbāṃ. “Yānissa tāni pubbe katāni kammāni, tānissa tasmim samaye olambanti ajjholambanti abhilambantī”¹ti¹ vacanato sāyanhe mahantānaṃ pabbatakūṭānaṃ chāyā viya āsannamaraṇassa sattassa citte supine viya vipaccitum katokāsaṃ kammaṃ, tassa nimittam gatinimittam upaṭṭhateva. **Calatīti** parivattati. Ekena hi kammunā taje nimitte upaṭṭhite paccayavisesavasena tato aññena kammunā tadaññassa nimittassa upaṭṭhānaṃ parivattanāṃ. **Sesā niccalā** avasesā² catubbidhāpi samaṅgitā niccalā aparivattanato.

Sunakhavājikoti sunakhehi migavājavasena³ vajanasīlo, sunakhaluddakoti attho. **Talasantharaṇapūjanti** bhūmitalassa pupphehi santharaṇapūjaṃ. **Āyūhanacetanā kammāsamaṅgitāvasenāti** kāyaduccaritassa aparāparaṃ āyūhanena sannipāpakacetanāya tasseeva pakappane kammakkhayakaraṇāṇena akhepitattā yathūpacitakammunā ca samaṅgibhāvassa vasena.

Kammanti akusalakammaṃ. **Tasmimyeva khaṇeti** āyūhanakkhaṇeveyeva. **Tassāti** kammāsamaṅgino puggalassa saggo vārito, tañce kammaṃ vipākavāraṃ labheyyāti adhippāyo. **Saggo vāritoti** ca nidassanamattam. Manussalokopissa vāritovāti. Apare pana purimehi vipākāvaraṇassa anuddhaṭattā “tasmimyeva khaṇe”ti ca avisesena vuttattā tam dosaṃ pariharitum “**āyūhitakammaṃ nāmā**”ti-ādimāha. **Yadā kammaṃ vipākavāraṃ labhatīti** idam katokāsassa appaṭibāhiyattā vuttam. Tathā hi bhagavā **tatiyapārājikavatthusmim**⁴ paṭisallīyi, imasmim sutte “kāyaduccaritasamaṅgi”ti āgatattā vipākūpaṭṭhānasamaṅgitā na labbhanti.

Aṭṭhānapāḷivaṇṇanāyaṃ anuttānatthadīpanā nipīhitā.

1. Ma 3. 203 piṭṭhe. 2. Catasso (Ka) 3. Migavavasena (Si) 4. Vi 1. 86 piṭṭhe.

16. Ekadhammapāli 1. Paṭhamavaggavaṇṇanā

296. Ekadhammapāli vaṇṇanāyaṃ idha dhamma-saddo sabhāvattho “kusalā dhammā”ti-ādīsu viyāti āha **“ekasabhāvo”**ti. **Ekantenā**ti ekamsena, avassanti atttho. **Vaṭṭeti** saṃsāravatṭe. **Nibbindanattthāyā**ti anabhiramanattthāya. **Virajjanattthāyā**ti arajjanattthāya. **Virajjanāyā**ti palujjanāya. Tenevāha **“vigamāyā”**ti. **Rāgādīnaṃ nirodhāyā**ti maggañāṇena rāgādīnaṃ nirodhanattthāya. Maggañāṇena nirodhanam nāma accantaṃ¹ appavattikaraṇanti āha **“appavattikaraṇattthāyā”**ti. Yathā khādanīyassa mukhe katvā khādanam nāma yāvadeva ajjhoharaṇatttham, evaṃ rāgādīnaṃ nirodhanam vaṭṭanirodhanattthamevāti vuttaṃ **“vaṭṭasseva vā nirujjanattthāyā”**ti. Yasmā kilesesu khīṇesu itaraṃ vaṭṭadvayampi khīṇameva hoti, tasmā mūlameva gaṇhanto **“upasamāyā**ti **kilesavūpasamanattthāyā”**ti āha. Saṅkhatadhammānaṃ abhijānanam nāma tattha lakkhaṇattayāropanamukhenevāti āha **“aniccādi -pa-abhijānanattthāyā”**ti. Sambujjhitabbāni nāma cattāri ariyasaccāni tabbinimuttassa ñeyyassa abhāvato. **“Catunnaṃ saccānaṃ bujjhanattthāyā”**ti vatvā tayidaṃ bujjhanam yassa ñāṇassa vasena ijjhati, tassa ñāṇassa vasena dassetuṃ **“bodhi vuccatī”**ti-ādi vuttaṃ. **Appaccayanibbānassā**ti amatadhātuyā.

Ussāhajananattthanti kammaṭṭhāne abhiruci-uppādanāya. **Visakaṇṭakoti** guḷassa vāṇijasamaññā. “Kismiñci dese desabhāsā”ti keci. Uccuraso samapākapakko cuṇṇādīhi missetvā piṇḍikato **guḷo**, apiṇḍikato **phāṇitaṃ**. Pākavisesena khaṇḍakhaṇḍasedito **khaṇḍo**, malābhāvaṃ āpanno **sakkarā**.

Saratīti sati. Anu anu saratīti **anussati**, anu anurūpā satītipi **anussati**. **Duvidham hotīti** payojanavasena duvidham hoti. **Cittasampahamsanattthanti** pasādanīyavatthusmiṃ pasāduppādanena bhāvanācittassa paritosanatttham. **Vipassanattthanti** vipassanāsukhattham. Upacārasamādhinā hi citte samāhite vipassanāsukhena ijjhati. **Cittuppādoti** bhāvanāvasena pavatto cittuppādo. **Upahaññati** patihaññati paṭikūlattā ārammaṇassa.

1. Accantāya (Ka)

Tato eva **ukkaṇṭhati**, kammaṭṭhānaṃ riñcati, **nirassādo hoti** bhāvanassādassa alabbhanato. **Pasīdati** buddhaguṇānaṃ pasādanīyattā. Tathā ca kaṅkhādicetokhilābhāvena **vinīvaraṇo hoti**. **Dametvāti** nīvaraṇanirākaraṇena nibbisevanaṃ katvā. Evaṃ kammaṭṭhānantarānuyuñjanena cittaparidamanassa upamaṃ dassento “**kathan**”ti-ādimāha.

Ko ayaṃ -pa- anussarīti ko ayaṃ mama abbhantare ṭhatvā anussari. **Pariggaṇhantoti** bāhirakaparikkappitassa anussarakassa sabbaso abhāvadassanametaṃ. Tenāha “**na añño koci**”ti. **Disvāti** pariyesananayena vuttappakāraṃ cittameva anussarīti disvā. **Sabbampetanti** etaṃ hadayavatthu-ādippabhedam sabbampi. **Idaṇca rūpaṃ purimaṇca arūpanti** idaṃ ruppanasabhāvattā rūpaṃ, purimaṃ atamsabhāvattā arūpanti saṅkhepato rūpārūpaṃ vavatthapetvā. Pañcakkhandhe vavatthapetvāti yojanā. **Sambhāvīkāti**¹ samuṭṭhāpikā. **Tassāti** samudayasaccassa. **Nirodhoti** nirodhanimittam. **Appanāvāroti** yathāraddhāya desanāya nigamanavāro.

297. **Eseva nayoti** iminā yvāyaṃ “taṃ panetan”ti-ādinā atthanayo buddhānussatiyaṃ vibhāvitoti atidisati, svāyaṃ atideso payojanavasena navasupi anussatisu sādharmaṇavasena vuttopi ānāpānassati-ādīsu tīsu vipassanattāhāneva hontīti iminā apavādena nivattitoti tāsaṃ ekappayojanatāva daṭṭhabbā. Dhamme anussati dhammānussatīti samāsapadavibhāgadassanampi vacanatthadassanapakkhikamevāti āha “**ayaṃ panettha vacanattho**”ti. **Dhammaṃ ārabbhāti** hi dhammassa anussatiyā visayabhāvadassanametaṃ. Esa nayo sesesupi. **Sīlaṃ ārabbhāti** attano pārisuddhisīlaṃ ārabbhā. **Cāgaṃ ārabbhāti** attano cāgaguṇaṃ ārabbhā. **Devatā ārabbhāti** ettha devatāguṇasadisatāya attano saddhāsīlasutacāgapaññāsu devatāsamaññā. Bhavati hi taṃsadisepi tabbohāro yathā “tāni osadhāni, esa brahmadatto”ti ca. Tenāha “**devatā sakkhiṭṭhāne ṭhapetvā**”ti-ādi. Tattha **devatā sakkhiṭṭhāne ṭhapetvāti** “yathārūpāya saddhāya samannāgatā tā devatā ito cutā tattha upapannā, mayhampi tathārūpā saddhā samvījati. Yathārūpena sīlena,

1. Pabhāvīkāti (Aṭṭhakathāyaṃ)

yathārūpena sutena, yathārūpena cāgena, yathārūpāya paññāya samannāgatā tā devatā ito cutā tattha upapannā, mayhampi tathārūpā paññā samvijjati”ti evaṃ devatā sakkhiṭṭhāne ṭhapetvā. **Assāsapassāsanimittam** nāma tattha laddhabbappaṭibhāganimittam. **Gatā**ti ārammaṇakaraṇavasena upagatā pavattā.

Upasammati ettha dukkhanti upasamo, nibbānam. Accantameva ettha upasammati vaṭṭattayanti **accantūpasamo**, nibbānameva. Khīṇoti khepeti kileseti khayō, ariyamaggo. Te eva upasametīti upasamo, ariyamaggo eva. Khayo ca so upasamo cāti **khayūpasamo**. Tatra cāyaṃ upasamo dhammo evāti dhammānussatiyā upasamānussati-ekasaṅgahoti? Saccamekasaṅgaho dhammabhāvasāmaññe adhippete, saṅkhatadhammato pana asaṅkhatadhammo sātiso uḷāratamaṇaṇītatamabhāvatoti dīpetuṃ visuṃ nīharitvā vuttam. Imameva hi viśesaṃ sandhāya bhagavā “dhammānussati”ti vatvāpi upasamānussatiṃ avoca anussarantassa savisesaṃ santapaṇītabhāvena upaṭṭhānato. Evañca katvā idha khayūpasamaggahaṇampi samatthitanti daṭṭhabbam. Yatheva hi samānepi lokuttaradhammabhāve “yāvatā bhikkhave dhammā saṅkhatā vā asaṅkhatā vā, virāgo tesam aggamakkhāyati”ti¹ ādivacanato maggaphaladhammehi nibbānadhammo sātiso, evaṃ phaladhammato maggadhammo kilesappahānena acchariyadhammabhāvato, tasmā accantūpasamena saddhiṃ khayūpasamopi gahitoti daṭṭhabbam. **Vipassanatthāneva hontī**ti kasmā vuttanti? “Ekantanibbidāyāti-ādivacanato”ti keci, tam akāraṇaṃ buddhānussati-ādisupi tathā desanāya āgatattā. Yathā pana buddhānussati-ādini kammaṭṭhānāni vipassanatthāni honti, nimittasampahamsanatthānipi honti, na evametāni, etāni pana vipassanatthānevāti tathā vuttam.

Paṭhamavaggavaṇṇanā niṭṭhitā.

16. Ekadhammapāli 2. Dutiyavaggavaṇṇanā

298. Micchā passati tāya, sayam vā micchā passati, micchādassanameva vā tanti **micchādiṭṭhi**, yaṃ kiñci viparītadassanam. Tenāha

1. Khu 1. 254 piṭṭhe.

3. Viddhastabhāvam (Ka)

paṭisandhi-anākaḍḍhanam kusalam anavajjam. **Satta bhave detīti** sotāpattimagassa paccayabhūtā vipassanā sammādiṭṭhi tassa puggalassa satta bhave deti. **Evamayati** pañcavidhampi sammādiṭṭhim sandhāya vuttam. Tenāha “**lokiyalokuttarā sammādiṭṭhi kathitā**”ti. **Imasmim panattheti** “nāham bhikkhave aññam ekadhammampi samanupassāmi”ti-ādinā vutte gatimaggasāṅkhāte atthe. “sugatiṃ saggaṃ lokaṃ upapajjantī”ti vuttattā “**lokikā bhavanipphādikāva veditabbā**”ti vuttam.

306. **Yathādiṭṭhīti** atthabyāpanicchāyaṃ **yathā**-saddo, tena uttarapadatthappadhāno samāsoti āha “**yā yā diṭṭhī**”ti. **Tassā tassā anurūpanti** tamtamdiṭṭhi-anurūpanti attho. **Samattanti** anavasesam. Tenāha “**paripuṇṇan**”ti. **Samādinanti** ādimajjhapariyosānesu samam ekasadisam katvā ādinnam gahitam anissattham. **Tadetanti** yadetaṃ “yam ceva kāyakammaṃ”ti-ādinā vuttam, tadetaṃ kāyakammaṃ. **Yathādiṭṭhiyam ṭhitakāyakammanti** yā pana diṭṭhi “natthi tatonidānam pāpan”ti-ādinā pavattā, tassam diṭṭhiyam ṭhitakassa ṭhitamattassa anissatthassa tamdiṭṭhikassa kāyakammaṃ. **Diṭṭhisahajātam kāyakammanti** tassa yathādiṭṭhikassa paresam hatthamuddādinā viññāpanakāle tāya diṭṭhiyā sahajātam kāyakammaṃ. Na cettha vacīkammāsāṅkhā uppādetabbā paṇaghātādīnamyeva adhippetattā. **Diṭṭhānulomikaṃ kāyakammanti** yathā paresam pākaṭam hoti, evam diṭṭhiyā anulomikaṃ katvā pavattitam kāyakammaṃ. Tenāha “**samādinnaṃ gahitaṃ parāmatṭhan**”ti. **Tatthāti**-ādi suviññeyyameva. **Eseva nayoti** iminā yathāvuttāya diṭṭhiyā ṭhitavacīkammaṃ, diṭṭhisahajātam vacīkammaṃ, diṭṭhānulomikaṃ vacīkammanti tividham hotīti evamādi atidisati. **Micchādiṭṭhikassāti** kammaopathappattāya micchādiṭṭhiyā micchādiṭṭhikassa. “Yāya kāyaci micchādiṭṭhiyā micchādiṭṭhikassa sato”ti apare.

Diṭṭhisahajātāti yathāvuttāya diṭṭhiyā sahajātā cetanā. Esa nayo sesapadesupi. **Patthanāti** “idaṃ nāma kareyyan”ti taṇhāpatthanā.

Cetanāpatthanānam vasenāti

yathāvuttadiṭṭhigatanissitacetaskanikāmanānam vasena. **Cittatṭhapanāti** cittassa paṇidahanā. **Phassādayoti** cetanādiṭṭhitatṭhādivinimuttā phassādidhammā. Yasmā diṭṭhi pāpikā, tasmā tassa puggalassa sabbe te dhammā aniṭṭhāya -pa- samvattantīti yojanā.

Purimassevāti tittakapadasseva. Tittakaṃ kaṭukanti ca ubhayaṃ idha aniṭṭhapariyāyaṃ daṭṭhabbaṃ “pacchā te kaṭukaṃ bhvissati”ti-ādīsu viya.

Amboyanti ambo ayaṃ. **Tameva pūjanti** tameva pubbe laddhapaṇiṣiṇṇanādānādipūjaṃ. **Nivesareti** pavisiṃsu. **Asātasannivāsenā**ti amadhuranimbamūlasaṃsaggena.

Taṃ pana paṭikkhipitvā -pa- vuttanti sabbāpi micchādiṭṭhi ekantasāvajjattā aniṭṭhāya dukkhāya saṃvattatīti adhippāyena vuttaṃ. **Anantarassutteti** dasamasutte. **Yojetvā veditabbānī**ti navamasutte viya yojetvā veditabbāni. **Cittatṭhapanāva patthanā**ti ettha paṇidhi cāti vattabbāṃ.

Dutiyavaggavaṇṇanā niṭṭhitā.

3. Tatiyavaggavaṇṇanā

308. Tatiyassa paṭhame **ayāthāvadiṭṭhikoti** aniccādiḥhāvesu dhammesu niccāti-ādinā uppannadiṭṭhiko. Tenāha “**tāyeva micchādiṭṭhiyā viparītadassano**”ti. **Saddhammā**ti ettha santo pasattho sundaro dhammo, yo manussadhammotipi vuccati. Tato hi micchādiṭṭhiko paraṃ vuṭṭhāpeyya, na ariyadhammato. Tenāha “**dasakusalakammapathadhammato**”ti. **Evarūpā**ti iminā pāthikaputtādike saṅgaṇhāti.

309. **Sabbaññubodhisattoti** sabbaññubhāgī bodhisatto. **Ādisaddena** pūritapāramikā paccekabodhisattā ekaccasāvakabodhisattā ca saṅgayhanti.

310. **Paramā**ti mahāsāvajjabhāvena paramā, ukkaṃsagatāti attho. **Tesanti** ānantariyakammānaṃ. **Paricchodoti** vipākavasena pariyosānaṃ. **Vaṭṭassa mūlaṃ**, tato taṃsamaṅgīpuggalo vaṭṭassa khāṇūti vuccti. Tenāha “**tāyā**”ti-ādi. Tañce gāhaṃ na vissajjeti, tassa punapi tabbhāvāvahattā vuttaṃ “**bhavato vuṭṭhānaṃ natthi**”ti, na pana sabbaso vuṭṭhānassa abhāvato. Yādise hi paccaye paṭicca ayaṃ taṃ dassanaṃ okkanto puna kadāci tappaṭipakkhe paccaye paṭicca tato sīsukkipanamassa na hotīti

na vattabbaṃ. Akusalaṃ hi nāmetaṃ abalaṃ dubbalaṃ, na kusalaṃ viya mahābalaṃ. Aññathā sammattaniyāmo viya micchattaniyāmopi accantiko siyā, na ca micchattaniyāmo accantiko. Teneva **papañcasūdaniyaṃ**¹—

“Kiṃ panesa ekasmiṃyeva attabhāve niyato hoti, udāhu aññasmimpīti? Ekasmiṃyeva niyato, āsevanavasena bhavantarepi taṃ diṭṭhiṃ roceti evā”ti—

vuttaṃ. Tatoyeva ca **sumaṅgalavilāsiniyampi**² vuttaṃ—

“Ye vā pana tesāṃ laddhiṃ gahetvā rattiṭṭhāne divāṭṭhāne nisinnā sajjhāyanti vīmaṃsanti, tesāṃ ‘karoto na karīyati pāpaṃ, natthi hetu, natthi paccayo, mato ucchiṃjati’ti tasmiṃ ārammaṇe micchāsati antiṭṭhati, cittaṃ ekaggaṃ hoti, javanāni javanti. Paṭhamajavane satekicchā honti, tathā dutiyādīsu. Sattame buddhānampi atekicchā anivattino riṭṭhakaṇṭakasadisā, tattha koci ekaṃ dassanaṃ okkamati, koci dve, koci tīpi, ekasmiṃ okkantepi dvīsu tīsu okkantesupi niyatamicchādiṭṭhikova hoti. Patto saggaṃaggāvaraṇaṇceva mokkhamaggāvaraṇaṇca, abhabbo tassattabhāvassa anantaraṃ saggaṃpi gantuṃ, pageva mokkhaṃ, attakhaṇu nāmesa satto pathavigopako, yebhuyyena evarūpassa bhavato vuṭṭhānaṃ natthī”ti.

Piṭṭhicakkavāleti jhāyamānacakkavālassa parato ekasmiṃ okāse. Yaṃ jhāyamānānaṃ ajjhāyamānānaṇca cakkavāḷānamantaraṃ, yattha lokantarikanirayasamaññā, tādise ekasmiṃ okāse. **Paccatiyevāti** cakkavāḷe jhāyamāne ajjhāyamānepi attano kammabalena paccatiyeva.

311. Catutthe **“mā khalī”ti vacanaṃ upādāya evaṃladdhanāmoti** taṃ kira sakaddamāya bhūmiyā telaghaṭaṃ gahetvā gacchantaṃ “tāta mā khalī”ti sāmiko āha. So pamādena khalitvā patitvā sāmikassa bhayena palāyituṃ āraddho. Sāmiko upadhāvitvā sātakakaṇṇe aggahesi. So sātakaṃ chaḍḍetvā acelako hutvā palāto paṇṇena vā tiṇena vā paṭicchādetumpi ajānanto jātarūpeneva ekaṃ

1. Ma-Ṭṭha 3. 85 piṭṭhe.

2. Dī-Ṭṭha 1. 150 piṭṭhe.

gāmaṃ pāvisi. Manussā taṃ disvā “ayaṃ samaṇo arahā appiccho, natthi iminā sadiso”ti pūvabhattādīni gahetvā upasaṅkamitvā “mayhaṃ sātakaṃ anivattabhāvena idaṃ uppannaṃ”ti tato paṭṭhāya sātakaṃ labhitvāpi na nivāsesi, tadeva ca pabbajjaṃ aggahesi. Tassa santike aññepi aññepīti pañcasatā manussā pabbajjimsu. Taṃ sandhāyetaṃ vuttaṃ “mā khalīti vacanaṃ upādāya evaṃladdhanāmo tittakaro”ti.

Samāgataṭṭhāneti dvinnam nadīnam udakappavāhassa sannipātaṭṭhāne. **Dvīnnaṃ udakānanti** dvinnam udakappavāhānam. Yathāvuttaṭṭhāne macchaggahaṇatthaṃ khipitabbato khippaṃ, kuminaṃ, tadeva idha **khippanti** vuttaṃ. Tenāha “**kuminan**”ti. **Ucchūhīti** udaka-ucchūhi. **Tucchapuriso** ariyadhammābhāvato. Jhānamattampi hi tassa nattheva, kuto ariyamaggo. **Manussakhippaṃ maññeti** manussā patitvā byasanappatti-atthaṃ oḍḍitaṃ kuminaṃ viya. Tenāha “**mahājanassā**”ti-ādi.

312. Pañcamādisu **bāhirakasāsananti** avisesena vuttaṃ tassa sabbassapi aniyyānikattā satthupaṭiññassapi asabbaññubhāvato. Tenāha “**tattha hī**”ti-ādi. **Gaṇoti** sāvakagaṇo. **Tathābhāvāyāti** ācariyena vuttākāratāya samaṅgibhāvattaṃ. **Jaṅghasatanti** bahū aneke satte. **Samakameva akusalaṃ pāpuṇāti** tesaṃ sabbesaṃ ekajjhaṃ samādapane pi tesaṃ akusalena samakameva akusalaṃ pāpuṇāti ekajjhaṃ bahūnaṃ samādapane pi tathā ussahanassa balavabhāvato. Visuṃ visuṃ samādapane vattabbameva natthi. Yathā hi dhammacariyāyaṃ samakamevāti vattabbā kalyāṇamittatā, evaṃ adhammacariyāyaṃ akalyāṇamittatāti.

313. **Suṭṭhu akkhātet** ekantato niyyānikabhāvena akkhāte. **Satthā ca sabbaññū hoti**ti asabbaññuno niyyānikabhāvena kathetuṃ asakkuṇeyyattā. **Dhammo ca svākkhāto** sammāsambuddhappaveditattā. **Gaṇo ca suppaṭipanno** satthārā suvinītattā. **Samādapako hīti**-ādi suppaṭipattiyā nidassanaṃ daṭṭhabbaṃ.

314. **Pamāṇaṃ jānitabbanti** “ayaṃ ettakena yāpeti, imassa ettakaṃ dātuṃ yuttaṃ”ti evaṃ pamāṇaṃ jānitabbaṃ. **Atireke -pa- nibbānasampatti vā natthi** durakkhātattā dhammassa. **Tassāti** paṭiggāhakassa. **Appicchapaṭipadā nāma natthi** durakkhāte dhammavinayeti adhippāyo.

315. **Dāyakassa vaso** nāma ulāruḷāratābhedo ajjhāsayo.
 Deyyadhammassa pana thokabahutāva **deyyadhammassa vaso** nāma. **Attano thāmoti** yāpanappamāṇaṃ. **Yadi hīti**-ādi “kathan”ti-ādinā saṅkhepato vuttassa atthassa vivaraṇaṃ. **Anuppannessāti** anuppanno assa puggalassa. **Cakkhubhūto hotīti** mahājanassa cakkhu viya hoti. **Sāsanaṃ ciraṭṭhititaṃ karotīti** anuppannalābhuppadanena mahājanassa pasāduppadanena ca ciraṭṭhitikaṃ karoti.

Kuṭumbariyavihāreti kuṭumbariyagāmasannissitavihāre.
Bhuñjanatthāyāti tasmimyeva gehe nisīditvā bhuñjanatthāya. **Gahetvā gamanatthāyāti** gehato bahi gahetvā gamanatthāya. **Dhurabhattānīti** niccabhattāni. **Cūḷupaṭṭhākanti** veyyāvaccakaraṃ. **Vīmaṃsitvāti** yathā uddissa kataṃ na hoti, evaṃ vīmaṃsitvā. **Mahājano appiccho bhavituṃ maññatīti** mahājano sayam appiccho bhavituṃ maññati diṭṭhānugatiṃ āpajjanena. **Mahājanassāti** bahujanassa. **Avattharivāti** vitthārikaṃ katvā.

316. **Pañcātapatappanaṃ** catūsu passesu aggisantāpassa upari sūriyasantāpassa ca tappanaṃ, tañca kho gimhakāle.
 Channappapātapabbatasikharato patanaṃ **maruppapātapatanaṃ**.
 Pubbaṇhādisu ādiccābhimukhāvaṭṭanaṃ **ādiccānuparivattanaṃ**.

317. **Ayampīti** svākkhāte dhammavinaye kusītopi. **Sāmaññanti** tapacaraṇaṃ. **Dupparāmaṭṭhanti** micchācaritaṃ saṃkiliṭṭhaṃ.
Nirayāyupakaḍḍhatīti nirayadukkhāya naṃ kaḍḍhati.

318. **Vuttappakāreti** pañcātapatappanādike vuttappakāre.

319. **Evanti** vuttappakārāya cittappasādavhayasuppaṭipattiyā. Tena samaṇadhammakaraṇasukhañca saṅgaṇhāti.

320. **Navakanipātetī** imasmimyeva aṅguttaranikāye vakkhamānaṃ navakanipātaṃ sandhāyāha. **Nava puggalāti** sattakkhattuparamakolaṃkolādayo nava puggalā. **Sabbatthāti** imasmim sutte vuttāvasiṭṭhesu sabbesu suttesu.

Tatīyavaggavaṇṇanā niṭṭhitā.

4. Catutthavaggavaṇṇanā

322. Catutthassa paṭhame **saññāṇabhūtā**ti upalakkhaṇabhūtā.
Pañcadasayojanāvattakkhandhāti pañcadasayojanakkhandhaparikkhepā.
Yathā cāti ca-saddena kadambarukkhādīnaṃ kappaṭṭhāyibhāvaṃ viya
 yojanasatubbedhādibhāvaṃ samuccinoti, na pana jambuyā jambudīpassa
 viya tehi aparagoyānādīnaṃ saññāṇabhāvaṃ. **Rāmaṇeyyakanti**
 ramaṇīyabhāvaṃ. **Sesapadesūti** vanarāmaṇeyyakādipadesu. Uggataṃ kūlaṃ
 ussitabhāvo etassāti **ukkūlaṃ**, vigataṃ apagataṃ kūlaṃ etassāti **vikūlanti**
 āha “**unnataṭṭhānaṃ ninnataṭṭhānaṃ**”ti ca. **Nandiyāvaṭṭamacchapiṭṭhenevāti**
 kujjakakulisakamacchasaṅghātapīṭṭheneva.

323. Dutiyādīsu **Cattāro apāyā aññatra manussehīti adhippetā**, na devā
 aññatra manussehīti hīnāya jātiyā adhippetattā. **Upādāyupādāyāpi**
majjhimadeso labbhati, yattha gati bhikkhūnaṃ bhikkhunīnaṃ upāsakānaṃ
 upāsikānaṃ aññesampi kammavādikiriyavādiviññujātikānaṃ, yo
 patirūpadesoti vuccati. Tenāha “**sakalopihī**”ti-ādi.

324. **Ejāti** doso. Tenāha “**niddosamukhāti attho**”ti.

326. Tathāgatassa guṇe jānitvā cakkhunāpi dassanaṃ dassanameva,
 ajānitvā pana dassanaṃ tiracchānagatānaṃ hotiyevāti āha “**ye tathāgatassa**
guṇe jānitvā”ti-ādi.

327. **Pakāsetvā kathitanti** saccāni pakāsetvā kathitaṃ.

328. Sutānaṃ dhammānaṃ asammamoso dhāraṇanti āha “**dhārentīti na**
pammussantī”ti.

329. **Atthānattham upaparikkhantīti** “ayaṃ imissā pāḷiyā attho, ayaṃ na
 attho”ti atthānattham upaparikkhanti. Anattaparīhārena hi atthaggaṇaṃ
 yathā adhammaparivajjanena dhammapaṭipatti.

330. **Anulomapaṭipadanti** nibbānassa anulomikaṃ paṭipadaṃ.

331. **Samvegajanakesu kāraṇesūti** samvegajanakesu jāti-ādīsu kāraṇesu. Samvejanīyesu ṭhānesu sahottappañāṇaṃ samvego.

332. **Upāyenāti** yena upāyena vaṭṭūpacchedo, tena upāyena. **Padhānavīriyaṃ karontīti** sammappadhānasāṅkhātāṃ vīriyaṃ karonti uppādentī.

333. Vavassajjīyanti vissajjīyanti ettha saṅkhārāti **vavassaggo**, asaṅkhatā dhātūti āha “**vavassaggo vuccati nibbānaṃ**”ti.

334. **Uttamannānanti** uttamānaṃ pañcannaṃ bhojanānaṃ. **Uttamarasānanti** uttamānaṃ rasānaṃ. **Uñchācārenāti** uñchācariyāya kassaci apariggahabhūtaṃ kiñci ayācitvā gahaṇaṃ uñchācāro. **Ettha cāti-ādinā** annādināṃ aggabhāvo nāma manāpaparamo icchitakkhaṇalābho, na tesāṃ lābhitāmatanti dasseti. **Paṭilabbhantīti**¹ denti paṇītabhāvena. **Bhattassa ekapātīti** ekapātipūraṃ bhattaṃ. **Idaṃ kiṃ nāmāti** “idaṃ annaggarassaggaṃ nāma hoti, na hoti”ti pucchati. **Uñchena kapālābhatenāti** missakabhattena. **Yāpenteti** yāpanasīsenā yāpanahetum bhattaṃ vadati. **Upādāya aggarasaṃ nāmāti** taṃ taṃ upādāyupādāya annaggarasaggaṃ daṭṭhabbanti dasseti. Cakkavatti-āhārato hi cātumahārājikānaṃ āhāro aggoti evaṃ yāva paranimmitavasavattidevā netabbaṃ.

335. **Attharaso nāma cattāri sāmāññaphalāni** “ariyamaggānaṃ phalabhūto raso”ti katvā. **Dhammaraso nāma cattāro maggā** “sāmāññaphalassa hetubhūto raso”ti katvā. **Vimuttiraso nāma amataṃ nibbānaṃ** “sabbasaṅkhārasamatho”ti katvā.

Catutthavaggavaṇṇanā niṭṭhitā.

Jambudīpapeyyālo niṭṭhito.

17. Pasādakaradhammavaggavaṇṇanā

366. **Addhamidanti** sandhivasena pāḷiyaṃ rassaṃ katvā vuttaṃ, makāro padasandhikaroti āha “**addhā idan**”ti. **Ekamso esāti** ekamso

1. Paṭilabbhanti (Aṭṭhakathāyaṃ)

hetu esa lābhānaṃ. **Pāpakam nāmāti** appakampi pāpaṃ nāma byattaṃ ekaṃsena na karoti. **Tathassāti**¹ tathā sammāpaṭipajjamānassa assa. Araññikattaṃ -pa- tecīvarikattanti imesaṃ dhutadhammānaṃ gahaṇeneva itaresampi taṃsabhāgānaṃ gahitabhāvo daṭṭhabbo. **Thāvarappattabhāvoti** sāsane thirabhāvappatti therabhāvo. **Ākappassa sampattīti** “añño me ākappo karaṇīyo”ti evaṃ vuttassa ākappassa sampatti. **Kolaputtīti** kolaputtiyanti āha “**kulaputtabhāvo**”ti. **Sampannarūpatāti** upadhisampadā. **Vacanakiriyāyāti** vacanappayogassa madhurabhāvo mañjussaratā. **Tenassa lābho uppajjātīti** idaṃ na lābhuppādanūpāyadassanaparaṃ, atha kho evaṃ sammāpaṭipajjamānassa anicchantasseva lābho uppajjātīti lābhassa abyabhicārahetudassanaparaṃ daṭṭhabbaṃ. Yathāha—

“Ākaṅkheyya ce bhikkhave bhikkhu lābhī assaṃ
cīvarapiṇḍapātasenāsanagilānappaccayabhesajjaparikkhārānanti,
sīlesvevassa paripūrakārī”ti².

Pasādakaradhammavaggavaṇṇanā niṭṭhitā.

18. Aparā-accharāsaṅghātavaggavaṇṇanā

382. **Idampi suttanti** ettha **pi-saddo** heṭṭhā vuttacūḷaccharāsaṅghātasuttaṃ sampiṇḍeti. Cūḷaccharāsaṅghātasutte appanaṃ appattāya mettāya tāvamahanto vipāko dassito, kimaṅgaṃ pana imissā appanāppattāya mettāyāti dassetuṃ “**appanāppattāya hī**”ti-ādimāha. **Vipākakathāyeva natthīti** vipāke kathāyeva natthi, ayameva vā pāṭho. **Gaṇanānupubbatāti** gaṇanānupubbatāya. Paṭhamāṃ uppannantipi paṭhamāṃ, paṭhamāṃ samāpajjātīti idaṃ pana na ekantalakkhaṇaṃ. Ciṇṇavasībhāvo hi aṭṭhasamāpattilābhī ādito paṭṭhāya matthakaṃ pāpentopi samāpajjitum sakkoti, matthakato paṭṭhāya ādim pāpentopi, antarantarā okkantopi samāpajjitum sakkoti eva. Pubbuppattiyaṭṭhena pana paṭhamāṃ nāma hoti. **Vibhaṅgeti** jhānavibhaṅge. Vipassanaṃ kayiramānaṃ **lakkhaṇūpanijjhānakiccaṃ maggena sijjhati**

1. Athassāti (Ka)

2. Ma 1. 39 piṭṭhe.

taggatasammohaviddhamsanato. Apica **vipassanāya lakkhaṇūpaniijhānaṃ maggena uppannena sijjhati** itarathā parivattanato, tasmā **maggo lakkhaṇūpaniijhānaṃ**, na aniccādilakkhaṇānaṃ ārammaṇakaraṇato. Yathā phalaṃ nibbānassa asaṅkhatalakkhaṇaṃ ārammaṇakaraṇavasena upaniijhāyati, evaṃ maggopi. Evampissa lakkhaṇūpaniijhānataṃ veditabbaṃ. **Vattabbameva natthi** arittajjhānatāya. **Sesaṃ** visesaṃ, arittajjhānā evāti attho.

386-387. **Hitapharaṇanti** sattesu hitānurūpaṃ jhānassa pharitvā pavattanaṃ. Cetopaṭipakkhato vimuccati etāyāti **cetovimutti**, appanāppattā mettā. Tenāha “**idhā**”ti-ādi. **Eseva nayoti** iminā karuṇādīnampi appanāppattataṃ atidisati. **Vatṭaṃ honti** kammavaṭṭabhāvato. **Vatṭapādā hontīti** vipākavaṭṭassa kāraṇaṃ honti.

390. **Ajjhattaparikkammavasenāti** attano kesādīsu karikkammakaraṇavasena. **Aṭṭhārasavidheti** aṭṭharasappabhede. **Kāyeti** rūpakāye. Rūpakāyo hi idha aṅgapaccaṅgānaṃ kesādīnaṃ dhammānaṃ samūhatṭhena hatthikāyarathakāyādayo viya kāyoti adhippeto. Samūhavisayatāya cassa kāyasaddassa samudāyupādanatāya ca asubhākārassa “kāye”ti ekavacanaṃ. Tathā ārammaṇādivibhāgena anekabhedabhinnampi cittaṃ cittabhāvasāmaññaṇa ekajjhaṃ gahetvā “citte”ti ekavacanaṃ kataṃ. **Kāyānupassīti** imassa atthaṃ dassetuṃ “**tameva kāyaṃ paññāya anupassanto**”ti āha. **Tameva kāyanti** ca avadhāraṇena vedanādi-anupassanaṃ nivatteti. Tena ca puna kāyaggahaṇassa payojanaṃ sūcitantī daṭṭhabbaṃ. “Kāye”ti hi vatvāpi puna “kāyānupassī”ti dutiyaṃ kāyaggahaṇaṃ asaṃmissato vavatthānaghaṇavinibbhogādīdassanattaṃ kataṃ. Tena vedanādayopi ettha sitā, ettha paṭibaddhāti kāyavedanādi-anupassanappasaṅgepi āpanne na kāye vedanānupassī cittānupassī dhammānupassī vā, atha kho kāyānupassīyevāti kāyasaṅkhātavatthusmiṃ kāyānupassanākārasseva dassanena asaṃmissato vavatthānaṃ dassitaṃ hoti. Tathā na kāye aṅgapaccaṅgavinimutta-ekadhammānupassī, nāpi kesalomādivinimutta-itthipurisānupassī. Yopi cettha kesalomādiko bhūtopādāyasamūhasaṅkhāto kāyo, tatthapi na bhūtopādāyavinimutta-ekadhammānupassī, atha kho rathasambhārānupassako viya

aṅgapaccaṅgasamūhānupassī, nāgarāvayavānupassako viya
kesalomādisamūhānupassī, kadalikkhandhapattavaṭṭivinibbhujako
rittamuṭṭhiviniveṭhako viya ca bhūtopādāyasamūhānupassīyevāti
nānappakārato samūhavaseneva kāyasaṅkhātassa vatthuno dassanena
ghanavinibbhogo dassito hoti. Na hettha yathāvuttasamūhavinimutto kāyo
vā itthi vā puriso vā añño vā koci dhammo dissati,
yathāvuttadhammasamūhamattheyeva pana tathā tathā sattā
micchābhinivesaṃ karonti.

Aṭṭhārasavidhenāti aṭṭhārasavidhā. Satipaṭṭhānabhāvakassāti
satipaṭṭhānabhāvanam bhāventassa. Tīsu bhavesu kilese ātapetīti **ātāpo**,
vīriyassetam nāmaṃ. Yadihi kilesānam pahānam ātāpananti, tam
sammādiṭṭhi-ādīnampi attheva. Ātapasaddo viya pana ātāpasaddopi vīriyeva
nirulho. Atha vā paṭipakkhappahāne sampayuttadhammānam
abbhussahanavasena pavattamānassa vīriyassa sātisayam tadātāpananti
vīriyameva tathā vuccati, na aññadhammā, tasmā ātāpoti vīriyassa nāmaṃ,
so assa atthīti **ātāpī**. Ayaṅca ikāro pasamsāya atisayassa vā dīpakoti
ātāpiggahaṇena sammappadhānasamaṅgitam dasseti. Tenevāha **“ātāpīti -pa-
vīriyena vīriyavā”**ti. **Sampajānoti** sampajāññaṅkhatena ñāṇena
samannāgato. Tenāha **“aṭṭhārasavidhena -pa- sammāpajānanto”**ti. Ayaṃ
panettha vacanatto—sammā samantato sāmāñca pajānanto **sampajāno**,
asammissato vavatthāne aññadhammānupassitābhāvena sammā aviparītam
sabbākārappajānena samantato uparūparivisesāvahabhāvena pavattiyā
sammā pajānantoti attho.

Kāyo ca idha lujjanappalujjanatṭhena lokoti adhippetoti āha
“tasminīyeva kāyasaṅkhāte loke”ti. **Pañcakāmaguṇikatāṇhanti** rūpādīsu
pañcasu kāmaguṇesu pavattamānam taṇhaṃ. Yasmā panettha
abhiññāgahaṇena kāmaccando, domanassaggahaṇena byāpādo saṅgham
gacchati, tasmā nīvaraṇapariyāpannabalavadhammadvayadassanena
nīvaraṇappahānam vuttam hotīti veditabbaṃ. Visesena cettha
abhiññāvinayena kāyasampattimūlakassa anurodhassa, domanassavinayena
kāyavipattimūlakassa virodhassa, abhiññāvinayena ca kāye abhiratiyā,
domanassavinayena kāyabhāvanāya anabhiratiyā, abhiññāvinayena kāye

abhūtānaṃ subhasukhabhāvādīnaṃ pakkhepassa, domanassavinayena kāye bhūtānaṃ asubhāsukhabhāvādīnaṃ apanayanassa ca pahānaṃ vuttaṃ. Tena yogāvacarassa yogānubhāvo yogasamatthatā ca dīpitā hoti. Yogānubhāvo hi esa, yadidaṃ anurodhavirodhavippamutto aratiratisaho abhūtapakkhepabhūtāpanayanavirahito ca hoti. Anurodhavirodhavippamutto cesa aratiratisaho abhūtaṃ apakkipanto bhūtañca anapanento yogasamattho hotīti. **Suddharūpasammasanameva kathitanti** kevalaṃ kāyānupassanābhāvato vuttaṃ.

Sukhādibhedāsu vedanāsūti sukhadukkha-adukkhamasukhasāmisa-nirāmisabhedāsu vedanāsu. Tattha sukhayatīti **sukhā**, sampayuttadhamme kāyañca laddhassāde karotīti attho. Suṭṭhu vā khādati, khanati vā kāyikaṃ cetasikañca ābādhanti **sukhā**, sukaraṃ okāsadānaṃ etissāti vā **sukhā**. Dukkhatīti **dukkhā**, sampayuttadhamme kāyañca pīleti vibādhatīti attho. Duṭṭhu vā khādati, khanati vā kāyikaṃ cetasikañca sātanti **dukkhā**, dukkaraṃ okāsadānaṃ etissāti vā **dukkhā**. Dukkhasukhappaṭikkhepena **adukkhamasukhāti** upekkhā vuttā. VEDIYATI ārammaṇarasāṃ anubhavatīti **vedanā**. **Vediyamānoti** anubhavamāno. **Sukhaṃ vedanaṃ vediyāmīti pajānātīti** kāyikaṃ vā cetasikaṃ vā sukhaṃ vedanaṃ vediyamāno “ahaṃ sukhaṃ vedanaṃ vediyāmī”ti pajānātīti attho. Tattha kāmaṃ uttānaseyyakāpi dāraḥ thaṇṇapivanādikāle sukhaṃ vedanaṃ vediyamānā “sukhaṃ vedanaṃ vediyāmā”ti pajānanti, na panetaṃ evarūpaṃ pajānanaṃ sandhāya vuttaṃ. Evarūpaṃ hi jānanaṃ sattupaladdhiṃ na jahati, attasaññaṃ na ugghāṭeti, kammaṭṭhānaṃ vā satipaṭṭhānabhāvanā vā na hoti. Imassa pana bhikkhuno jānanaṃ sattupaladdhiṃ jahati, attasaññaṃ ugghāṭeti, kammaṭṭhānañceva satipaṭṭhānabhāvanā ca hoti. Idaṃ hi “ko vediyati, kassa vedanā, kimkāraṇā vedanā”ti evaṃ sampajānantassa vediyanaṃ sandhāya vuttaṃ.

Tattha ko vediyatīti? Na koci satto vā puggalo vā vediyati. Kassa vedanāti? Na kassaci sattassa vā puggalassa vā vedanā. Kimkāraṇā vedanāti? Vatthu-ārammaṇa ca panassa vedanāti. Tasmā esa evaṃ pajānāti “taṃ taṃ sukhādīnaṃ vatthubhūtaṃ rūpādīnaṃ ārammaṇaṃ katvā

vedanāva vediyati, taṃ pana vedanāpavattiṃ upādāya ‘ahaṃ vediyāmi’ ti vohāramattaṃ hoti” ti. Evaṃ “sukhādīnaṃ vatthubhūtaṃ rūpādīnaṃ ārammaṇaṃ katvā vedanāva vediyati” ti sallakkhento esa “sukhaṃ vedanaṃ vediyāmi” ti pajānātīti veditabbo.

Atha vā **sukhaṃ vedanaṃ vediyāmi** ti **pajānātīti** sukhavedanākkhaṇe dukkhāya vedanāya abhāvato sukhaṃ vedanaṃ vediyamāno “sukhaṃ vedanaṃ yeva vediyāmi” ti pajānāti. Tena yā pubbe bhūtapubbā dukkhā vedanā, tassā idāni abhāvato imissā ca sukhāya vedanāya ito paraṃ paṭhamāni abhāvato “vedanā nāma aniccā addhuvā vipariṇāmadhammā” ti itiha tattha sampajāno hoti. **Dukhaṃ vedanaṃ vediyāmi** ti **pajānātīti** -ādīsupi eseva nayo.

Sāmisāni vā sukhanti -ādīsu yasmā kilesehi āmasitabbato āmisā nāma pañca kāmagaṇā. Ārammaṇakaraṇavasena saha āmīsehi ti sāmisā, tasmā **sāmisā sukhā** nāma pañcakāmagaṇāmisānissitā chasu dvāresu uppannā chagehassitā somanassavedanā. **Sāmisā dukkhā** nāma chagehassitā domanassavedanā. Sā ca chasu dvāresu “iṭṭhārammaṇaṃ nānubhavissāmi nānubhavāmi” ti vitakkayato uppannā kāmagaṇānissitā domanassavedanā veditabbā. **Nirāmisā sukhā** nāma chanekkhāmassitā somanassavedanā. Sā ca chasu dvāresu iṭṭhārammaṇe āpāthagate aniccādivasena vipassanaṃ paṭṭhapetvā ussukkāpetuṃ sakkontassa “ussakkitā me vipassanā” ti somanassajātassa uppannā somanassavedanā daṭṭhabbā.

Nirāmisā dukkhā nāma chanekkhāmassitā domanassavedanā. Sā pana chasu dvāresu iṭṭhārammaṇe āpāthagate anuttaravimokkhasāṅkhāta-ariyaphaladhammesu pihaṃ paṭṭhapetvā tadadhigamāya aniccādivasena vipassanaṃ paṭṭhapetvā ussukkāpetuṃ asakkontassa “imampi pakkaṃ imampi māsāni imampi saṃvaccharāni vipassanaṃ ussukkāpetvā ariyabhūmiṃ pāpuṇituṃ nāsakkhin” ti anusocato uppannā domanassavedanā.

Sāmisā adukkhamasukhā nāma chagehassitā upekkhāvedanā. Sā ca chasu dvāresu iṭṭhārammaṇe āpāthagate gulāpiṇḍake nilīnamakkhikā viya rūpādīni anuvattamānā tattheva laggā laggitā hutvā uppannā

kāmaguṇanissitā upekkhāvedanā. **Nirāmisā adukkhamasukhā** nāma chanekkhammassitā upekkhāvedanā. Sā pana chasu dvāresu iṭṭhādi-ārammaṇe āpāthagate iṭṭhe arajjantassa, anīṭṭhe adussantassa, asamapekkhanena amuyhantassa uppannā vipassanāñāṇasampayuttā upekkhāvedanā. **Evam vuttanti** mahāsatipaññānasutte vuttaṃ. **Sāva vedanā veditabbā**ti lujjanappalujjanaṭṭhena sā vedanā “loko”ti veditabbā.

Evam vitthāriteti “sarāgaṃ vā cittaṃ sarāgaṃ cittanti pajānāti, vītārāgaṃ vā cittaṃ -pa- sadosaṃ vā cittaṃ, vītadosaṃ vā cittaṃ. Samohaṃ vā cittaṃ, vītamohaṃ vā cittaṃ. Saṃkhittaṃ vā cittaṃ, vikkhittaṃ vā cittaṃ. Mahaggataṃ vā cittaṃ, amahaggataṃ vā cittaṃ. Sa-uttaraṃ vā cittaṃ, anuttaraṃ vā cittaṃ. Samāhitaṃ vā cittaṃ, asamāhitaṃ vā cittaṃ. Vimuttaṃ vā cittaṃ, avimuttaṃ vā cittanti pajānāti”ti evaṃ satipaññānasutte¹ vitthāretvā dassite soḷasavidhe citte.

Tattha **sarāganti** aṭṭhavidhaṃ lobhasahagataṃ. **Vītārāganti** lokiyakusalābyākataṃ. Idaṃ pana yasmā sammasanaṃ na dhammasamomānaṃ, tasmā idha ekapadehi lokuttaraṃ na labbhati. Sesāni cattāri akusalacittāni neva purimapadaṃ, na pacchimapadaṃ bhajanti. **Sadosanti** duvidhaṃ domanassasahagataṃ. **Vītadosanti** lokiyakusalābyākataṃ. Sesāni dasa akusalacittāni neva purimapadaṃ, na pacchimapadaṃ bhajanti. **Samohanti** vicikicchāsahagatañceva uddhaccasahagatañcāti duvidhaṃ. Yasmā pana moho sabbākusalesu uppajjati, tasmā sesāni idha vattantiyeva. Imasmiññeva hi duke dvādasākusalacittāni pariyādinnānīti. **Vītamohanti** lokiyakusalābyākataṃ.

Saṃkhittanti thinamiddhānupatitaṃ. Etaṃ hi saṅkucitacittaṃ nāma ārammaṇe saṅkocavasena pavattanato. **Vikkhittanti** uddhaccasahagataṃ. Etaṃ hi pasaṭacittaṃ nāma ārammaṇe savisesaṃ vikkhepavasena viṣaṭabhāvena pavattanato. **Mahaggatanti** rūpāvacaraṃ arūpāvacarañca. **Amahaggatanti** kāmāvacaraṃ. **Sa-uttaranti** kāmāvacaraṃ. **Anuttaranti** rūpāvacaraṃ arūpāvacarañca. Tatrāpi sa-uttaraṃ rūpāvacaraṃ, anuttaraṃ arūpāvacarameva. **Samāhitaṃ** yassa appanāsamādhī vā upacārasamādhī vā atthi. **Asamāhitaṃ** ubhayasamādhivirahitaṃ.

1. Dī 2. 237; Ma 1. 76 piṭṭhesu.

Vimuttanti tadaṅgavikkhambhanavimuttīhi vimuttaṃ. **Avimuttanti** ubhayavimuttirahitaṃ. Samucchedappaṭippassaddhinissaraṇavimuttīnaṃ pana idha okāsova natthi, okāsābhāvo ca sammasanacārassa adhippetattā veditabbo.

Upādānassa khandhā **upādānakkhandhā**, upādānassa paccayabhūtā dhammapuñjā dhammarāsayoti attho. Upādānehi ārammaṇakaraṇādivasena upādātabbā vā khandhā **upādānakkhandhā**. **Cha ajjhattikabāhirāyatanānīti** cakkhu sotaṃ ghānaṃ jivhā kāyo manoti imāni cha ajjhattikāyatanāni ceva, rūpaṃ saddo gandho raso phoṭṭhabbo dhammāti imāni cha bāhirāyatanāni ca. Ettha pana lokuttaradhammā na gahetabbā sammasanacārassa adhippetattā. **Satta sambojjhaṅgāti** satisambojjhaṅgādayo satta sambojjhaṅgā. Sati-ādayo hi sambodhissa, sambodhiyā vā aṅgāti **sambojjhaṅgā**. Tathā hi sambujjhati āraddhavipassakato paṭṭhāya yogāvacaroti sambodhi, yāya vā so sati-ādikāya sattadhammasāmaggiyā sambujjhati, kilesaniddāto utṭhāti, saccāni vā paṭivijjhati, sā dhammasāmaggī sambodhi, tassa sambodhissa, tassā vā sambodhiyā aṅgāti **sambojjhaṅgā**.

Cattāri ariyasaccānīti “dukkhaṃ dukkhasamudayo dukkhanirodho dukkhanirodhagāminipaṭipadā”¹ti evaṃ vuttāni cattāri ariyasaccāni. Tattha purimāni dve saccāni vaṭṭaṃ pavattihetubhāvato. Pacchimāni vivaṭṭaṃ nivaṭṭatadadhigamūpāyabhāvato. Tesu bhikkhuno vaṭṭe kammaṭṭhānābhiniveso hoti sarūpato pariggahasambhavato. Vivaṭṭe natthi abhiniveso avisayattā avisayatte ca payojanābhāvato. **Pañcadhā vuttesūti** satipaṭṭhānasutte vuttesu. **Suddha-arūpasammasanamevāti** rūpena amissitattā kevalaṃ arūpasammasanameva. Khandhāyatanasaccakoṭṭhāsānaṃ pañcakkhandhāsaṅgahato “**rūpārūpasammasanan**”ti vuttaṃ. Pubbabhāgiyānampi satipaṭṭhānānaṃ saṅgahitattā “**lokiyalokuttaramissakāneva kathitānī**”ti āha.

394. **Anibbattānanti** ajātānaṃ. **Payogaṃ parakkamanti** ettha bhusaṃ yogo payogo, payogova parakkamo, payogasaṅkhātāṃ parakkamanti attho. **Cittaṃ ukkhipatīti** kosajjapakkhe patitum apadānavasena ukkhipati.

1. Saṃ 3. 363 piṭṭhādīsu.

Padhānavīriyanti sammappadhānalakkhaṇappattavīriyaṃ. **Lokiyāti** lokiyasammappadhānakathā. **Sabbapubbabhāgeti** sabbamaggānaṃ pubbabhāge. **Kassapasamīyuttapariyāyenāti** kassapasamīyutte āgatasuttena “uppannā me pāpakā akusalā dhammā appahīyamānā anathāya samvatteyyūn”¹ti āgatattā. Sā lokiyāti veditabbā.

Samathavipassanāvāti avadhāraṇena maggaṃ nivattetvā tassa nivattane kāraṇaṃ dassento “**maggo panā**”²ti-ādimāha. **Sakim uppajjitvāti** idaṃ bhūtakathanamattaṃ. Niruddhassa puna anuppajjanato “na koci guṇo”³ti āsaṅkeyyāti āha “**so hī**”⁴ti-ādi. Anantameva yathā phalaṃ uppajjati, tathā pavattiyevassa paccayadānaṃ. **Purimasmimpīti** “anuppannā me kusalā dhammā uppajjamānā anathāya samvatteyyūn”⁵ti etthapi. **Vuttanti** porāṇaṭṭhakathāyaṃ. **Taṃ pana** tathāvuttavacanāṃ **na yuttaṃ** dutiyasmiṃ viya purimasmiṃ maggassa aggahaṇe kāraṇābhāvato. Purimasmiṃ aggahite magge anuppajjamāno maggo anathāya⁶ samvatteyyāti āpajjeyya, na cetāṃ yuttaṃ āpajjamāne tasmiṃ padhānatthasambhavato⁷.

Catukiccasāadhanavasenāti

anuppannākusalānuppadanādicatukiccasāadhanavasena.

Vuttanayenāti “asamudācāra vasena vā ananubhūtārammaṇavasena vā”⁸ti-ādinā vuttanayena. **Vijjamānāti** dharamānasabhāvā.

Khaṇattayapariyāpannattā uppādādisamaṅgino vattamānabhāvena uppannaṃ **vattamānuppannaṃ**. Tā hi uppādato paṭṭhāya yāva bhaṅgā uddhaṃ pannaṃ pattanti nippariyāyato “**uppanna**”⁹ti vuccati. Anubhavitvā bhavitvā ca vigataṃ bhutvāvigataṃ. Anubhavanabhavanāni hi bhavanasāmaññena bhutvā-saddena vuttāni. Sāmaññameva hi upasaggena visesīyati. Idha vipākānubhavanavasena tadārammaṇaṃ avipakkavipākassa sabbathā avigatattā bhavitvāvigatamattavasena kammaṇca “**bhutvāvigatuppanna**”¹⁰ti vuttaṃ. Na aṭṭhasālīniyaṃ viya rajjanādivasena anubhūtāpagataṃ javanaṃ uppajjitvā niruddhatāvasena bhūtāpagataṃ saṅkhatam

bhūtāpagatuppannanti. Tasmā idha **okāsakatuppannaṃ** vipākameva vadati, na tattha viya kammampi. Aṭṭhasālīniyaṃ hi bhūtāvigatuppannaṃ okāsakatuppannaṃ aññathā dassitaṃ. Vuttaṃ hi tattha¹¹—

1. Sam 1. 400 piṭṭhe.

3. Padhānatthasambhavato (Sī)

2. Atthāya (Sī)

4. Abhi-Ṭṭha 1. 108, 109 piṭṭhesu.

“Ārammaṇarasam anubhavitvā niruddham
 anubhūtāpagatasamkhātāṃ kusalākusalāṃ, upādāditayāṃ anuppatvā
 niruddham bhūtāpagatasamkhātāṃ sesasamkhataṇṇa
 bhūtāpagatuppannam nāma. ‘Yānissa tāni pubbekatāni kammāni’ti
 evamādinā nayena vuttam kammam atītampi samānam aññaṃ vipākam
 paṭibāhitvā attano ipākassokāsam katvā tthittā, tathākatokāsaṇṇa
 vipākam anuppannampi samānam evam kate okāse ekantena
 uppajjanato okāsakatuppannam nāmā”ti.

Idha pana sammohavinodaniyam vuttanayeneva bhutvāvigatuppannam
 okāsakatuppannaṇṇa dassitam. Vuttam hi **sammohavinodaniyam**¹—

“Kamme pana jahite ārammaṇarasam anubhavitvā niruddho vipāko
 bhutvāvigatam nāma. Kamam uppajjitvā niruddham hutvāvigatam
 nāma. Tadubhayampi bhutvāvigatuppannanti samkhyaṃ gacchati.
 Kusalākusalāṃ kammam aññaṃkammassa vipākam paṭibāhitvā attano
 vipākassa okāsam karoti. Evam kate okāse vipāko uppajjamāno
 okāsakaraṇato paṭṭhāya uppannoti vuccati. Idam okāsakatuppannam
 nāmā”ti.

Tattha aṭṭhasāliniyā ayamadhippāyo—satipi sabbesampi cittuppadānam
 samvedayitasabhāvā ārammaṇanubhavane savipallāse pana santāne
 cittābhisamkhāravasena pavattito abyākatehi viṣiṭṭho kusalākusalānam
 sātisayo visayānubhavanākāro. Yathā² vikappaggāhavasena rāgādīhi
 tabbipakkhehi ca akusalāṃ kusalaṇṇa nippariyāyato ārammaṇarasam
 anubhavati, na tathā vipāko kammavegakkhittattā, nāpi kiriyā ahetukānam
 atidubbalatāya, sahetukānaṇṇa khīṇakilesassa chaḷaṇṇupekkhāvato
 uppajjamānānam atisantavuttittā, tasmā rajjanādivasena
 ārammaṇarasānubhavanam sātisayanti akusalāṃ kusalaṇṇa uppajjitvā
 niruddhatāsamaññaṇṇa sesasamkhataṇṇa bhūtāpagatanti vuttam.
 Sammohavinodaniyā pana vipākānubhavanavasena tadārammaṇam
 avipakkapākassa sabbathā avigatattā bhavitvāvigatamattavasena kammaṇṇa

1. Abhi-Ṭṭha 2. 285 piṭṭhe.

2. Tathā (Ka)

bhutvāpagatanti vuttaṃ. Teneva tattha okāsatuppannanti vipākamevāha, na kammampi, tasmā imāpi sammohavinodaniyaṃ vuttanayeneva bhutvāpagatuppannaṃ okāsatuppannañca vibhattanti daṭṭhabbaṃ.

Pañcakkhandhā pana vipassanāya bhūmi nāmāti sammasanassa ṭhānabhāvato vuttaṃ. **Tesūti** atītādibhedesu. **Anusayitakilesāti** appahīnā maggena pahātabbā adhippetā. Tenāha “**atītā vā -pa- na vattabbā**”ti. Hontu tāva “atītā”ti vā “paccuppannā”ti vā na vattabbā, “anāgatā”ti pana kasmā na vattabbā, nanu kāraṇalābhe uppajjanārahā appahīnaṭṭhena thāmagatā kilesā anusayāti vuccantīti? Saccametaṃ, anāgatabhāvopi nesaṃ na paricchinno itarānāgatakkhandhānaṃ viyāti “anāgatā vāti na vattabbā”ti vuttaṃ. Yadi hi nesaṃ paricchinno anāgatabhāvo siyā, tato “paccuppannā, atītā”ti ca vattabbā siyūṃ, paccayasamavāye pana uppajjanārahataṃ upādāya anāgatavohāro tattha veditabbo.

Idaṃ bhūmiladdhuppannaṃ nāmāti idaṃ yathāvuttaṃ kilesajātaṃ appahīnaṭṭhena bhūmiladdhuppannaṃ nāma kāraṇalābhe sati vijjamānakiccakaraṇato. **Tāsu tāsu bhūmīsūti** manussadevādi-attabhāvasaṅkhātesu upādānakkhandhesu. Ārammaṇakaraṇavasena hi bhavanti ettha kilesāti **bhūmiyo**, upādānakkhandhā. **Asamugghātagatāti** tasmim̐ tasmim̐ santāne anuppattidhammataṃ anāpāditatāya samugghātaṃ samucchedaṃ na gatāti **asamugghātagatā**. **Bhūmiladdhuppannaṃ nāmāti** ettha laddhabhūmikaṃ bhūmiladdhanti vuttaṃ aggi-āhito viya. Okāsatuppannasaddepi ca **aṭṭhasālīniyaṃ**¹ āgatanayena okāso kato etena kusalākusalakammena, okāso kato etassa vipākassāti ca duvidhatthepe evameva katasaddassa paranipāto veditabbo, idha pana okāsatuppannasaddena vipākasseva gahitattā “okāso kato etassa vipākassā”ti evaṃ viggaho daṭṭhabbo.

Khaṇattayasamaṅgitāya samudācārappattaṃ **samudācāruppannaṃ**. Tenāha “**sampati vattamānaṃyevā**”ti. Ārammaṇaṃ adhiggaṃya dāḷhaṃ gahetvā pavattaṃ **ārammaṇādhiggaḥhituppannaṃ**. Vikkhambhanappahānavasena appahīnā **avikkhambhitā**. Samucchedappahānavasena appahīnā **asamugghātītā**. Nimittaggāhavasena ārammaṇassa

1. Abhi-Ṭṭha 1. 109 piṭṭhe.

adhiggahitattā taṃ ārammaṇaṃ anussaritānussaritakkhaṇe
kilesuppatthetubhāvena upatitṭhanato adhiggahitameva nāmaṃ hotīti āha
“**ārammaṇassa adhiggahitattā**”ti. Ettha ca āhaṭakhīrarukkho viya
nimittaggāhavasena adhiggahitaṃ ārammaṇaṃ, anāhaṭakhīrarukkho viya
avikkhambhitatāya antogatakilesa-ārammaṇaṃ daṭṭhabbaṃ. Nimittaggāhikā
avikkhambhitakilesā vā puggalā vā āhaṭānāhaṭakhīrarukkhasadisā.

Purimanayenevāti avikkhambhituppanne vuttanayeneva. **Vitthāretabbanti**
“imasmiṃ nāma ṭhāne nuppajjissanti”ti na vattabbā. Kasmā?

Asamugghātittā. Yathā kiṃ? Yathā sace khīrarukkhaṃ kuṭhāriyā
āhaneyyuraṃ, imasmiṃ nāma ṭhāne khīraṃ na nikkhameyyāti na vattabbāṃ,
evaṃ. Idaṃ asamugghātittuppannaṃ nāmāti evaṃ yojetvā vitthāretabbāṃ.

Imesu uppannesūti yathāvuttesu aṭṭhasu uppannesu. Idaṃ **na**
maggavajjhaṃ appahātabbavattuttā. **Maggavajjhaṃ** maggena
paheyyavattuttā. **Rattoti** rāgena samannāgato. Esa nayo **duṭṭho mūlhoti**
etthāpi. **Vinibaddhoti** mānasaṃyojanena virūpaṃ nibandhito. **Parāmaṭṭhoti**
diṭṭhiparāmāsenā khammasabhāvaṃ atikkamma parato āmaṭṭho.

Aniṭṭhaṅgatoti niṭṭhaṃ agato, saṃsayāpannoti attho. **Thāmagatoti**
anusayavasena daḷhataṃ upagato. **Yuganaddhāti** pahātabbappahāyakayuge
naddhā viya vattanakā ekakālikattā. **Samkilesikāti** samkilesadhammasahitā.

Pāḷiyanti paṭisambhidāpāḷiyaṃ¹. Tikālikesupi kilesesu
vāyāmābhāvadassanattamaṃ ajātapthalataruṇarukkho pāḷiyaṃ nidassito,
aṭṭhakathāyaṃ pana jāto satto asamudāhaṭakilesa nāma natthīti
“**jātapphalarukkhena dīpetabban**”ti vatvā tamattamaṃ vivarituraṃ “**yathā hī**”ti-
ādi vuttaṃ. Atha vā maggena pahīnakilesānameva atītādibhedena tidhā
navattabbataṃ pākaṭaṃ kātuṃ ajātapphalarukkhō upamāvasena pāḷiyaṃ
ābhato, atītādīnaṃ appahīnatādassanattamaṃ pi “**jātapphalarukkhena**
dīpetabban”ti aṭṭhakathāyaṃ vuttaṃ. Tattha yathā acchinne rukkhe
nibbattanārahāni phalāni chinne anuppajjamānāni kadāci sasabhāvāni
ahesuṃ, honti, bhavissanti vāti atītādibhāvena na vattabbāni, evaṃ maggena
pahīnakilesā ca daṭṭhabbā magge anuppanne uppattirahānaṃ uppanne
sabbena sabbāṃ

1. Khu 9. 394 piṭṭhe.

abhāvato. Yathā ca chede asati phalāni uppajjissantīti chedanassa sātthakatā, evaṃ maggabhāvanāya ca sātthakatā yojetabbā. **Nāpi na pajahatīti** uppajjanārahānaṃ pajahanato vuttaṃ. **Uppajjitvāti** lakkhaṇe tvā-saddo. Maggassa uppajjanakiriyāya hi samudayappahānanibbānasacchikaraṇakiriyā viya khandhānaṃ parijānanakiriyā lakkhīyati.

Tepi pajahatiyevāti ye tehi kilesehi janetabbā upādinakkhandhā, tepi pajahatiyeva tannimittassa abhisankhāraviññāṇassa nirodhanato. Tenāha “**vuttampi cetan**”ti-ādi. **Abhisankhāraviññāṇassa nirodhenāti** kammaviññāṇassa anuppattidhammatāpādanena. **Etthāti** etasmim sotaṇṇamaggaṇaṇe hetubhūte. **Eteti** nāmarūpasāññitā saṅkhārā. **Sabbabhavehi vuṭṭhātiyevātipi vadantīti** arahattamaggo sabbabhavehi vuṭṭhātiyevāti vadanti taduppattito uddham bhavūpapattiyā kilesassapi abhāvato.

Ekacittakkhaṇikattā maggassāti adhippāyena “**katham anuppannānaṃ -pa- ṭhitiyā bhāvanā hotī**”ti pucchati. Maggappavattiyāyeva ubhayakiccasiddhito āha “**maggappavattiyāyevā**”ti. **Maggo hīti**-ādinā tamattham vivarati. Anuppanno nāma vuccati, tasmā tassa bhāvanā anuppannānaṃ uppādāya bhāvanā vuttāti yojetabbā. **Vattum vaṭṭatīti** yāvatā maggassa pavattiyeva ṭhiti, tattakāneva nibbattitalokuttarāni.

398-401. Kattukamyatāchandaṃ adhipatiṃ karitvā paṭiladdhasamādhī chandasamādhīti āha “**chandaṃ nissāya pavatto samādhī chandasamādhī**”ti. **Padhānasankhārāti** catukiccasādhakassa sammappadhānavīriyassetam adhivacanaṃ. Tenāha “**padhānabhūtā saṅkhārā padhānasankhārā**”ti. Tattha **padhānabhūtāti** vīriyabhūtā. Saṅkhatasaṅkhārādinivattanattham padhānaggahaṇanti. Atha vā tam tam viśesaṃ saṅkharotīti **saṅkhāro**, sabbam vīriyam. Tattha catukiccasādhakato sesanivattanattham padhānaggahaṇanti, padhānabhūtā seṭṭhabhūtāti attho. Catubbidhassa pana vīriyassa adhippetattā bahuvacananiddeso kato. **Tehi dhammehīti** chandasamādhinā padhānasankhārehi ca. **Iddhipādanti** ettha ijjhatīti iddhi, samijjhati nipphajjatīti attho. Ijjhanti vā etāya sattā iddhā vuddhā ukkaṃsagatā hontītipi iddhi. Paṭhamenatthena iddhi eva

pādo **iddhipādo**, iddhikoṭṭhāsoti attho. Dutiyenatthena iddhiyāpādoti **iddhipādo**, pādoti patiṭṭhā, adhigamūpāyoti attho. Tena hi yasmā uparūparivisesasaṅkhātā iddhiṃ pajjanti pāpuṇanti, tasmā pādoti vuccati. Tenāha “**iddhiyā pādaṃ, iddhibhūtaṃ vā pādaṃ iddhipādan**”ti.

Atha vā **iddhipādanti** nipphattipariyāyena ijjhanaṭṭhena ijjhanti etāya sattā iddhā vuddhā ukkaṃsagatā hontīti iminā vā pariyāyena iddhīti saṅkhaṃ gatānaṃ upacārajjhānādikusalacittasampayuttānaṃ chandasamādhīpadhānaṃ saṅkhārānaṃ adhiṭṭhānaṭṭhena pādabhūtaṃ sesacittacetāsikarāsinti attho. Teneva **iddhipādavibhaṅge**¹ “iddhipādoti tathābhūtaṃ vedanākkhandho -pa- viññāṇakkhandho”ti vuttaṃ. Sā eva ca tathāvuttā iddhi yasmā heṭṭhimā heṭṭhimā uparimāya uparimāya tayo chandasamādhīppadhānaṃ saṅkhārā pādabhūtaṃ adhiṭṭhānaṃ bhūtaṃ, tasmā vuttaṃ “iddhibhūtaṃ vā pādan”ti. Tathā heṭṭhā dhammā iddhipi honti iddhipādāpi, sesā pana sampayuttakā cattāro khandhā iddhipādāyeva. Vīriyacittavīmaṃsāsamādhīppadhānaṃ saṅkhārāsaṅkhātāpi tayo tayo dhammā iddhipi honti iddhipādāpi, sesā pana sampayuttakā cattāro khandhā iddhipādāyeva.

Apica pubbabhāgo pubbabhāgo iddhipādo nāma, paṭilābho paṭilābho iddhi nāmāti veditabbā. Ayamatto upacārena vā vipassanāya vā dīpetabbo. Paṭhamajjhānaparikammaṃ hi iddhipādo nāma, paṭhamajjhānaṃ iddhi nāma. Dutiya, tatiya, catuttha, ākāsa, viññāṇa, ākiñcaṇṇāyatana, nevasaññānāsaññāyatanaṃ parikammaṃ iddhipādo nāma, nevasaññānāsaññāyatanaṃ iddhi nāma. Sotāpattimaggaṃ vipassanā iddhipādo nāma, sotāpattimaggo iddhi nāma. Sakadāgāmi, anāgāmi-arahattamaggaṃ vipassanā iddhipādo nāma, arahattamaggo iddhi nāma. Paṭilābhenapi dīpetum vaṭṭatiyeva. Paṭhamajjhānaṃ hi iddhipādo nāma, dutiyajjhānaṃ iddhi nāma. Dutiyajjhānaṃ iddhipādo nāma, tatiyajjhānaṃ iddhi nāma -pa- anāgāmimaggo iddhipādo nāma, arahattamaggo iddhi nāma.

Sesesupīti vīriyasamādhī-ādīsūpi. Tattha hi vīriyaṃ, cittaṃ, vīmaṃsaṃ adhipatiṃ karitvā paṭiladdhasamādhī vīriyasamādhī, cittasamādhī,

1. Abhi 2. 226 piṭṭhe.

vīmaṃsāsamādhīti attho veditabbo. **Chandādīsu ekanti** chandādīsu catūsu ādito vuttattā ādibhūtaṃ ekaṃ padhānaṃ chandanti adhippāyo. Tenevāha **“tadāssa paṭhamiddhipādo”**ti. **Evam sesāpī**ti etena vīriyaṃ cittaṃ vīmaṃsaṃ nissāya vipassanaṃ vaḍḍhetvā arahattaṃ pāpuṇantānaṃ vasena dutiyavīriyiddhipādādayo yojetabbāti dasseti. Iminā hi suttantena catunnaṃ bhikkhūnaṃ matthakappattaṃ kammaṭṭhānaṃ dassitaṃ. Eko hi bhikkhu chandaṃ avassayati, kattukamyatākusaladhammacchandena atthanipphattiyaṃ sati “ahaṃ lokuttaradhammaṃ nibbattessāmi, natthi mayhaṃ etassa nibbattane bhāro”ti chandaṃ jeṭṭhakaṃ chandaṃ dhuraṃ chandaṃ pubbaṅgamaṃ katvā lokuttaradhammaṃ nibbatteti. Eko vīriyaṃ avassayati, eko cittaṃ, eko paññaṃ avassayati, paññāya atthanipphattiyaṃ sati “ahaṃ lokuttaradhammaṃ nibbattessāmi, natthi mayhaṃ etassa nibbattane bhāro”ti paññaṃ jeṭṭhakaṃ paññaṃ dhuraṃ paññaṃ pubbaṅgamaṃ katvā lokuttaradhammaṃ nibbatteti.

Kathaṃ? Yathā hi catūsu amaccaputtesu ṭhānantaraṃ patthetvā vicarantesu eko upaṭṭhānaṃ avassayati, eko sūrabhāvaṃ, eko jātiṃ, eko mantāṃ. Kathaṃ? Tesu hi paṭhamo upaṭṭhāne appamādakāritāya atthanipphattiyaṃ sati labbhamānaṃ “lacchāmetaṃ ṭhānantaraṃ”ti upaṭṭhānaṃ avassayati. Dutīyo upaṭṭhāne appamattopi “ekacco saṅgāme paccupaṭṭhite saṅṭhātum na sakkoti, avassaṃ pana rañño paccanto kuppissati, tasmim kuppīte rathassa purato kammaṃ katvā rājānaṃ ārādhetvā āharāpessāmetaṃ ṭhānantaraṃ”ti sūrabhāvaṃ avassayati. Tatiyo “sūrabhāvepi sati ekacco hīnajātiko hoti, jātiṃ sodhetvā ṭhānantaraṃ dento mayhaṃ dassatī”ti jātiṃ avassayati. Catuttho “jātimāpi eko amantanīyo hoti, mantena kattabbakicce uppanne āharāpessāmetaṃ ṭhānantaraṃ”ti mantāṃ avassayati. Te sabbe pi attano attano avassayabalena ṭhānantarāni pāpuṇimsu.

Tattha upaṭṭhāne appamatto hutvā ṭhānantaraṃ patto viya chandaṃ avassāya kattukamyatākusaladhammacchandena “athanipphattiyaṃ sati ahaṃ lokuttaradhammaṃ nibbattessāmi, natthi mayhaṃ etassa nibbattane bhāro”ti chandaṃ jeṭṭhakaṃ chandaṃ dhuraṃ chandaṃ pubbaṅgamaṃ katvā lokuttaradhammanibbattako

daṭṭhabbo **raṭṭhapālatthero**¹ viya. So hi āyasmā “chande sati katham nānujānissanti”ti sattāhampi bhattāni abhuñjitvā mātāpitaro anujānāpetvā pabbajitvā chandameva avassāya lokuttaradhammaṃ nibbattesi. Sūrabhāvena rājānaṃ ārādhetvā ṭhānantaraṃ patto viya vīriyaṃ jeṭṭhakaṃ vīriyaṃ dhuraṃ vīriyaṃ pubbaṅgamaṃ katvā lokuttaradhammanibbattako daṭṭhabbo **soṇatthero**² viya. So hi āyasmā vīriyaṃ dhuraṃ katvā lokuttaradhammaṃ nibbattesi.

Jātisampattiyaṃ ṭhānantaraṃ pattoviya cittaṃ jeṭṭhakaṃ cittaṃ dhuraṃ cittaṃ pubbaṅgamaṃ katvā lokuttaradhammanibbattako daṭṭhabbo **sambhūtatthero**³ viya. So hi āyasmā cittaṃ jeṭṭhakaṃ cittaṃ dhuraṃ cittaṃ pubbaṅgamaṃ katvā lokuttaradhammaṃ nibbattesi. Mantāṃ avassāya ṭhānantaraṃ patto viya vīmaṃsaṃ jeṭṭhakaṃ vīmaṃsaṃ dhuraṃ vīmaṃsaṃ pubbaṅgamaṃ katvā lokuttaradhammanibbattako daṭṭhabbo **thero mogharāja**⁴ viya. So hi āyasmā vīmaṃsaṃ jeṭṭhakaṃ vīmaṃsaṃ dhuraṃ vīmaṃsaṃ pubbaṅgamaṃ katvā lokuttaradhammaṃ nibbattesi. Tassa hi bhagavā “suññato lokaṃ avekkhassū”ti⁵ suññatākathaṃ kathesi. Paññānissitamānaniggahatthañca dvikkhattuṃ pucchito pañhaṃ na kathesi. Ettha ca punappunaṃ chanduppādanaṃ tosaṇaṃ viya hotīti chandassa upaṭṭhānasadisatā vuttā, thāmaabhāvato vīriyassa sūratasadisatā, “chadvārādhipati rājā”ti⁶ vacanato pubbaṅgamatā cittassa viṣiṭṭhajātisadisatā.

402-406. **Attano saddhādhureti** attano saddhākicce saddahanakiriyāya. **Indaṭṭhamkāretīti** anuvattanavasena sampayuttadhammesu indaṭṭham kāreti, tasmā ādhipateyyaṭṭhena saddhā eva indiyanti **saddhindriyaṃ**. Tathā vīriyādīnaṃ sakasakakiccesūti āha “**vīriyindriyādīsipi ese va nayo**”ti. **Visodhentoti** vipakkhavivajjanasapakkanisevanasarikkhūpanissayasaṅgaṇhanalakkaṇehi tīhi kāraṇehi visodhanavasena sodhento.

Assaddhe puggale parivajjayatoti buddhādīsū pasādasinehābhāvena saddhārahite lūkhapuggale sabbaso vajjayato. **Saddhe puggale**

1. Ma 2. 244 piṭṭhe.

3. Theragāthā-Ṭṭha 2. 18 piṭṭhe.

5. Khu 1. 448; Khu 8. 180, 188 piṭṭhesu.

2. Vi 3. 267 piṭṭhe.

4. Khu 1. 447; Khu 8. 172 piṭṭhesu.

6. Dhammapada-Ṭṭha 2. 150 piṭṭhe.

Sevatoti buddhādīsu saddhādhimutte vakkalitttherasadise sevato.
Pasādanīyeti pasādāvahe sampasādanīyasuttādike¹. **Paccavekkhatoti** pālito
 atthato ca pati pati avekkhantassa cintentassa. **Visujjhatīti**
 paṭipakkhamalavigamato paccayavasena sabhāvasaṃsuddhito
 visuddhaphalanibbattito ca saddhindriyaṃ visujjhati. Esa nayo sesesupi.
Sammappadhāneti sammappadhānappaṭisaṃyutte² suttante. Esa nayo
 sesesupi. **Jhānavimokkheti** paṭhamajjhānādijjhānāni ceva
 paṭhamavimokkhādivimokkhe ca. Kāmaṃ cettha jhānāniyeva vimokkhā,
 pavatti-ākāravasena pana visuṃ gahaṇaṃ.

Gambhīraññācariyanti gambhīraṇaṃ ñāṇānaṃ pavattiṭṭhānaṃ. Tenāha
 “saṇhasukhuman”ti-ādi. **Khandhantaranti** sabhāvajātibhūmi-ādivasena
 khandhānaṃ nānattaṃ. Esa nayo sesesupi. **Akatābhīnivesoti** pubbe
 akatābhāvanābhīniveso. **Saddhādhurādīsūti** saddhādhure paññādhure ca.
Avasāneti bhāvanāpariyosāne. **Vivaṭṭetvāti** saṅkhārārammaṇato vivaṭṭetvā
 nibbānaṃ ārammaṇaṃ katvā. **Arahattaṃ gaṇhātīti** maggaparamparāya
 arahattaṃ gaṇhātīti. **Akampiyaṭṭhenāti** paṭipakkhehi akampiyabhāvena.
 Etenevassa sampayuttadhammesu thirabhāvopi vibhāvito daṭṭhabbo. Na hi
 sampayuttadhammesu thirabhāvena vinā paṭipakkhehi akampiyatā
 sambhavati. Sampayuttadhammesu thirabhāvene va hi akusalānaṃ
 abyākatānaṃ nesaṃ balavabhāvūpapatti. **Assaddhiyeti** assaddhiyahetu.
 Nimittatthe hetuṃ bhumavacanaṃ. Esa nayo sesesupi.

418. **Ādipadānanti** sati-ādipadānaṃ. **Saraṇaṭṭhenāti**
 cirakatacirabhāsitaṇaṃ anussaraṇaṭṭhena. **Upaṭṭhānalakkhaṇāti** kāyādīsu
 asubhākārādisallakkhaṇamukhena tattha upatiṭṭhanasabhāvā. Upatiṭṭhanaṃ
 ārammaṇaṃ upagantvā ṭhānaṃ, avissajjanaṃ vā ārammaṇassa.
Apilāpanalakkhaṇāti asamussanasabhāvā, udaye alābu viya ārammaṇe
 plavitvā gantuṃ appadānaṃ, pāsāṇassa viya niccalassa ārammaṇassa
 ṭhapanāṃ saraṇaṃ asammuttaṭṭhakaṇaṃ apilāpanaṃ. **Sāpateyyanti** santakaṃ.
 Apilāpanaṃ asammuttaṭṭhaṃ katori **apilāpeti**, sāyaṃ pātaṇa rājānaṃ
 issariyasampattiṃ sallakkhāpeti saretīti attho. **Kaṇhasukkasappaṭibhāge**
dhammeti kaṇhasukkasakaṇhāte sappaṭibhāge dhamme. Kaṇho hi dhammo
 sukkena,

1. Dī 3. 82 piṭṭhe.

2. Saṃ 3. 214 piṭṭhe.

sukko ca kaṇhena sappatibhāgo. **Vitthāra**-saddo ādisaddattho. Tena “ime cattāro dhammā sammappaddhānā, ime cattāro iddhipādā, imāni pañcindriyāni, imāni pañca balāni, ime satta bojjhaṅgā, ayaṃ ariyo aṭṭhaṅgiko maggo, ayaṃ samatho, ayaṃ vipassanā, ayaṃ vijjā, ayaṃ vimutti, (ime lokuttaradhammā)ti¹ evaṃ kho mahārāja apilāpanalakkhaṇā sati”ti² imaṃ pālisesaṃ saṅgaṇhāti. **Therenā**ti nāgasenattherena. So hi dhammānaṃ kiccaṃ lakkhaṇaṃ katvā dasseti “apilāpanalakkhaṇā sati, ākoṭanalakkhaṇo vitakko”ti-ādinā. Evaṃ hi dhammā subodhā hontīti. Sammosapaccanīkaṃ kiccaṃ asammoso, na sammosābhāvamattanti āha “**asammosarasā vā**”ti. Yassa dhammassa balena sampayuttadhammā ārammaṇābhimukhā bhavanti, sā sati. Tasmā sā tesāṃ ārammaṇābhimukhabhāvaṃ paccupaṭṭhāpesi, sayāṃ vā ārammaṇābhimukhabhāvena paccupaṭṭhatīti vuttaṃ “**gocarābhimukhībhāvapaccupaṭṭhānā**”ti. Sammā pasattho bojjhaṅgoti **sambojjhaṅgo**. **Bodhiyā** vakkhamānāya³ dhammasāmaggiyā, **bodhissa vā** ariyasāvakassa aṅgoti bojjhaṅgo. **Yā hī**ti-ādinā tameva saṅkhepato vuttamatthaṃ vivarati. “Yā hi ayaṃ dhammasāmaggi”ti etassa “bodhīti vuccatī”ti iminā sambandho. **Dhammasāmaggiyā**ti dhammasamūhena, yāya dhammasāmaggiyāti sambandho. **Pariṭṭhānāyūhanā oghatarāṇasuttavaṇṇanāyaṃ**⁴ “kilesavasena patiṭṭhānaṃ, abhisāṅkhāravasena āyūhanā. Taṇhāvasena patiṭṭhānaṃ, diṭṭhivasena āyūhanā. Sassatadiṭṭhiyā patiṭṭhānaṃ, ucchedadiṭṭhiyā āyūhanā. Līnavasena patiṭṭhānaṃ, uddhaccavasena āyūhanā. Kāmasukhallikānuyogavasena patiṭṭhānaṃ, attakilamathānuyogavasena āyūhanā. Sabbākusalābhisāṅkhāravasena patiṭṭhānaṃ, sabbalokiyakusalābhisāṅkhāravasena āyūhanā”ti evaṃ vuttesu sattasu pakāresu idha avuttānaṃ vasena veditabbā. **Paṭipakkkhabhūṭāyā**ti ettha līnappatiṭṭhānakāmasukhallikānuyoga-ucchedābhinivesānaṃ dhammavicayavīriyapītippadhānā dhammasāmaggi paṭipakkho, uddhaccāyūhana-attakilamathānuyogasassatābhinivesānaṃ passaddhisamādhī-upekkhāpadhānā dhammasāmaggi paṭipakkho. Sati pana ubhayatthāpi icchitabbā. Tathā hi sā “sabbatthikā”ti vuttā.

1. () Pāliyaṃ na dissati.

3. Vattamānāya (Sī)

2. Khu 11. 36 piṭṭhe.

4. Saṃ-Tīha 1. 18 piṭṭhe.

Kilesasantānaniddāya uṭṭhahatīti etena sikhāppattavipassanāya sahaḡatānampi sati-ādināṃ bojḡhaṅgabhāvaṃ dasseti. Vuṭṭhānagāminivipassanā hi kilese nirodhentī eva pavattatīti. **Cattāri vāti-**ādinā pana maggaḡhalasahaḡatānaṃ bojḡhaṅgabhāvaṃ dasseti. Sattahi bojḡhaṅgehi bhāvitehi saccappaṭivedho hotīti kathamidaṃ jānitabbanti codanaṃ sandhāyāha “**yathāhā**”ti-ādi. **Jhānaṅgapaggaṅgādayo viyāti** etena bodhibojḡhaṅga-saddānaṃ samudāyāvayavavisayataṃ dasseti. **Senāṅgarathaṅgādayo viyāti** etena puggalapaññattiyā avijḡjamānapaññattibhāvaṃ dasseti.

Bodhāya saṃvattantīti bojḡhaṅgāti kāraṇattho aṅgasaddoti katvā vuttaṃ. Bujḡhantīti bodhiyo, bodhiyo eva aṅgāni bojḡhaṅgānīti vuttaṃ “**bujḡhantīti bojḡhaṅgā**”ti. Vipassanādināṃ kāraṇādināṃ bujḡhitabbānaṃ saccānaṃ anurūpaṃ paccakkhabhāvena paṭimukhaṃ aviparītātāya sammā ca bujḡhantīti evaṃ atthavisesadīpakehi upasaggehi “**anubujḡhantī**”ti-ādi vuttaṃ. Bodhisaddo hi sabbavisesayuttabujḡhanaṃ sāmāññena saṅgaṇhāti. Saṃ-saddo paśaṃsāyaṃ suṇḡdarabhāve ca dissatīti āha “**pasattho suṇḡdaro ca bojḡhaṅgo saṃbojḡhaṅgo**”ti.

Dhamme vicinatīti **dhammavicayo**. Tattha **dhammeti** catusaccadhamme tabbinimuttassa sabhāvadhammassa abhāvato. Tato eva so **pavicayaḡalakkhaṇo**. **Obhāsanarasoti** visayobhāsanaraso. Asammuyhaṇākārena paccupaṭiṭṭhatīti **asammohapaccupaṭṭhāno**.

Vīrassa bhāvo, kammaṃ vāti **vīriyaṃ**. **Īrayitabbatoti** pavattetabbato. **Paggahaḡalakkhaṇanti** kosajḡjapakkhe patituruṃ adatvā sampayuttadhammānaṃ paggaḡhalakkhaṇaṃ. Tato eva sampayuttadhamme **upaṭṭhambhanaḡasaṃ**. **Anosīdanaṃ** asaṃsīdanaṃ.

Pīṇayatīti tappeti. Pīṇanakkiccaṇa sampayuttadhammānaṃ viya taṃsaṃuṭṭhānapaṇītarūpehi kāyassābyapanaṃ. Pharaṇapīṭivasena hetam lakkhaṇaṃ vuttaṃ, tathā **rasoti**. Udaggaḡbhāvo odagyaṃ, taṃ paccupaṭṭhapeti **odagyaḡpaccupaṭṭhānā**. ubbegaḡpīṭivasena cetam vuttaṃ.

Kāyacittadarathappaśambhanaḡatoti kāyadarathassa cittadarathassa ca paśambhanaḡato vūpaśamanaḡato. Tenāha “**upaśamaḡalakkhaṇā**”ti,

kāyacittadarathānaṃ vūpasamanalakkhaṇāti attho. **Kāyoti** cettha vedanādayo tayo khandhā. **Daratho** sārāmbho, dukkhadomanassapaccayānaṃ uddhaccādikānaṃ kilesānaṃ, tathāpavattānaṃ vā catunnaṃ khandhānametaṃ adhivacanaṃ. Darathanimmaddanena pariāhaparipphanavirahito sītibhāvo **aparipphandanasītibhāvo**.

Sammā cittaassa ṭhapanāṃ **samādhānaṃ**. **Avikkhepo** sampayuttānaṃ avikkhittatā. Yena sampayuttā avikkhittā honti, so dhammo **avikkhepo**. **Avisāro** attano eva avisaraṇabhāvo. Atha vā vikkhepappaṭipakkhatāya **avikkhepalakkhaṇo**. Nhānīyacuṇṇassa udakaṃ viya sampayuttadhammānaṃ sampiṇḍanakiccatāya avisārabhāvena lakkhitabbo **avisāralakkhaṇo**. Nivāte dīpacciṭṭhiti viya cetaso ṭhitibhāvena paccupatiṭṭhatīti **ittatṭhipaccupaṭṭhāno**.

Ajjhupekkhanatoti samappavattesu assesu sārathi viya sampayuttadhammānaṃ ajjhupekkhanato. **Paṭisaṅkhānalakkhaṇāti** majjhatabhāve ṭhatvā vīmaṃsanasaṅkhātappaṭisaṅkhānalakkhaṇā. **Samavāhitalakkhaṇāti** samaṃ avisamaṃ yathāsakakiccesu sampayuttadhammānaṃ pavattanalakkhaṇā. Udāsīnabhāvena pavattamānāpi sesasampayuttadhamme yathāsakakiccesu pavatteti, yathā rājā tuṇhī nisinnopi atthakaraṇe dhammaṭṭhe yathāsakaṃ kiccesu appamatto pavatteti. Alīnānuddhatappavattipaccayattā **ūnādhikanivāraṇarasā**¹. **Pakkhapātupacchedanarasāti** “idaṃ nihīnakiccaṃ hotu, idaṃ atirekatarakiccaṃ”ti evaṃ pakkhapātanavasena viya pavatti pakkhapāto, taṃ upacchindantī viya hotīti **pakkhapātupacchedanarasā**. Sampayuttadhammānaṃ sakasakakicce majjhatabhāvena paccupatiṭṭhatīti **majjhatabhāvapaccupaṭṭhāno**. Bojjhaṅgānaṃ uparūpari uppādanameva brūhanaṃ vaḍḍhanañcāti āha “**uppādeti**”ti.

Sati ca sampajaññaṇca **satisampajaññaṇaṃ**, satipadhānaṃ vā sampajaññaṇaṃ **satisampajaññaṇaṃ**. Taṃ sabbattha satokāribhāvāvahattā satisambojjhaṅgassa uppādāya hoti. Yathā paccanīkadhammappahānaṃ anurūpadhammasevanā ca anuppannānaṃ kusalānaṃ dhammānaṃ uppādāya hoti, evaṃ satirahitapuggalavivajjanā, satokāripuggalasevanā, tattha ca yuttatā satisambojjhaṅgassa

1. Ūnādhikatānivāraṇarasā (Sī, Ka)

uppādāya hotīti imamattham dasseti “**satisampajaññan**”ti-ādinā. **Sattasu** **ṭhānesūti** “abhikkante paṭikkante sampajānakārī hoti, ālokite vilokite sampajānakārī hoti, samīñjite pasārite sampajānakārī hoti, saṃghāṭipattacīvaradhāraṇe sampajānakārī hoti, asite pīte khāyite sāyite sampajānakārī hoti, uccārapassāvakamme sampajānakārī hoti, gate ṭhite nisinne sutte jāgarite bhāsīte tuṇhībhāve sampajānakārī hoti”¹ti evaṃ vuttetu abhikkantādīsu sattasu ṭhānesu. **Tissadattatthero** nāma yo bodhimaṇḍe suvaṇṇasālākāṃ gahetvā “aṭṭhārasasu bhāsāsu katarabhāsāya dhammam kathemī”ti parisam padhāresi. **Abhayattheroti** dattābhayattheramāha. **Abhinivesanti** vipassanābhinivesam.

Paripucchakatāti pariyogāhetvā pucchakabhāvo. Ācariye payirupāsītva pañcapi nikāye saha aṭṭhakathāya pariyogāhetvā yaṃ yaṃ tattha gaṇṭhiṭṭhānabhūtam, tam tam “idaṃ bhante katham, imassa ko attho”ti khandhāyatanādi-attham pucchantassa hi dhammavicayasambojjhaṅgo uppajjati. Tenāha “**khandhadhātu -pa- bahulatā**”ti.

Vatthuvisadakiriyāti ettha cittacetasikānam pavattiṭṭhānabhāvato sarīram tappaṭibaddhāni cīvarādīni ca vatthūnīti adhippetāni. Tāni yathā cittassa sukhāvahāni honti, tathā karaṇam tesam visadakiriyā. Tenāha “**ajjhattikabāhirānan**”ti-ādi. **Ussannadosanti** vātapittādivasena upacitadosam. **Sedamalamakkhanti** sedena ceva jallikāsaṅkhātena sarīramalena ca makkhitam. **Ca**-saddena aññampi sarīrassa pīlavaham accāsanādim saṅgaṇhāti. **Senāsanam vāti vā**-saddena malaggahitapattādīnam² saṅgato daṭṭhabbo. **Paribhaṇḍakaraṇādīhīti ādi**-saddena pattapacanādīnam saṅgaho daṭṭhabbo. **Avisadeti** vatthumhi avisade sati, visayabhūte vā. Katham bhāvanamanuyuttassa tāni ajjhattikabāhiravatthūni visayo? Antarantarā pavattanakacittuppadavaseneva vuttam. Te hi cittuppadā cittekaggatāya aparisuddhabhāvāya samvattanti. **Cittacetasikesūti** nissayādipaccayabhūtesu cittacetasikesu. **Ñāṇampīti api**-saddo sampiṇḍanattho. Tena “na kevalam vatthueva, atha kho tasmim aparisuddhe ñāṇampi

1. Dī 2. 233; Ma 1. 72 piṭṭhesu.

2. Malaggahitavatthādīnam (Sī)

aparissuddham hoti”ti nissayāparissuddhiyā taṃnissitāparissuddhi viya visayassa aparissuddhatāya visayino aparissuddhim dasseti.

Samabhāvakaraṇanti kiccato anunādhikabhāvakaraṇam. **Saddhindriyaṃ balavaṃ hoti**, saddheyyavatthusmiṃ paccayavasena adhimokkhakiccassa paṭutarabhāvena paññāya avisadatāya vīriyādīnaṃ sithilatādīnā saddhindriyaṃ balavaṃ hoti. Tenāha “**itarāni mandāni**”ti. **Tatoti** tasmā, saddhindriyassa balavabhāvato itaresaṃca mandattāti attho. Kosajjapakkhe patitum adatvā sampayuttadhammānaṃ paggaṇhanaṃ anubalappadānaṃ paggaho. Paggahova kiccaṃ **paggahakiccaṃ**. Kātuṃ na sakkotīti ānetvā sambandhitabbaṃ. Ārammaṇaṃ ugapantvā ṭhānaṃ, anissajjanaṃ vā **upaṭṭhānaṃ**. Vikkheppapaṭipakkho, yena vā sampayuttā avikkhittā honti, so **avikkhepo**. Rūpagataṃ viya cakkhunā yena yāthāvato visayasabhāvaṃ passati, taṃ **dassanakiccaṃ kātuṃ na sakkoti** balavatā saddhindriyena adhibhūtattā. Sahajātadhammesu hi indaṭṭhaṃ kārentānaṃ sahapavattamānānaṃ dhammānaṃ ekadesatāvaseneva¹ atthasiddhi, na aññathā. **Tasmāti** vuttamevatthaṃ kāraṇabhāvena paccāmasati. **Tanti** saddhindriyaṃ. **Dhammasabhāvapaccavekkhaṇenāti** yassa saddheyyassa vatthuno uḷaratādiguṇe adhimuccanassa sātisayappavattiyā saddhindriyaṃ balavaṃ jātāṃ, tassa paccayapaccayuppannatādivibhāgato yāthāvato vīmaṃsanena. Evaṃ hi evaṃdhammatānayaena yāthāvasarasato pariggayhamāne savipphāro adhimokkho na hoti “ayaṃ imesaṃ dhammānaṃ sabhāvo”ti parijānanaśasena paññābyāpārassa sātisayattā. Dhuriyadhammesu hi yathā saddhāya balavabhāve paññāya mandabhāvo hoti, evaṃ paññāya balavabhāve saddhāya mandabhāvo hoti. Tena vuttaṃ “**taṃ dhammasabhāvapaccavekkhaṇena hāpetabbaṃ**”ti.

Tathā amanasikārenāti yenākārena bhāvanamanuyuñjantassa saddhindriyaṃ balavaṃ jātāṃ, tenākārena bhāvanāya ananuyuñjanatoti vuttaṃ hoti. Idha duvidhena saddhindriyassa balavabhāvo attano vā paccayavisesena kiccuttariyato vīriyādīnaṃ vā mandakiccatāya. Tattha paṭhamavikappe hāpanavidhi dassito, dutiyavikappe pana yathā manasikaroto vīriyādīnaṃ mandakiccatāya saddhindriyaṃ balavaṃ jātāṃ, tathā amanasikārena

1. Ekarasatāvaseneva (Ka)

vīriyādīnaṃ paṭukiccabhāvāvahena manasikārena saddhindriyaṃ tehi samarasam karontena hāpetabbanṃ. Iminā nayena sesindriyesupi hāpanavidhi veditabbo.

Vakkalitttheravatthūti so hi āyasmā saddhādhimuttatāya katādhikāro satthu rūpadassanappasuto eva hutvā viharanto satthārā “kim te vakkali iminā pūtikāyena diṭṭhena, yo kho vakkali dhammaṃ passati, so maṃ passatī”ti-ādinā¹ nayena ovaditvā kammaṭṭhāne niyojitopi taṃ ananuyuñjanto paṇāmito attānaṃ vinipātetum papātaṭṭhānaṃ abhiruhi. Atha naṃ satthā yathānisinnova obhāsavissajjanena attānaṃ dassetvā—

“Pāmojjabahulo bhikkhu, pasanno buddhasāsane.

Adhigacche padaṃ santaṃ, saṅkhārūpasamaṃ sukhaṃ”ti²—

gāthaṃ vatvā “ehi vakkalī”ti āha. So teneva amatena abhisitto haṭṭhatuṭṭho hutvā vipassanaṃ paṭhapesi, saddhāya pana balavabhāvena vipassanāvīthim na otari. Taṃ ñatvā bhagavā tassa indriyasamattappaṭipādanāya kammaṭṭhānaṃ sodhetvā adāsi. So satthārā dinnanaye ṭhatvā vipassanaṃ ussukkāpetvā maggappaṭipāṭiyā arahattaṃ pāpuṇi. Tena vuttaṃ “**vakkalitttheravatthu cettha nidassanan**”ti. **Etthā**ti saddhindriyassa adhimattabhāve sesindriyānaṃ sakiccākaraṇe. **Itarakiccabhedanti** upaṭṭhānādikiccavisesaṃ. **Passaddhādīti ādi**-saddena samādhī-
upekkhāsambojjhaṅgānaṃ saṅgaho. **Hāpetabbanti** yathā saddhindriyassa balavabhāvo dhammasabhāvapaccavekkhaṇena hāyati, evaṃ vīriyindriyassa adhimattatā passaddhi-ādibhāvanāya hāyati samādhīpakkhiyattā tassā. Tathā hi samādhindriyassa adhimattataṃ kosajjapātato rakkhantī vīriyādibhāvanā viya vīriyindriyassa adhimattataṃ uddhaccapātato rakkhantī passaddhādibhāvanā ekamsato hāpeti. Tena vuttaṃ “**passaddhādibhāvanāya hāpetabban**”ti.

Soṇattherassa vatthūti sukhumālasonattherassa vatthu. So hi āyasmā satthu santike kammaṭṭhānaṃ gahetvā sītavane viharanto “mama sarīraṃ sukhumālaṃ, na ca sakkā sukheva sukhaṃ adhigantum, kilametvāpi

1. Sam 2. 98 piṭṭhe.

2. Khu 1. 68 piṭṭhe.

samaṇadhammo kātabbo”ti ṭhānacaṅkamameva adhiṭṭhāya padhānamanuyuñjanto pādatalesu phoṭesu uṭṭhitesupi vedanaṃ ajjhupekkhitvā dāḥavīriyaṃ karonto accāraddhavīriyatāya visesaṃ nibbattetuṃ nāsakkhi. Satthā tattha gantvā viñūpamovādena ovaditvā vīriyasamatāyojanavidhiṃ dassento kammaṭṭhānaṃ visodhetvā gijjhakūṭaṃ gato. Theropi satthārā dinnanayena vīriyasamataṃ yojetvā bhāvento vipassanampi ussukkāpetvā arahatte patiṭṭhāsi. Tena vuttaṃ **“soṇattherassa vatthu dassetabban”**ti. **Sesesupīti** satisamādhipaṇṇindriyesupi.

Samatanti saddhāpaṇṇānaṃ aññamaññaṃ anūnādhikabhāvaṃ, tathā samādhivīriyaṇaṃ. Yathā hi saddhāpaṇṇānaṃ visum dhuriyadhammabhūtaṇaṃ kiccato aññamaññānavattanaṃ visesato icchitabbaṃ, yato nesaṃ samadhuratāya appanā sampajjati, evaṃ samādhivīriyaṇaṃ kosajjuddhacapakkhikānaṃ samarasatāya sati aññamaññūpatthambhanato sampayuttadhammaṇaṃ antadvayapātābhāvena sammadeva appanā ijjhati. **Balavasaddhoti**—ādi byatirekamukhena vuttassevatthassa samatthanaṃ. Tassattho—yo balavatiyā saddhāya samannāgato avisadaññaṃ, so mudhappasanno hoti, na aveccappasanno. Tathā hi avatthusmiṃ pasīdati seyyathāpi titthiyasāvakā. **Kerāṭakapakkhanti** sāṭheyyapakkaṃ bhajati. Saddhāhīnāya paṇṇāya atidhāvanto “deyyavatthupariccāgena vinā cittuppādamattenapi dānamayaṃ puññaṃ hoti”ti—ādini parikappeti hetuppaṭirūpakehi vañcito, evaṃbhūto sukkhatakkaviluttacitto paṇḍitaṇaṃ vacanaṃ nādiyati, saññattim¹ na gacchati. Tenāha **“bhesajjasamuṭṭhito viya rogo atekiccho hoti”**ti. Yathā cettha saddhāpaṇṇānaṃ aññamaññaṃ samabhāvo atthāvaho, anattāvaho visamabhāvo, evaṃ samādhivīriyaṇaṃ aññamaññaṃ avikkhepāvaho samabhāvo, itaro vikkhepāvaho cāti **kosajjaṃ abhibhavati**, tena appanaṃ na pāpuṇātīti adhippāyo. **Uddhaccaṃ abhibhavatīti** etthāpi eseṇa nayo. **Taṃ ubhayanti** saddhāpaṇṇādvayaṃ samādhivīriyadvayaṇca. **Samaṃ kattabbanti** samarasaṃ kātabbaṃ.

Samādhikammikassāti samathakammaṭṭhānikassa. **Evanti** evaṃ sante, saddhāya thokaṃ balavabhāve satīti attho. **Saddahantoti** “pathavī pathavīti

manasikaraṇamattena kathaṃ jhānuppattī”ti acintetvā “addhā sammāsambuddhena vuttavidhi ijjhissatī”ti saddahanto saddhaṃ janento. **Okappentoti** ārammaṇaṃ anuppavisitvā viya adhimuccanavasena avakappento pakkhandanto. **Ekaggaṭā balavatī vaṭṭati** samādhippadhānattā jhānassa. **Ubhinnanti** samādhipaññānaṃ. Samādhikammikassa samādhino adhimattatā viya paññāya adhimattatāpi icchitabbāti āha “**amatāyapi**”ti, samabhāvenapīti attho. **Appanāti** lokiya-appanā. Tathā hi “**hotiyeva**”ti sāsāṅkaṃ vadati. Lokuttarappanā pana tesaṃ samabhāveneva icchitā. Yathāha “samathavipassanaṃ yuganaddhaṃ bhāvetī”ti¹.

Yadi visesato saddhāpaññānaṃ samādhivīriyānañca amatāva icchitā, kathaṃ satīti āha “**sati pana sabbattha balavatī vaṭṭati**”ti. **Sabbatthāti** līnuddhaccapakkhikesu pañcasu indriyesu. Uddhaccapakkhike gaṇhanto “**saddhāvīriyapaññānaṃ**”ti āha. Aññathāpīti ca gahetabbā siyā. Tathā hi **kosajjapakkhikena ca samādhinā**-icceva vuttaṃ, na “passaddhisamādhīupekkhāhī”ti. **Sāti** sati. Sabbesu rājakammesu niyutto **sabbakammiko**. **Tenāti** tena sabbattha icchitabbatthena kāraṇena. **Āha** aṭṭhakathāyaṃ. Sabbattha niyuttā **sabbatthikā** sabbattha līne uddhate ca citte icchitabbattā, sabbena vā līnuddhaccapakkhiyena bojjaṅgagagaṇena atthetabbāti sabbatthā, sāva **sabbatthikā**. **Cittanti** kusalacittaṃ. Tassa hi **satipaṭisaraṇaṃ** parāyaṇaṃ appattassa pattiyā anadhigatassa adhigamāya. Tenāha “**ārakkhapaccupaṭṭhānā**”ti-ādi.

Khandhādibhedesu anogaḷhapaññānanti pariyaṭṭibāhusaccavasenapi khandhāyatanādisu appaṭiṭṭhitabuddhīnaṃ. Bahussutasevanā hi sutamayaññānavahā. Taruṇavipassanāsamaṅgīpi bhāvanāmayaññāṇe ṭhitattā ekaṃsato paññāvā eva nāma hotīti āha “**samapaññāsa -pa-puggalasevanā**”ti. Ñeyyadhammassa gambhīrabhāvavāsena tapparicchedakaññāṇassa gambhīrabhāvaggahaṇanti āha “**gambhīresu khandhādisu pavattāya gambhīrapaññāyā**”ti. Taṃ hi ñeyyaṃ tādīsāya paññāya caritabbato gambhīraññānacariyaṃ. Tassā vā paññāya tattha pabhedato pavatti gambhīraññānacariyā, tassā paccavekkhaṇāti āha “**gambhīrapaññāya pabhedapaccavekkhaṇā**”ti.

1. Ma 2. 127; Aṃ 1. 475; Khu 9. 288 piṭṭhesu.

Pañcavidhabandhanakammakāraṇaṃ niraye nibbattasattassa yebhuyyena sabbapaṭhamam karontīti devadūtasuttādīsu ādito vuttattā ca āha “**pañcavidhabandhanakammakāraṇato paṭṭhāyā**”ti. **Sakaṭavahanādikā**leti **ādi**-saddena tadanñam manussehi tiracchānehi ca vibādhitabbakālam saṅgaṇhāti. **Ekaṃ buddhantaranti** idaṃ aparāparesu petesuyeva uppajjanakasattavasena vuttaṃ, ekaccānam vā petānam ekaccatiracchānānam viya dīghāyukatā siyāti tathā vuttaṃ. Tathā hi kālo nāgarājā catunnam buddhānam sammukhībhāvaṃ labhitvā ṭhitopi metteyyassapi bhagavato sammukhībhāvaṃ labhissatīti vadanti, yatassa kappāyukatā vuttā.

Evaṃ ānisaṃsadassāvinoti vīriyāyatto eva sabbo lokiyo lokuttaro ca viśesādhigamoti evaṃ vīriye ānisaṃsadassanasīlassa. **Gamanavīthinti** sapubbabhāgaṃ nibbānagāmini paṭipadam, saha vipassanāya ariyamaggappaṭipāṭi, sattavisuddhiparamparā vā. Sā hi “bhikkhuno vaṭṭaniyyānāya gantabbā paṭipajjitabbā paṭipadā”ti katvā gamanavīthi nāma.

Kāyadaḥhībahuloti yathā tathā kāyassa daḥhīkammappasuto. **Piṇḍapātanti** raṭṭhapiṇḍam. Paccayadāyakānam attani kārassa attano sammāpaṭipattiyā mahapphalabhāvassa karaṇena piṇḍassa bhikkhāya paṭipūjanā **piṇḍapātāpacāyanam**.

Nīharantoti pattatthavikato nīharanto. **Tam saddam sutvāti** tam upāsikāya vacanam paṇṇasālādvāre ṭhitova pañcābhiññatāya dibbasotena sutvā. Manussasampatti dibbasampatti nibbānasampattīti imā **tisso sampattiyo**. **Dātuṃ sakkhissasīti** tayi katena dānamayena veyyāvaccamayena ca puññakammena khattavisesabhāvūpagamanena aparāparam devamanussānam sampattiyo ante nibbānasampattiñca dātuṃ sakkhissasīti thero attānam pucchati. **Sitaṃ karontoti** “akiccheneva mayā vaṭṭadukkham samatikkantan”ti paccavekkhaṇāvasāne sañjātapāmojjavasena sitaṃ karonto.

Nipparissayakāloti nirupaddavakālo, tadā bhikkhusaṃghassa sulabhā paccayā hontīti paccayahetukā cittapīlā natthīti adhippāyo.

Passantānamyevāti anādare sāmivacanam. **Khīradhenunti** khīradāyikaṃ

dhenum. **Kiñcideva katvāti** kiñcideva bhatikammaṃ katvā.
Ucchuyantakammanti ucchuyantasālāya kātabbhaṃ kiccaṃ. **Tameva**
magganti upāsakena paṭipannamaggaṃ. **Upakatthāyāti** āsannāya.
Vippaṭipannanti jātiddhammakuladhammādilaṅghanena asammāpaṭipannaṃ.
Evanti yathā asammāpaṭipanno putto tāya eva asammāpaṭipattiyā
kulasantānato bāhiro hutvā pitu santikā dāyajjassa na bhāgī, evaṃ **kusītopi**
teneva kusītabhāvena na sammāpaṭipanno satthu santikā laddhabba-
ariyadhanadāyajjassa na bhāgī. **Āraddhavīriyova labhati**
sammāpaṭipajjanato. Uppajjati vīriyasambojjhaṅgoti yojanā, evaṃ sabbattha.

Mahāti sīlādiguṇehi mahanto vipulo anaññasādhāraṇo. Taṃ panassa
guṇamahattaṃ dasasahassilokadhātukampanena loke pākaṇanti dassento
“**satthuno hi**”ti-ādimāha.

Yasmā satthusāsane pabbajitassa pabbajjūpagamanena
sakyaputtiyabhāvo sañjāyati, tasmā buddhaputtabhāvaṃ dassento
“**asambhinnāyā**”ti-ādimāha.

Alasānaṃ bhāvanāya nāmamattampi ajānantānaṃ kāyadalhībahulānaṃ
yāvadatthaṃ bhuñjitvā seyyasukhādi-anuyuñjanakānaṃ tiracchānagatikānaṃ
puggalānaṃ dūrato vajjanā **kusītapuggalaparivajjanāti** āha “**kucchimpūretvā**
ṭhita-ajagarasadiṣe”ti-ādi. “Divasaṃ caṅkamaṇaṃ nisajjāya āvaraṇīyehi
dhammehi cittaṃ parisodhessāmā”ti-ādinā bhāvanārambhavasena
āraddhavīriyānaṃ dalhaparakkamānaṃ kālena kālaṃ upasaṅkamanā
āraddhavīriyapuggalasevanāti āha “**āraddhavīriye**”ti-ādi. **Visuddhimagge**¹
pana jātimahattapaccavekkhaṇā sabrahmacārimahattapaccavekkhaṇāti idaṃ
dvayaṃ na gahitaṃ, thinamiddhavinodanā
sammappadhānapaccavekkhaṇatāti idaṃ dvayaṃ gahitaṃ. Tattha
ānisaṃsadassāvitāya eva sammappadhānapaccavekkhaṇā gahitā hoti
lokiyalokuttaravisesādhigamassa vīriyāyattatādassanabhāvato,
thinamiddhavinodanaṃ pana tadadhimuttatāya eva gahitaṃ hoti.
Vīriyuppādane yuttappayuttassa thinamiddhavinodanaṃ atthasiddhamevāti.

1. Visuddhi 1. 129 piṭṭhe.

Tattha thinamiddhavinodana kusītapuggalaparivajjana
 āraddhavīriyapuggalasevana
 tadadhimuttatāpaṭipakkhavidhamanapaccayūpasamhārasena
 apāyabhayapaccavekkhaṇādayo samuttejanavasena vīriyasambojjhaṅgassa
 uppādakā daṭṭhabbā.

Buddhānussatiyā upacārasamādhiniṭṭhattā vuttaṃ “**yāva upacārā**”ti.
Sakalasarīraṃ pharamānoti pītisamuṭṭhānehi paṇītarūpehi sakalasarīraṃ
 pharamāno, dhammasaṅghaguṇe anussarantassapi yāva upacārā
 sakalasarīraṃ pharamāno pītisambojjhaṅgo uppajjatīti evaṃ sesa-anussatīsu,
 pasādanīyasuttantapaccavekkhaṇāya ca yojetabbaṃ tassāpi
 vimuttāyatanabhāvena taggatikattā. **Evarūpe kāleti** “dubbhikkhabhayādīsū”ti
 vuttakāle. **Samāpatti -pa- na samudācarantīti** idaṃ upasamānussatiyā vasena
 vuttaṃ. Saṅkhārānaṃ hi vasena sappadesavūpasamepi nippadesavūpasame
 viya tathā saññāya¹ pavattito bhāvanāmanasikāro
 kilesavikkhambhanasamattho hutvā upacārasamādhim āvahanto
 tathārūpapītisomanassasamannāgato pītisambojjhaṅgassa uppādāya hotīti.
 Tattha “**vikkhambhitā kilesā**”ti paṭho. **Na samudācarantīti iti-saddo**
 kāraṇattho. Yasmā na samudācaranti, tasmā taṃ nesaṃ asamudācāraṃ
 paccavekkhantassāti yojanā. Na hi kilese paccavekkhantassa bojjhaṅguppatti
 yuttā, pasādanīyesu ṭhānesu pasādasinehābhāvena lūkhahadayatāya lūkhatā.
 Sā tattha ādaragāravākaraṇena viññāyatīti āha “**asakkaccakiriyāya**
samsūcitalūkhabhāve”ti.

Paṇītabhojanasevanatāti paṇītasappāyabhojanasevanatā. **Utu-**
iriyāpathasukhaggahaṇena sappāya-utu-iriyāpathaggahaṇaṃ daṭṭhabbaṃ.
 Taṃ hi tividhampi sappāyaṃ seviyamānaṃ kāyassa kalyatāpādanavasena
 cittassa kalyataṃ āvahantaṃ duvidhāyapi passaddhiyā kāraṇaṃ hoti.
 Ahetukasattesu labbhamānaṃ² sukhadukkhanti ayameko anto,
 issarādivisamahetukanti pana ayaṃ dutiyo. Ete ubho ante anupagamma
 yathāsakaṃ kammunā hotīti ayaṃ majjhimā paṭipatti. Majjhatto payogo
 yassa so majjhattapayogo, tassa bhāvo **majjhattapayogatā**. Ayaṃ hi
 sabhāvāsāraddhatāya taṃpassaddhakāyatāya³ kāraṇaṃ hoti,

1. Paññāya (Ka)

2. Labhamānaṃ (Sī, Ka)

3. Pahānasāraddhakāyatāsāṅkhātapassaddhakāyatāya (Sam-Ṭī 2. 438 piṭṭhe)

passaddhidvayaṃ āvahati. Eteneva sāraddhakāyapuggalaparivajjana passaddhakāyapuggalasevanānaṃ tadāvahanatā samvaṇṇitāti daṭṭhabbaṃ.

Vatthuvisadakiriyaṃ indriyasamattappaṭipādanā ca paññāvahā vuttā, samādhānāvahāpi tā honti. Samādhānāvahabhāveneva paññāvahabhāvatoti vuttaṃ “**vatthuvisada -pa- veditabbā**”ti.

Kāraṇakosallabhāvanākosallānaṃ nānantariyabhāvato rakkhanākosallassa ca taṃmūlakattā “**nimittakusalatā nāma kasiṇanimittassa uggahakusalatā**” icceva vuttaṃ. **Kasiṇanimittassā**ti ca nidassanamattaṃ daṭṭhabbaṃ. Asubhanimittādikassapi hi yassa kassaci jhānuppattinimittassa uggahakosallaṃ nimittakusalatā evāti. **Atisithilavīriyatādīhīti ādi-**saddena paññāpayogamandataṃ payogavekallaṇca saṅgaṇhāti. **Tassa paggaṇhananti** tassa līnassa cittassa dhammavicayasambojjhaṅgādisamuṭṭhāpanena layāpattito samuddharaṇaṃ. Vuttaṃ hetuṃ bhagavatā—

“Yasmiṃ ca kho bhikkhave samaye līnaṃ cittaṃ hoti, kālo tasmiṃ samaye dhammavicayasambojjhaṅgassa bhāvanāya, kālo īriyasambojjhaṅgassa bhāvanāya, kālo pītisambojjhaṅgassa bhāvanāya. Taṃ kissa hetu? Līnaṃ bhikkhave cittaṃ, taṃ etehi dhammehi usamuṭṭhāpayāṃ hoti. Seyyathāpi bhikkhave puriso parittaṃ aggim ujjaletukāmo assa, so tattha sukkhāni ceva tiṇāni pakkhipeyya, sukkhāni ca gomayāni pakkhipeyya, sukkhāni ca kaṭṭhāni pakkhipeyya, ukhavātaṇca dadeyya, na ca paṃsukena okireyya, bhabbo nu kho so puriso parittaṃ aggim ujjaletunti. Evaṃ bhante”ti¹.

Ettha ca yathāsakaṃ āhārasena dhammavicayasambojjhaṅgādīnaṃ bhāvanā samuṭṭhāpanāti veditabbā, sā anantaraṃ vibhāvitā eva.

Accāraddhavīriyatādīhīti ādi-saddena paññāpayogabalavataṃ pamoduppilāpanaṇca saṅgaṇhāti. **Tassa niggaṇhananti** tassa uddhatassa cittassa samādhisambojjhaṅgādisamuṭṭhāpanena uddhatāpattito nisedhanaṃ. Vuttampi cetuṃ bhagavatā—

1. Saṃ 3. 99 piṭṭhe.

“Yasmim ca kho bhikkhave samaye uddhataṃ cittaṃ hoti, kālo tasmim samaye passaddhisambojjhaṅgassa bhāvanāya, kālo samādhisambojjhaṅgassa bhāvanāya, kālo upekkhāsambojjhaṅgassa bhāvanāya. Taṃ kissa hetu? Uddhataṃ bhikkhave cittaṃ, taṃ etehi dhammehi suvūpasamaṃ hoti. Seyyathāpi bhikkhave puriso mahantaṃ aggikkhandhaṃ nibbāpetukāmo assa, so tattha allāni ceva tiṇāni pakkhipeyya, allāni ca gomayāni nikkhipeyya, allāni ca kaṭṭhāni pakkhipeyya, mukhavātaṇca na dadeyya, paṇsukena ca okireyya, bhabbo nu kho so puriso mahantaṃ aggikkhandhaṃ nibbāpetunti. Evaṃ bhante”ti¹.

Etthāpi yathāsakaṃ āhārasena passaddhisambojjhaṅgādīnaṃ bhāvanā samuṭṭhāpanāti veditabbā. Tattha passaddhisambojjhaṅgassa bhāvanā vuttā eva, samādhisambojjhaṅgassa vuccamānā, itarassa anantaraṃ vakkhati.

Paññāpayogamandatāyāti paññābyāpārassa appakabhāvena. Yathā hi dānaṃ alobhappadhānaṃ, sīlaṃ adosappadhānaṃ, evaṃ bhāvanā amohappadhānā. Tattha yadā paññā na balavatī hoti, tadā bhāvanā pubbenāparaṃ visesāvahā na hoti. Anabhisankhato viya āhāro purisassa, yogino cittassa abhiruciṃ na janeti, tena taṃ nirassādaṃ hoti. Tathā bhāvanāya sammadeva avīthipaṭipattiyā upasamasukhaṃ na vindati, tenapi cittaṃ nirassādaṃ hoti. Tena vuttaṃ **“paññāpayoga -pa- nirassādaṃ hoti”**ti. Tassa saṃveguppādanaṃ pasāduppādanaṇca tikicchananti taṃ dassento **“aṭṭha saṃvegavatthūnī”**ti-ādimāha. Tattha jātijarābyādhimaraṇāni yathārahaṃ sugatiyaṃ duggatiyaṇca hontīti tadaññameva pañcavidhabandhanādikhuppiśādi-aññamaññaviheṭhanādihetukaṃ apāyadukkhāṃ daṭṭhabbaṃ. Tayidaṃ sabbāṃ tesaṃ tesaṃ sattānaṃ paccuppannabhavanissitaṃ gahitanti atīte anāgate ca kāle vaṭṭamūlakadukkhāni viṣuṃ gahitāni. Ye pana sattā āhārūpajīvino, tattha ca uṭṭhānaphalūpajīvino, tesaṃ aññehi asādhāraṇajīvitadukkhāṃ aṭṭhamāṃ saṃvegavatthu gahitanti daṭṭhabbaṃ. **Ayaṃ vuccati samaye sampahaṃsanatāti** ayaṃ bhāvanācittassa sampahaṃsitabbasamaye vuttanayeneva

1. Saṃ 3. 100 piṭṭhe.

saṁvegajananavasena ceva pasāduppādanavasena ca sammadeva pahamsanā, saṁvegajananapubbakapasāduppādanena tosanāti attho.

Sammāpaṭipattiṃ āgammāti līnuddhaccavirahena samathavīthipaṭipattiyā ca sammā avisamaṃ sammadeva bhāvanāpaṭipattiṃ āgamma. **Alīnanti**-ādīsu kosajjapakkihiyānaṃ dhammānaṃ anadhimattatāya **alīnaṃ**, uddhaccapakkhikānaṃ anadhimattatāya **anuddhataṃ**, paññāpayogasampattiyā upasamasukhādhigamena ca **anirassādaṃ**, tato eva ārammaṇe **samappavattaṃ samathavīthipaṭipannaṃ**. Alīnānuddhatāhi vā ārammaṇe **samappavattaṃ**, anirassādatāya **samathavīthipaṭipannaṃ**. Samappavattiyā vā **alīnaṃ anuddhataṃ**, samathavīthipaṭipattiyā **anirassādanti** datṭhabbāṃ. Tattha alīnatāya **paggāhe**, anuddhatatāya **niggahe**, anirassādatāya **sampahānsane** na byāpāraṃ āpajjati. **Ayaṃ vuccati samaye ajjhupekkhanatā**ti ayaṃ ajjhupekkhitabbasamaye bhāvanācittassa paggahaniggahasampahānsanesu byāvaṭatāsāṅkhātāṃ paṭipakkhaṃ abhibhuyya ajjhupekkhanā vuccati. Paṭipakkhavikkhambhanato vipassanāya adhiṭṭhānabhāvūpagamanato ca upacārajjhānampi samādhānakiccanipphattiyā puggalassa samāhitabhāvasādhanamevāti tattha samadhurabhāvenāha **“upacāraṃ vā appanaṃ vā”**ti. **Esa uppajjati**ti esa samādhisambojjhaṅgo anuppanno uppajjati.

Anurodhavirodhappahānavasena majjhatabhāvo upekkhāsambojjhaṅgassa kāraṇaṃ tasmīṃ sati sijjhanato, asati ca asijjhanato, so ca majjhatabhāvo visayavasena duvidhoti āha **“sattamajjhattatā saṅkhāramajjhattatā”**ti. Tadubhayena ca virujjhanāṃ passaddhisambojjhaṅgabhāvanāya eva dūrīkatanti anurujjhanasseva pahānavidhiṃ dassetuṃ **“sattamajjhattatā”**ti-ādi vuttaṃ. Tenāha **“sattasaṅkhārakelāyanapuggalaparivajjanatā”**ti. Upekkhāya hi visesato rāgo paṭipakkho. Tathā cāha **“upekkhā rāgabahulassa visuddhimaggo”**ti¹. **Dvīhākārehī**ti kammassakatāpaccavekkhaṇaṃ attasuññatāpaccavekkhaṇanti imehi dvīhi kāraṇehi. **Dvīhevāti** avadhāraṇaṃ saṅkhyāsamānatādassanattamaṃ. Saṅkhyā eva hettha samānā, na saṅkhyeyyaṃ sabbathā samānanti. **Assāmikabhāvo** anattaniyatā. Sati hi attani tassa kiñcanabhāvena cīvaraṃ aññaṃ vā kiñci attaniyaṃ nāma siyā,

1. Visuddhi 1. 314 piṭṭhe.

so pana koci natthevāti adhippāyo. **Anaddhaniyanti** na addhānakkhamam, na ciraṭṭhāyī ittaram aniccanti attho. **Tāvakālikanti** tasseva vevacanam.

Mamāyatīti mamattam karoti, mamāti tañhāya pariggayha tiṭṭhati.
Dhanāyantāti dhanam dabbam¹ karontā.

419. **Sammādassanalakkhaṇā**ti sammā aviparītam
aniccādivasenadassanasabhāvā. **Sammā-abhiniropanalakkhaṇoti** sammadeva
ārammaṇe cittassa abhiniropanasabhāvo. Caturāṅgasamannāgatā vācā janam
saṅgaṇhātīti tabbipakkhaviratisabhāvā sammāvācā
bheda-karamicchāvācāpahānena jane sampayutte ca pariggaṇhana kiccavatī
hotīti **“pariggahalakkhaṇā”**ti vuttā. Viśamvādanādikiccatāya hi lūkhānam
apariggāhakānam musāvādādīnam paṭipakkhabhūtā siniddhabhāvena
pariggahaṇasabhāvā sammājappanakiccā sammāvācā
tappaccayasubhāsitasamapaṭiggāhake jane sampayuttadhamme ca
pariggaṇhantī pavattatīti **pariggahalakkhaṇā**. Yathā
cīvarakammādippayogasaṅkhāto kammanto kātabbam cīvararajanādikaṁ
samuṭṭhāpeti nipphādeti, taṁtaṁkiriyaṇipphādako vā cetanāsaṅkhāto
kammanto hatthacalanādikaṁ kiriyaṁ samuṭṭhāpeti, evaṁ
sāvajjakattabbakiriyaṇasamuṭṭhāpakamicchākammantappahānena
sammākammanto niravajjassa kattabbassa niravajjākārena
samuṭṭhāpanakiccavā hotīti āha **“sammāsamuṭṭhāpanalakkhaṇo”**ti.
Sampayuttadhammānam vā ukkhipanam **samuṭṭhāpanam** kāyikakiriyaṇa
bhārukkhipanam viya. **Sammāvodāpanalakkhaṇoti** jīvamānassa puggalassa,
sampayuttadhammānam vā jīvitindriyavuttiyā, ājīvasseva vā sammadeva
sodhanam vādāpanam lakkhaṇam etassāti sammāvodāpanalakkhaṇo. Atha
vā kāyavācānam khandhasantānassa ca saṁkilesabhūtamicchā-
ājīvappahānena sammā-ājīvo **“vodāpanalakkhaṇo”**ti vutto.
Sammāvāyāmasatisamādhīsu vattabbam heṭṭhā vuttameva.

Paññāya kusalānam dhammānam pubbaṅgamabhāvato sabbepi akusalā
dhammā tassā paṭipakkhāvāti vuttam **“aññehipi attano paccanīkakilesehi
saddhin”**ti. Atha vā **attano paccanīkakilesā** diṭṭhekaṭṭhā avijjādayo paññāya
ujupaccanīkabhāvato. **Passatīti**

passantī viya hoti vibandhābhāvato. Tenāha “**tappaṭicchādaka -pa-asammohato**”ti. Sammāsaṅkappādināṃ micchāsaṅkappādayo ujuvipaccanīkāti āha “**sammāsaṅkappādayo -pa- pajahantī**”ti. Tathevāti iminā attano paccanīkakilesehi saddhinti imamatthaṃ anukaḍḍhati. **Visesatoti** sammādiṭṭhiyā vuttakiccato visesena. **Etthāti** etesu sammāsaṅkappādīsu.

Esā sammādiṭṭhi nāmāti lokiyaṃ lokuttarañca ekajjhaṃ katvā vadati missakatābhāvato. Tenāha “**pubbabhāge**”ti-ādi. **Ekārammaṇā** nibbānārammaṇattā. **Kiccatoti** pubbabhāge¹ dukkhādīhi ñāṇehi² kātabbakiccassa idha nipphattito, imasseva vā ñāṇassa dukkhādiṭṭhikāsanakiccato. **Cattāri nāmāni labhati** dukkhapariññādicatukiccasāadhanato. **Tīṇi nāmāni labhati** kāmasaṅkappādiṭṭhikāsanakiccanipphattito. **Sikkhāpadavibhaṅge**³ “viraticetanā taṃsampayuttāca dhammā sikkhāpadāni”ti vuttāni, tattha padhānānaṃ viraticetanānaṃ vasena “**viratiyopi honti cetanādayopi**”ti āha. “sammāvadati etāyā”ti-ādinā atthasambhavato **sammāvācādayo tayo viratiyopi honti cetanādayopi**. Musāvādādīhi viramaṇakāle viratiyo, subhāsītādivācābhāsanādikāle cetanādayo yojetabbā. **Maggakkhaṇe pana viratiyova** maggalakkhaṇappattito. Na hi cetanā niyyānasabhāvā. Atha vā ekassa ñāṇassa dukkhādīñāṇatā viya ekāya viratiyā musāvādādiviratibhāvo viya ca ekāya cetanāya sammāvācādikiccattayasāadhanasabhāvā sammāvācādivirātibhāvāsiddhito “**maggakkhaṇe viratiyovā**”ti vuttaṃ.

Cattāri nāmāni labhatīti catusammappadhānacatusatipaṭṭhānavasena labhati. Maggakkhaṇeti ānetvā sambandho. **Pubbabhāgepi maggakkhaṇepi sammāsamādhi evāti** yadipi samādhi-upakāraṇaṃ abhiniropanānumajjanasampiyyāyanabrūhanasantasukhānaṃ vitakkādīnaṃ vasena catūhi jhānehi sammāsamādhi vibhatto, tathāpi vāyāmo viya anuppannākusalānuppadanādicatuvāyāmakiccaṃ, satī viya ca asubhāsukhāniccānattesu kāyādīsu subhādisaññāpahānalakkhaṇaṃ catusatikiccaṃ, eko samādhi catujjhānasamādhikiccaṃ na sādhetīti pubbabhāgepi paṭhamajjhānasamādhi,

1. Pubbabhāgehi (Mūlaṭī 2. 71 piṭṭhe.)

2. Nāṭehi (Ka)

3. Abhi 2. 299 piṭṭhe.

paṭhamajjhānasamādhī eva maggakkhaṇepi, tathā pubbabhāgepi
catutthajjhānasamādhī, catutthajjhānasamādhī eva maggakkhaṇepīti attho.

“Kiṃ paṇāyaṃ maggadhammānaṃ desanānukkamo, kevalaṃ vācāya
kamavattinibhāvato, udāhu kañci visesaṃ upādāyā”ti vicāraṇāyaṃ kañci
visesaṃ upādāyāti dassento āha **“imesū”**ti-ādi. Tatha bhāvanānubhāvā
hitaphalāya sātisaṃ tikkhavisadabhāvappattiyā
acchariyabbhūtasamatthātāyogena sabbaso paṭipakkhavidhamanena
yāthāvato dhammasabhāvabodhanena ca sammādiṭṭhiyā bahukārātā
veditabbā. Tenāha **“ayaṃ hī”**ti-ādi.

Tassāti sammādiṭṭhiyā. **Bahukāro**ti dhammasampaññavedhe bahūpakāro.
Idāni tamatthaṃ upamāhi vibhāvetuṃ **“yathā hī”**ti-ādi vuttaṃ.

Vacībhedaṃ kārako vitakko
sāvajjānavajjavacībhedanivattanappavattanākārāya sammāvācāyapi
upakārako evāti āha **“svāyaṃ -pa- sammāvācāyapi upakārako”**ti.
Sammāsaṅkappo hi saccavācāya¹ virativācāyapi visesapaccayo
micchāsaṅkappatadekaṭṭhakilesappahānato.

Saṃvidahitvāti-ādīsu sammā vidahanaṃ kammantappayojanaṃ
ekantānavajjavacīkāyakkammavasena icchitabbanti virativācāvasena
saṃvidahanaṃ viratikammantasseva payojanaṃ nidassitanti daṭṭhabbaṃ.
Evaṃ hissa sammāvācāya sammākammantassāpi bahukārātā jotitā siyā.
Vacībhedaniyāmiṃ hi vacīduccaritavirati kāyikakiriyāniyāmiṃkāya
kāyaduccaritaviratiyā upakārikā. Tathā hi viśānvādanādimicchāvācāto
avirato micchākammantatopi na viramateva. Yathāha **“ekaṃ dhammaṃ
atītassa -pa- natthi pāpaṃ akāriyaṃ”**ti². Tasmā aṇṇānvādanādisammāvācāya
ṭhito sammākammantampi pūreṭiyeṇāti vacīduccaritavirati
kāyaduccaritaviratiyā upakārikā.

Yasmā ājīvapārisuddhi nāma dussīlyappahānapubbikā, tasmā
sammāvācākammantānantaraṃ sammā-ājīvo desitoti dassetuṃ
“catubbidham”

1. Saddavācāya (Ka)

2. Khu 1. 207 piṭṭhe Itivuttake.

panā”ti-ādi vuttam. **Ettāvatāti** parisuddhasilājīvikāmattena. **Idam vīriyanti** catusammappadhānavīriyam.

Vīriyārambhopi sammāsati-pariggahito eva nibbānāvaho, na kevaloti dasseturū **“tato”**ti-ādi vuttam. **Sūpaṭṭhitāti** bahiddhāvikkhepaṃ pahāya suṭṭhu upaṭṭhitā kātābbā. **Samādhissa upakāradhammā** nāma yathāvuttavattthuvisadakiriyādayo. Tappaṭipakkhato **anupakāradhammā** veditābbā. **Gatīyoti** nipphattiyo. **Samanvesitvāti** sammā pariyesitvā.

427. Yathā itthīsu kathā pavattā adhiṭṭhīti vuccati, evaṃ attānaṃ adhikicca pavattā **ajjhattaṃ**. “Evaṃ pavattamānā mayaṃ ‘attā’ti gahaṇaṃ gamissāmā”ti iminā viya adhippāyena attānaṃ adhikicca uddissa pavattā sattasantati-pariyāpannā ajjhattaṃ. Tasmim **ajjhattarūpe**, attano kesādivatthuke kaṣiṇarūpeti attho. **Parikkammavasena ajjhattaṃ rūpasaññīti** parikkammakaraṇavasena ajjhattaṃ rūpasaññī, na appanāvasena. Na hi paṭibhāganimittārammaṇā appanā ajjhattavisayā sambhavati. Taṃ pana ajjhattaṃ parikkammavasena laddhaṃ kaṣiṇanimittaṃ avisuddhameva hoti, na bahiddhā parikkammavasena laddhaṃ viya visuddhaṃ. Tenāha **“taṃ panā”**ti-ādi.

Yassevaṃ parikkammaṃ ajjhattaṃ uppannanti yassa puggalassa evaṃ vuttappakārena ajjhattaṃ parikkammaṃ jātaṃ. **Nimittaṃ pana bahiddhāti** paṭibhāganimittaṃ sasantati-pariyāpannaṃ na hotīti bahiddhā. **Parittānīti** yathā laddhāni suppasarāvamattāni. Tenāha **“avaḍḍhitānī”**ti. **Parittavasenevāti** vaṇṇavasena ābhoge vijjamānēpi parittavaseneva idaṃ abhibhāyatanam vuttam. Parittatā hettha abhitavanassa kāraṇam. Vaṇṇābhoge satipi asatipi abhibhavatīti abhibhu, parikkammaṃ, ñāṇam vā. Abhibhu āyatanam etassāti **abhibhāyatanam**, jhānam. Abhibhavitabbaṃ vā ārammaṇasaṅkhātāṃ āyatanam etassāti **abhibhāyatanam**. Atha vā ārammaṇābhibhavanato abhibhu ca taṃ āyatanañca yogino sukhavisesānaṃ adhiṭṭhānabhāvato manāyatanadhammāyatanabhāvato cāti sasampayuttajjhānaṃ **abhibhāyatanam**. Abhibhāyatanabhāvanā nāma tikkhapaññasseva sambhavati, na itarassāti āha **“ñāṇuttariko puggalo”**ti. **Abhibhavitvā samāpajjhāti** ettha

abhibhavanaṃ samāpajjanañca upacārajjhānādhigamanasamanantameva appanājhānuppādananti āha “**saha nimittuppādenevettha appanaṃ pāpeti**”ti. **Saha nimittuppādenāti** ca appanāparivāsābhāvassa lakkhaṇavacanametam. Yo khippābhiññoti vuccati, tatopi ñāṇuttarasseva abhibhāyatanabhāvanā. **Etthāti** etasmiṃ nimitte. **Appanaṃ pāpeti**ti bhāvanā-appanaṃ neti.

Ettha ca keci “uppanne upacārajjhāne taṃ ārabba ye heṭṭhimantena dve tayo javanavārā pavattanti, te upacārajjhānapakkhikā eva, tadanantaraṃ bhavaṅgaparivāseṇa upacārasevanāya ca vinā appanā hoti, saha nimittuppādeneva appanaṃ pāpeti”ti vadanti, taṃ tesam matimattaṃ. Na hi parivāsikaparikkammaṇa appanāvāro icchito, nāpi mahaggaṭappamaṇajjhānesu viya upacārajjhāne ekantato paccavekkhaṇā icchitabbā. Tasmā upacārajjhānādhigamato paraṃ katipayabhavaṅgacittāvasāne appanaṃ pāpuṇanto “**saha nimittuppādenevettha appanaṃ pāpeti**”ti vutto. **Saha nimittuppādenāti** ca adhippālikamidam vacanaṃ, na nītatthaṃ, tattha adhippāyo vuttanayeneva veditabbo. **Na antosamāpattiyam** tadā tathārūpassa ābhogassa asambhavato. **Samāpattito vuṭṭhitassa ābhogo** pubbhāgabhāvanāvasena jhānakkhaṇe pavattaṃ abhibhavanākāraṃ gahetvā pavattoti daṭṭhabbam. Abhidhammaṭṭhakathāyaṃ pana “imināssa pubbhābhogo kathito”ti vuttaṃ. Antosamāpattiyam tadā tathā ābhogābhāve kasmā jhānasaññāyapīti vuttanti āha “**abhibhavaśaṇṇā hissa antosamāpattiyampi atthi**”ti.

Vaḍḍhitappamaṇānāti vipulappamaṇānāti attho, na ekaṅguladvaṅgulādivaḍḍhiṃ pāpitāni tathā vaḍḍhanassevettha asambhavato. Tenāha “**mahantāni**”ti. **Bhattavaḍḍhitakanti** bhuñjanabhājane vaḍḍhetvā dinnam bhattam, ekāsane purisena bhuñjitabbabhattato upaḍḍhabhattanti attho.

Rūpe saññā rūpasaññā, sā assa atthīti rūpasaññī, na rūpasaññī **arūpasaññī**. Saññāsīseṇa jhānaṃ vadati. Rūpasaññāya anuppādanamevettha **alābhitā**. **Bahiddhāva uppannanti** bahiddhāvatthusmimyeva uppannam. Ettha ca—

“Ajjhattaṃ rūpasaññī bahiddhā rūpāni passati parittāni suvaṇṇadubbaṇṇāni. Ajjhattaṃ rūpasaññī bahiddhā rūpāni passati appamaṇāni

suvaṇṇadubbaṇṇāni. Ajjhattaṃ arūpasaññī bahiddhā rūpāni passati parittāni suvaṇṇadubbaṇṇāni. Ajjhattaṃ arūpasaññī bahiddhā rūpāni passati appamāṇāni suvaṇṇadubbaṇṇāni”ti¹—

evamidha cattāri abhibhāyatanāni āgatāni, **abhidhamme**² pana “ajjhattaṃ arūpasaññī bahiddhā rūpāni passati parittāni suvaṇṇadubbaṇṇāni, appamāṇāni suvaṇṇadubbaṇṇāni”ti evamāgatāni. Tattha ca kāraṇaṃ abhidhammaṭṭhakathāyaṃ vuttameva. Tathā hi vuttaṃ aṭṭhasālīniyaṃ³—

“Kasmā pana yathā suttante ‘ajjhattaṃ rūpasaññī eko bahiddhā rūpāni passati parittāni’ti-ādi vuttaṃ, evaṃ avatvā idha catūsūpi abhibhāyatanesu ajjhattaṃ arūpasaññitāva vuttāti. Ajjhattarūpānaṃ anabhibhavanīyato. Tattha vā hi idha vā bahiddhā rūpāneva abhibhavitabbāni, tasmā tāni niyamato vattabbāni”ti.

Tatrāpi idhapi vuttāni “ajjhattaṃ rūpasaññī ajjhattaṃ arūpasaññīti idaṃ pana satthu desanāvilāsamattamevā”ti. Ayaṃ panettha adhippāyo—idha vaṇṇābhogarahitāni sahitāni ca sabbāni parittāni suvaṇṇadubbaṇṇāni abhibhuyyāti. Pariyāyakathā hi suttantadesanāti. Abhidhamme pana nippariyāyadesanattā vaṇṇābhogarahitāni visuṃ vuttāni, tathā sahitāni. Atthi hi ubhayattha abhibhavanavisesoti. Tathā idha pariyāyadesanattā vimokkhānampi abhibhavanapariyāyo atthīti “ajjhattaṃ rūpasaññī”ti-ādinaṃ paṭhamadutiya-abhibhāyatanesu paṭhamavimokkho, tatiyacatuttha-abhibhāyatanesu dutiyavimokkho, vaṇṇābhāyatanesu tatiyavimokkho ca abhibhavanapattito saṅgahito. Abhidhamme pana nippariyāyadesanattā vimokkhābhāyatanāni asaṅkarato desetum vimokkhe vajjetvā abhibhāyatanāni kathitāni. Sabbāni ca vimokkhakiccāni jhānāni vimokkhadesanāyaṃ vuttāni. Tadetam “ajjhattaṃ rūpasaññī”ti āgatassa abhibhāyatanadvayassa abhidhamme abhibhāyatanesu avacanato “rūpī rūpāni passati”ti-ādīnaṃ sabbavimokkhakiccasādhāraṇavacanabhāvato vavatthānaṃ katanti viññāyati.

1. Dī 3. 215, 250; Am 3. 125, 305 piṭṭhesu.

2. Abhi 1. 64 piṭṭhe.

3. Abhi-Ṭṭha 1. 234 piṭṭhe.

Ajjhattarūpānaṃ anabhibhavanīyatoti idaṃ abhidhamme katthacipi “ajjhatarūpāni passatī”ti avatvā sabbattha yaṃ vuttaṃ “bahiddhā rūpāni passatī”ti, tassa kāraṇavacanāṃ. Tena yaṃ aññahetukaṃ suttante “bahiddhā rūpāni passatī”ti vacanāṃ, taṃ tena hetunā vuttaṃ. Yaṃ pana desanāvilāsahetukaṃ ajjhataṃ arūpasaññitāya eva abhidhamme vacanāṃ, na tassa aññaṃ kāraṇaṃ maggitabbanti dasseti. Ajjhattarūpānaṃ anabhibhavanīyatā ca tesaṃ bahiddharūpānaṃ viya avibhūtattā. Desanāvilāso ca yathāvuttavavatthānavasena veditabbo veneyyajjhāsayaavasena vijjamānapariyāyakathanabhāvato. Desanāvilāso hi nāma veneyyajjhāsayanurūpaṃ vijjamānassa ca pariyāyassa vibhāvanāṃ, na yassa kassaci, tasmā “idha pariyāyadesanattā”ti-ādinā vuttappakāraṃ vavatthānaṃ desanāvilāsanibandhananti daṭṭhabbaṃ.

Suvaṇṇadubbaṇṇānīti eteneva siddhattā na nīlādi-abhibhāyatanāni vattabbānīti ce? Na nīlādīsu katādhikārānaṃ nīlādibhāvasseva abhibhavanakāraṇattā. Na hi tesaṃ parisuddhāparisuddhavaṇṇānaṃ parittatā appamāṇatā vā abhibhavanakāraṇaṃ, atha kho nīlādibhāvo evāti. Etesu ca parittādikasiṇarūpesu yaṃyaṃcaritassa imāni abhibhāyatanāni ijjhanti, taṃ dassetum “imesu panā”ti-ādi vuttaṃ.

Sabbasaṅgāhikavasenāti nīlavaṇṇanīlanidassananīlanibhāsānaṃ sādharmaṇavasena. **Vaṇṇavasenāti** sabhāvavaṇṇavasena. **Nidassanavasenāti** passitabbatāvasena, cakkhuviññāṇavīthiyā gahetabbatāvasena. **Obhāsavasenāti** sappabhāsatāya avabhāsanasena. **Vaṇṇadhātuyā vāti** añjanarajatavatthādivaṇṇadhātuyā. **Lokiyāneva** rūpāvacarajjhānabhāvato.

435. **Rūpīti** ettha yenāyaṃ sasantatipariyāpannena rūpena samannāgato, taṃ yassa jhānassa hetubhāvena viṣiṭṭharūpaṃ hoti. Yena viṣiṭṭhena rūpīti vucceyya, tadeva sasantatipariyāpannarūpanimittāṃ jhānaṃ. Idha pana paramatthato rūpibhāvasādhakanti āha “ajjhataṃ kesādīsū”ti-ādi. **Rūpajjhānaṃ rūpanti** uttarapadalopena vuttaṃ “rūpūpapattiyā”ti-ādīsū¹ viya.

1. Abhi 1. 44, 52, 53, 64; Abhi 2. 276 piṭṭhesu.

Subhantveva adhimutto hotīti ayaṃ tatiyavimokkho idha suparisuddhanīlādivaṇṇakasiṇajjhānavasena vuttoti dassetvā idāni paṭisambhidāpāliyaṃ tassa brahmavihārajjhānavasena āgatabhāvaṃ dassetuṃ “**paṭisambhidāmagge panā**”ti-ādi āradham. Idha pana uparipāliyaṃyeva brahmavihārānaṃ āgatattā taṃ nayaṃ paṭikkhipitvā parisuddhanīlādivaṇṇakasiṇavaseneva subhavamokkho anuññāto.

443. **Parikammamapathaviyāpīti** akatāya vā katāya vā dalhamañḍalādisaṅkhātaparikammamapathaviyāpi. Uggahanimittādīnaṃ pathavīkasiṇanti nāmaṃ nissite nissayavohāravasena vuttanti daṭṭhabbaṃ yathā “mañcā ukkuṭṭhiṃ karonti”ti.

Sīlānīti pātimokkhasaṃvarādīni cattāri sīlāni. **Sodhetvāti** anāpajjanena āpannavuṭṭhāpanena kileshehi appaṭipīlanena ca visodhetvā. Tividhaṃ hi sīlassa visodhanaṃ nāma anāpajjanaṃ āpannavuṭṭhāpanaṃ kileshehi ca appaṭipīlananti. Kammatṭhānabhāvanaṃ paribundheti uparodheti pavattituṃ na detīti **palibodho** rakārassa lakāraṃ katvā, paribandhoti attho. **Upacchinditvāti** samāpannena saṅgahaṇena vā uparundhitvā, apalibodham katvāti attho. **Kalyāṇamittaṃ upasaṅkamitvāti**—

“Piyo garu bhāvanīyo, vattā ca vacanakkhamo.

Gambhīraṇca kathaṃ kattā, no caṭṭhāne niyojako”ti¹—

evamādiḡuṇasamannāgataṃ ekantahitesiṃ vuddhipakkhe ṭhitāṃ kalyāṇamittaṃ upasaṅkamitvā.

Ananurūpaṃ vihāranti aṭṭhārasannaṃ dosānaṃ aññatarena samannāgataṃ. Vuttaṃ hetuṃ aṭṭhakathāsu—

“Mahāvāsaṃ navāvāsaṃ, jarāvāsaṇca panthaniṃ.

Soṇḍiṃ paṇṇaṇca pupphaṇca, phalaṃ patthitameva ca.

Nagaraṃ dārunā khettaṃ, visabhāgena paṭṭanaṃ.

Paccantasīmā sappāyaṃ, yatthā mitto na labbhati.

Aṭṭhārasetāni ṭhānāni, iti viññāya paṇḍito.

Ārakā parivajjeyya, maggaṃ sappatibhayaṃ yathā”ti².

1. Am 2. 422 piṭṭhe.

2. Visuddhi 1. 118 piṭṭhe.

Anurūpeti gocaragāmato nātidūranaccāsannatādīhi pañcahi aṅgehi samannāgate. Vuttaṃ hetam bhagavatā—

“Kathañca bhikkhave senāsanaṃ pañcaṅgasamannāgataṃ hoti?

Idha bhikkhave senāsanaṃ nātidūraṃ hoti naccāsannaṃ amanāgamanasampannaṃ divā appākiṇṇaṃ rattiṃ appasaddaṃ appanigghosaṃ appaḍaṃsamakasavātātapasarīsapasamphassaṃ, tasmim kho pana senāsane viharantassa appakasirena uppajjanti cīvarapiṇḍapātasenaṃsanagilānapaccayabhesajjaparikkhārā, tasmim kho pana senāsane therā bhikkhū viharanti bahussutā āgatāgamā dhammadharā vinayadharā mātikādharā, te kālena kālaṃ upasaṅkamitvā paripucchati paripaṇhāti ‘idaṃ bhante kathaṃ imassa ko attho’ti. Tassa te āyasmanto avivaṭṭaṇṇeva vivaranti, anuttānīkathaṃ uttānīṃ karonti, anekavihitesu ca kaṅkhaṭṭhāṇīyesu dhammesu kaṅkhaṃ paṭivinodenti. Evaṃ kho hikkhave senāsanaṃ pañcaṅgasamannāgataṃ hoti”ti¹.

Ettha ca nātidūraṃ naccāsannaṃ gamanāgamanasampannanti ekaṃ aṅgaṃ, divā appākiṇṇaṃ rattiṃ appasaddaṃ appanigghosanti ekaṃ, appaḍaṃsamakasavātātapasarīsapasamphassanti ekaṃ, tasmim kho pana senāsane viharantassa -pa- parikkhārāti ekaṃ, tasmim kho pana senāsane therā -pa- kaṅkhaṃ paṭivinodentīti ekanti evaṃ pañcaṅgaṇi vedittabbāni.

Khuddakapalibodhaṃ upacchinditvāti dīghakesanakhalomānaṃ chedanena cīvarakammacīvararajanapattapacanamañcapīṭhādisodhanavasena khuddakapalibodhaṃ upacchinditvā.

453. **Uddhumātakādīsūti** ettha ādi-saddena vinīlakavipubbakavicchiddakavikkhāyitakahatavikkhittakalohitakapuḷavaka-aṭṭhikānaṃ saṅgaho daṭṭhabbo. Tattha bhaṭṭā viya vāyuna uddhaṃ jīvitapariyādānā yathānukkamaṃ samuggatena sūnabhāvena dhumātattā uddhumātaraṃ, uddhumātameva **uddhumātakaṃ**, paṭikūlattā vā kucchitaṃ uddhumātanti **uddhumātakaṃ**, tathārūpassa chavasarīrassetam adhivacanaṃ. Vinīlaṃ vuccati viparibhinnanīlavaṇṇaṃ, vinīlameva **vinīlakaṃ**, paṭikūlattā vā kucchitaṃ vinīlanti **vinīlakaṃ**, maṃsussadaṭṭhānesu

rattavaṇṇassa, pubbasannicayaṭṭhānesu setavaṇṇassa, yebhuyyena ca nīlavaṇṇassa nīlaṭṭhāne nīlasāṭakapārutasseva chavasārīrassetaṃ adhivacanaṃ. Paribhinnaṭṭhānesu vissandaṃānapubbaṃ vipubbaṃ, vipubbameva **vipubbakaṃ**, paṭikūlattā vā kucchitaṃ vipubbanti **vipubbakaṃ**, tathārūpassa chavasārīrassetaṃ adhivacanaṃ. Vicchiddaṃ vuccati dvidhā chindanena apadhāritaṃ, vicchiddameva **vicchiddakaṃ**, paṭikūlattā vā kucchitaṃ vicchiddanti **vicchiddakaṃ**, vemajjhe chinnaṃ chavasārīrassetaṃ adhivacanaṃ. Ito ca etto ca vividhākārena soṇasiṅgālādīhi khāyitaṃ vikkhāyitaṃ, vikkhāyitameva **vikkhāyitakaṃ**, paṭikūlattā vā kucchitaṃ vikkhāyitanti **vikkhāyitakaṃ**, tathārūpassa chavasārīrassetaṃ adhivacanaṃ.

Vividhā khittaṃ vikkhittaṃ, vikkhittameva **vikkhittakaṃ**, paṭikūlattā vā kucchitaṃ vikkhittanti **vikkhittakaṃ**, aññena hatthaṃ, aññena pādaṃ, aññena sīsanti evaṃ tato tato vikkhittassa chavasārīrassetaṃ adhivacanaṃ. Hatañca taṃ purimanayeneva vikkhittakañcāti **hatavikkhittakaṃ**, kāyapadākārena āṅgapaccaṅgesu satthena hanitvā vuttanayeneva vikkhittassa chavasārīrassetaṃ adhivacanaṃ. Lohitaṃ kirati vikkhipati ito cito ca paggharatīti **lohitakaṃ**, paggharitalohitamakkhittassa chavasārīrassetaṃ adhivacanaṃ. Puḷavā vuccanti kimayo, puḷave kiratīti **puḷavakaṃ**, kimiparipuṇṇassa chavasārīrassetaṃ adhivacanaṃ. Aṭṭhiyeva **aṭṭhikaṃ**, paṭikūlattā vā kucchitaṃ aṭṭhīti **aṭṭhikaṃ**, aṭṭhisāṅkhalikāyapi ekaṭṭhikassapi etaṃ adhivacanaṃ. Imesu dasasu asubhesu paṭhamajjhānameva uppajjati, na dutiyādīni. Tenāha idha “**paṭhamajjhānasahagatā saññā**”ti. Tathā hi aparisaṇṭhitajalāya sīghasotāya nadiyā arittabaleneva nāvā tiṭṭhati, vinā arittena na sakkā ṭhapetuṃ. Evamevaṃ dubbalattā ārammaṇassa vitakkabaleneva cittaṃ ekaggaṃ hutvā tiṭṭhati, vinā vitakkena na sakkā ṭhapetuṃ. Tasmā paṭhamajjhānamevettha hoti, na dutiyādīni. Ārammaṇassa dubbalatā cettha paṭikūlabhāvena cittaṃ ṭhapetuṃ asamatthatā.

“Rukkho mato, lohaṃ matan”ti-ādīsu yaṃ khandhappabandhaṃ upādāya rukkhādisamaññā, tasmim̐ anupacchinnepi allatādivigamaṇaṃ nissāya matavohāro **sammutimaraṇaṃ**. Saṅkhārānaṃ khaṇabhaṅgasaṅkhātāṃ **khaṇikamaraṇaṃ**. **Samucchedamaraṇaṃ**ti arahato santānassa sabbaso ucchedabhūtaṃ maraṇaṃ. Vipassanābhāvanāvasena cetāṃ vuttaṃ. Maraṇānussatibhāvanāyaṃ pana tividhampetaṃ

nādhippetaṃ asaṃvegavatthuto anupaṭṭhahanato abāhullato ca.
Maraṇānussatiyaṃ hi ekena bhavena paricchinnassa
jīvitindriyappabandhassa vicchedo maraṇanti adhippeto saṃvegavatthuto
upaṭṭhahanato bāhullato ca. Idāni imameva maraṇaṃ sandhāya
vikappantaraṃ dassento “**heṭṭhā vuttalakkhaṇā vā**”ti-ādimāha.

Asitapītādibhedeti asitapītakhāyitasāyitappabhede,
asitabbakhādītābbasāyitabbavibhāgeti attho kālabhedavacanicchāya
abhāvato yathā “duddhan”ti. Kabaḷaṃ karīyatīti kabaḷikāro, āharīyatīti
āhāro, kabaḷikāro ca so āhāro cāti **kabaḷikārāhāro**. Vatthuvasena cetāṃ
vuttaṃ. Savatthuko eva hi āhāro idha kammaṭṭhānabhāvena adhippeto.
Ojālakkhaṇo pana āhāro ojaṭṭhamakaṃ rūpaṃ āharatīti āhāroti vuccati. So
idha nādhippeto paṭikūlākāraggahaṇassa asambhavato. **Nava paṭikūlānīti**
gamanapariyesanaparibhogāsayanidāna-
aparipakkaparipakkaphalanissandappaṭikūlavasena nava paṭikūlāni.
Samakkhanappaṭikūlaṃ pana paribhogādīsu labbhamānattā idha visuṃ na
gahitaṃ, aññathā tena saddhiṃ “dasa paṭikūlānī”ti vattabbaṃ.
Visuddhimagge¹ pana samakkhanaṃ paribhogādīsu labbhamānampi
nissandavasena visesato paṭikūlanti visuṃ gahetvā dasahākārehi paṭikūlatā
vuttā.

Uppajjanakasaññanti paṭikūlākāraggahaṇavasena uppajjanakasaññaṃ.
Saññā-saddo cāyaṃ “rūpasaññā saddasaññā”ti-ādīsu² sañjānanalakkhaṇe
dhamme āgato, “aniccasaññā dukkhasaññā”ti-ādīsu³ vipassanāya āgato,
“uddhumātakasaññāti vā sopāka rūpasaññāti vā ime dhammā ekaṭṭhā, udāhu
nānaṭṭhā”ti-ādīsu samathe āgato. Idha pana samathassa parikamme
daṭṭhabbo. Āhārehi paṭikūlākāraggahaṇaṃ, tappabhāvitāṃ vā
upacārajjhānaṃ idha “āhāre paṭikūlasaññā”ti ādhippetaṃ.

Ukkaṇṭhitasaññanti nibbindanākārena uppajjanakasaññaṃ.
Aniccasaññanti ettha aniccaṃ khandhapañcakaṃ
uppādavayaññathattabhāvato, hutvā abhāvato vā, tasmīṃ anicce
khandhapañcake aniccanti uppajjamānā aniccalakkhaṇapariggāhikā saññā
aniccasaññā. Tenāha “**pañcannaṃ upādānakkhandhānaṃ**”ti-ādi. Tattha

1. Visuddhi 1. 341 piṭṭhe.

2. Saṃ 2. 52 piṭṭhe.

3. Am 3. 75, 294 piṭṭhesu.

udayo nibbatilakkhaṇaṃ, **vayo** vipariṇāmalakkhaṇaṃ, **aññathattaṃ** jarā.

Udayabbayaññathattaggahaṇena aniccalakkhaṇaṃ dasseti.

Uppādavayaññathattabhāvato hi khandhapañcakaṃ aniccanti vuccati. Yassa ca sabhāvena khandhapañcakaṃ aniccanti vuccati, taṃ **aniccalakkhaṇaṃ**.

Tena hi taṃ aniccanti lakkhīyati, aniccalakkhaṇaṃca udayabbayānaṃ amanasikārā santatiyā paṭicchannattā na upaṭṭhāti, udayabbayaṃ pana pariggahetvā santatiyā vikopitāya aniccalakkhaṇaṃ yāthāvasarasato upaṭṭhāti. Na hi sammadeva udayabbayaṃ sallakkhentaṃ pubbāpariyena pavattamānaṃ dhammānaṃ aññoññabhāvaṃ sallakkhaṇena santatiyā ugghāṭitāya dhammā sambandhabhāvena upaṭṭhahanti, atha kho ayosalāka viya asambandhabhāvenāti suṭṭhutaṃ aniccalakkhaṇaṃ pākaṭaṃ hoti.

“Yadaniccaṃ, taṃ dukkhaṃ”ti¹ vacanato tadeva khandhapañcakaṃ abhiñhappaṭipīlanato dukkhaṃ, abhiñhappaṭipīlanākāro pana dukkhalakkhaṇaṃ. Tenevāha “**anicce khandhapañcake -pa- saññiṃ bhāveti**”ti. Tattha paṭipīlanaṃ nāma yathāpariggahitaṃ udayavayavasena saṅkhārānaṃ nirantaraṃ paṭipīliyamānatā vibādhiyamānatā.

Dukkhalakkhaṇaṃca abhiñhasamapaṭipīlanassa amanasikārā iriyāpathehi paṭicchannattā na upaṭṭhāti, abhiñhasamapaṭipīlanaṃ pana manasi karitvā iriyāpathe labbhamānadukkhappaṭicchādakabhāve ugghāṭite dukkhalakkhaṇaṃ yāthāvasarasato upaṭṭhāti. Tathā hi iriyāpathehi paṭicchannattā dukkhalakkhaṇaṃ na upaṭṭhāti, te ca iriyāpathā abhiñhasamapaṭipīlanāmanasikāreṇa paṭicchādakā jātā. Ekasmiṃ hi iriyāpathe uppannaṃ dukkhassa vinodakaṃ iriyāpathantaraṃ tassa paṭicchādakam viya hoti, evaṃ sesāpi. Iriyāpathānaṃ pana taṃtaṃdukkhapatitākārabhāve yāthāvato ñāte tesam dukkhappaṭicchādakabhāvo ugghāṭito nāma hoti saṅkhārānaṃ nirantaraṃ dukkhābhītunnatāya pākaṭabhāvato. Tasmā abhiñhasamapaṭipīlanaṃ manasi karitvā iriyāpathe labbhamānadukkhappaṭicchādakabhāve ugghāṭite dukkhalakkhaṇaṃ yāthāvasarasato upaṭṭhāti.

“Yaṃ dukkhaṃ, tadanattā”ti vacanato tadeva khandhapañcakaṃ avasavattanato anattā, avasavattanākāro pana anattalakkhaṇaṃ. Tenāha

1. Saṃ 2. 19, 37, 68, 69, 92, 236, 237; Khu 9. 295 piṭṭhesu.

“**paṭipīḷanaṭṭhenā**”ti-ādi. Anattalakḥhaṇaṇca nānādhātuviniḃbhogassa amanasikārā ghanena paṭicchannattā na upaṭṭhāti, nānādhātuyo pana viniḃbhujjitvā “aññā pathaviḍhātu, aññā āpodhātū”ti-ādinā, “añño phasso, aññā vedanā”ti-ādinā ca visum visum katvā ghanaviniḃbhoge kate samūhaghane kiccārammaṇaghane ca bhedite anattalakḥhaṇam yāthāvasarasato upaṭṭhāti. Yā hesā aññamaññūpatthambhesu samuditesu rūpārūpadhammesu ekattābhinivesavasena aparimadditasāṅkhārehi mamāyamānā samūhaghanatā, tathā tesaṃ tesaṃ dhammānam kiccabhedassa satipi paṭiniyatabhāve ekato gayhamānā kiccaghanatā, tathā sārammaṇadhammānam satipi ārammaṇakaraṇabhede ekato gayhamānā ārammaṇaghanatā. Sā catūsu dhātūsu ñāṇena viniḃbhujjitvā dissamānāsu hatthena parimaddiyamāno pheṇapiṇḍo viya vilīnam¹ āgacchati, yathāpaccayaṃ pavattamānā suññā ete dhammamattāti avasavattanākārasaṅkhātā anattalakḥhaṇam pākaṭataram hoti.

Apara-accharāsaṅghātavaggavaṇṇanā niṭṭhitā.

19. Kāyagatāsativaggavaṇṇanā

563. **Cetasā phuṭoti** cittena pharito. Cittena pharaṇaṇca samuddassa dvidhā sambhavatīti āha “**duvidham pharaṇan**”ti-ādi. **Purimena atthenāti** “sampayogavasena vijjam bhajantī”ti vuttana atthena. **Pacchimenāti** “vijjābhāge vijjākoṭṭhāse vattantī”ti vuttana.

564. **Mahato saṃvegāya saṃvattatīti**-ādīsu ayaṃ pana aparo nayo. Yāthāvato kāyasabhāvappavedanato mahato saṃvegāya saṃvattati. **Atthāyāti** diṭṭhadhammikādi-atthāya. **Yogakkhemāyāti** catūhi yogehi khemabhāvāya. **Satisampajaññāyāti** sabbattha sati-avippavāsāya sattaṭṭhānīyasampajaññāya ca. **Ñāṇadassanappaṭilābhāyāti** vipassanāñāṇādhigamāya. **Vijjāvimutti phalasacchikiriyāyāti** tisso vijjā cittassa adhimutti nibbānam cattāri sāmāññaphalānīti etesaṃ paccakkhakaraṇāya.

584. **Paññāpaṭilābhāyā**ti-ādīsu soḷasasu padesu paññāpaṭilābhāya paññāvuddhiyā paññāvepullāya paññābhāhullāyāti imāni cattāri paññāvasena bhāvavacanāni, sesāni dvādasa puggalavasena bhāvavacanāni.

Sappurisasamsevoti sappurisānaṃ bhajanaṃ. **Saddhammassavananti** tesam sappurisānaṃ santike silādippaṭipattidīpakassa saddhammavacanassa savanaṃ. **Yoniso manasikāro**ti sutānaṃ dhammānaṃ atthūpaparikkhāvasena upāyena manasikāro. **Dhammānudhammapaṭipattī**ti lokuttaradhamme anugatassa silādippaṭipadādhammassa paṭipajjanaṃ.

Channaṃ abhiññāṇānanti

iddhividhadibbasotacetopariyapubbenivāsadibbacakkhu-

āsavakkhayaññānaṃ. **Tesattatīnaṃ ñāṇānanti paṭisambhidāpāliyaṃ**¹

“sotāvadhāne paññā sutamaye ñāṇaṃ, sutvāna samvare paññā silamaye ñāṇaṃ”ti-ādinā ñāṇakathāya niddiṭṭhānaṃ sāvakasādhāraṇāsādhāraṇānaṃ ñāṇānaṃ. Imesaṃ hi tesattatīñāṇānaṃ sutamayaññāṇādīni sattasatṭhiñāṇāni sāvakassa sādāraṇāni, “indriyaparopariyatte ñāṇaṃ, sattānaṃ āsayānusaye ñāṇaṃ, yamakaṭṭhiñāṇaṃ, mahākaruṇāsamaṇāpattiyaṃ ñāṇaṃ, Sabbaññutaññāṇaṃ, anāvaraṇañāṇaṃ”ti² imāni cha asādhāraṇañāṇāni sāvakehi.

Sattasattatīnaṃ ñāṇānanti ettha—

“Jātipaccayā jarāmarāṇanti ñāṇaṃ, asati jātiyā natthi jarāmarāṇanti ñāṇaṃ. Atītaṃpi addhānaṃ jātipaccayā jarāmarāṇanti ñāṇaṃ, asati jātiyā natthi jarāmarāṇanti ñāṇaṃ. Anāgatampi addhānaṃ jātipaccayā jarāmarāṇanti ñāṇaṃ, asati jātiyā natthi jarāmarāṇanti ñāṇaṃ. Yampissa taṃ dhammaṭṭhitiñāṇaṃ, taṃpi khayadhammaṃ vayadhammaṃ virāgadhammaṃ nirodhadhammanti ñāṇaṃ. Bhavapaccayā jātīti ñāṇaṃ -pa-. Upādānapaccayā bhavoti ñāṇaṃ, taṇhāpaccayā upādānanti ñāṇaṃ, vedanāpaccayā taṇhāti ñāṇaṃ, phassapaccayā vedanāti ñāṇaṃ, saḷāyatanapaccayā phassoti ñāṇaṃ, nāmarūpapaccayā saḷāyatananti ñāṇaṃ, viññānapaccayā nāmarūpananti ñāṇaṃ, saṅkhārapaccayā viññānanti ñāṇaṃ, avijjāpaccayā saṅkhārāti ñāṇaṃ,

1. Khu 9. 1 piṭṭhe.

2. Khu 9. 4 piṭṭhe Paṭisambhidāmagge.

asati avijjāya natthi saṅkhārāti ñāṇaṃ, atītampi addhānaṃ avijjāpaccayā saṅkhārāti ñāṇaṃ, asati avijjāya natthi saṅkhārāti ñāṇaṃ, anāgatampi addhānaṃ avijjāpaccayā saṅkhārāti ñāṇaṃ, asati avijjāya natthi saṅkhārāti ñāṇaṃ, yampissa taṃ dhammaṭṭhitiñāṇaṃ, tampi khayadhammaṃ ayadhammaṃ virāgadhammaṃ nirodhadhammanti ñāṇaṃ”ti—

bhagavatā **nidānavagge**¹ jarāmarañādisu ekādasasu paṭiccasamuppādaṅgesu paccekaṃ satta satta katvā vuttāni sattasattatiñāṇāni.

Tattha **dhammaṭṭhitiñāṇanti** paccayākārañāṇaṃ. Paccayākāro hi dhammānaṃ pavattisaṅkhātāya ṭhitiyā kāraṇattā “dhammaṭṭhiti”ti vuccati, tattha ñāṇaṃ dhammaṭṭhitiñāṇaṃ, “jātipaccayā jarāmarāṇaṃ”ti-ādinā vuttasseva chabbidhassa ñāṇassettaṃ adhivacanaṃ. **Khayadhammanti** khayagamanasabhāvaṃ. **Yavadhammanti** vayagamanasabhāvaṃ. **Virāgadhammanti** virajjanasabhāvaṃ. **Nirodhadhammanti** nirujjhanasabhāvanti attho.

Lābhoti-ādīsu lābhoyeva upasaggena visesetvā “**paṭilābho**”ti vutto. Puna tasseva atthavivaraṇavasena “**patti sampatti**”ti vuttaṃ. **Phusanāti** adhigamanavasena phusanā. **Sacchikiriya**ti paṭilābhasacchikiriya. **Upasampadāti** nipphādanā.

Sattannaṃ ca sekkhānanti tisso sikkhā sikkhantīti sekkhasaññitānaṃ sotāpattimaggaṭṭhādīnaṃ sattannaṃ. **Puthujjanakalyāṇakassa cāti** nibbānagāminiyā paṭipadāya yuttattā sundaraṭṭhena kalyāṇasaññitassa puthujjanassa. Vaddhitaṃ vaddhanaṃ etāyāti **vaddhitavaddhana**. Yathāvuttānaṃ aṭṭhannampi paññānaṃ vasena visesatova arahato paññāvasena **paññāvuddhiyā**. Tathā **paññāvepullāya**.

Yassa kassacipi visesato anurūpadhammassa mahantaṃ nāma kiccāsiddhiyā veditabbanti tadassa kiccāsiddhiyā dassento “**mahante atthe pariggaṇhātī**”ti-ādimāha. Tattha atthādīnaṃ mahantabhāvo mahāvisayatāya veditabbo, mahāvisayatā ca tesaṃ paṭisambhidāmagge āgatanayena veditabbā. Silakkhandhassa pana hetumahantatāya paccayamahantatāya

1. Saṃ 1. 291 piṭṭhe.

nissayamahantatāya pabhedamahantatāya kiccamahantatāya phalamahantatāya ānisaṃsamahantatāya ca mahantabhāvo veditabbo. Tattha **hetu** alobhādayo. **Paccayo** hirottappasaddhāsativīriyādayo. **Nissayo** sāvakabodhipaccekabodhiniyatatā taṃsamāṅgino ca purisavisesā. **Pabhedo** cārittavārittādivibhāgo. **Kiccam** tadaṅgādivasena paṭipakkhavidhamanaṃ. **Phalaṃ** saggasampadā nibbānasampadā ca. **Ānisaṃso** piyamanāpatādi. Ayamettha saṅkhepo, vitthāro pana **visuddhimagge**¹ **ākaṅkheyyasuttā**dīsu² ca āgatanayena veditabbo. Iminā nayena samādhikkhandhādīnampi mahantatā yathārahaṃ niddhāretvā vattabbā. Tṭhānāṭṭhānādīnaṃ mahantabhāvo pana mahāvisayatāya veditabbo. Tattha tṭhānāṭṭhānānaṃ mahāvisayatā bahudhātukasuttādīsu āgatanayena veditabbā.

Vihārasamāpattīnaṃ mahāvisayatā samādhikkhandhe mahāvisayatāniddhāraṇanayena veditabbā, ariyasaccānaṃ sakalayānasaṅgāhakato **saccavibhaṅge**³ **taṃsaṃvaṇṇanāsu**⁴ ca āgatanayena, satipaṭṭhānādīnaṃ **satipaṭṭhānavibhaṅgā**dīsu⁵ **taṃsaṃvaṇṇanā**dīsu⁶ ca āgatanayena, sāmaññaphalānaṃ mahato hitassa mahato sukhassa mahato atthassa mahato yogakkhemassa nipphattibhāvato santapaṇīta-atakkāvacarapaṇḍitavedanīyabhāvato, abhiññāya mahāsambhārato mahāvisayato mahākiccato mahānubhāvato mahānipphattito, nibbānassa madanimmadānādīmahatthasiddhito ca mahantabhāvo veditabbo. **Pariggaṇhātī**ti sabhāvādito paricchijja gaṇhāti jānāti, paṭivijjhatīti attho.

Puthupaññāti etthāpi vuttanayānusārena attho veditabbo. Ayaṃ pana viseso—**puthu nānākkhandhesu ñāṇaṃ pavattatī**ti “ayaṃ rūpakkhandho nāma -pa- ayaṃ viññāṇakkhandho nāma”ti evaṃ pañcannaṃ khandhānaṃ nānākaraṇaṃ paṭicca ñāṇaṃ pavattatī. Tesupi ekavidhena rūpakkhandho -pa- ekādasavidhena rūpakkhandho. Ekavidhena vedanākkhandho -pa- bahuvidhena vedanākkhandho. Ekavidhena saññākkhandho -pa- bahuvidhena saññākkhandho. Ekavidhena saṅkhārakkhandho -pa- bahuvidhena saṅkhārakkhandho. Ekavidhena viññāṇakkhandho -pa-

1. Visuddhi 1. 9 piṭṭhe.

2. Ma 1. 39 piṭṭhe.

3. Abhi 2. 104 piṭṭhe.

4. Abhi-Ṭṭha 2. 78 piṭṭhe.

5. Abhi 2. 200 piṭṭhe.

6. Abhi-Ṭṭha 2. 204 piṭṭhe.

bahuvidhena viññāṇakkhandhoti evaṃ ekekassa khandhassa ekavidhādivasena atītādivasenapi nānākaraṇaṃ paṭicca ñāṇaṃ pavattati.

Puthu nānādhātūsūti “ayaṃ cakkhudhātu nāma -pa- ayaṃ manoviññādhātu nāma. Tattha soḷasa dhātuyo kāmāvacarā, dve cātubhūmikā”ti evaṃ dhātūsu nānākaraṇaṃ paṭicca ñāṇaṃ pavattati. Tayidaṃ upādinna dhātuvaseṇa vuttaṃ. Paccekabuddhānaṃ hi dvinnāṇa aggasaṅkhaṇaṃ upādinna dhātūsu eva nānākaraṇaṃ paṭicca ñāṇaṃ pavattati, taṇha kho ekadesatova, na nippadesato. Bahiddhā anupādinna dhātūnaṃ nānākaraṇaṃ tesāṃ avisayova, sabbāññubuddhānaṃ yeve pana “imāya dhātuyā ussannattā imassa rukkhassa khandho seto hoti, imassa kāḷo, imassa maṭṭho, imassa kharo, imassa bahalataco, imassa sukkhataco. Imassa pattarā vaṇṇasaṅghānādivasena evarūpaṃ. Imassa pupphaṃ nīlaṃ, pītaṃ, lohitaṃ, odātaṃ, sugandhaṃ, duggandhaṃ, missakagandhaṃ. Phalaṃ khuddakaṃ, mahantaṃ, dīghaṃ, vaṭṭaṃ, suvaṇṇaṃ, dubbaṇṇaṃ, maṭṭhaṃ, pharuṣaṃ, sugandhaṃ, duggandhaṃ, madhuraṃ, tittakaṃ, ambilaṃ, kaṭukaṃ, kasāvaṃ. Kaṇṭako tikhiṇo, atikhiṇo, ujuko, kuṭilo, tambo, nīlo, lohito, odāto”ti-ādinā dhātunānattaṃ paṭicca ñāṇaṃ pavattati.

Puthu nānā-āyatanesūti “idaṃ cakkhāyatanaṃ nāma -pa- idaṃ dhammāyatanaṃ nāma. Tattha dasāyatana kāmāvacarā, dve cātubhūmakā”ti evaṃ āyatananānattaṃ paṭicca ñāṇaṃ pavattati.

Phuthu nānāpaṭiccasamuppādesūti ajjhatabhiddhābhedato santānābhedato ca nānābhāvedesu paṭiccasamuppādaṅgesu. Avijjādi-aṅgāni hi paccekāṃ paṭiccasamuppādasāññitāni. Tenāha saṅkhārapiṭake “dvādasa paccayā dvādassa paṭiccasamuppādā”ti¹.

Puthu nānāsuññatamanupalabbhesūti nānāabhāvesu nīcasārādivirahitesu suññābhāvesu, tato eva itthipurisa-attattaniyādivasena anupalabbhamānasabhāvesu. Ma-kāro hettha padasandhikaro.

Puthu nānā-atthesūti atthapaṭisambhidāvisayesu paccayuppannādinānā-atthesu. **Dhammesūti** dhammapaṭisambhidāvisayesu paccayādinānādhāmmesu.

1. Saṃ-Ṭī 1. 163 piṭṭhepi.

Niruttisūti tesamñyeva atthadhammānaṃ niddhāraṇavacanasañkhātesu nānāniruttisu. **Puthu nānāpaṭibhānesū**ti atthapaṭisambhidādivisayesu imāni nāṇāni idamatthajotakānīti tathā tathā paṭibhānato upatiṭṭhanato paṭibhānānīti laddhanāmesu nānāñāṇesu.

Puthu nānāsīlakkhandhesūti-ādīsu sīlassa puthuttaṃ nānattañca vuttameva, itaresaṃ pana vuttanayānusārena suviññeyyattā pākaṭameva. Yaṃ pana abhinnaṃ ekameva nibbānaṃ, tattha upacāravasena puthuttaṃ gaḥetabbanti āha “**puthu nānājanasādhāraṇe dhamme samatikkammā**”ti. Tenassa madanimmadanādipariyāyena puthuttaṃ paridīpitaṃ hoti.

Vipule attheti mahante atthe. Mahantapariyāyo hi vipulasaddo. **Gambhīresū**ti sasādihi viya mahāsamuddo anupacitañāṇasambhārehi alabbhaneyyappatiṭṭhesu khandhesu nāṇaṃ pavattatīti visayassa gambhīratāya nāṇassa gambhīratā vibhāvītā.

Tikkhavisadabhāvādiguṇehi asādhāraṇattā paresaṃ paññāya na sāmāntā, atha kho suvidūravidūreti **asamantapaññā** ākāraṇassa rassattaṃ katvā. Keci “asamatthapaññā”ti paṭhanti, tesaṃ yathāvuttaguṇehi aññehi asādhāraṇattā natthi etissā kāyaci samatthanti asamattā paññāti yojanā. **Atthavavattḥānatoti** atthappabhedassa yāthāvato sanniṭṭhānato. **Na añño koci sakkoti abhisambhavitunti** nāṇagatiyā sampāpuṇitum na añño kocipi sakkoti, tasmā ayaṃ suvidūravidūreti asamantapaññā. Idāni puggalantaravasena asamantapaññaṃ vibhāvetum “**puthujjanakalyāṇakassā**”ti-ādi āradhmaṃ.

“Paññāpabhedakusalo abhinnañāṇo adhigatappaṭisambhido catuvesārajjappatto dasabaladhārī purisāsabho purisasīho purisanāgo purisajāñño purisadhorayho anantañāṇo anantatejo anantayaso aḍḍho mahaddhano balavā netā vinetā anunetā paññāpetā vinijjhāpetā pekkhetā pasādetā. So hi bhagavā anuppannassa maggassa uppādetā, asaṇjātassa maggassa saṇjanetā, anakkhātassa maggassa akkhātā, maggaññū maggavidū maggakovido. Maggānugāmī ca pana etarahi sāvakā viharanti pacchā samannāgatā.

So hi bhagavā jānaṃ jānāti, passaṃ passati, cakkhubhūto
 ñāṇabhūto dhammabhūto brahmabhūto vattā pavattā atthassa ninnetā
 amatassa dātā dhammassāmī tathāgato, natthi tassa bhagavato aññātaṃ
 adiṭṭhaṃ aviditaṃ asacchikataṃ aphassitaṃ paññāya. Atītaṃ anāgataṃ
 paccuppannaṃ upādāya sabbe dhammā sabbākārena buddhassa
 bhagavato ñāṇamukhe āpāthaṃ āgacchanti, yaṃ kiñci neyyaṃ nāma
 atthi taṃ sabbaṃ jānitabbaṃ, attattho vā parattho vā ubhayattho vā
 diṭṭhadhammiko vā attho samparāyiko vā attho uttāno vā attho
 gambhīro vā attho gūḷho vā attho paṭicchanno vā attho neyyo vā attho
 nīto vā attho anavajjo vā attho nikkilesa vā attho vodāno vā attho
 paramattho vā attho, sabbaṃ taṃ antobuddhañāṇe parivattati.

Sabbaṃ kāyakammaṃ buddhassa bhagavato ñāṇānuparivatti,
 sabbaṃ vacīkammaṃ buddhassa bhagavato ñāṇānuparivatti, sabbaṃ
 manokammaṃ buddhassa bhagavato ñāṇānuparivatti. Atīte buddhassa
 bhagavato appaṭihataṃ ñāṇaṃ, anāgate buddhassa bhagavato
 appaṭihataṃ ñāṇaṃ, paccuppanne buddhassa bhagavato appaṭihataṃ
 ñāṇaṃ, yāvatakaṃ neyyaṃ, tāvatakaṃ ñāṇaṃ. Yāvatakaṃ ñāṇaṃ,
 tāvatakaṃ neyyaṃ. Neyyapariyantikaṃ ñāṇaṃ, ñāṇapariyantikaṃ
 neyyaṃ, neyyaṃ atikkamitvā ñāṇaṃ nappavattati, ñāṇaṃ atikkamitvā
 neyyapatho natthi, aññamaññapariyantaṭṭhāyino te dhammā, yathā
 dvinnaṃ samuggapaṭalānaṃ sammā phusitānaṃ heṭṭhimaṃ
 samuggapaṭilaṃ uparimaṃ nātivattati, uparimaṃ samuggapaṭalaṃ
 heṭṭhimaṃ nātivattati, aññamaññapariyantaṭṭhāyino, evamevaṃ
 buddhassa bhagavato neyyaṇca ñāṇaṇca aññamaññapariyantaṭṭhāyino.
 Yāvatakaṃ neyyaṃ, tāvatakaṃ ñāṇaṃ. Yāvatakaṃ ñāṇaṃ, tāvatakaṃ
 neyyaṃ, neyyapariyantikaṃ ñāṇaṃ, ñāṇapariyantikaṃ neyyaṃ, neyyaṃ
 atikkamitvā ñāṇaṃ nappavattati, ñāṇaṃ atikkamitvā neyyapatho natthi.
 Aññamaññapariyantaṭṭhāyino te dhammā. Sabbadhammesu buddhassa
 bhagavato ñāṇaṃ pavattati.

Sabbe dhammā buddhassa bhagavato āvajjanappaṭibaddhā
 ākaṅkhappaṭibaddhā manasikārappaṭibaddhā cittuppādappaṭibaddhā,
 sabbasattesu buddhassa bhagavato ñāṇaṃ pavattati. Sabbesaṃ sattānaṃ
 buddho āsayaṃ jānāti, anusayaṃ jānāti, caritaṃ jānāti, adhimuttim
 jānāti, apparajakkhe mahārajakkhe tikkhindriye mudindriye svākāre
 dvākāre suviññāpaye duviññāpaye bhabbābhabbe satte pajānāti,
 sadevako loko samārako sabrahmako sassamaṇabrāhmaṇī pajā
 sadevamanussā antobuddhañāṇe parivattati.

Yathā ye keci macchakacchapā antamaso timitimiṅgalaṃ upādāya
 automahāsamudde parivattanti, evameva sadevako loko samārako
 sabrahmako sassamaṇabrāhmaṇī pajā sadevamanussā antobuddhañāṇe
 parivattati. Yathā ye keci pakkhino antamaso garuḷaṃ venateyyaṃ
 upādāya ākāsaṃ padese parivattanti, evameva yepi te sārīputtasamā
 paññāya, tepi buddhañāṇassa padese parivattanti, buddhañāṇaṃ
 devamanussānaṃ paññaṃ pharitvā atighaṃsitvā tiṭṭhati. Yepi te
 khattiyapaṇḍitā brāhmaṇapaṇḍitā gahapatipaṇḍitā samaṇapaṇḍitā nipuṇā
 kataparappavādā vāavedhirūpā, vobhindantā maññe caranti
 paññāgatena diṭṭhigatāni, te te pañhaṃ abhisankharitvā
 abhisankharitvā”ti¹—

ādinā niddiṭṭhapāḷim peyyālamukhena saṅkhipitvā dassento

“paññāpabhedakusalo pabhinnañāṇo -pa- te pañhaṃ abhisankharitvā
 abhisankharitvā”ti-ādimāha.

Tattha **pabhinnañāṇoti** atthādīsu pabhedagatañāṇo. “Pabhedañāṇo”tipi
 paṭhanti, soyeva attho. **Te pañhanti** te te attanā adhippetāṃ pañhaṃ.
Niddiṭṭhakāraṇāti vissajjitakāraṇā. **Upakkhittakā**ti bhagavato
 paññāveyyattiyena samīpe khittakā antevāsikā sampajjanti.

1. Khu 9. 375 piṭṭhe Paṭisambhidāmagge.

Bhavati abhibhavatīti bhūri, kim? Rāgādiṃ. Upasagge satipi tadeva padaṃ tamatthaṃ vadatīti upasaggena vināpi so attho viññeyyo anekatthattā dhātūnanti vuttaṃ “**abhibhuyyati**”ti. Kārakabyattayena cetam vuttaṃ, tasmā **rāgaṃ abhibhuyyati**ti sā sā maggapaññā attanā attanā vajjhaṃ rāgaṃ abhibhuyyati abhibhavati, maddatīti attho. Abhibhavatīti sā sā phalapaññā tam tam rāgaṃ bhavi abhibhavi maddīti **bhūripaṇṇā**. “Abhibhavitā”ti vā paṭho, “abhibhavitvā”tipi paṭhanti. Abhibhavitvāti ca kiriyāya siddhabhāvadassanaṃ. Paññā ce siddhā, rāgābhibhavo ca siddho evāti. Sesesupi eseva nayo.

Rāgādisu pana rajjanalakkhaṇo **rāgo**. Dussanalakkhaṇo **doso**. Muyhanalakkhaṇo **moho**. Kujjhanalakkhaṇo **kodho**, upanandhanalakkhaṇo **upanāho**. Pubbakālaṃ **kodho**, aparakālaṃ **upanāho**. Paraguṇamakkhanalakkhaṇo **makkho**, yugaggāhalakkhaṇo **palāso**. Parasampattikhīyanalakkhaṇā **issā**, attano sampattiniggūhanalakkhaṇaṃ **macchariyaṃ**. Attanā¹ katapāpappaṭicchādanalakkhaṇā **māyā**, attano avijjamānaguṇappakāsanalakkhaṇaṃ **sātheyyaṃ**. Cittassa uddhumātabhāvalakkhaṇo **thambho**, karaṇuttariyalakkhaṇo **sārambho**. Unnatilakkhaṇo **māno**, abbhunnatilakkhaṇo **atimāno**. Mattabhāvalakkhaṇo **mado**, pañcakāmaguṇesu cittavossaggalakkhaṇo **pamādo**. Bhavati abhibhavati arinti **bhūri** asarūpato parassa akārassa lopaṃ katvā. Tenāha “**arim maddanipaṇṇāti bhūripaṇṇā**”ti. Bhavati ettha thāvarajaṅgamanti **bhūri vuccati pathavī** yathā “bhūmī”ti bhūri viyāti **bhūripaṇṇā** vitthatavipulaṭṭhena sabbaṃ sahatāya ca. Tenāha “**tāyā**”ti-ādi. Tattha **pathavisamāyāti** vitthatavipulaṭṭheneva pathavisamāya. **Vitthatāyāti** pajānitabbe visaye vitthatāya, na ekadese vattamānāya. **Vipulāyāti** uḷarabhūtāya. **Samannāgatoti** puggalo. **Iti**-saddo kārānatthe, iminā kārāṇena puggalassa bhūripaṇṇāya samannāgatattā tassa paññā bhūripaṇṇā nāmāti attho. “Bhūripaṇṇassa paññā bhūripaṇṇāpaṇṇā”ti vattabbe ekassa paññāsaddassa lopaṃ katvā “bhūripaṇṇā”ti vuttaṃ.

Apicāti paññāpariyāyadassanattam vuttam. **Paññāyametanti** paññāya etam. **Adhivacananti** adhikam vacanam. **Bhūrīti** bhūte atthe khandhādike ramati saccasabhāvena, diṭṭhi viya na abhūtetī bhūri. **Medhāti** asani viya siluccaye kilese medhati himsatīti medhā, khippam gahaṇadhāraṇaṭṭhena vā medhā. **Pariṇāyikāti** yassuppajjati, tam sattam attahitappaṭipattiyam sampayuttadhamme ca yāthāvalakkhaṇappaṭivedhe pariṇetīti pariṇāyikā. Imeheva aññānipi paññāpariyāyavacanāni honti.

Paññābāhullanti paññā bahulā assāti paññābahulo, tassa bhāvo paññābāhullam. Tañca paññāya bāhullam pavatti evāti tamattham paññāgarukassa puggalassa vasena dassento “**idhekacco paññāgaruko hotī**”ti-ādimāha. Tattha **idhekaccoti** puthujjanakalyāṇako, ariyo vā. Paññā garu etassāti **paññāgaruko**. Paññāya carito pavattito **paññācarito**, paññāya caritam pavattam assāti vā **paññācarito**. Anulomikakhanti-ādivibhāgā paññā āsayo etassāti **paññāsayo**. Paññāya adhimutto tanninnoti **paññādhimutto**. Samussitaṭṭhena paññā dhajo etassāti **paññādhajo**. **Paññāketūti** tasseva vevacanam. Paññānimittam ādhipateyyam etassāti **paññādhipateyyo**. Paññāsaṅkhāto vicayo, dhammasabhāvavicinanam vā bahulam etassāti **vicayabahulo**. Nānappakārena dhammasabhāvavicinanam bahulam assāti **pavicayabahulo**. Okkhāyanam yāthāvato dhammānam upaṭṭhānam bahulam etassāti **okkhāyanabahulo**. Paññāya tassa tassa dhammassa sammāpekkhanā sampekkhā, sampekkhāya ayanam pavattanam sampekkhāyanam, sampekkhāyanam dhammo pakati assāti **sampekkhāyanadhammo**. Sampekkhāyanam vā yāthāvato dassanadhammo sabhāvo etassāti **sampekkhāyanadhammo**. Sabbam dhammajātam vibhūtam vibhāvitam katvā viharāṇasīloti **vibhūtavihārī**.

Taccaritoti-ādīsu **taṁ**-saddena paññā paccāmaṭṭhā, tasmā tattha “paññācarito”ti-ādinā attho veditabbo. Sā paññā caritā garukā bahulā assāti **taccarito taggaruko tabbahulo**. Tassam paññāyam ninno poṇo pabbhāro adhimuttoti **tanninno tappoṇo tappabbhāro tadadhimutto**. Sā paññā adhipati tadadhipati, tadadhipatito

āgato **tadādhipateyyo**. **Paññāgarukoti**-ādini “kāmaṃ sevantaṃyeva jānāti, ayaṃ puggalo nekkhammagaruko”ti-ādīsu¹ viya purimajātito pabhuti vuttāni. **Taccaritoti**-ādini imissā jātiyā vuttāni. Idāni vuttamevatthaṃ nidassanavasenapi dassetuṃ “**yathā**”ti-ādi vuttaṃ. **Evamevanti**-ādini dassitabbanigamanāṃ.

Sīghapaññāti attano visaye sīghappavattikā paññā, yā samāraddhā attano paññākkiccam adandhāyanti avitthāyanti khippameva sampāpeti. Tenāha “**sīghaṃ sīghaṃ sīlāni paripūreti**”ti-ādi. Tattha **sīghaṃ sīghanti** bahūnaṃ sīlādīnaṃ saṅghatthaṃ dvikkhattuṃ vuttaṃ. **Sīlānīti** cārittavārittavasena paññattāni pātimokkhasaṃvarasīlāni, ṭhapetvā vā indriyasaṃvaraṃ tassa visuṃ gahitattā itarāni tividhasīlāni.

Indriyasaṃvaranti cakkhādīnaṃ channaṃ indriyānaṃ rāgappaṭighappavesaṃ akatvā satikavāṭena nivāraṇaṃ thakanaṃ. **Bhojane mattaṇṇutanti** paccavekkhitaparibhogavasena bhojane pamāṇaṇṇubhāvaṃ.

Jāgariyānuyoganti divasassa tīsu koṭṭhāsesu rattiyaṃ paṭhamamajjhimakotṭhāsesu ca jāgarati na niddāyati, samaṇadhamameva karotīti jāgaro, jāgarassa bhāvo, kammaṃ vā jāgariyaṃ, jāgariyassa anuyogo jāgariyānuyogo, taṃ jāgariyānuyogaṃ. **Sīlakkhandhanti** sekkhaṃ vā asekkhaṃ vā sīlakkhandhaṃ. Evamitarepi khandhā veditabbā.

Paññākkhandhanti maggapaññā ca sekkhāsekkhānaṃ lokiyapaññā ca.

Vimuttikkhandhanti phalavimutti. **Vimuttiñāṇadassanakkhandhanti** paccavekkhaṇaṇāṇaṃ. Sīghapaññāniddeśasadisoyeva lahupaññāniddeśo, tathā hāsaṇāññāniddeśo. Javanapaññāniddeśo pana kalāpasammasananayena pavatto. Tikkhapaññāniddeśo vīriyassa ussukkāpanavasena, nibbedhikapaññāniddeśo sabbaloke anabhiratasāññāvasena pavatto. Tattha turitakiriya **sīghatā**. Adandhatā **lahutā**. Vegāyitattaṃ **khippatā**.

Hāsabahuloti pītibahulo. Sesapadāni tasseva vevacanāni. Atha vā **hāsabahuloti** mūlapadaṃ. **Vedabahuloti** tassā eva pītiyā sampayuttasomanassavedanāvasena niddesapadaṃ. **Tuṭṭhibahuloti** nātibalavapītiyā tuṭṭhākāravasena. **Pāmojjabahuloti** balavapītiyā pamuditabhāvasena. **Sīlāni paripūreti**ti haṭṭhappahaṭṭho

1. Khu 9. 118 piṭṭhe Paṭisambhidāmagge.

udaggūdaggo sampiyāyamāno sīlāni sampādeti. Pītisomanassasahagatā hi paññā abhirativasena ārammaṇe phullitā vikaṣitā viya pavattati, na evaṃ upekkhāsahagatāti.

Aniccato khippaṃ javatīti “khandhapañcakaṃ aniccan”ti vegāyitena pavattati, paṭipakkhadūrīhāvena pubbābhisañkhārassa sātisaṃyattā indena vissaṭṭhavaḥsiraṃ viya lakkhaṇaṃ avirajjhantī adandhāyanti aniccalakkhaṇaṃ vegasā paṭivijjhati, tasmā sā javanapaññā nāmāti attho. Sesapadesupī eseṇa nayo. Evaṃ lakkhaṇārammaṇikavipassanāvasena javanapaññāṃ dassetvā balavavipassanāvasena dassetuṃ “**rūpan**”ti-ādi vuttaṃ. Tattha **khayaṭṭhenāti** yattha yattha uppajjati, tattha tattheva bhijjanato khayasaṃbhāvattā.

Bhayaṭṭhenāti bhayānakabhāvato. **Asāraṭṭhenāti** attasāravirahato niccasārādivirahato ca. **Tulayitvāti** tulābhūtāya vipassanāpaññāya tuletivā. **Tīrayitvāti** tāya eva tīraṇabhūtāya tīretivā. **Vibhāvayitvāti** yāthāvato pakāsetvā pākaṇaṃ katvā. Atha vā **tulayitvāti** kalāpasammasanavasena tulayitvā. **Tīrayitvāti** udayabbayānupassanāvasena tīretivā. **Vibhāvayitvāti** bhaṅgānupassanādivasena pākaṇaṃ katvā. **Vibhūtaṃ katvāti** sañkhārupekkhānulomavasena phuṇaṃ katvā. **Rūpanirodheti** rūpakkhandaṃ nirodhabhūte nibbāne. **Khippaṃ javatīti** ninnapoṇapabbhāravasena javati pavattati. Idāni sikhāppattavipassanāvasena javanapaññāṃ dassetuṃ puna “**rūpan**”ti-ādi vuttaṃ.

Ñāṇassa tikkhabhāvo nāma savisesaṃ paṭipakkhasamucchinnaṇaṃ veditabboti “**khippaṃ kilese chindatīti tikkhapaññā**”ti vatvā te pana kilese vibhāgena dassento “**uppannaṃ kāmavitakkaṃ**”ti-ādimāha. Samathavipassanāhi vikkhambhanatadaṅgavasena pahīnampi ariyamaggena asaṃuhatattā uppattidhammataṃ anatītatāya asaṃuhatuppannanti vuccati, taṃ idha “**uppannaṃ**”ti adhippetāṃ. **Nādhivāsetīti** santānaṃ āropetvā na vāseti. **Pajahatīti** samucchēdavasena pajahati. **Vinodetīti** khipati. **Byantiṃ karotīti** vigatantaṃ karoti. **Anabhāvaṃ gametīti** anu abhāvaṃ gameti, vipassanākkamena ariyamaggaṃ patvā samucchēdavaseneva abhāvaṃ gamayatīti attho. Ettha ca kāmappaṭisaṃyutto vitakko **kāmavitakko**. “Ime

sattā marantū”ti paresaṃ maraṇappaṭisaṃyutto vitakko **byāpādavitakko**. “Ime sattā vihiṃsiyantū”ti paresaṃ vihiṃsāpaṭisaṃyutto vitakko **vihiṃsāvitakko**. **Pāpaketi** lāmake. **Akusale dhammeti** akosallasambhūte dhamme. Tikkhapañño nāma khippābhiñño hoti, paṭipadā cassa na calatīti āha “**ekamhi āsane cattāro ariyamaggā**”ti-ādi.

“Sabbe saṅkhārā aniccā dukkhā vipariṇāmadhammā saṅkhatā paṭiccasamuppannā khayadhammā vayadhammā virāgadhammā nirodhadhammā”ti yāthāvato dassanena saccappaṭivedho ijjhati, na aññathāti kāraṇamukhena nibbedhikapaññaṃ dassetuṃ “**sabbasaṅkhāresu ubbegabahulo hoti**”ti-ādi vuttaṃ. Tattha **ubbegabahuloti** “sabbe saṅkhārā aniccā”ti-ādinā¹ nayena sabbasaṅkhāresu abhiṇhappavattasaṃvego. **Uttāsabahuloti** ñāṇabhayaavasena sabbasaṅkhāresu bahuso utrastamānaso. Tena ādīnavānupassanamāha. **Ukkaṇṭhanabahuloti** saṅkhārato uddhaṃ visāṅkhārābhimukhatāya ukkaṇṭhanabahulo. Iminā nibbidānupassanamāha. **Aratibahuloti**-ādinā tassā eva aparāparūpapattim. **Bahimukhoti** sabbasaṅkhārato bahibhūtaṃ nibbānaṃ uddissa pavattañāṇamukho. Tathā pavattitavimokkhamukho. Nibbijjhanam paṭivijjhanam nibbedho, so etissā atthīti nibbedhikā, nibbijjhatīti vā nibbedhikā, sā eva pañña **nibbedhikapañña**. **Anibbiddhapubbanti** anamatagge saṃsāre antaṃ pāpetvā anividdhapubbaṃ. **Appadālita**pubbanti tasseeva atthavacanaṃ, antakaraṇeneva appadālitapubbanti attho. **Lobhakkhandhanti** lobharāsim, lobhakoṭṭhāsaṃ vā.

Kāyagatāsativaggavaṇṇanā niṭṭhitā.

20. Amatavaggavaṇṇanā

600-611. Natthi ettha mataṃ maraṇaṃ vināsoti **amataṃ**, nibbānanti āha “**maraṇavirahitaṃ nibbānaṃ paribhuñjantī**”ti. Amatassa vā nibbānassa

1. Khu 1. 53 piṭṭhe Dhammapade.

adhigamahetutāya amatasadisa-atappakasukhapatitatāya ca kāyagatāsati

“**amatan**”ti vuttā. **Paribhuñjantī**ti jhānasamāpajjanena vaḷañjanti.

Viraddhanti anadhigamena virajjhitaṃ. Tenāha “**virādhitaṃ nādhigatan**”ti.

Āradvanti sādhitam nipphāditam. Tañca paripuṇṇam nāma hotīti āha

“**āraddhanti paripuṇṇan**”ti. **Pamādimśūti** kālabyattayenedam vuttanti āha

“**pamajjantī**”ti.

Iti manorathapūraṇiyā aṅguttaranikāyaṭṭhakathāya

Ekakanipātavaṇṇanāya anuttānatthadīpanā samattā.

Paṭhamo bhāgo niṭṭhito.

Aṅguttaraṭīkāya paṭhamabhāge

Saṁvaṇṇitapadānaṁ anukkamaṇīkā

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Akakkasaṁ	180	Aṭṭhakkhuraṁ	170
Akathitapubbo	82	Aṭṭhānaṁ	211
Akalyako	76	Aṭṭhikaṁ	272
Akiñcanaṁ	196	Aṭṭhikalyāṇatā	187
Akusalapakkhikā	110	Aṭṭhittaco	68
Akusalabhāgiyā	110	Aḍḍhacūḷaṁ	99
Aggadvārena	160	Aṇuṁ	162
Aggipapaṭikaṁ	79	Aṇusahagate	131
Aggo	127	Ati-añchitum	167
Aṅgasamkhitte	160	Aticaritā	207
Aṅgārapakkaṁ	78	Atilīnatā	85
Aṅguttarāgamavaro	18	Atilūkkhabhāvaṁ	113
Aṅgulaggena	142	Atīritaṁ	125
Aṅguliya	178	Atucchajjhāno	107
Acintitampi	147	Atulitaṁ	125
Accantūpasamo	224	Attajjhāsayo	48
Accasarā	196	Atthāya	275
Accho	98	Atricchatā	112
Ajāto	72	Adantaṁ	90
Ajjatagge	142	Adiṭṭhaṁ	125
Ajjhattaṁ	266	Adiṭṭhajotaṇā	124
Ajjhattikaṁ	117	Adhigamo	102
Ajjhāsayaṁ	49	Adhipannassa	194
Ajjhesi	167	Adhimuccitvā	200
Ajjhopannā	102	Adhivahati	89
Aññātaṁ	125	Anatikkamanto	72

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Anatthapadasamhitā	181	Antaraghare	181
Anadhikaṁ	134	Antaravatthum	209
Ananucchavikaṁ	153	Apattāni	82
Ananuyogo	111	Apanetvā	19
Anapekkhino	193	Apāyo	97
Anabhāvaṁ	286	Apilāpeti	248
Anabhirati	77	Apeti	70
Anāvilo	98	Appakenapi	161
Aniccasaññaṁ	273	Appagabbho	154
Aniṭṭhaṅgato	243	Appaṭipuggalo	138, 219
Anivattakena	137	Appaṭibhāgo	219
Anucchavikaṁ	148	Appaṭisamo	219
Anujīvasi	147	Appamādo	111
Anutāpakarā	137	Abbokiṇṇaṁ	113
Anuttaraṁ	13	Abbhūṁ	208
Anudhāriyamāne	127	Abhinivesaṁ	130
Anuddhataṁ	262	Abhinīhāraṁ	49
Anupatanti	151	Abhinīhāro	220
Anupadhāretvā	198	Abhibhāyatanāṁ	266
Anupavajjaṁ	134	Abhisamayaṭṭho	33
Anubhosi	167	Abhisamayo	34
Anumatipucchā	125	Amataṁ	287
Anuvicinitvā	180	Ambilaggam	142
Anusari	147	Ayogo	116
Anussati	139	Ayyadhītā	152
Anūnaṁ	134	Arati	77
Anejo	168	Arahantaṁ	176
Anvāvajjana	75	Arittajjhāno	107
Antaṁ	80	Ariyavihāro	38
Antakena	194	Ariyasamghaṁ	16

Padānukkamo	Piṭṭhaṅko	Padānukkamo	Piṭṭhaṅko
[A]		[Ā]	
Arūpasaññī	267	Ānantariyakammāni	212
Alābūneva	82	Ānantariyāni	122
Alīnaṃ	262	Ānāmanā	77
Alīnacittaṃ	147	Ābhata	19
Avañjhaṃ	183	Ābhidosikaṃ	174
Avibhūtaṃ	125	Ābhogo	75
Asāmsaṭṭhā	153	Āyatacakkhunetto	68
Asattaṃ	176	Āyūhanasamaṅgitā	220
Asantuṭṭhitā	114	Āyūhanto	78
Asamasamo	219	Āraddhavīriyo	85
Asamugghātagatā	242	Ārambhatha	79
Asamo	219	Ārāmo	39
Asampajaññaṃ	115	Ārogyasālaṃ	184
Asammosena	30	Ālasyaṃ	77
Asammohena	30	Ālimpesi	208
Asātaṭṭhaciriyatā	111	Āvāhamaṅgalaṃ	187
Asītihaṭṭhā	153	Āvilo	98
Asubhanimittaṃ	83	Āvutā	103
Asekhabhāgiyaṃ	67	Āsabhiṃ	127
Assagandhinī	70	Āsayavasena	68
Assāsaṭṭhānaṃ	106	Āsīsetheva	145
Assutavā	101		
[Ā]		[I]	
Āgantukabhattaṃ	200	Īṅgitaṃ	167
Āgamo	102	Icchāgatā	112
Ācikkhi	184	Īṇaparibhogo	108
Āṇākhettaṃ	216	Itthākaro	152
Ātāpī	235	Itthijane	174
Ātāpo	235	Itthinimittaṃ	197
Ādānaṃ	130	Itthiyā	50, 70

Padānukkamo	Piṭṭhaṅko	Padānukkamo	Piṭṭhaṅko
[I - Ī]		[U]	
Idamaṭṭhitā	151	Upapattinimittam	221
Iddhipādam	244, 245	Upayogena	184
Iddhiyā	79	Upavijaññā	177
Iriyam	143	Upasaṃharitvā	104
Iriyati	107	Upahaññati	222
Iriyāpathavihāro	107	Upādānakkhandhā	239
Iriyāpatho	38	Upāyena	232
Īrayitabbato	250	Uppathamānasikāro	75
[U]		Ubbattetvā	198
Ukkaḍḍhanti	167	Ummujji	113
Ukkaṇṭhitasaññam	273	Ussannadosam	252
Ukkaṇṭhitā	77	[E]	
Ukkūlam	231	Ekamso	232
Uggaho	102	Ekabuddhadhāraṇī	217
Ucchuyantakammam	258	Ekarājā	69
Ucchūhi	229	[O]	
Uñchācārena	232	Okappento	256
Uttamannānam	232	Okkhāyanabahulo	284
Uttamo	218	Oṭṭhaṭṭhivaṇṇam	119
Udakadaho	98	Oṭṭhamāṃsasammakkhano	71
Udakarāhaddo	98	Odhisoparaṇā	85
Udeti	69	Onameyya	218
Uddhaccam	78	Onayhati	76
Uddhumātakam	271	Onāho	76
Upakappati	51	Olambakā	152
Upakkhittakā	282	Olīnavuttitā	111
Upagato	13	Olīyanā	76
Upacitam	221	Olokentopi	49
Upanāho	283		

Padānukkamo	Piṭṭhaṅko	Padānukkamo	Piṭṭhaṅko
[O]		[Ka]	
Ovutā	103	Kāyūpapanno	68
Osāritam	218	Kālakiriyā	137
Osāretvā	153	Kāsāvakaṇṭhā	119
Oḷārike	131	Kilāsubhāvo	105
[Ka]		Kiliṭṭhadhātukāni	161
Kakkhaḷattam	131	Kilesadhunano	150
Kaṅkhā	33	Kisathūlena	218
Katakāyo	159	Kukkuccam	78
Kadariyam	209	Kuñjaro	68
Kaddamībhūto	98	Kuṭam	79
Kampeyya	217	Kummāsam	174
Kammato	213	Kulagharam	182
Kammanto	153	Kulagharikā	164
Kammasamaṅgitā	220	Kerāṭikapakkham	255
Kammassakatā	84, 122	Kesavissajjanam	187
Karuṇāsītalahadayam	5	Kokanadam	161
Kalāpaggam	149	Koṭi	127
Kalyāṇamittatā	84	Koṭibhūtā	142
Kasiṇanimitte	50	Koṭṭhaggaṃ	149
Kāpotakāni	82	Kolāhalam	151
Kāpotikā	189	Kosajjam	111
Kāmacchando	73	[Kha]	
Kāmanandī	73	Khaṇḍo	222
Kāmapariḷāho	73	Khayūpasamo	224
Kāmamucchā	73	Khalaggaṃ	149
Kāmarāgo	73	Khalabhaṇḍaggaṃ	149
Kāmasneho	73	Khippatā	285
Kāyadalhībahulo	257	Khīṇāsavam	176
Kāyikam	85	Khīradhenum	257
		Khepetvā	50

Padānukkamo	Piṭṭhaṅko	Padānukkamo	Piṭṭhaṅko
[Ga]		[Ca]	
Gaṇhantassa	74	Catudosāpagataṃ	85
Gaṇhi	164	Candābhaṃ	145
Gatiyo	266	Caleyya	217
Gativimuttaṃ	9	Cārakato	198
Gadduhanamattampi	184	Cāriṃ	161
Gadhitā	102	Ciraṭṭhitatthaṃ	20
Ganthakammaṃ	81	Cūḷupaṭṭhākaraṃ	230
Gandhadāmaṃ	148	Cetanāsamaṅgitā	220
Gandhamaṇḍalamāḷe	105	Cetiyaṃ	200
Gamaṇākappaṃ	184	Cetovimutti	234
Gameti	71	Codenti	119
Gahapatānī	210	[Cha]	
Gāravayutto	36	Chattamaṅgalaṃ	187
Gāravena	159	Chavikalyāṇatā	187
Giddhā	102	Chasarīradosarahitā	187
Gītasaddo	68	Chādentam	218
Guṇasampatti	220	[Ja - Jha]	
Guttā	69	Janapadakalyāṇī	187
Guḷadadhim	167	Jambhanā	77
Guḷo	222	Jalapathakammikena	161
Gotamī	192	Jāgariyānuyogaṃ	285
Gotrabhuno	119	Jātikhettaṃ	216
[Gha]		Jātiśamsāraṃ	80
Ghaṭentasseva	82	Jīvakesadhātuyā	200
Ghanabahalaṃ	97	Jeṭṭhakaṃ	68
Ghamaṅgalaṃ	187	Jeṭṭho	218
Ghātetvā	203	Jhānaṅgehi	160
[Ca]		Jhāyī	168
Cakkhumā	69	Jhāyeyyuraṃ	144
Caṇḍikataṃ	180		

Padānukkamo Piṭṭhaṅko

[Ña - Tha]

Ñātattacariyā 126
Ñāpane 43
Thānantare 150

[Ta]

Tathameva 133
Tathāgato 134, 135
Tadaṅgappahānaṃ 82
Tandikato 218
Tandī 77
Tapacāraṃ 191
Tāṇāya 194
Tipallatthaṃ 170
Tumbo 99
Tejussadattā 211
Tejena 184

[Tha]

Thambho 283
Thāmagato 243
Thinaṃ 76
Theraṃ 79
Theravaṃsadīpānaṃ 19

[Da]

Daratho 251
Dassanānuttariyaṃ 139
Dāyajjaparibhogo 108
Dāsikagāmā 153
Diṭṭhadhammiko 98

Padānukkamo Piṭṭhaṅko

[Da]

Diṭṭhasaṃsandanā 124
Diṭṭhekaṭṭhe 131
Dibbavihāro 38
Dibbāni 165
Divasaṃ 69
Dīpakamigapakkhino 79
Dīparukkhānaṃ 155
Dīpavāsīnaṃ 19
Dukkhā 236
Dukkhūpanisā 79
Dukkheṇa 89
Duggati 97
Duggandho 70
Duṭṭhullaṃ 77
Duppesanato 89
Dullabhassavanaṃ 210
Dussantappayo 112
Desentassa 74

[Dha]

Dhanāyantā 263
Dhammaṃ 13
Dhammakathikapuṅgavā 18
Dhammakkhānaṃ 126
Dhammatṭhitiññaṃ 277
Dhammanetti 33
Dhammapīti 188
Dhammavicayo 250
Dhammadhiṭṭhānaṃ 67
Dhutaṅga-appiccho 113

Padānukkamo Piṭṭhaṅko

[Dha]

Dhutadhammā	21, 150
Dhuto	150
Dhurapattāni	148
Dhurabhaddam	200

[Na]

Nakkhattam	152
Nandim	130
Nameyya	218
Navutihattāni	148
Naḷāgāram	80
Nānattasaññāyo	129
Nikkamatha	79
Nikkasī	159
Nikkham	152
Nikkhattadhuraṭṭā	111
Nikkhattassa	47
Niggayhavādim	190
Niccasaññam	130
Nidānam	23
Nidhīnam	190
Nippatti	138
Nibbānaparāyaṇam	196
Nibbānapariyosānam	196
Nibbānogadham	196
Nibbidānupassanāya	130
Nibbindeyya	145
Nibbedhabhāgiyam	67
Nibbedhikapaññā	287
Nimantetvā	159

Padānukkamo Piṭṭhaṅko

[Na]

Nimujjanummujjanavasena	184
Nirābādhānam	184
Nirāmagandhā	169
Nirodhadhammam	277
Nirodhānupassanāya	130
Nivatthanivāsanassa	68
Nivutā	103
Nissaraṇappahānam	83
Nhārukalyāṇatā	187

[Pa]

Pakāsentassa	74
Pakkhikabhaddam	200
Paggharaṇam	131
Pacalāyikabhāvo	76
Paccaya-appiccho	113
Paccavekkhanto	106
Paccekabuddhā	103
Pañcakalyāṇasammannāgatā	187
Paññāgaruko	284
Paññācarito	284
Paññādhajo	284
Paññādhigateyyo	284
Paññādhimutto	284
Paññāpubbaṅgamāya	30
Paññāvuddhiyā	277
Paññāsaṅkalananicchayo	21
Paññāsayo	284
Paṭikkhepavatthūsu	151
Paṭighanimittam	76

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Paṭighasaññā	129	Paramattho	121
Paṭicchannā	103	Paramasantuṭṭhova	115
Paṭinissaggānupassanā	130	Paravambhanavasena	180
Paṭippassaddhippahānaṁ	83	Parāmatṭho	243
Paṭibalassa	79	Pariggaṇhāti	278
Paṭimā	138	Pariggahalakkhaṇā	131
Paṭiyādetvā	152	Paricchedo	211
Paṭisaṅkhānaṁ	84	Paritassitā	77
Paṭisamo	138	Paribhuñjanti	288
Paṭihārakassa	188	Pariyatti-appiccho	113
Paṭṭabandho	187	Pariyesanto	124
Paṇakaṁ	98	Parissāvetvā	163
Paṇamaṇā	77	Parihīnajjhānassa	74
Paṇiyaṁ	159	Parosahassaṁ	144
Patikiṭṭhaṁ	117	Palāyi	184
Pattadāmaṁ	148	Palālavaraṇakaṁ	79
Pathabyā	68	Palāso	283
Pathavippabhāso	69	Palibuddhā	103
Padavibhāgo	23	Palibodho	270
Padumuttaro	148	Pavattāraṁ	190
Padhānakammikā	82	Pavivekatā	151
Panūdanāya	85	Pāpamittatā	116
Pantesu	77	Pāpicchatā	112
Pabbajjā	220	Pābhatena	161
Pabbatagahanaṁ	69	Pāyāsassa	208
Pabhassaraṁ	99	Pāyāsirañño	182
Pamaṇena	218	Pāricariyā	139
Payogo	116	Pārijuññaṁ	175
Parajjhāsayo	48	Pārupanakaṇṇaṁ	152
Parapariyāpannā	193	Pāleti	107

Padānukkamo	Piṭṭhaṅko	Padānukkamo	Piṭṭhaṅko
[Pa]		[Ba]	
Piṇḍāpacitīm	81	Buddhabhāvaṃ	13
Piyānaṃ	179	Buddhicariyā	126
Pihitā	103	Bodhiyā	116
Piṇayati	250	Byantiṃ	286
Piḷanaṃ	34	Byādhiyakam	77
Puññaṃ	17	Byāpādo	76
Puññaniyāmena	152	Byāsattamanasaṃ	199
Puttapasusammattaṃ	199	Brahmavihārā	38
Puthujjanā	102	Brāhmaṇā	69
Pupphadāmaṃ	152	Brūhetvā	127
Pubbacariyā	126	[Bha]	
Pubbayogo	126	Bhaginīnaṃ	162
Puḷavakaṃ	272	Bhajeyya	190
Pekkha	208	Bhattakilamatho	77
Posenti	163	Bhattapariḷāho	77
[Pha]		Bhattabyāpatti	76
Phāṇitaṃ	222	Bhattamucchā	77
Phālenti	184	Bhattavaḍḍhitakaṃ	267
Phāsukakāle	184	Bhāginī	209
Phuṭo	275	Bhātā	160
Phussarathaṃ	152	Bhāvetvā	13
[Ba]		Bhikkhanadhammatā	44
Bandhavā	194	Bhikkhanasīlatā	44
Balaṃ	115	Bhiyyobhāvāya	72
Bahimukho	287	Bhuttāvissa	77
Bāhiraṃ	117	Bhutvāvigatuppannaṃ	240
Bāhullāya	74	Bhūtakāraṇā	121
Bujjhanakasattassa	116	Bhūtāpagatuppannaṃ	240
		Bhūmiyo	242

Padānukkamo	Piṭṭhaṅko	Padānukkamo	Piṭṭhaṅko
[Ma]		[Ma]	
Maṃsakalyāṇatā	187	Muttaharītakaṃ	115
Makkho	283	Mettā	84
Maṇivaṇṇe	82	Metti	176
Manāpānaṃ	179	Medhāviṃ	190
Manomayena	155	Moghapurisa	177
Mamāyati	263	Morakukkuṭikāya	70
Maranti	184	[Ya]	
Marū	128	Yakkhāvaṭṭo	200
Mahaṭṭhiyaṃ	109	Yathālābhasantoso	115
Mahapphalaṃ	109	Yantabaddhāni	153
Mahallakatarā	163	Yuganaddhā	243
Mahā-avijjaṃ	97	Yogakkhemāya	275
Mahājutikaṃ	109	Yogo	116
Mahābodhimaṇḍo	136	[Ra]	
Mahābhūti	81	Rajjateva	70
Mahāvipphāraṃ	109	Raṇā	162
Mahāsamayo	33	Ratanam	17
Mahāhatthī	68	Rattā	102
Mahicchata	112	Rahogato	177
Mahoghova	199	Rāgaṭṭhāniyaṃ	75
Mātucchaṃ	193	Rājakakudhabhaṇḍam	152
Māpako	169	Rāmaṇeyyakam	231
Māyā	283	Rittako	156
Mārasenamathanā	16	Ruppati	50
Mālādāmaṃ	148	Rūpagarukānaṃ	49
Migarūpāni	200	Rūpasaññā	129
Migo	68	Rūpūpapattiyā	50
Middham	76	Rodantiyā	69
Muṇḍapīṭhakaṃ	142		

Padānukkamo	Piṭṭhaṅko	Padānukkamo	Piṭṭhaṅko
[La]		[Va]	
Laggā	102	Vavassaggo	232
Laggitā	103	Vasino	19
Laddhamaggaṃ	82	Vasīkatā	166
Lahutā	285	Vācentassa	74
Lābhitāya	160	Vārabhikkhaṃ	193
Lābho	139	Vārijo	68
Liṅgasampatti	220	Vāsanābhāgiyaṃ	66
Līnaṃ	77	Vāhetvā	167
Luḷito	98	Vāḷamigaṭṭhāne	208
Lūkhehi	199	Vikireyya	218
Lokāmisena	153	Vikūlaṃ	231
Lokiyaṃ	67	Vikkantaṃ	147
Lobhakkhandhaṃ	287	Vikkami	128
Lomāni	161	Vikkhambhanappahānaṃ	82
Lohitakaṃ	272	Vikkhāyitakaṃ	272
[Va]		Vikkhittakaṃ	272
Vaṅgapatte	148	Vikkhittacittā	45
Vacanakiriyāya	233	Vigatadosaṃ	19
Vajjadassinaṃ	190	Vicayabahulo	284
Vaṭarukkhaṃ	208	Vicikicchā	78
Vaṭṭapaṭilābhāya	88	Vicchiddakaṃ	272
Vaṭṭe	222	Vijambhanā	77
Vaḍḍhitavaḍḍhanā	277	Viññāpaniṃ	180
Vaḍḍhitappamāṇāni	267	Vitthambhanaṃ	131
Vattamānuppannaṃ	240	Viddhamseyya	218
Vanasabhāgaṃ	162	Vidhameyya	218
Vandanāmayam	17	Vidhāvanikaṃ	163
Vayakalyāṇatā	187	Vinamaṇā	77
Vayadhammaṃ	277	Vinameyya	218

Padānukkamo	Piṭṭhaṅko	Padānukkamo	Piṭṭhaṅko
[Va]		[Sa]	
Vinipāto	97	Samgharāji	214
Vinibaddho	243	Samyogābhinivesaṃ	130
Vinīlakam	271	Sakkarā	222
Vinodeti	286	Sankhama	98
Vipākārahaṃ	221	Sanḡitā	19
Vipubbakam	272	Saccakārena	188
Vippaṭisāro	78	Saccakāro	151
Vippasanno	98	Saccavippaṭikūlena	75
Vibhūtavihārī	284	Sacchikatvā	13
Vimati	33	Sajjhāyantaṣṣa	74
Vimaticchedanā	125	Satasākho	153
Viraddham	288	Sativossaggaṃ	74
Virāgānupassanāya	130	Satisampajaññaṃ	251
Visaṅkharitvā	79	Sattādhīṭṭhānaṃ	67
Visakaṇṭako	222	Satthāradassanaṃ	220
Visikādaṣṣanaṃ	51	Saddahanto	255
Visiṭṭho	218	Saddhammā	227
Visuddhipavāraṇaṃ	82	Saddhādhure	247
Vissatṭhajjhānaṣṣa	74	Sanarāmaralokagaruṃ	7
Vissatthā	197	Santāpo	34
Vissāsiko	151	Sandacchāyaṃ	203
Vihassati	80	Sabbakilese	131
Vīriyaṃ	250	Sabhāgasabhāgānaṃ	178
Vusitaṃ	157	Samaṇakapabbajjaṃ	152
Vedagū	69	Samanupassanā	49
Vepullāya	72	Samannāhāro	75
Vossaggānuppadānaṃ	111	Samayappavādaḡe	33
[Sa]		Samayo	34
Samkilesabhāgiyaṃ	66	Samā	128
Samkilesikā	243	Samādhikammikassa	255

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Samādhigāḷho	160	Sārade	82
Samānapaṇṇaṃ	152	Sārappaṃ	115
Samijjhati	220	Sālā	208
Samucchedappahānaṃ	83	Sālisūkaraṃ	96
Samuddhari	147	Siṅgī	68
Samupādikā	218	Siddhatthakaṃ	199
Samodhānaṃ	132	Siḡhata	285
Samosaraṇaṃ	132	Sīlakathā	21
Sampajāno	235	Sīlāni	270
Sampatijāto	127	Sīsānulokiko	158
Samparāyo	98	Sīhanādikānaṃ	156
Samparikiṇṇaṃ	209	Sukkhavipassakā	118
Sampekkhāyanadhammo	284	Sukhā	236
Sambojjhaṅgo	249	Sugataṃ	9, 176
Sammasitvā	158	Sutavā	103
Sammādiṭṭhi	225	Sutavittako	188
Sammuti	121	Suttanikkhepo	48
Saraṇaṭṭhena	248	Sunakhavājiko	221
Salākagāhakā	175	Sunipuṇavinicchayā	20
Salākabhattaṃ	200	Supaṇihito	166
Sallekhata	151	Suppiyo	68
Sallekhitaṃ	106	Subhanimittaṃ	72
Savanaṃ	139	Suvaṇṇakaṭake	208
Sahapaṃsukīlita	149	Suvaṇṇapūjaṃ	160
Sākacchitvā	167	Suvihatantarāyo	17
Sāṭheyyaṃ	283	Sūpaṭṭhita	266
Sādhukāritā	44	Sūrabhāvaṃ	195
Sādhukīlitaṃ	152	Sūriyābhaṃ	145
Sāpateyyaṃ	248	Seṭṭho	218
Sāraṃ	132	Sevālaṃ	98

Padānukkamo	Piṭṭhaṅko	Padānukkamo	Piṭṭhaṅko
[Sa]		[Ha]	
Soṇitagandhinī	70	Harissavaṇṇo	69
Sodhetvā	270	Hāpetabbam	254
[Ha]		Hāretvā	72
Hatavikkhittakam	272	Hāsabahulo	285
Harati	107	Hitatthāya	124
Haritūpalittāya	163	Hitapharaṇam	106, 234
		Hīnādhikajanasevitam	44